

張一麐著

心太平室集

2015-10-24

序

嘗謂魯仲連齊東一野人耳其於秦非有桑梓之親也於秦王非有君臣之義也席戰國處士縱橫之議矢不帝秦舊史美之今夫仲連亦知秦莫予毒耳使齊欲帝者仲連且奈何其蹈海與否未可知也吾老友張子古之狷人也乙丙之際衆佞盈廷君方官樞要參密勿於當軸且有布衣昆季之好一旦決然去之死生禍福非所計吾以爲賢於仲連遠甚其後君里居遭國家多難諸將帥爭權奪利自相殘賊者十餘年東人猾夏一再內侵者七年於茲往者君於諸將亦既垂涕泣而道之矣今歲八月東人再闚君感於童子軍致身前敵有死綏者慨然要約諸海內老人樹立一幟以其餘年爲國家效命當道聞而尼之議雖不行君之志事蓋有迥異乎庸衆者又非乙丙之際嶮然不污者比也於時君之門人方刊行君全集屬序於余君之學海內所共知余感於君之生平犖犖大節乃僅以斯集爲不朽之業而使後之人得因斯集以窺君之生平則可欣也然不朽者豈僅斯集也歟中華民國二

十六年十月弟韓國鈞

光緒壬午秋先師仁和許恭慎公星叔諱庚身南海譚公叔裕諱宗浚奉命典試江南兩公崇尙經術壹甄拔樸學博文經明行修之人特以學詩爲二南命題追琢其章譽髦斯士於時蘇州袁部郎寶璜曹文愨福元金壇馮撫軍煦俱獲菁莪芄楫之選余亦濫躋其列而吳縣張君仲仁甫十六齡爲許譚二公所激賞榜發誤中副車蘇父老摺紳且喜且惜越三年乙酉君赴京兆秋試賦鹿鳴歸許公大悅掄揚無數於是君名滿京師而余始識君於春明團拜時厥後君敷歷中外舉經濟特科洊任弼德院參議嘗一佐項城袁大軍機世凱幕無何國步斯頻項城以總統枋國政赫赫厥聲其燄如執熱不可濯貪人敗類巧言如流謂有命旣集宜保茲天子項城惑之遂稱受命改元維時君方任機要局長曰殆矣不知其玷也是用大諫當謹爾侯度毋淪胥以亡詎意發笥逝梁誦言如醉迨夫顛沛之揭始悔正直不與而亂不沮方事之殷識者以君究彼謫逢彼怒且爲將恐將懼惴惴小心君坦然曰

吾固不畏疆禦也遂出公府長教育嗚呼抑詩有言其維愚人覆謂我僭又曰聽用我謀庶無大悔項城能用君而不能聽君之謀非所謂回遹其德未知臧否者耶泊項城卒君隱居里門偶因民生利害發憤一言輒不得當遂益韜晦守白圭戒考槃之碩人永矢弗告白駒之嘉客金玉爾音豈已焉哉匪舌是瘁惟躬是瘁也士君子際天之方蹶無回天之力而不能不與天爭痛民卒流亡無救民之權而不得不爲民救然而南箕翁舌北斗挹漿閭闔杼柚其空矣睠言顧之怒焉如擣謂之何哉數十年來師門殂逝而後若袁若曹若馮諸同年先後云亡而我兩人者亦曰旣耄矣顧瞻四方中心如噎履冰集木日邁月征惟小宛之詩可以處世而進德顧山有嘉卉谷有幽芳無罪無辜廢爲殘賊可無以拯之乎然則躬丁板蕩心攪民勞曷嘗忘惠此中國哉我相此邦無不潰止有心人讀變雅末篇不禁涕零如雨也歲次丁丑十一月爲君七秩攬揆之辰同人等哀集君所著心太平室詩文鈔及古紅梅閣筆記蓮幕集數種將壽諸梓徵序於余余曰善哉天保詩頌九如曰

如松柏之茂無不爾或承君歲寒松柏宜乎降福孔固俾壽而臧爰序簡端
方諸吉甫作誦山甫慰心庶無負先師學詩之訓乎風雨如晦雞鳴不已老
成舊止殷監在茲凡百君子讀君之文慕君之節必有仰高山而景行行止
者已年愚弟太倉唐文治謹序

張仲
仁先
生七
十
歲
遺
像

世姪 顧廷龍
謹題



力爭正義鞏固民主是乃貢獻
於國志索救賦消弭兵禍所以愛
護其鄉圖書一室羔鴈四方惟愛
才之若命雖朽株泛駕而六荷揄
揚茅庵風雪拊循流亡思馨歎於
永夕能無黯然而神傷

民備先生遺象 潘昌煦謹題



心太平室集目錄

卷一

國民參政會第一屆第四次大會開會答辭

國民參政會第二屆第二次大會開會答辭

國民參政會第一屆第四次大會提案

七七二周紀念感言

老子軍規則草案

密陳大計呈稿

致東海論外交

擬復軍機章京內閣中書尹

擬復江蘇藩司陳

答客問

五十年來國事叢談

卷二

辛亥革命之際月表序

廣平程氏譜略序

方氏世譜序

騰衝青齊李氏宗譜序

張氏族譜序

吳縣志序

吳縣社會調查統計序

黃埭志序

吳郡西山訪古記虎邱金石經眼錄鎮揚游記合刻序

約章成案匯覽序

蘇社第三期財政特刊導言

浙江制憲史序

荷屬華僑教育年鑑序

全國律師民刑訴訟全案彙編序

各國經濟思潮之變遷序

和平之回溯與國民自決序

經濟制度私有與公有之得失序

韓國遺民全醉堂精神哲學通論序

有竹居印譜序

養正詩歌序

太極拳圖解序

閩古古全集序

海鹽朱少虞年丈遺著序

袁瓊禹同年遺集序

天放樓文言序

繡餘草序

風雨雞鳴錄序

從政芻言序

雙廬詩鈔序

東廬詩鈔序

抗戰第三年序

蘇州文徵乙編序

浙西張氏合集序

謝氏家藏同光諸老尺牘序

漢字之新系統序例序

孔少霑師遺著跋

姚石荃皖中公牘跋

繭蕉盦詩詞稿跋

吳堯圃山水冊跋

湯濟武爲梁伯強尊人震三先生墓

碑文稿題詞

寶積傳衣圖題詞

潘習菴臨懷琳草書卷子題詞

卷三

上巳修禊記

誦芬堂雷氏興學記

杜氏家祠記

陽山十八人祠記

重建闕里分祠碑記

市北公學建築紀念碑

嚴裕棠先生蘇綸紡織廠碑記

捐建吳縣圖書館奚萼銘先生立像

紀念碑文

水上公安隊游擊隊長李公殉難碑

陸軍步兵中校馬君玉奎墓碑

褒揚節孝魚母陳太夫人碑記

許母郁太君暨孝女祔葬碑記

錢母孫太君墓表

故陸軍中將昆明繆君墓誌銘

清湖北兵備道曹君墓誌銘

馬捷三先生暨配合葬墓誌銘

常熟丁芝蓀先生墓誌銘

雷理卿先生墓誌銘

蔡桂初先生墓誌銘

許劍青君墓誌銘

劉正康君墓誌銘

長男爲宣墓誌

卷四

費君仲深家傳

清故候選同知沈君家傳

袁霓孫先生家傳

嚴春泉先生傳

吳節母傳

饒母章夫人傳

李母馮太夫人傳

龐母俞太夫人傳

李母闕太夫人傳

許母藍太夫人傳

儲亦樓筵室莫竹君女士傳

故代理大總統馮公事狀

族叔誠之府君事略

太夫人哀啓

紀念章太炎先生

汪荃臺年丈私謚孝惠先生議

雲南李公燦廷哀誄

祭湯明水文

王紫雲先生小象贊

商團團長鄒椿如君象贊

平江李蘭蓀隊長象贊

張福申君象贊

范厚甫君象贊

楊叔英君象贊

武進許稻蓀君象贊

木瀆徐甸孫先生象贊

美國柏樂文先生象贊

吳江黎里都金宗兄象贊

錢新之先生母曾太夫人象贊

韓止石省長元配王夫人象贊

劉寶甫先生元配蔡夫人象贊

卷五

汪荃臺世丈七十壽序

段公少滄壽序

江仲琴先生八十壽序

江陰錢以湘先生七十壽序

朱智仁先生七十壽序

灌雲杜香谷先生暨德配七十雙壽

序

陳子宣先生暨德配七秩雙壽序

兩湖巡閱使吳上將軍五十壽言

丹陽林玉堂世丈八十壽言

黃母陸太夫人八旬晉一壽序

饒母吳太夫人六秩壽序

賈母孫太夫人六十壽言

王母袁太夫人六十壽言

旌表貞孝毛母袁太恭人五秩壽序

擬淵明歸去來辭

有似黃金擲虛牝賦

漢家兵馬如日月賦

猶是春闈夢裏人賦

虬髯客入扶餘國賦

人貓賦

立夏三朝開蠶黨賦

牡丹爲花王賦

限警十算乃得爲吏賦

悶尋鸚鵡說無聊賦

平原君相士賦

射蝨貫心賦

卷六

蘇州之武士道

蘇州之農業

預防湖匪策敬告吳中士民

建築蘇鄧洞汽車路意見書

火災感言

蘇州市鄉公報十週紀念頌辭

吳縣各界聯歡社募捐啓

致楊建章爲教育局請官地書

致圖書館函

蘇臺雜綴

申報民國十二年之東南增刊

冰壺先生傳

擬文心雕龍神思篇

徐福論

譙周論

書史記刺客傳後 其一

書史記刺客傳後 其二

化兵爲農之預備

國語淺說

大戴禮保保其身體傳傳之德義師

導之教訓與近世各國學校體育德育智育同義論

漢武帝造白金爲幣分爲三品當錢多少各有定直其後白金漸賤錢制

亦屢更竟未通行宜用何術整齊之策

周禮農工商諸政各有專官論 桓寬言外國之物內流而利不外泄

則國用饒民用給今欲異物內流而利不外泄其道何由策

卷七

蓮幕集

卷八

古紅梅閣筆記

卷九

樂府

卷十

詩

補遺

附錄

詩

詞

先德集

生餘留草

張世榮

甲申小陽賈餉天雄途存

張是勳

右心太平室集吾世丈張仲仁先生所撰詩文稿也歲丙子丈七十及門謀刊行爲壽抗戰軍興而罷今夏吳江徐君子爲攜示遺稿一束委爲校理距丈之歿四年矣愴然覽讀全稿次第棼如若老子軍規則草案若倭寇淞滬雜詩昔所傳誦今皆未見稿經他人校閱間有自行復校之筆審爲當年議印清本而尙未編定者也爰將原錄古今體詩駢散語體文及筆記等略加蒐補益以公子輩所輯蜀中諸作依類相從勒爲十卷既付手民續獲文電若干篇關係史實爲補遺一卷彙錄時賢哀祭之文爲附錄一卷而以丈祖若父之詩存爲先德集二卷附麗並傳竟遺志也文學養深厚歷筦樞密志節高亢昭人耳目晚歲退隱鄉邑致澤桑梓東南物望一國所慕蓋不以文字傳而文字藉人以傳

也丈與先人奕世通好龍亦夙承獎飾憶丁丑春自燕假歸謁侍起居知龍爲集均之學訪丁泳之先生士涵校訂韻稿不可得詔曰余齋有吳氏兔牀騫校藏本後經丁氏及許氏勉夫克勤兩家加校堪資研習出以相假攜故都傳寫未及還甌而國難作南北音訊睽隔倉皇播遷未敢失墜越兩年來滬籌設合衆圖書館閱肆輒見丈題識之本偶收一二知藏書已爲敵逆所攘集均其子遺矣因卽度之館中以留紀念時丈僑寓香港郵邏綦嚴不克通尺素洎聞噩耗彌覺傷悼探遺稿之存亡或謂曾經刊行或謂燬於港變傳言不一固不知賴子爲護持以獲全是可幸也今子爲復借丈猶子服五商諸故舊醴金印行龍忝與校字之役聊盡後生之責歷時四閱月始觀厥成是集問世將使頑廉懦立以厲末俗子爲誠不負所託矣卅六年九月一日顧廷龍謹識

心太平室集卷一

吳縣 張一麀 仲仁

國民參政會第一屆第四次大會開會答辭

第四屆參政會召集適在美國廢止美日商約德俄訂互不侵犯條約英法德波宣戰三大變動時期議長前以保約與正義昭告友邦（七七告友邦書）得世界各民主國之同情使敵人日益孤立而又集思廣益徵詢本會同人意見同人等仰見議長堅苦焦勞敢不竭誠貢獻外交形勢瞬息千變與軍事機動相似運用之妙存乎一心上次歐洲大戰時間因吾國內戰不已參戰着着落後華府會議使亞洲大勢處處受日人箝制釀成此後視我國如附庸局面可爲前鑒自七七蘆溝橋事變以後始定抗戰到底國策雖淪陷區域受敵人慘無人道之蹂躪中華性命財產損失不可勝計幸天相吾國西南西北各省連歲豐年軍事由被動而進於主動此皆由議長苦心指導及前方忠勇將士之功同人等深爲全國人民表示敬禮但政府所望

於參政會者要在抗戰建國之根本大計凡爲此國策之阻礙者必消患於未萌以免百密一疏而效千慮一得約略計之蓋有數端自敵人以華制華之毒計使我自相殘殺乃有無恥小人公然作背叛黨國出賣民族之荒謬行爲誠可痛恨雖首要諸逆已受國法制裁而餘孽尙多漏網在政府罪擬惟輕對於脅從力求寬大然人民受其蠱惑則此種漢奸的和平奴隸的和平滅亡的和平易爲搖動卽如上海市黨部執委七人已裹脅而去其大半彼以敵人所扣存庚子賠款文化基金千六百萬利誘威脅意志薄弱之徒靡然從之其他各地類是似宜將已有附逆實據者查究主名宣示全國以明是非黑白庶綱紀肅然此其一精神集中力量集中除少數喪盡天良之漢奸外必須以漢賊不兩立爲惟一目標斷不容於同受三民主義洗禮中自相違反全國中擁護中央出錢出力厥功不小但默察各地黨政軍各級人員對於民衆運動往往有所歧視道路傳聞尙有假借取締與指導名義摧殘合法組織箝制正當言論拘捕熱血青年致爲親者所痛而爲仇者所

快若任其摩擦勇於私鬪必怯於公戰敵人與漢奸之所喜卽仁人志士之所憂應由政府申徹全國同人等所鯁鯁過慮者此其二中華民國主權在人民全體但全國人民不識字者尙居百分八十左右致使僅有七千萬人之敵國侵略我四萬萬五千萬人之文明大國其故安在人民常識如三民主義如新生活運動如全國精神總動員如兵役法種種此百分八十之文盲安得以言語使之家喻戶曉義務教育提倡數十年何以勞苦大眾不能入校何以貪污土劣利用文盲之不識字使常在黑暗地獄之中周時王畿二百里內有學三百七十有奇今英美法德各國識字人民百分之九十以外蘇俄土耳其昔日文盲之數與吾國相等今不及數年皆已掃除故能隆直上此與建國大計有絕大關係遠溯成周近鑒列強似應明定期限於兩年以內完成教育普及之工具使勞苦大眾不費時不費財不費力而皆有讀書閱報之機會國民智識如水平線然後下令如流水之行此其三同人等欣逢議長博采羣言未敢毛舉細故以列明問冀於人人所欲言而人

人所不敢言實關抗戰建國之大計者以爲芻蕘之獻其他歌功頌德之詞不敢以進謹此答問

國民參政會第二屆第二次大會開會答詞

本會成立於抗戰之次年自成立以來已歷三年又四閱月過去開過大會六次撫今憶昔溫故知新我們應該自行檢討與反省其一爲促進抗戰建國各項設施本會對於政府曾經議決建議案五百餘起今次大會同人對已往諸建議案應前後通觀綜合檢討證以政府實施情形詳審有無經政府認爲最有價值者有無被視爲不切實際者一一精密擇究鑑往衡來以爲此次再行建議之張本其二我輩既是人民的代表我輩自問是不是把人民的意見已經儘量傳達給政府了我們有無辜負了人民的期望其三同人自抗戰以來直接間接參加各項抗建工作有的是代表政府有的是代表人民雖則不無微勞究竟我們的工作是否切實有無錯誤是否不負人民及政府付託之重亦望同人各自檢討並相互檢討用以益堅自信之

心以爲今後益加努力之鼓舞

本會之設原在團結力量以救國歷時既經三年有餘同人在會內會外所言動表現者自問確能達到精誠團結舉國一致之崇高精神過去如是此後自當益更實踐使此團結精神愈臻於堅強穩實以此率導全國上下咸同風氣固民志以禦外侮此莫由今我國家已到存亡絕續關頭團結則存渙散則亡我等對於抗建大計有所見到只要不妨於抗戰如有不同的意見儘可率直向政府陳明政府亦自不得輕加猜疑蔽塞言路但如或不幸而竟有於言於行破壞團結影響抗戰自當以漢奸論過去如是今後亦如是必當盡力制裁以符抗戰建國之綱領

本會同人數年以來竭精殫慮以盡其對於政府施政之輔助自問所貢獻者雖或微末要皆出於忠誠謀國之赤忱政府對於同人所貢獻者大端均能切實籌劃以見於實施惟亦間有未見採行者有雖採行而未符原議者有雖採行而竟無效果者此等事實已屢見於歷屆駐會委員會之檢討報

告中究其未能採行及採行而未符原議或採行而竟無效果其所以然之故據政府報告所述未盡詳明同人亦多忽略過去未盡注意彼此均付諸不復重提之列既乖實事求是之方亦虛費當時之誠懇提案與討論因此近來頗有多言不如默爾之意態這是極不對的然同人過去對政府之態度始終一貫的爲和衷共濟政府有不副民意之處同人大都不避艱直進其諍議政府於同人如發見其言行有不妥當之處亦甚望政府虛衷涵容以收互勉交^與之益

本會之權限如現行參政會組織條例所規定同人每覺其對於民主政治有不足之感數年以來期望政府增加權限甚殷此固同人企望極度民治早速實現之盛心然試一環顧當前事實似亦確有未能一蹴而幾之機然同人即在現有權限之內如能善盡其思慮以充分行使此現有之權限俾無遺憾則於國於民將必有莫大之益循序漸進成章必達惟在同人自盡其責爲國民倡率奠定自治基礎使運用法治蔚成風習則會議應有之權

限將不待求之而政府自不得不與之吾人誠爲促進憲政而致力斯當深明確應致力之所在切望勿以權限不足而自阻而以努力不足自警總之參政會既爲達到真正民主政治的一個過渡機構應該循序漸進故尤望政府根據參政會數年來之經驗早日頒布憲法實行憲政以副國民之期望

茲當第二屆第二次大會開會之始謹爲卑無高論之言以譁於同人兼貢獻於政府非敢謂當尙祈教正

國民參政會第一屆第四次大會提案

- 一 請用大會名義通電全國聲討汪逆兆銘及附逆諸漢奸以示堅持
- #### 抗戰國策案

抗戰國策早經中央決定統帥宣示一曰全面抗戰二曰持久抗戰三曰爭取主動舉國軍民一致擁護猶憶蔡松坡將軍有言我國數年之後若與他邦以兵戎相見與其爲孤注一擲之舉不如採用波亞戰術據險以守節節

爲防以全軍而老敵師爲主俟其源入無繼乃一舉而殲滅之昔俄人之蹙拿破崙於境外使之一蹶不振可借鑑也足徵軍事家所見略同此次戰略可操勝算證以最近倭寇愈戰愈疲我軍愈戰愈強之事實益信勝利確有把握任何人不容置疑汪逆兆銘身居中樞密參大計本會第一次大會通過擁護中國國民黨臨時全國代表大會所通過之抗戰建國綱領案第二次大會通過擁護蔣委員長所宣示全面抗戰持久抗戰爭取主動之政府既定方針案汪逆均以議長資格躬與其事且屢有激昂沉痛之演詞國人方望其永矢忠貞翊贊統帥弼成抗戰建國之大業乃汪逆反覆性成好居人上陰蓄異志久懷貳心及抗戰甫入第二期敵人軍事無法進展欲以政治陰謀亡我有所謂近衛聲明經我蔣委員長立予嚴斥而汪逆適於是時出走妄發主和豔電正中敵閥以華制華之毒計中樞寬大爲懷僅予開除黨籍褫奪本兼各職尙未下令通緝本會同人亦僅辭關其荒謬主張於第三次大會通過竭誠擁護政府執行第二期抗戰國策之議案尙未對汪逆

正名定罪無非冀其悔過自新懸崖勒馬顧汪逆怙惡不悛愈演愈醜奴顏婢膝乞降虜廷在敵軍監護下奔走平青港滬求爲南北僞組織合流之首長而不可得則悄然思受粵敵卵翼竊號自娛近又在滬設立僞中央黨部召集僞代表大會且將詭託民意假造國憲甚至文姦言飾邪說厚誣吾最高統帥暨抗戰將士以惑衆竄改三民主義以媚敵曲解中山先生之大亞細亞主義以諂附近衛所謂東亞新秩序賣身賣黨賣國家賣民族賣中山先生於死後詩禮發冢椎埋爲姦躬助大盜之國並助其盜吾聖智仁義之法上辱吾黃帝以來列祖列宗先聖先賢暨中山先生在天之靈下淪吾億萬世中華民族子孫於奴隸牛馬之境地猶復盜憎主人惡直醜正嗾使暴徒狙擊善類罪浮於秦檜劉豫張邦昌李克用實爲亘古未有之神姦巨慝逆賊元兇其餘附逆諸漢奸投機取巧趨羶逐臭皆神人所共憤天地所不容亂臣賊子人人得誅政府已下令通緝國人當一致聲討本會代表全國國民於義更難緘默同人雖有箇別或集團發電聲討者而全體尙無表示

應請本會於四次大會開會之始用大會名義通電全國聲討汪逆及附逆諸漢奸以示堅持抗戰之國策確具勝利之信心庶幾邪說可息士氣可振抗戰必勝建國必成

二 充實下級行政機構以養廉恥而挽風俗案

自八一三後江浙贛鄂等省淪陷無不有漢奸爲虎作倭固由民衆組織素不經心抑亦鄉鎮保甲各長有名無實成事不足而僨事有餘也顧亭林言大官多者其世亂小官多者其世治（其所謂小官包括今之自治職而言）於漢時鄉亭之職三致意焉今各省鄉鎮保甲與民衆直接者皆純粹無給職政府有令省行諸縣縣行諸鄉鎮鄉鎮行諸保甲而所謂鄉鎮長保甲長者既無俸給仰不足以事父母俯不足以畜妻子賢者退避不遑承其乏者非強迫掛名卽別有用意可爲不正當之利得也徵兵則殷戶可以賄免而應募者大半流氓納稅則正供可以欠交而漏規必且倍取教養衛三者乃無一事之可言（廣西山西兩省是例外）夫衣食足而知榮辱巧婦不能

爲無米之炊孟子言庶人在官皆有代耕之祿唐宋以前有官田役田（顧氏炎武日知錄詳之）自元入主中國乃一切收爲國有彼視漢人與色目人本不平等致下級行政機構日就卑污今欲提高縣長職權而不先從其下級行政充實之無怪外人嘲吾國政治爲倒置之寶塔式也然則求治之道必先自下層基礎始矣親民之官莫如縣令除縣長本有俸給公費外其餘鄉鎮長如江蘇之吳縣月僅公費四元待造虛僞之表冊如雪片而來以購紙筆尙不足保甲長更可知矣問其無給之故則每縣鄉鎮以百計保甲以千計欲舉全國之鄉鎮保甲俱制代耕之祿以當此軍事時代增加龐大預算殆不可能顧欲爲建國永久計使人民運用四權有民選縣長之一日則此項充實基本其可緩乎上屆會畢道出桐梓見模範縣長孔福民以此事相質該縣長正在更選鄉鎮長先清理各地閒田以充費用今若師唐宋官田役田之制凡各屬有無糧黑地或充公田畝或財團法團之自願獻入公家者仿各善堂樂捐之例凡鄉鎮保甲長在職時分收官田若干畝更選

則移交後任大率鄉鎮以數百畝計保甲以數十畝計民知此舉可以永免科派也可得好人爲之長也人情莫不愛其鄉必有本鄉正紳樂捐以成事實爲之長者既有官田役田以養其廉人民見賢能之在位在職前之魚肉鄉里者不復能爲患而足以相戒風俗乃日趨於向上日遷善而自知乃嗚呼如爲太平之民以達民有民治民享之目的應由行政院內政部行知各省將每縣下級行政統計總數徵求各省參議會意見依次施行

七七二週紀念感言

自七七盧溝橋之役我政府始決心抗戰爲爭存國家民族之唯一方法我四萬萬五千萬民衆凡我武裝不設備城市供其慘無人道之蹂躪促成全國精神總動員我將士以血肉之軀前仆後繼弘演納肝而猶能殺賊宗澤臨沒而猶呼渡河岳少保報國精忠文信國成仁取義魯仲連所謂將軍有死之心士卒無生之氣孫子所謂置諸死地而後生置諸死地而後存故能於兩年之中愈戰愈強殲日過半已達持久戰消耗戰之目的使公理人道

昭著於世界中也

所謂消耗戰者不獨消耗其對我之戰鬪力並消耗其對於歐美凡民主國之戰鬪力彼所謂東亞新秩序乃以征服中國之餘力征服世界今中國以長期抵抗消耗其主力安有餘力以征其他之各國故所謂我之抗戰並消耗其對於其他民主國之戰鬪力非過詞也觀其封鎖天津之英法租界封鎖廈門之鼓浪嶼封鎖定海溫州各口岸嗾使僞滿挑釁外蒙古皆其東亞新秩序之一斑擴而大之如法屬越南英屬印度香港新嘉坡美屬菲律賓濱凡在東亞範圍以內無非俎上之肉網中之魚明乎此則此次抗戰之意義何其重大我雖不求人助而人之視我者得無有行將及我之憂耶得道者多助失道者寡助此古今中外之通義也

自八一三後兩週年雖然粉碎侵略者速戰速決之迷夢而大都市如上海南京杭州南昌廣州武漢等處先後陷落無怪近視眼以爲最後勝利何以必屬於我答之曰最後勝利之誰屬取決於淪陷區域之民衆心理如民衆

心理爲奸掠焚炸的日人所取得則不屬於我如民衆心理仍爲我軍民合作所取得則不屬彼而必歸於我今彼所佔領者爲地圖之點（都市之一部）與線（鐵道）而面與積則皆爲我游擊區我正規軍及游擊隊卽以民衆爲偵探爲聯絡線爲破壞彼交通工具之助手以主待客以逸待勞以有道禦無道故曰後方重於前方民衆重於士兵始也消耗日人之戰鬪力繼也取得各文明國之同情終且取得侵略國民衆之同情而最後勝利必屬於我決然無可疑者

建國之道在乎民衆其進化則以識字者百分之若干爲比例文明各國之新聞紙每家以日銷二百萬或數十萬爲率我則如何政府出一令立一法以直接能使全國辟遠人民一目了然爲掃除中間阻隔欺朦之主要我則如何文明各國識字者百分之九十以上我則如何士兵以受普通教育有常識能讀軍中小冊爲限度而我之招募到營之士兵則如何兵役法推行矣省責諸縣縣責諸鄉鎮鄉鎮之組織如何人民能讀法者幾何故普及義

務教育乃抗戰建國中基礎之基礎根本之根本我政府其何以解決此莫大問題

夫義務教育之聲浪高唱二三十年何以識字人民仍在百分之二十以下彼蘇俄土耳其人民昔者教育程度亦在百分二十以下何以一躍而爲百分之九十以上豈不以推行文字之工具猶未善耶

政府下令凡軍中士兵不識字者須令受教育矣而若干年可掃除軍中文盲未有術也貪官污吏明令嚴懲矣而老百姓何以任貪污之剝削則以徵收租稅之文告單據文盲不能閱看也法令條文至纖至悉智識階級不能甚解何論文盲老百姓之犯法而不知者不謂之冤不得也諸如此類悉數難終若欲其通曉今日之三民主義課本雖極簡易白話亦非十年八年不能今若有一種工具可以一年半年之間使文盲有閱報看書之效用則建國基礎中之基礎根本中之根本得之矣天下無難事只怕無心人閱者欲知其詳乎請待國民精神總動員設計會之設計

老子軍規則草案

一宗旨 青年有同志軍則老人應有老子軍緣少者壯者前程遠大爲日方長若多犧牲未免可惜至老者忝在父兄理宜奉率以年齒論如商賈早有贏利折閱本在意中視死如歸是其天職故取吳中范希文小范老子之意創爲本軍草案

二組織 本軍各省市同志皆可自由加入惟性別暫以男子爲限（以老婦多裹足者）

三目的 本軍以敢死爲目的凡青年不必犧牲者則本軍當代之但老者于跑步跳高使用槍械等均難及格故一概免其訓練

四軍制 滿六十歲以上者爲合格未滿六十而在五十五歲至五十九歲爲預備軍五十歲至五十四歲爲續備軍

甲 設軍統一人推年齒最高之九八老人馬相伯先生爲之

乙 設軍需長一人推雲南古稀老人李恆昇慨捐百萬元者爲之

丙 設軍法長一人推全國法律名家爲之

丁 設參謀長一人以全國信仰之有軍事學識者爲之

戊 其他軍職俟後續訂但不適用於老子軍者力避之

五職務

甲 燃點雷電之發動機關與敵人拚命而不得生還者

乙 破壞敵人之重工業軍械須與之俱斃而不得生還者

丙 凡一切不用膂力而決死者

丁 抗議本國後方軍人之欺壓民衆者（以軍令所未許可爲限）

戊 裁制土豪劣紳之魚肉平民者

六下列各項不得爲本軍人員

甲 曾染鴉片癮而未曾戒絕者

乙 有痿痹瘖聾等殘疾者（但有特長者不限）

丙 臨決死之時而退縮不前者（惟軍統不親前敵以示尊崇）

丁 一二八後與敵人有妥協實據者

七下列各項不合本軍資格

甲 上有老親者

乙 依戀於身家妻子者

丙 現役軍人而未退休者

丁 現爲官吏或法令規定之公務員有專職者

八獎勵 老人祇受名譽獎勵（如公議立謚立碑紀念等）凡實踐第五

條之每項職務而衆目昭彰者適用之

九懲罰 本軍懲罰由軍統付指定臨時委員會行之

甲 除名

乙 罰款（量力充地方公益之用）凡違背宗旨或有第六條甲丙兩

項先未查明者適用之凡假借本軍名義而圖一己之利益者亦同

十擬徵發起人五至九名由發起人就近召募同志合格者

十一本規則由軍統核定通告同志施行並呈請軍事委員會備案

蔣委員長來電

吳縣張仲仁先生鑒報載台端建議創設老子軍壯氣磅礴足以振厲國人至增欽慰惟抗戰之際所望於各地父老者厥在督率後進慎固守禦提挈民衆協助軍事國家縱極艱危不應責耆老以效死於前縵况軍事組織貴在嚴整軍事名稱未可輕用務請中止此議別謀所以靖獻之道自登高之呼懦夫志立國家固已受賜不淺矣區區之意務祈諒察蔣中正

覆電

南京蔣委員長崇鑒伏讀銑電具仰公矜余老朽整肅軍權之至意敢不敬遵某犬馬之年行將就木溯自前清甲午庚子以至最近東四省之役凡今七八十之老人即當時二三十之健者乃虛糜歲月坐視艱危看壯士之犧牲聽敵人之宰割種種罪惡皆在臨財苟得臨難苟免處己於安

而遣人以危亡國爲奴恬不知恥是以忽生奇想以了殘生耶教有救世軍之名稱學界有童子軍之組織妄相比附冀效馳驅昔越勾踐使罪人三行屬劍自剄以致吳師駭怪大敗闔廬他若魏侯羸之於信陵君燕田光之於太子丹皆垂暮捐軀以報知己某雖不武竊慕此風將以愧愛錢惜死之徒知取義成仁之美而已公明察秋毫示之軌範自應別謀靖獻協助守禦以固後方湘鄉曾氏云勇士赴敵視死如歸斯則常勝之理萬方不變我之科學既不如人惟有以肉彈相搏如牆而進天而不亡中國乎各方父老願扶杖以觀公德化之成也臨電感悚味死以聞張一麐叩

密陳大計呈稿

民國五年國民總代表勸進書呈之日

呈爲密陳大計以定人心事一鑒嘗讀虞書舜之戒禹曰予違汝弼汝無面從退有後言又讀孟子之言曰不以舜之所以事堯事君賊其君者也故隨從大總統十餘年不敢蹈面從後言之譏以自免於賊君之大戾此心耿耿

誓以勿欺苟利於國死生以之直道事人不黜而陟每欲得一當以報知遇之隆蓋一磨之於大總統非夫尋常利祿之徒所可比擬是以率其愚黷不爲苟同當籌安會之初發生也一磨未明大總統之作用謬附于古人審審匪躬之義輒欲以一身冒萬死之衝而置我國家與我大總統于安全之地繼而思之爽然自失何也當日本提出第五號覺書京師震動賴我大總統神機默運得以懸案了之嗣奉密諭以兼弱攻昧取亂侮亡申儆國民無忘五月七日之恥益歎大總統之操心慮患每飯不忘也然當歐戰未停均勢之局已破英俄法既自顧不暇美更不足與謀假如日本以一紙哀的美敦書逼我簽第五號之懸案不應則無以相抗應之則立底於亡絕續之機間不容髮故大總統用兵法攻心之策僞爲共和將改帝制也者以引起日本人無窮之大欲使彼覺第五號之不值重提借內政以延宕外交不卽不離若迎若距遷延歲月以待歐戰構和之後均勢之局復完彼日本方移其目光於列國大會議場而我乃得發表真相然此等苦心焦慮大總統斷不使

一人知之非一屢隨從十餘年互證參觀亦安得而測其萬一乎假如日本重提第五號而臨之以兵則北京人民遷徙者必什之三四中交兩銀行紙幣必致不能行用於市場安有如今日之比戶晏然金融尙活乎一屢微窺大總統之顏色當五六月間食量過少豐腴不改于前今則胃納復元而堯癯瘠殆甚於昔蓋深知大總統有臥薪嘗膽不可告人之志故焦勞如此之甚也寧犧牲一時之名譽而所全者四萬萬之生靈兩害取輕枉尋直尺此等仁術真足動天地而泣鬼神矣不然謳歌訟獄天與人歸需以數年如果成熟雖有智慧不如乘時宋人掘苗視之則槁曾是大總統之明而爲之乎拿破侖加冕必須混一全歐元太祖稱雄必先揚威異域今則區宇初定強敵在前東學黨之訐大總統親見之自強傳之劇大總統親觀之朝以動則夕有責言夕以動則朝有險象曾是大總統之智而爲之乎孔子稱文王曰周之德其可謂至德焉已矣孟子曰以德服人者中心悅而誠服也如七十子之服孔子也否則稱帝王者萬世之業而秦不再傳頌功德者四十萬

人而漢能復活曾是大總統之聖而爲之乎當大總統視師蕭家港時一塵曾馳電勸進是時天下大亂民無所歸今則一統已成國書已定昔晉文攘楚尙有伐原示信之文魯莊侵齊猶作治獄尙忠之語彼霸者且然何況帝業初基不慎後嗣何觀曾是大總統之義而爲之乎自古易姓之際必有流血之禍故武庚逞頑於股邑伯夷槁餓於首陽辛亥之役和平解決前朝耆宿抱器來歸自帝制問題人多誤會潔身之士入山必深下焉者走越走胡爲叢驅雀若竟拔幟易幟則必載舟覆舟屈原哀郢而沈淵伍胥痛吳而伏劍曾是大總統之仁而爲之乎一塵有以知其必不然矣伏讀二十一日申令堅持讓德薄海同欽杜甫詩曰將軍欲以巧勝人盤馬彎弓故不發此之謂矣顧京外秩序雖尙無虞而海內人心終多惶惑似應特降申令謂國體業經解決此事重大非可操切以圖自今以後務令官修其職士勤其學工商各安爾業農夫各畋爾田勿事虛文勿荒本職如此則廟算如神之運用待全球恢復之時機大總統救民救國之苦心終有昭然共見之一日一塵

誼同休戚所以報大總統者即欲保留一部分之人心兩月以來招隱之詩傷時之語聞之熟矣每以大政治家必無失敗之說安其意而糜其身又不能明言其所以然也所以密陳大計緣由謹披瀝上陳謹呈

此呈上後次日見報已成大錯思之傷心

自記

致東海論外交

大總統尊鑒昔四年十月一日一慶詣邸問疾蒙詢人皆謂汝書歎近日仍說歎話否一慶謂楊左丞抑使勿言故暫守沈默大總統曰余所聞知己比項城爲多汝較余尤多汝不言更無人言一慶唯唯次日即大發歎與項城爭持至一時有半翌日即下教育部之命自帝制取消左丞乃曰人謂汝書歎乃汝之語無不應者一慶大言曰小事或不省大事則無有錯誤錢右丞在旁尙聞之也一慶數年來之感觸俱見評徐佛蘇西南自治與和平一書中已承垂覽大總統必啞然曰書歎狂態猶昔也自和平中止不復有所論列但以十餘年出沒於政潮且四方士夫之書翰往還時接於耳目負暄知

暖不能不效獻曝之誠者敢爲大總統陳之自清光宣以後內政騷動未有不由外交者最近則督軍團之興黃陂之退皆以參戰案爲媒介今則保留案與直接交涉兩派又激戰國中二者之是非姑不言試言其利害滬友書來謂近日上海空氣已視內和爲不急之務南方要人皆持外交解決方及統一之議其意謂中央如直接交涉則南方不值與中央共負此責俟全國鼎沸而南方坐獲輿論之利人民視綫必舍北而助南果爾則長江一帶折入西南或竟成三角之勢近年二億八千萬之債負將獨以北數省當之西南可不認此種計畫至確至狠又一友人來書謂英法均已接受美參院保留案之意見美國會於三月三日閉會閉會前必通過保留案共和民主兩黨已協議大定贊成者兩黨共六十餘人反對者約僅十人美既通過英法既接受矣則國際聯盟美必加入英法既與美一致吾國已得一半之勝利故三月四日以前正日人情愈萬分之時今日之大患南北不和尙是表面之毒人民與政府不和乃是心腹之毒云云來書均責一塵以危急情狀轉

達鈞聽若墜不上聞非大總統所望於一塵者語曰兩害相權取其輕願鈞座勿信一方面之詞而適爲忌我者所喜縷縷之愚不能默爾謹撮舉以陳虔叩崇祺

擬復軍機章京內閣中書尹

克昌

兩奉手畢並籌款芻議精思偉論超絕時流凡百政事皆從理財入手以今日時勢之艱需用之亟誠非有數百兆金難以挹注日本全國僅抵我四川一省之大歲入乃有二億八千七百餘萬圓之多聞變法之初議加租稅民亦譁然懲創數人旋亦安靖亦得失之林也大著核算鈎稽至爲明確往見南海何沃生所著書論及田稅鹽課土藥應收之數略與高見相同苟實力清釐剔除中飽必有巨款爲措辦新政之資某日前召對闕廷粗陳梗概並將來摺轉交政府諸公矣嘗謂理財者非籌款之難而籌所以取之之爲難卽如田稅一宗赫德所言並非目論但履畝清丈未收實效先騰謗書日本改正租稅問題亦十餘年而始定苟非明國民一體之由設地方會議之制

任公正廉明之紳士而去蠹役奸胥用測量圖繪之學生以代丈書弓手則雖張江陵之權力勢亦不行鴉片專賣台灣已有成規然使巡邏不徧設則稽察無人官制不改良則賄賂不絕雖有官煙之目曷勝偷漏之多至鹽稅一層莫善於就場征稅然馮林一駁李雯之議張季直又駁馮氏之議聚訟紛紛莫衷一是彼英屬印度鹽課折合華銀約歲五千萬圓是又何說以處之印花之稅尤便民生某往者初發難端便生衆議任事之難卽此可見總之民智不開雖善政無從措手而所以導政治思想者學校之外以宣講爲始以自治爲終憲法雖未能驟定而地方選舉之制不可不行西人恆言不出代議士不納租稅欲取民而不與民以代議之權無以撤官民隔閡之病根而杜悠悠之口近如粵漢鐵路之爭還國民捐之踴躍大夢已醒因而導之似易爲力若普興宣講之事漸定自治之章設銀行以資貨幣之流通設警察以消天下之奸宄卅幅一轂方軌並馳貧弱之原庶幾可藥津鎮鐵路事亦俟與政府商之日來樽俎周旋薪勞未已先此布復

擬復江蘇藩司陳啓泰

昨荷華翰備承瑑飾迴環維誦感愧交縈世變迭更時艱無補是庸夙夜憂憤屢抱采薪聖明不遺俾膺艱鉅詎幹材所克荷亦孱體所難支拜疏堅辭未蒙俞允方惴惴焉隕越是懼乃辱執事謬相引重益滋汗顏來書歷言政府之責任輿論之機關抉根本教育之圖陳地方分權之議援據閎博規畫精詳敬佩敬佩江蘇號財賦之區而民力凋敝乾隆時孫文定南遊記已言之加以近年賠款屢加甲於他省公私竭蹶自在意中惟物產豐隆交通便利若振興實業當有可觀頗聞地方公款不免爲舊日紳董所把持而省垣師範高等各學堂仍以科名較著之人主持其事並非究心教育著有經驗之員鄙人前在畿輔時經辦學務者必慎選熱心此道或出洋考察而歸其科第諸君另有位置不相混淆其書院賓興棚規考費概充學堂之用不令舊董把持是以數年來粗著成效亦未起有風潮至自治事宜現已飭擬通行章程期以三年普設近且明奉諭旨各省自當切實推行官吏既有監督

之權選舉又有制裁之法則少年浮薄者似不能濫用其權執事學識淹通老成持重一切新政必能斟酌得宜無俟觀縷五舍弟未諳兵事渥承提挈尙祈隨時指教勿過搗謙爲幸

答客問

全國省議會聯席會議之說僕於答某報訪員之問及致友人書中披露之友人有病其說之未盡者僕故畢其詞如左

僕少讀宋徑魯連之書渴望和平是其天性朱君桂辛南下嘗先後至滬爲之奔走迨朱君撤回和平中斷幸也王君一堂慨然自任奮袂南行卒以未得西南輿論之同情而和平又中阻矣僕因設想再隔數月或半年仍不統一則其象如何得甲乙兩種之揣想如下

甲國際聯盟成立決不容遠東有如此紛亂之龐然大國若我國無統一之自力則由聯盟國處分之

乙巴黎會議以五大強國爲主則國際聯盟亦不能出此範圍苟欲處分此

東方之龐然大國則必委任東方強國之一處分之

公等試閉目存想此時景象爲何如耶與其待人處分曷若自處分然自處分者將爲國會乎而一國兩會吾誰適從將爲政府乎而代表會議之效已如彼局部議和之效又如此嗟我國民其何能待約法不云乎中華民國之主權屬諸人民全體吾求諸國中足以代表人民之固有團體而尙無南議會北議會新議會舊議會等不統一的名詞者厥惟省議會吾求諸足以代表人民之國會而不統一如此不得不降而求諸代表地方人民之省議會此省議會之團體自個別言之則代表一省人民之意耳若集合之於一處其與美德之聯邦參議院又何異吾於是不得不望省議會之聯合

此聯合之省議會無所謂北代表也南代表也北總代表也南總代表也簡括言之則中華全國人民之代表總結合也如是則不待開議而國民自己統一矣政府既求統一必贊成是國會既愛和平必贊成是其有不贊成者必其不愛和平不求統一之人僕不忍言也

僕告新國會友人曰僕之爲此爲一堂下場非爲一堂拆場也君試思一堂孤懸于上海者幾何月矣行僕之策則一堂靜候省會聯合之選舉可也揚長而歸可也要之視桂辛之撤回體面固有加矣

僕告舊國會友人曰僕之爲此亦爲國會下場非爲國會拆場也君試思議憲何時制定即定矣中央政府其能遵辦之乎即西南政務會總裁其人人項禮而誓守之乎若其未能不如少安毋躁以待地方人民代表之解圍也僕蘇人也蘇省議會同人用僕之言徵集各省會之同意省議員之良心與僕之良心同也各省會議員之良心吾知其亦與僕同也乃有一種非牛非馬之某某研究會以此等良心作用詈爲一般無聊政客乘隙投機嗚呼公等自爲夏蚋秋蠅則已耳而以之玷辱此良心作用之省議會僕不忍聞之也公等欲包辦議和而又欲人人自匿其良心以候裁判公等休矣僕不忍聞之也

僕今忠告于公等之前曰省會聯合自聯合公等議和自議和不相妨也乘

聯合會之未開而南北代表已相見於議場或局部議和已揭開其暗幕吾知省議會聯合諸君必額手相慶頌公等之神而佩公等之敏必不爲申申之冒而求爲居間之漁翁也公等休矣烏用此吠影吠聲爲也

僕有黨乎以中華民國爲黨僕有私乎以民國存在卽自身存在爲私僕嘗參預北洋之大政而不願以北洋二字爲標幟以爲是示人不廣而多樹敵也故僕又爲北洋中之非北洋派北洋之領袖爲項城以項城之聲威僕直言批鱗死且不懼其下項城一等者僕又何畏僕于徐于馮于段皆故舊亦皆不媿阿故僕無所德亦無所怨但僕不能不爲擁有民國主權之小百姓稍稍主張公道而驅除其爲蚊蚋以啗人者公等共鑒之

五十年來國事叢談

余以清同治丁卯生實申報產生之前六年未有申報以前中國無所謂新聞有邸鈔而已自申報出世遂儼然爲吾國日報之開山祖師今年三月爲申報出版後五十年大紀念主館事者以五十年國事叢談徵文於余昔春

秋之言三世有所見世有所聞世有所傳聞世余之生也前乎申報六年此五十年中可謂之所見世矣顧自同治癸酉以迄乎民國十一年國事之變動紛糾波譎雲詭不可名狀昔黃遵憲氏作日本國志謂五十年事可比他時期中之數百年余於申報出版後之五十年亦作如是觀念然則一部廿一史從何處說起耶鄙人年來涉獵佛書篤信因果之說以爲事之生也必有其所以生其滅也又必有其所以滅各隨衆生業力之深淺大小而予以感應至民國以後其種因愈銳則其結果也愈速亦有結果在此五十年內而種因遠在數百年前者引繩而絕之必知其所絕之處若合符節不爽累黍豈造物者真有管理下界之特權而支配之耶非也種瓜得瓜種豆得豆種荆棘者決不能得芝蘭物之性也昔楚靈王之困於乾谿也曰余殺人子多矣能無及此乎元凶劭之將刑也曰覆載所不容丈人何爲見哭蓋人雖至不肖而理性尙存故其心理時呈一反感之作用凡趨愈疾者顛愈速小人而乘君子之器盜思奪之矣衆人熙熙皆爲利來衆人攘攘皆爲利往自

造物者觀之皆蚊蚋耳鄙人生十六而至寧十八而遊燕三十四而入蜀三十七而從政洎民國以後凡有驚風駭浪無役不從或所聞至確而國史必不能詳或所見既真而野人尙爲異語茶餘酒後拉雜書之輒仿小說例先爲楔子一個以靈胎道情之意擬宣和遺事之歌請讀報諸君聽者

莫打鼓來莫打鑼

聽我唱個因果歌

那李闖逼死崇禎帝

文武百官一網羅

那闖將同聲敲夾烙

霎時間金銀堆積滿巖阿

衝冠一怒吳三桂

借清兵驅賊出京都

賊兵捨不得金銀走

馬上纍纍沒奈何

金銀大塊名

一路追兵潮湧至

把金銀向山西境上掩埋過

賊兵一去不復返

農夫掘地富翁多

三百年票號稱雄久

不成文法孰磋磨

相傳是亭林青主兩公筆

這一樁公案確無訛

這首歌詞是明末清初之事非近五十年之事何以特地把標題出來因作者欲覓一因果之最大而遠者喚醒一般財迷勿爲兒孫作牛馬勿爲他人作奴隸故此做成不莊不諧的一種歌曲當作晨鐘暮鼓發人猛省且山西票號在清代佔二百數十年之勢力及銀行制度興而票號乃終此事結果實在民國初年而種因乃在三百年以上本書以此爲楔子慢慢將事實道來但作者唱道情本不擅長以後亦不敢再獻醜了

作者於民國三年因事與山西票莊相往來一日問其掌櫃曰日本人輯支那經濟全書雖一紙白契或一張收條皆不憚煩瑣爲之鉤摹證明獨徽州當舖與山西票莊竟無從得其章程當舖姑勿論試問票莊何以有不傳之祕掌櫃（亦士而商者忘其名）答余曰此貴省顧亭林先生所定之不成文法而以口授不以筆傳者也先生遊太原與傅青主先生最友善是時山西富人多貲財二先生乃爲酌定票莊制度以操縱全國金融不願宣之筆墨以招當世之忌余聞而恍然靈石何氏者先世爲農其阡陌近大道因耕

地得藏鏹無算遂舍耕而讀洵爲顯宦其家與余有姻亞故老相傳晉省農
之富者類以此起家焉（明史周奎傳李自成逼京師帝遣內侍徐高密諭
奎倡勦戚輸餉奎堅謝無有高憤泣曰后父如此國事去矣奎不得已奏捐
萬金且乞皇后爲助及自成陷京師掠其家得金數萬計又李自成傳上略
勦戚文武諸臣奎純臣演藻德等共八百餘人送宗敏等營中拷掠責賂賂
至灼肉折脛備諸慘毒藻德遇馬世奇家人泣曰善不能爲若主今求死不
得賊又編排甲令五家養一賊大縱淫掠民不勝毒縊死相望徵諸勦戚大
臣金金足輒殺之下略自成自永平奔還京師悉鎔所拷索金及宮中帑藏
器皿鑄爲餅每餅千金約數萬餅騾車載歸西安）讀明史二則知自成挾
金以遁金重馬瘠沿途瘞之不圖清兵入關賊已救死不暇匹馬隻輪無返
者遂遺之山西農夫以爲二百餘年粟莊之基礎明史所謂載歸西安者不
過十之三五耳是時山西農人驟獲巨金清將又追賊不暇過問青主先生
爲山右名人亭林先生爲光復巨子因爲之口授方略創爲粟莊規制一旦

有事則足以操縱全國之金融此中作用不問可知其事深祕世莫能詳洎世祖聖祖兩朝振作諸先生亦不欲塗炭生靈而晉人遂以多財善買聞於世以歷史眼光歸納之則票莊所吸收者李賊之數萬餅也卽明勳戚諸臣之賕賂也亦卽崇禎年間貪官污吏所朘削之民脂民膏也暨清之末年銀行代興而山西票莊二百餘年之氣脈與清俱盡矣昔漢疏廣曰子孫愚而多財則益其過賢而多財則損其智民國以來剖腹藏珠者多矣諺爲大愚不亦宜乎

魏源聖武記曰扈倫四部最強在滿州之北曰葉赫曰哈達曰輝發曰烏拉清太祖以明萬歷二十七年降哈達三十五年亡輝發四十年亡烏拉四十六年（天命四年）亡葉赫葉赫者那拉氏也故老相傳葉赫臨危誓曰我有一女亦必使滿洲亡故清廷相戒不以葉赫後人列於妃后（記庚辛間時報咸陽李孟符所載宮府事略及之）及清文宗時慈禧以那拉氏入後宮生穆宗抑何與周平王時繫弧箕服之謠相似耶故友吳希玉聞諸鄂撫

彭公云文宗大漸語慈安曰此人非若所能制不可制則早圖之慈禧伏於屏後潛聞此語乘間跪求慈安保全慈安長者出文宗手詔焚之以安其心暨穆宗卽位兩太后並垂簾慈安長齋奉佛而已同治十三年穆宗大漸兩宮皇太后召惇親王奕訢恭親王奕訢訢親王奕譞孚郡王奕譔惠郡王奕詳等入慈禧泣語諸王曰帝疾不可爲繼統未定誰其可者或言溥倫長當立惇親王言溥倫疏屬不可后曰溥字輩無當立者奕譞長子今四歲矣且至親予欲使之繼統蓋醇親王嫡福晉慈禧妹也慈禧利幼君可專政儻爲穆宗立後則已爲太皇太后雖尊而不親故欲以內親立德宗也諸王皆愕不敢抗后旨是日穆宗崩帝入居宮中遂卽位用兩宮皇太后旨皇帝龍馭上賓未有儲貳不得已以醇親王奕譞之子載湉承繼文宗顯皇帝爲子入承大統爲嗣皇帝俟皇帝生有皇嗣卽承繼大行皇帝爲嗣改元光緒穆后本失愛於慈禧穆宗病慈禧后以穆后不能防護掌責之又以兩宮不爲穆宗立後以寡嫂居宮中滋不適乃仰藥殉焉慈安薨後慈禧垂簾聽政母子

間積不相能甲午之役德宗已親政思一戰以雪國恥則不復受制於太后然海軍經費已爲建築頤和園所移用北洋海陸軍無備遂割地以求和舉國惶懼發憤圖強於是而有戊戌之維新慈禧忌之會親貴譏構其間乃有八月政變幽禁瀛臺之事甲午爲因戊戌爲其果也慈禧以帝黨亡命終爲己患乃召六部九卿陰謀廢立卒以李鴻章言各國不承認而止改爲立大阿哥然終以廢立不成由各友邦之箝制適義和團以不畏槍礮自命乃有庚子崇獎義民之詔而卒召八國之聯軍賠款之巨國力以傾戊戌爲因庚子爲其果也清之亡實亡於庚子而非亡於辛亥則葉赫之後那拉后爲之也怨毒之於人甚矣哉入關之始以攝政睿親王而興遼國之終以攝政醇親王而廢抑何其前後輝映如治一爐也多爾袞之告史可法曰得之於闖賊而非得之於大明民國初元亦可曰得之於南京政府而非得之於前清故優待條件者不啻作順治元年爲明帝發喪之交換品苟無野心家之反動則優待條件較諸楊蓮僧伽之慘酷爲何如亦可爲中華民國作和平之

先導矣何必效法之路易十四俄之尼哥拉第二而後爲忠於前清哉
清之興也臺灣鄭成功至康熙而始平成功之父鄭芝龍娶日本婦而生成
功明之遺老往往至日本乞師以圖光復黃梨洲年譜己丑十月監國由健
跳至舟山復召公偕馮侍郎躋仲副澄波將軍阮美乞師日本抵長崎不得
請公爲賦式微之章以感將士有日本乞師記海外慟哭記又朱舜水先生
於永曆五年自舟山至安南而至日本素與經略直浙兵部左侍郎王翊深
相締結且與舟山諸將密定恢復之策所以屢至日本者欲以王翊爲主將
鄉導而借援兵也旣而王翊戰敗被擒不屈而死自後歸路梗塞然以日本
禁淹留外邦人復過舟山累蒙徵辟十有二次前後力辭七年癸巳復來日
本十二月復赴安南監國九年丙申三月魯王特勅徵至明年丁酉正月始
達交趾時安南王檄取中原識字人被捕先生不屈明年戊戌夏又至日本
筑後抑川有安東守約者師事之白長崎鎮巡甲辰日本宰相上公遣儒臣
小宅生順於長崎請爲庠序師乙巳至水戶己酉上公設養老之禮饗先生

於後樂園且親臨其第庚戌以檜木作壽器漆而藏之乃謂門人曰我既老在異邦自誓非中國恢復不歸也水戶侯爲之立橫舍以興教定廟次以明祭示以衣冠之式以致文詔以棺槨之制以厚終至今日本人無不知有舜水先生中國既革命先生族裔往日本拜其墓謀分其所藏器物於日人歸而爲衣冠之墓湯君壽潛爲刊舜水遺書行於世蓋明季遺臣欲爲申包胥者見東方之日本以遠隔強國自成樂土非如愛新覺羅氏之屢入明塞積有世仇也又其國漸染唐風與吾江浙臺澎聲息相通故其光復故物之心時以日本爲策源地及甲午以後南北洋及各行省大遣留學生東游革命種子遂潛伏於其中而不可復遏日本人民若林若鄭若梅皆漢姓也（梅謙次郎自稱爲中國梅氏之後）辛亥武昌廣東之役革命黨之入內地者無不與日本人爲緣雖謂明季遺老光復之精神醞釀而成可也若乃貪天之功以爲己力乘人之危以殘其民是皆與於不仁之甚者矣非所敢聞

附錄光緒三十三年政府所得同盟會之歷史以見一斑

同盟會

末永節

宮崎寅藏

平山周

青藤氏

和田三郎

北輝次郎

加藤氏

海軍大尉
參謀

介紹三人向俄學炸彈
本莊氏

日人任中少佐及士官者十餘人

輸送部……平山……玄野

教育部……北輝……章炳麟

後改編
黨部

經理部……和田……魯愚

參謀部……加藤……福建方某

……加藤任聯合部

現改……時公久任諜報部

……方君瑛暫任暗殺部

編建女子高等
師範理化專科

孫文……

黃興……往廣西運動郭人漳蔡鍔鈕永建

章炳麟

與孫黃有違言

張繼

劉揆一

河南程克

江蘇章梓

安徽楊立堂

貴州平剛

四川李昭甫

福建林時埭

山東丁某

各省分會長

回國運動者……程家樾

曾與張繼開中日聯合會

廣東 陶駿保

胡衍鴻

派入黃岡

許雪球

潮州人孫都督

山西喬某

孫派往黃岡

安徽方某

湖北田桐

吳祿貞 其弟社貞為同盟會員

南京 孫銘

安慶 蔣秋平

四川 鄧家彥

郭人漳 軍國民教育會黃興改

名張愚臣住伊

處景久該標三

蔡鐸 以軍國民會員

鈕永建

廣西

從南部入者均由北海潮州必經香港

從北部入者或由青島或往東三省

從中部入者必往上海

東三省吳崑往

廣東 宋教仁 為魁印存機文秀光社有存機

(附記) 上表係作者在北洋幕府時所鈔今革命已畢事隔十五年情隨事遷無復忌諱錄之以供讀者參考

余戊戌三上春官試以姊夫夏孫桐爲同考官迴避留京無俚友人秦樹聲約至粵東館入保國會列名於公車上書五月回里是時德宗銳意革新設學校廢八股文召楊銳劉光第譚嗣同林旭參預新政黜禮部六堂官湖南巡撫陳寶箴設南學會於長沙維新之聲日盛迨八月政變嗒然若喪余在唐家巷小學與弟一鵬同課諸生革職京卿江標時相過從今閱江君沅湘校士錄所得士如黃興譚人鳳蔡鐸唐才常等什八九皆江君門下士惜江君是冬以肺疾逝世不及見諸偉人之發揚蹈厲也已亥間唐君才常設正學會於上海欲訪之以友人勸沮未果庚子拳亂起於北方東南各省立互保之約年丈吳鈍齋先生有督四川學政之命囑爲蜀游時學堂受入股影響生徒日少費幾不支聞蜀中多佳山水欣然願往由漢口至宜昌聞船中人言先是富有票中人往來如織長江提督兩江營務處俱聞其事唐君所結皆哥老會人該會向以扶清滅洋爲幟唐君以勤王爲主名議不合而洩遂致命至宜昌見東湖縣設區收富有票自投者千數百名（民國以後聞

亡友湯覺頓言梁君啓超本約唐君同至漢口以日本船遲開一星期而免
否者梁與唐同戮於鄂中矣。湖南方大戮黨人兩湖高才生死者百計譚
嗣同之言曰各處變法無不流血者請自隗始觀於戊戌庚子之敗與辛亥
之成時未至則爲其難機已熟則爲其易其一往直前有死無二寧有異哉
雖然教案自庚子後遂無聞焉蓋長江會黨經一度之變化與拳匪之反動
卽西人之袒教者亦申明約束公論漸彰斯亦覘國者得失之林矣至拳亂
始末與富有稟之經過具有專書茲不復贅言不旣云乎清之亡實亡於庚
子而非亡於辛亥入國聯軍之後一切內政無不牽及外交人必自侮而後
人侮之國必自伐而後人伐之此定律也不可逃也

何以言內政牽及外交乎日俄之戰北洋主守中立然日人兵至遼東北洋
大臣密派段芝貴入其軍中締結密約世未之聞也日俄戰事畢日本專使
小村壽太郎與北洋大臣袁世凱訂條約於北京之錫拉胡同以理言之日
本是時民氣方張必以不得志於俄者轉而索之於我然則中日條約未嘗

損失重大權利亦未激起國民之抗爭此何故耶辛亥江蘇獨立時作者正從程都督於南京一日某國領事來謁程屏左右言是夕都督密語余明日將往滬請黃大元帥余曰何也答曰今日某國領事以某公使密電示余謂南方非另立政府不能推倒滿清故余必自往促克強來滬次日都督卽行以劉君之潔爲參謀長劉君語余近日北方軍官某來言北軍要求以項城爲大總統南方先立政府而後讓與項城暨余次年入京聞某使以清廷親貴不足與謀故勸項城自爲之合前後所聞則民國成立由南京政府讓與項城爲元首則某國全權公使某爲之也癸丑之役長江七省同盟由湖口獨立以致皖蘇粵贛川湘同時並舉固以宋案與大借款爲導火線而與日本亦未嘗不有蛛絲馬跡之可尋觀日本在野黨領袖運動其政府改變對華政策可以證明尾崎氏演說上略設日本助北中國必起南中國之惡感而排斥日貨則日本商務又將大受虧損如數年前廣東二辰丸事殷鑑不遠也且袁總統素有反對日本之意設日本助之未必得益而南方領袖（

指孫黃等）對於日本常存親愛之心設日本助之必能得南方之歡心總言之袁派失敗於日本無礙若南方領袖一蹶不振日本必大受其影響矣故余意日本當助南方下略次犬養氏演說上略政府似信借款可助中國維持太平而無損於日本之商務未免失誤袁總統或藉借款之力竟能驅逐孫逸仙黃興胡瑛等於國外或竟殺害之然革命之根原未能剪滅領袖雖去各省必時起革命四川湖南廣東其尤著者也袁之兵力斷不能壓平全國反對之人反對者或力不敵而求援於外人（指借款購械言）許以特別之利益則凡中國利源將盡入外人掌握故政府助袁不足以維持中國太平恐反成中國瓜分之禍耳至南北調和之說更不能行據現在情勢而論南北調和非與孫黃以優勝地位必置孫黃於無可容足之地或放或殺惟袁所欲耳故有勸南方領袖讓步調和者不啻助袁放殺孫黃也云云以上爲六月五日精養軒大會之演詞又日本探員報告日本國民日日會議各派代表要求外務省下動員令不然外務大臣須辭職現在組織排華

示威大會以阻撓內閣爲事首相山本伯爵主持不下動員令惟堅毅辦中國問題陸軍參謀大島大將川村大將議論多激由日皇召至日光會商政務云云觀以上記載則癸丑之役與日本外交固已同聲相應張勳馮國璋攻南京時日本兵艦橫亘江中牽制礮線某國以兵綴其後蓋日人袒南而某國人袒北袁政府以四十八日而平長江之亂實由某國人主持大借款與以充分之準備癸丑之役亦日本與某國之爲也丙辰之役自四年夏籌安會後繼以請願團正在舉國若狂之日適雲南宣告獨立蔡鐸起義於畢節繼之以黔桂獨立至次年三月二十一日召余起草取消帝制之令（自籌安會初設至此余逐日有日記中多牽涉當代人物故不宣布）人以爲是國民之反對則然耳以余所聞則外交之影響爲大其事隱祕人罕知之初政事堂參議伍朝樞往謁某使某使甚不贊成其說帖余親見之及十月二日某使忽覲見蔡廷幹任傳譯是日問答筆記無一詞反對與伍君前件如出兩人蓋某使已聞某要人言日本業已贊成某國如不然恐中國商務

某國必受損於是陽爲贊成而陰誦中日間之祕事以電與上海某國領事謂此次中國特派周某爲大使而日以親王之禮相待其中必有原因如能查得實據者則使館預備數十萬之外交祕密費專辦此事某領乃訪寓滬之某巨公託其設法某巨公曰可適是時袁氏有同姓子在滬其人固隨其父出入而習知公府路徑凡內外尉及女使婢媼皆自幼諭之者也得某巨公之巨額費用入京訪內差句某某之母爲袁氏舊媼司內室灑掃虎子之役他人所不能入者獨媼能爲之某乃因其母配一鎖匙伺項城出開其密室中之屨而致之某國使館遣工照入攝影而以原物返其故所絕無人知某使乃以所攝轉與某使某使電致紐約報略宣布之此報章傳至日本大隈首相乃召華使面斥之曰余固知汝中國人不能共事此事先與爾約除我與爾及項城外不許第四人知今何如矣華使逢彼之怒而不知所由至今茫然也未幾而日政府致電外部敵國因有未便貴國大使可勿來云云是時熊君希齡以湘西賑事來京謁請願團某要人問帝政可能否某曰專

使不去殆絕望矣閱者諸君不記句克明被捕之事耶未幾而顧問某國人某君日唱帝制不成之說是帝制之失敗亦某使爲之也不獨此事蔡鐔之赴滇梁啓超之赴桂俱有某國領事暗示或穿和服以日妓爲眷屬而始不入北方偵探警察之手以脫於名捕吾故曰庚子以後一切內政無不牽及外交也吾國經一次變亂則外交權利亦損失一度外人勢力又增高一層痛乎哀哉吾國民方日墮三塗而不知其故也

丙辰之事不自丙辰而始發其所由來久矣讀者諸君不記民元正月之北京兵變乎當南京政府之議決請袁項城南遷踐位也時則專使蔡元培宋教仁入京就館某公子者素選事召各鎮中下級軍官開會密議議決以兵入東華門奪清帝位效黃袍加身故事是時禁衛軍爲馮國璋所統不與謀故火焚東華門禁衛軍抵禦不能入兵無所洩遂大掠東西二城以及於天津（此事有某君告余暫隱其名）此一事也癸丑之役張勳旣任江蘇督軍有崇文門監督何棧者先爲張屬僚至是奉命至寧謂張曰公大功告成

蓋請願大總統改爲大皇帝張厲聲斥之未幾而以張爲長江巡閱使馮國璋代爲督軍作者於民國五年十二月五日宿於徐州巡閱使署張親以告余者此一事也民國四年九月正交片參政院認變更國體爲不合事宜突有安徽省長倪嗣冲入京余以問項城其入京何事耶則曰彼欲效陳橋故事耳是月十日拱衛軍統領步軍統領軍政執法處處長參謀部長統率辦事處副處長警察廳長等八軍人飲余於東興樓共二席一席倪嗣冲居首一席余居首蓋倪因計畫未行將歸皖余則以反對帝制聞於軍人而爲此示威運動也今倪以病臥於津門旅次者三年矣聞其日以槍斃某某爲辭而所欲得而甘心者非其親丁卽其將領醫者謂神經錯亂其然耶其不然耶人生天地間如白駒過隙古人有詩云西方故國早回還人命無常呼吸間有限光陰當愛惜今生錯過出頭難願閱者諸君猛省

一國命脈在財政金融記民國四年日本黑龍會有替中國人製造心臟一篇大旨謂一國之有國家銀行猶人之有心臟心臟有迴血發血之機能猶

銀行有收款發款之作用今中國有中國交通兩銀行而同爲國庫已失銀行根本之原理其所營事業與商業銀行無異不足以操縱全國金融故吾日本人當替造之（大意如此原文記在大中華雜誌中）是時朝鮮銀行臺灣銀行已日漸發達於通商巨埠民國六年段內閣時陸宗輿創爲匯業銀行條例迫閣員通過閣議於是中日匯兌之機關以立值段內閣主張武力解決大借日債以匯業銀行爲無盡之藏曹汝霖長財部迷信段總理兩月削平西南之說所借日債已在一萬萬以上余與曹君本有雅故一日訪諸其寓婉風之曰歐戰將停君以日本外交名於世余觀美國威爾遜之演說將來不免西風壓倒東風君蓋稍變方針毋偏重一方乎曹君以余爲咎其借款答余曰人皆以借日款咎余實則余所抵押者如東三省之森林本在其勢力範圍之內一如無抵押而借巨大之款尙不便宜乎余以其所對非所問遂不復與辨及次年而五四運動之事出曹君大受創且有以余爲主動之一人者余固不之辨甚矣直道之難行也卽以余與項城而論案無

織芥之緣惟以特科發往直隸爲候補知縣值直省舉行新政在幕府八年幸見信任然洪憲之役尙幾不免於媒孽甚矣忠言之逆耳也夫個人之毀譽本無容心生死禍福尤置於度外惟坐視民國以來之軍政財政無不爲生民之禍而力不足以救之天耶人耶雖然古人以成敗利鈍歸諸運命如洪憲之事遲至民國六年必可不作何也德皇被逐矣俄皇被殺矣皇帝夢必不作矣相隔幾何時帝國日少民國日多德謨克拉西之聲浪日高迪克推多之惡魔將絕政治也經濟也世界重心方集中於美洲矣然則十年來之痛史雖曰人事豈非衆生業力應有此磨蝎臨宮哉不自我先不自我後詩人代言之矣

吾國近日最大之害莫如軍隊之多此凡有識者之公言也前清有二十四鎮之計畫而如皖浙等省不過成一旅耳至民國七八年乃有一百五十餘萬之軍隊革命之初巡防各營皆成師旅各省添募漫無限制粵之綠林川之哥老東三省之鬍匪以及匹夫一呼動成千百徒手襁褓所在成羣至癸

丑而漸如鳥獸散矣二次革命以後凡南軍所已潰之地悉以北軍充之於是直東皖三省之白丁人人首其纓而腰其刀走卒廝養皆爲高官皂隸輿臺盡充末將此又一時也洪憲之役各將軍先以添兵加餉挾制中央昔所裁汰皆因而增額滇黔起義粵桂從風農夫輟耕輿尸載道此又一時也段氏三次組閣欲以武力削平西南參戰其名對內其實大借外債如獲金穴雷池未越謬臺已傾此又一時也安福失敗直派代興湘鄂之爭川陝之戰勞師饋運虎視中原近者東北西南潛相利用鷹瞵狼顧舌劍唇槍此又一時也乃者太平洋會議執限制軍備爲詞據唐公使所報告者英國提案中國不得過二十萬正式之軍隊夫以美國之強其平時不過三萬人我國以二十萬爲率已比日本之十八萬爲多獨奈何向所烏合之一百數十萬人將如何而解散向所積欠之數千萬墊餉將如何而消滅乎然而世界潮流誰能抵抗各國監視萬目睽睽我不自動而待他動則軍人之體面何如矣美使許門之言曰民主國軍隊須受全國民政府之節制假使總統不顧

合法民選立法機關之意志而管理軍隊則是一人集權之軍人專政若各省省長或其他民政或軍政官吏不顧民政政府之意旨則是衆人分權之軍人專政均非民主國應有之現象也中略欲求統一則以民主政府裁減軍隊設立代表機關使政治操於人民之手爲要旨嗚呼爲我謀國者視吾之自謀如何矣彼昏不知其結果殊難料也

作者屬筆至此暫告一段落以塞申報館主人之責若詳悉言之固累萬言而不能盡也請以他日乃爲偈以終焉偈曰

衆生所造諸惡業 皆由無始貪嗔癡 是生姦盜與淫殺
循環報復無已時 放下屠刀卽成佛 天堂地獄皆人爲
君不見現身說法維摩詰 要洗世界成琉璃

心太平室集卷二

吳縣 張一麐 仲仁

辛亥革命之際月表序

序曰清廷自甲午戰後外侮侵尋內政瀆亂聯英聯俄帝黨后黨之訌不絕土崩之象已著初咸同間胡林翼曾國藩以練勇平洪楊之難各省督撫提鎮大半取之湘淮兩軍八旗綠營已就淘汰洎庚子之禍倡拳亂者王公尸之賴東撫袁世凱砥柱中流長江各省得以立東南互保之約故李鴻章以議和盡瘁而袁世凱繼督北洋及攝政王修西后幽禁德宗之怨罷黜袁世凱北洋將領憤無可洩與南方革命黨異曲同工大亂已成乃急而召袁再起其爲日本之德川抑英之格林威爾勢使然也洪秀全覆亡其餘黨之竄居南洋各島者不絕如縷革命黨人利用三點會以號召光緒二十一年孫文等舉事廣州二十六年鄭士良等舉事惠州史堅如等舉事廣州而唐才常以勤王名義舉事武昌三十四年熊成基等舉事安慶皆先後失敗革命

風潮前仆後繼迨皇族內閣成立請願團體解散人心大去岌岌不可終日宣統三年黃興等舉事廣州死者七十二人遂聳中外觀聽其同盟會中之激烈者復實行暗殺如吳樾之炸五大臣徐錫麟之刺恩銘汪兆銘之謀炸載灃溫生才之刺孚琦劉恩復陳敬嶽等之擊李準李沛基等之擊鳳山五步流血朝貴寒心益以章炳麟主民報事文字鼓吹天下靡然矣泊鐵路國有問題起民氣益激昂清廷旣檄端方自鄂入川從事鎮撫同盟會中人則以有機可乘密集武漢圖大舉鄂督瑞澂偵其謀名捕之時鄂省軍人多隸黨籍迫不得已遂以爆發辛亥八月十九日卽陽歷十月十日民軍舉義武昌首佔軍械局合攻督署瑞澂倉卒逃避軍艦中民軍遂擁協統黎元洪爲都督宣告獨立更遣師渡江克復漢口漢陽西向與四川通聲援清廷初以陸軍大臣蔭昌督師南征不三日起袁世凱爲湖廣總督督水陸諸師進攻袁氏初以北洋勁旅攻克漢陽同時民軍亦克南京各省如湘贛蘇皖閩浙滇黔粵桂川陝晉魯甘或由督撫自行反正或由民軍逐督撫而獨立清廷

乃下罪己詔罷皇族內閣以袁世凱爲內閣總理大臣又宣布預備立憲之十九信條停戰與民軍議和時獨立各省乃推伍廷芳爲外交代表與清廷所派議和代表唐紹儀議和於上海而民清兩軍戰事遂以終焉至議和之日凡三閱月作辛亥革命之際月表

程守初廣平程氏譜略序

戊辰己巳間吳中朋舊結詩社於里中獲交崑山程康侯守初昆仲兩君所居離余家才里許文酒往還時相過從接其言論風采恂恂然其處昆弟之間怡怡然入其室左圖右史几無纖塵秩然井然心竊異之一日守初持所作廣平程氏譜略屬爲導言循閱一過益歎君天性之篤厚思慮之微密所謂孝乎惟孝友於兄弟施於有政者足以當之矣記曰萬物本乎天人本乎祖曾子曰慎終追遠民德歸厚矣近世好爲新說者推倒一切幾以宗法社會爲不祥之名詞不知一國之文化風俗皆由數千年歷史所流行以維持民族吾國以宗法爲教與西歐各國以個人爲單位者不同偶一效顰輒相

鑿柄則盡反其本矣大傳云愛百姓故刑罰中亭林顧氏爲之說曰天下之宗子各治其族罔攸兼於庶獄而民自不犯於有司又云庶民安則財用足顧氏曰收族之法行而歲時有合食之恩吉凶有通財之義本族六安萬民三曰聯兄弟六行之條曰睦曰恤不待王政之施而鰥寡孤獨廢疾者皆有所養矣守初生長崑山漸染於鄉先達亭林之遺教於其政成而歸田也則恤族黨修祖墓建宗祠又勤數年之力成此譜牒觀其祭祀之儀器塋兆之構造世系之旁及外親必誠必敬至纖至悉若夫上述先德下詒孫謀使人孝弟之念油然而生宜其寢熾寢昌光大門閭而未有艾也抑程氏自伯休父以降名儒魁傑史不絕書茲譜之作至本支七世而止不敢遠張門望以效夸大者之所爲蓋其慎也曩者守初筮仕遼瀋歷膺繁劇洊涉監司所至綏輯流亡表章文獻君子得其志則化民成俗隱居則強勉爲善於一鄉一族之間孟子有言人人親其親長其長而天下平其理一也

方氏世譜序

吾友方君炳勳以續修世譜督余爲序余與君居相近年相若少時應童子試以君家鄰貢院祇數十步曾侍先君子造廬憩息嗣值書院課期又時相晤語而未知君之族系固爲有明正學先生裔也憶余年十六以秋試始至金陵弔古於正學祠徘徊於碧血亭下憤長陵十族之慘以爲先生之後自此殄滅歎忠臣義士之竟覆其宗天道無知愴焉欲絕今讀譜所載始知先生成仁後季子德宗爲寧海典史魏公擇藏匿流轉至雲間冒余氏姓生友直友諒友竹至友竹之孫啓緒徙居毘陵蓋自永樂至萬曆始奉詔復姓至今毘陵一支子孫蕃衍丁男至七八百人然後歎先生之丹心浩氣上徹雲霄人雖厄之而天必佑之爲善者可以自壯矣譜之作也昉於清康熙辛未至光緒辛丑已七次重修自辛丑上推至道光庚子第六次凡六十年而一修自光緒辛丑至民國戊辰不及三十年又八次重修君於辛丑爲協修今已兩次從事於茲譜益加精焉此二十七年中國體變更滄桑遞嬗浮言胥動赤舌燒城凡先民之所以維繫人心者幾幾如六朝五代之瀕於漸滅而

方氏獨致力於譜牒以永其水源木本之思此以見先儒流澤孔長而君等漸染於詩書之教者固不以窮達夷險而異其趣耶抑貞下起元人窮反本破壞終而建設始將使人人親其親長其長而天下平也紀言尊祖敬宗敬宗故收族而極之於庶民安財用足吾鄉校邠馮氏議復宗法以爲宗法者佐國家養民教民之原本今宗法卽不可復而由圖譜之學以聯其族人使覽者孝弟之心油然而生於不覺將齊家治國平天下以貫之庶幾風俗由澆而淳社會之罪惡日以減少是則正學先生之靈所陰相之者余故推類言之以質後之君子匪僅爲方氏一家言也民國十七年歲次戊辰夏五月吳縣張一塵

騰衝青齊李氏宗譜序

爲李氏宗譜而託始於由齊遷滇之祖其遷齊之祖相傳自隴西者以無徵故不載蓋慎也首列家訓欲祖德賴是以弗替次列命名定派字庶本支由是而弗紊也仿古爲世系表載遷滇以來歷世名字生卒妻子職秩封贈葬

地別爲文以紀世官世德其文類傳其用卽古之牒牒表之注表略而牒詳也其後爲行述哀狀小傳爲墓志碑文銘章誄詞而宗祠紀祠產墓田錄歷世載籍記戚備孝子慈孫之善繼志述事矜慎而不苟作並世賢士大夫之好闡幽表潛質直而不虛美俱見於此一塵心敬之亦執筆從諸賢後爲闕太夫人傳以應吾友印泉請旣而譜成命序雖欲默惡可默也夫民有宗宗有譜就一譜論固家譜若合千萬家譜寧非國譜如是而曰中華無民史不可也家譜所載方志采之國史亦采之如是而曰二十四史皆帝王家譜不可也譜衰於秦漢以後毅然起而振之者宋歐陽氏蘇氏乃若吾吳則首創義莊者范希文志復宗法者前有顧寧人後有馮景亭百世聞風五賢同揆皆知宗以族得民之善而憂叔世民散欲以親親之道聚之庶大本立而亂無由起如是而曰先儒不重民族不識羣學不可也吾觀李氏十世爲明武臣功在南陲入清隱淪爲多卽仕宦亦不顯問其何以然則鍾英翁懷永曆之恥志節若顧寧人有遺教以勸子孫使之然也其後族人遭亂流離死亡

泰半其存者卒從異鄉歸故土既散而復集垂絕而得延問其何以然則德昌翁之殫心力於收族功德不讓范希文重建門庭招集流亡無親疏悉與同室以居以養使之然也永曆之恥忍之八世辛亥革命何異乎齊襄復九世之仇蔚然翁崛起滇西印泉昆仲從父受方略以助成南北統一之功鍾英翁之齋志以歿至是始大快於泉下問其何以然則其疊水河支祖師北齊顏氏以立訓至今冠於譜首曰孝弟忠信勤儉早起愛衆親仁自立知恥者蓋此十六字之心傳使之然也抑景亭有言宗法行而後保甲團練之可行觀於李氏父子兄弟之同心戮力爲民族効命亦宗法可復之一驗也印泉作譜師歐蘇志行希景亭蓋亦以爲人合不如天合若舍親親以言羣如烏合如齋集不崇朝而散而反以爲無民史輕民族之所致醫說流行真無當也印泉之意然而如一鑿者親仁而得益友亦愛衆而自命民傭自命民傭者蓋欲爲孝弟忠信勤儉仁慈自立知恥之民之傭而非從醫說以自附於烏合齋集之羣與之舍本而齊末此則承命作序之本旨竊幸與印泉

同而亦欲質之當世吾是以云雖欲默惡可默也中華民國十九年九月一等大綬寶光嘉禾章前教育總長吳縣張一麐謹序

張氏族譜序

余少時勝衣就傅見叔父信魚公課餘之暇手鈔家譜細若蠅頭公沒後則族叔父誠之公繼之拾遺補闕屹屹不休今距誠之公之沒將十期矣缺而不修懼將廢墜上年堂弟兩葵自京返里慨然有志於此乃就兩叔父原本賡續爲之凡前所未備者一一搜訪而增益之又於掃墓之便相度咨詢作爲墳圖以垂久遠其無可考實者則存疑焉且爲世系表以便觀覽詳矣備矣書成將與雲搏胞弟謀付排印而囑余校序曩者余與弟輩擬以俸入餘資建宗祠營祭器遭逢世變奔走流離囊橐既空徒存虛願而吾年亦已老矣言之憮然吾家系出橫渠世傳耕讀明季兵燹宗譜散失無存故今譜以在吳祖讓四公爲始又經成豐庚申之亂先代著作蕩然其嘉言懿行足以昭示後人者惟曾叔祖二渠公張氏家傳蓋自有明以來世有隱德常自韜

匿由讓四公以至余小子凡十六世自小子上溯本支爲秀才者凡九世我高祖考樹香公鄉舉孝廉中途卽世至先考正定府君始成進士需次直隸者八年乃除正定縣令在任二十月以病告歸翌年卽見背我祖考味魯公績學敦品值庚申蘇城失守避居鶴田濱未攜一物味魯公病沒家徒壁立送死養生我府君辛苦支持教養諸叔父由賈而儒一一成立中年以後屢擢疾病迨一官出宰愛民勤政盡瘁以終祖宗積累之厚至我府君而仍未大泄綿延以及於小子倖捷制科回翔幕府中遭鼎革因緣舊誼洵躡閣僚大懼列祖遺澤將由我而斬雖懷老氏知止之戒而曾於國事無少補抱憾多矣古人云父兄之教不先子弟之率不謹余忝爲一族之長而無德以紹先人之緒能不汗顏木有本水有源惟望後之人無忘祖德以補吾過而已昔在川公以元會運世是一爲萬爲世次命名之序今擬以厚德載福美意延年繼萬字之後焉詩曰無念爾祖聿修厥德孔子曰宗族稱孝焉鄉黨稱弟焉凡我子姓尙其念諸民國十七年一月十六世孫張一塵謹序

吳縣志序

有清一代言方志之學者首推會稽章實齋氏顧章氏爲吳郡志姑蘇志書後指摘疵類幾無完膚以范文穆王文恪之賢而能文尙有不滿人意之處甚矣方志之難也吳縣志直接清乾隆初年自乾嘉下訖宣統時歷七朝歲閱百四五十載地括吳長元三縣太湖靖湖兩廳搜輯之夥草創之艱蓋可知已言其最近者有同治蘇州府志第府志與縣志一詳一略體例不同况同治己巳至民國初元亦已四十餘年其間變革亦復不少當民國五年邵君杏生佐吳縣幕言諸縣長孫公少川倡議續修孫公旋量移不果繼任吳公秀之賡續前議設局於滄浪亭公推曹根蓀吳穎芝蔣季和三先生爲總纂妙選時賢任分纂采訪諸事十二年以費絀撤局十三年添聘孔君康侯同任總纂均義務職方事之初所定條例折中實齋之說視舊志爲謹嚴綿歷歲時行將就緒乃曹蔣兩先生先後捐館吳先生亦於二十年春初遽歸道山始終其事者惟孔君一人耳君以一塵蠹知梗概具牘前縣長黃公雲

僧令主其事乃添延李君印泉吳君鼎丞與原在局中之孔君暨王君佩諤施君濟衆張君壬士爲委員會並聘郭君隨庵爲總編校商酌體例略有增損而不離其宗因原稿覆閱費時於會外懇請陳君公孟單君束笙更定數門以期盡善同人等以志稿粗完若不付刊將飽蟬蠹無以竟諸先達一簣之功惟核計刊印紙工全書八十卷將及萬元而志局餘存之款祇二千四百餘元除總編校及庶務薪金鈔錄雜費外兩年中所餘無多因議購預約券以千部爲率可以無絀不意兵事影響售券祇什二三而校印不可以中止地方預算竭蹶未忍爲發棠之請僅補領吳先生任內未領之款千四百元承地方熱心文獻諸君之厚意借貸巨款指券價作抵始得歲事今幸全書出版有期除預約券外需加價十之六以償宿逋而資結束一慶人事牽率衰年多疾未暇徧閱全書賴郭君一手編校絲毫不苟又仗委員諸君羣策羣力克底於成使百五十年文獻所關得以傳布此區區所引爲慶幸者也名吳縣志者尊現制也本擬將民國二十年大事別爲一編毛君羽滿慨

然擔任尙未竣工不在此書範圍以內附記於此以俟方來民國二十二年一月張一慶序

吳縣社會調查統計序

昔會稽章實齋創議州縣請立志科以爲州縣之志不可取辦於一時平日當於諸典吏中特立志科僉典吏之稍明於文法者以充其選積數十年之久則訪能文學而通史裁者筆削以爲成書章氏志乘之學號爲專家乃前清盛時各行省並未有采用其言而設立志科者及觀東西各國之地方統計歲有會月有要期若列眉至詳且覈何其與章氏之言相似也余嘗論之方志數十年而一修意在鑒往此屬於縱者也統計期年而一度意在知今此屬於衡者也一縱一橫互相經緯但非有良吏究心治術博攷方聞則亦難成事實吳縣邑侯黃公雲僧下車經年政成多暇設立社會調查處使全縣行政建設有切實之統計其爲目二十四至纖至悉不出戶庭而得全縣之狀況卽以縣名名其書茲將綜合彙編付諸剞劂屬爲序言譚陋不文無

以副命因推本章氏之說與各國地方統計之意以告邑之留心文獻者

黃埭志序

出望齊門迤北稍西三十餘里有鎮曰黃埭相傳爲楚相春申君築埭堰水故冠以姓按史記春申君初相楚後請封於江東考烈王許之因城故吳墟以爲都邑春申君相楚二十五年其客朱英有言曰名爲相國實楚王也太史公當西漢時尚及見春申君故城宮室之盛則二十五年中凡有大興作皆以春申君名義行之民安其業而去後思之又奚足怪吳淞之浦曰黃浦故蘇郡守之堂曰黃堂皆此類也黃埭之北界蠡河蠡河者吳地記謂范蠡伐吳而造此瀆吳中古蹟若蠡河若蠡市若蠡口若蠡塘皆以范蠡得名正與黃歇之名埭相似黃埭自古無專志董事朱君福照等始爲之葦路藍縷以詔方來用力之勤使人油然而增鄉土友望扶持之重顧余疑三閩大夫足未至吳境何以立廟於黃埭繼而思之楚懷王以六千里而爲人役其死也天下哀之故南公有三戶亡秦之說楚項籍尙立懷王之孫心以覆秦彼屈

平者諫懷王而不用致沈汨羅暨楚滅吳春申封於其地澧蘭沅芷馨香遠聞故爲建廟於此以誌懷沙之痛甚矣情感之動人也清儒章學誠有言各郡邑宜設志科以繼太史采風遺意吾蘇諸君子誠能各就市鄉撰爲志乘以表吳中文史之盛令後之學者有所觀感興起洵爲美風豈不懿歟輒書所見以復之

李印泉吳郡西山訪古記虎邱金石經眼錄鎮揚游記合刻序

騰越李君印泉以滇南奇傑爲吳下賓萌胥疏江湖蟬蛻塵滓循陔絮養補廣徵之詩涉園自娛開泉明之徑琴樽時會花鳥助其發皇裙屐相要漁樵相爲唱和陶陶然不知爲故將軍爲眞宰相也君神觀聰強精力殊絕凡輶車所駐行部所經營慕阮芸臺畢秋帆之爲人搜剔貞珉提倡羣雅神遊造化足徧名山文采風流炤耀今古比者脫離世網汗漫江濱瞻大德之道場訪名賢之祠墓鬼神感靈而來告者獻斂手而交推成西山訪古記四卷虎阜一隅厥稱勝迹氈樵所至石壘斯呈懸崖之書披藤蘿而涌現題名之詞

剔苔蘚而如新方諸前賢數乃逾倍成虎邱金石經眼錄一卷南徐古郡汲江心之寒泉廣陵名區挹蜀岡之幽勝巾幅戾止以伸壯懷山水有靈亦驚知已成鎮揚遊記一卷曾不數稊真然巨帙洵掌故之淵海抑藝苑之琳琅已噫滄海橫流風塵頽洞漢陰忘機之喻莊生逍遙之篇古之傷心人同斯感喟云

約章成案匯覽序

公法家之言曰凡一國之法律必有立法者以裁制之惟國與國交際之法律則無人能擅立法之權故居今日國際法之主位者莫如條約蓋操縱離合之故成敗得失之林于是乎在彼東西各國法學專家童而習之皓首而不輟而吾士大夫眇所究心其何以懲前毖後乎自北洋有彙纂類編之刻桐鄉勞氏輯爲纂要湘中又賡續而廓大之爲分類輯要一書世之言交涉者賴焉顧其書止于己亥距今又六年矣時局日新人事遷貿錯綜變化月異而歲不同有倍蓰於己亥以前者闕而莫述來者何觀爰屬顏韵伯觀察

踵湘刻之後續鈔成案都爲是編蛻故而存新訂訛而補闕商榷體例增益圖表旁注年月以便攷證上提綱要以省繙帙蓋不獨致力之勤其用心良苦焉書既成命曰約章成案匯覽將以諭世之言交涉者俾資觀覽且仿英國藍皮書之例歲出一冊以成定章方今環球大通世變日亟詰戎練武之實與講信修睦之文二者相爲表裏前車已逝來軫方遘杜漸防微陽開陰闔詎復有常轍之可循雖然語不云乎不習爲吏視已成事又曰不知來視諸往誠由此而進讀外交諸史以斬登乎法學家之堂而躋其裁則是編其猶大輅之椎輪也夫

蘇社第三期財政特刊導言

一事之敗也必有其所以敗之因由前日之因以生今日之果其造因之日或爲環境所逼迫或爲野心所發生因因相循果果相續若不究其因之緣起而第咎今日之何以結此果於是論理學爲不完譬如患病之人疴羸枯瘠瘡痂叢生善醫者必量其元氣之能勝與否去其腐生其新使營衛漸調

血脈通利若一味投以猛劑抑施以割術恐關節天闕大命以傾豈良醫而敢出此抑我見鄉之富人田連阡陌倉庾如雲但以歲之不時與用之不節抵借倍稱之息使母財日蝕於無形之中不十年而富者以貧貧者以絕矣一家然一省何獨不然各國財政學家整理舊債不外合併與借換兩法何謂合併卽併諸債爲一償化散者而使之整也何謂借換卽借新債以償舊債化重利而爲輕利也彼當國者豈不欲省嗇一切之費用以償宿逋哉顧省嗇亦有其限度若舉不可省嗇者而亦罷之則其反動之需要或尙過於今之竭蹶而其害且中於民生是以深閉固拒之說不過書生快意之談當局者固不應若是也吾省財政至今日而困難極矣究其因非一省之所爲而受全局之影響帝制也復辟也督軍團也蘇浙之違言也直皖之戰也以至於直軍之驅奉出關也無往而不使省財政爲所牽動蓋國家財政與地方財政表面固劃分爲二中央政府庫空如洗一律責諸地方致省庫外國庫虧至一千萬元之鉅此一千萬元債額中屬於息借商款者六百五十七

萬餘元屬於欠發各費者三百二十五萬餘元索債者既無清結之望催款者亦無再欠之地若長此不已必至川湘等省各就其所食之采地豆剖而瓜分之此非危言也吾聞奉直將戰之時已有令催各縣解額徑解軍署幸戰事迅結未至延長否則數省紛糾斷無一省獨立於安全之地位苟不早爲之所則省之破產即在目前彼湖北江西安徽皆與吾共此長江流域試一按其積虧之鉅較吾蘇爲何如邦人君子尙無徇虛名而蹈實禍也今者韓省長有募集七百萬元公債之擬商同督軍於十一年度不敷二百三十七萬之中將撥留中央稅款加列一百萬元又實減軍政民政經費一百六十三萬元而將原擬之有獎公債償還本息一百一十一萬元及各銀行借款利息四十三萬餘元剔除收支兩抵可餘一百八十萬元作爲以後歷年還債專款此卽各國財政學家整理舊債合併與借換兩法東西學者言財政之公式不可逃也吾社同人既有志於地方自治事業之發展則對於省行政艱危當如手足之扞頭目先置省於完全穩固之地位而縣市鄉之自

治乃有術以進行若僅好爲夸大之言而於事實有損而無益則非吾之所敢知矣

浙江制憲史序

甚矣人之驚名而不求實也聞中央集權則色然喜聞各省制憲則瞿然驚有清入關承明督撫之制而寄其權於滿大臣經洪楊之變曾胡左李諸公削平大難封疆之權乃尊然其時號爲清流者以強幹弱枝彈章四上暨光宣之際親費用事盛倡中央集權而清社以屋民國成立項城因仍舊制北洋軍閥徧國中自丙辰以後忽有所謂督軍團者上不受中央節制下惟剝民以自肥於是憂時之士倡各省自治之說以裁抑軍閥收回民權省憲之說風動一時不可復遏譬之家長不能事子弟各謀自立爲家長者應獎成之又如公司破產全體股東開會自決經理不能阻遏之理之常也昔顧亭林先生憂明制之敝其所謂郡縣論曰古之聖人以公心待天下之人胙之士而分之國今之君人者盡四海之內爲我郡縣猶不足也人人而疑之

事事而制之中略有聖人起寓封建之意於郡縣之中而天下治矣今之言自治者乃真寓封建之意於郡縣中也賈子有言治天下至纖至悉以吾國幅員之廣人口之多而欲以一切之法繩之毋怪羣盜滿山而民事不舉矣劉孚京曰古之封建大國不過百里次七十里次五十里及兼諸侯分天下以爲三十六郡郡各統縣中略一縣之地容公侯之封累十或八九五六者所在猶多有之中略姦宄之所伏匿怨仇之所交構紛然錯出吏以一人之耳目手足而欲兼營而並驚嗚呼苟不得罪於民爲幸而謂其民猶可得而治者吾不敢言之也周之興也有鄰里鄉黨爲之基齊之伯也軌里連鄉爲之制吾嘗謂一國猶一身然省如人之心臟有迴血發血之機能國憲則腦髓而縣市鄉制則四支無腦髓則神經不完無四支則六陰六陽之動脈無所起點故省憲爲中權縣市鄉制爲首尾浙江制憲史告成問序於余因書所見以質達者而又渴望國憲之成以與相輔焉

荷屬華僑教育年鑑序

民國四年余
君衡三往君
之書裒然巨
之也比余奉
年鑑句爲一
人士頗悟物
莊之書累經
字大同不隔
餘毋亦反其
和極軌豈不
荷屬同胞於
涯矣余故述

全國律

吳興王君均卿不見已二十餘年矣一日自上海抵吳門造余寓袖出命爲序其書皆徵集國中律師稿件之完案而彙刊之以爲程式余於法律之學懵無所知瞠目無以爲報顧王君來自遠方其意勤勤懇懇不可以不文辭儒家言禮治法家言法治禮者防於未然之前法者禁於已然之後自禮教失墜法家乃起而乘之雖諸葛武侯之於蜀張江陵之於明不能不用法家之綜覈名實漢儒有春秋決事比之作雖謂儒與法相通可也改革以來百政解紐惟司法獨立之基礎世已莫敢非之而律師制度所以保障人權用意周至較昔之獨裁政體以武健嚴酷爲能者未嘗不差強人意是書之作其亦昔之折獄龜鑑刑案彙覽之流亞歟爰書所見以復於王君民國十一年二月吳縣張一麐序

蕭子敬各國經濟思潮之變遷序

禮運言大同之世曰貨惡其棄於地也不必藏於己力惡其不出於身也不必爲己論語言不患貧而患不均均無貧實以揭國家社會經濟之精義但

因閉關已久與世界各國不相接觸故經濟之學古無專書自海通以來東西列邦名人鉅子精心結撰之文遂譯而來於是國人始知經濟學法政各校列爲專科乃執政者於經濟原理懵無所知盲人瞎馬背道而馳以至羣盜滿山外債山積吾固不敢以各國政治家之眼光責難於公等抑何於禮運論語之單詞隻義概乎其未有聞耶毋亦蔽於血氣之私而悍然不顧也蕭君子敬新編是書問序於余余惟學者之有益於人國也應乎時代之潮流參以國民之趨勢參伍比較確爲方針以吾國人工之低廉天產之豐富而國力疲茶至於此極其故何哉憂時君子得此書而研究之則可以哀多益寡使人人各盡所能各得所需者必有其道矣民國十年一月張一麀

陳仲炯和平之回溯與國民自決序

有人焉陰陽相搏臟腑不調厥病膈噎癢癢或爲癰閉凋瘵不治將殆得扁鵲俞跗診之浹旬而瘳庸醫遇之則澳忍媮媮待其宛轉以自斃病家錯愕謚曰大愚夫至羣一國之人嘯歌漏舟之中逍遙焚屋之下有叩之者則曰

無術以療其不行尸走肉矣乎彼西歐戰爭伏尸千萬糜帑萬億然而期年之間載書歃血以底平成豈有閔牆之爭馮軾之戲綿歷歲月莫知其鄉可以終古長夜者乎吾義軒神明之胄其騰笑於五洲而後屠割若犬豕其曷足怪粵若稽古周禮之詢萬民盤庚之告有衆近代德謨克拉西之徽幟在彼爲新詮在我爲古誼肉食者鄙既無術以幹旋危局則莫如返訴諸石民僕竊不自揆發爲民意機關自舉和議代表之議聞侯陳子敷暢厥指助我張目詩曰風雨如晦鷄鳴不已既見君子云何不喜記曰儒有合志同方行道同術怵神洲之陸沉爰嚶鳴而求友當世賢達其諸樂有取於斯乎

吳柳隅經濟制度私有與公有之得失序

易繫辭傳曰窮則變變則通通則久六十四卦始於乾坤而終於未濟何以不終於既濟以易道無平不陂無往不復繹繫辭之意亦可曰久則窮窮則變也故人道進化而不窮世之論政者規規於一先生之言以爲既足不知天下事理煩復變動不居既無絕對之利亦無絕對之弊龔自珍之勸豫曰

將敵則豫師來姓又將敵則豫師來姓物不可以終敵故受之以革革物者莫若鼎故受之以鼎但其既窮而革之則川壅而潰所傷實多於文自營爲人入人爲公下非說許叔重云入者分也各分其私之一部分合而成公詩曰雨我公田遂及我私此之謂也若夫民之初生睢睢盱盱天之所長地之所養取之不竭用之不盡只有公而無私之可言德儒伯伯利謂初民社會破壞而私有財產制始作於是成爲國家國家者所以保護制度者也私之既敵則又思返諸公此馬克思共產黨宣言書所由出也近者俄羅斯勞農政府成立李甯以取消私有制之理論見諸行事共產主義遂先實現於俄羅斯今布爾塞維克之潮流震盪列邦或畏之如蛇蠍或頌之如神明英大哲學家羅素者向尊李甯爲澈底澄清之英雄事業及游俄以後則惴惴焉惟蘇維埃現象是懼其歸結則以社會崎嶇之故實權力之不平而非僅財力之不平爲厲此豈前後自相矛盾耶孔子曰天下國家可均也爵祿可辭也白刃可蹈也中庸不可能也羅氏所言其亦有感於中庸之德民鮮能之

乎吳君柳隅著經濟制度私有與公有之得失督余爲序書凡四章曰財產私有制度曰財產共有制度曰土地制度曰國家之經濟政策條分而縷析燭照而數計折中於公有私有之間而合乎窮變通久之義吳君之學余何以窺其涯涘顧世方震駭於馬克思之學說而深閉固拒束書不觀卒無有能平亭而批判者誠取是書而讀之以民治精神運用於社會國家經濟之域毋襲秦政以來朕卽國家之謬種徐度其最不平使措諸平則禍亂之來庶幾過息非然者吾烏能測其所至哉

韓國遺民全醉堂精神哲學通論序

己未仲秋上丁陳子重遠屬以講經之役因闢孔門義利之辨冀遏人欲于橫流全先生醉堂聞而可之造廬修相見禮並出所著精神哲學通論二冊命爲之序受而讀之大要述性命之指歸而於道家吐納長生之術本諸師說參以心得又通諸政治哲學隱然欲爲萬世開太平何其盛也余讀漢書藝文志黃帝四經四篇黃帝銘六經篇又黃帝雜子步引十二卷王氏應麟

考證引朱子曰黃帝聰明神聖得之於天天下之理無不知天下之事無不能上而天地陰陽造化發育之原下而保神練氣愈疾引年之術庶物萬事之理巨細精粗洞然於胸次是以其言有及之者又引真西山之言曰養生之說出於老子谷神章其最要也漢初黃老之學盛行故太史公序述六家要指獨尊道家謂凡人所生者神也所託者形也神大用則竭形大勞則敝神者生之本也形者生之具也不先定其神而曰我有以治天下何由哉史談之說如此近世東西各國言攝生靜坐之學者雖爲術不同而理則莫之能外全先生薈萃各家之說先之以治身而推極於治天下蓋黃帝老子之真傳與史談右神左形之意固如是也先生自稱玄牝道人年逾六十玄髮未素殆古所謂專氣致柔能嬰兒者歟余嘗論春秋三世之說自據亂而入升平而太平二十世紀方自據亂而入升平且爲太平世之先導歐洲空前大戰已止而國際聯盟始萌自今以後德威廉俄尼古拉士之軍國主義警察國主義將永永絕於地球而爲德謨克拉西取而代之先生之書使亞洲

文明燦爛大光以與世界潮流相接而成一結晶體則是書也謂爲太平世之初桃可也豈僅以長生不死之道眩耀耳目已哉

有竹居印譜序

許氏說文序言摹印書有繆篆其書今不可見而於漢印得其略漢印惟誌官位名氏自元明以來連狴鐫文爲用浸廣吾子行文三橋諸公遂於金石書畫之外別樹一幟近今陳篋齋更以鐘鼎文字入刻印之中上追蒼雅胎息深厚蓋藝而進於道矣戴君佩鳴工鐵筆以其手鐫印爲有竹居印存一冊見示余於刻印之道未嘗問津而蟲知六書源委書家言疏能走馬密不透風刻印之神妙與書家爲近觀夫奏刀摹古意趣橫生有如庖丁解牛神行官止昔楊子雲云雕蟲小技壯夫不爲顧瑰意琦行之士不能無託而遊戴君之於此道其亦定庵所謂以瑣耗奇者耶

步翰青養正詩歌序

倫理學者分家庭倫理社會倫理國家倫理爲三大級而皆以修身爲本孔

子曰君君臣臣父父子子夫夫婦婦一律作平等觀各盡其道本無軒輊自後儒揚彼抑此有君叫臣死不得不死天下無不是底父母等說遂激起倫理革命之反動昔孫芝房芻論以晚明之亡歸獄於陽明洪楊之亂歸獄於漢學家湘鄉曾氏辭而闕之以爲過當今之言倫理革命者其亦矯枉過正等於孫氏憤世之談耶吾友步君翰青窮年矻矻著書自娛近又纂養正詩歌四冊督余爲序古者君子無故不撤琴瑟自樂官失傳里巷靡靡之音浸爲風俗於是孫悟空黃天霸之子虛烏有成爲普及教育而害中於社會國家豈不可恥古者小學之教十有三年學樂誦詩故雖兔置野人江漢游女俱有士君子之行東西各國以音樂之普及與否觀其國民之程度樂雖不古詩則尙存步君此編洵有心人之作也因書所見以質之當世知言君子

許雨生霽厚太極拳圖解序

往嘗讀周禮春秋傳之軍制試以次國二軍爲平均率每國得二萬五千人之兵額百國卽有二百五十萬人若以千八百國計則勝兵者殆四千萬當

今日全國人口數十之一矣又嘗讀戰國策齊秦燕楚韓魏趙等七國國必有帶甲百萬技擊數十萬蒼頭數萬若以今之全國男子二萬萬例之則吾國必當有勝兵之男子千萬矣日俄之戰旅順遼陽諸役肉搏相爭論者咸以日之勝歸功於柔道柔道者即吾國技擊流傳之一種故吾國而不欲自衛也則已苟欲自衛則德育體育智育三者之中尤宜以體育爲重矣自秦政一統以後世主忌人民之武俠去古者軍民合一之制絕遠國人率媮惰萎靡適以與列強遇遂不寒而慄不吹而僞誰之過歟民國成立識時之士漸知拳術之爲國魂許君雨生於各術靡不曉而尤精於太極一門一塵曾入體育社爲特別社員時時承許君之教益一日出其所著太極拳圖解相示以科學之眼光發明其先後緩急之序而爲圖以明之大則強國強種小則却病延年前見徐械所撰拳術與力學之關係借力學槓桿之理解太極虛實運用之法藝而幾進於道惜是書一見於體育季刊未窺全豹今許君之書裒然成帙其視徐君所著如鳥有翼如車有輪即孱弱如余亦能立頑

而振儒世之學者可以興矣但使吾國男子有百分之二各分其飲博冶遊之精力以從事於此道何渠不能與列強比耶

閩古古全集序

泗陽張君慰西於京中露攤得古古先生全集既爲編訂年譜將付剞劂督余爲導言君表章耆舊撫摠殘廢扶義之功侔乎遠矣先生高節具見君序跋中明之亡也船山梨洲亭林諸老均以光復故物爲職志既已不能見諸行事乃爲文字以漸漬於文人學子之腦髓而屢轉不窮故革命之起非自辛亥始也蓋五祖之說三點之會其由來久矣舜水亡命日本而陽明學派傳播東瀛日本梅鄭等族出自華夏等於馬留以故清末逋逃均受卵翼匹夫之志可以回天王侯螻蟻豈不信哉天道好還無往不復吳潘史難啓禎詩變江浙名士誅戮殆盡暨乾隆末葉川陝楚之教匪以迄道光後之西力東漸咸豐洪楊一役幾屋清社同光中興漢族勢力已超曼殊而上之乃者親費用事張脈債興故武昌一呼如摧枯拉朽非明季諸老之精神貫徹曷

以致茲集中帝統樂章排斥猾夏隱然爲二百數十年後之背景自大園視之猶一瞬耳佛云一切衆生慎勿造因後之作者可以觀矣民國十一年春節後十日東吳張一塵

海鹽朱少虞年丈遺著序

壬寅之冬余自蜀返里海鹽朱少虞年丈延至其家爲諸公子授讀水鄉扁舟敝書盈篋瑤環瑜珥羅列聽經丈所居園林有平泉花木之勝早謝簪組退老槃阿人疑地行之仙家號通德之里桐間柳下談讌莊諧翌年癸卯閏五月余入都應試特科以縣令入北洋幕府忽忽廿年無從會晤辛亥國變後余在京師聞丈已歸道山公子笏廷燮廷亦相繼下世回首前塵有如夢幻適四公子葆廷緣事入都以丈舊著夢鹿庵文集榆蔭山房詩集若干卷屬爲之序集中所作多戊辰以前橐筆傷時懷人感舊之什嗣後通籍京曹暨出守瓊潮二州以至戊子乞養旋里優游林下者二十餘年所存僅寥寥數首豈一行作吏此事遂廢耶抑搜輯有所未盡耶丈詩文不名一家而舒

卷自如絕無鉅釘彫琢之習世之讀者自能知之特誌余與德門文字因緣以誌山陽聞笛之感民國九年季夏之月年家子吳縣張一塵

袁瓊禹同年遺集序

余既爲藻樓昆季題其尊人瓊禹同年之結寄圖藻樓由吳門貽書京師曰先府君著作泰半散佚近始搜輯得駢散文二卷古近體詩二卷同里孫君受之任編校列入吳興劉氏嘉業堂叢書殺青將竟乞爲弁言余惟瓊禹之學於訓詁詞章金石目錄以及歷史輿地無所不通壬午以後憤慨時艱往往悔其少作憶丙戌春間公車北上余與君同寓於虎坊橋吳鈍齋年丈宅中嗣皆報罷南歸於舟中間余馮林一先生之學以何者爲最余以經世之學對君曰然哉又告余曰向所爲詩文集留汪郎亭侍郎所許以刊布迄未見還又言欲爲續疇人傳印人傳二書而未成甲午中日失和君隨軺返里中余叩以日本變法之故君曰當學商鞅之治秦蓋謂行法自親貴始也嗣主學古堂講席拔算學卷第一見者大譁君語余曰訓詁之學余二十年前

喜爲之今則芻狗耳君以光緒丙申歸道山距今歲星兩周矣世變滄桑亂靡有定卽亭藏書亦已蕪落未知君當年手定之藁流落何方卽余所曾見之粟香隨筆序及葑門彭氏寫韻樓詩序皆未入此編則如藻樓所輯殆遺著之什一耳他日考吳中文獻者願更有以廣之

金鶴望天放樓文言序

吾友金君鶴望以所撰天放樓文言見示命爲導言余讀之舌橋而不能下而神爲之懾而口爲之噤余雖蠡涉文字之樊思力蹇淺又勃窣塵網神觀銳減若以語夫著作之林曾不足當有道者之一呖乃以觀君之文如深山大澤陽開陰闔波譎雲詭不可方物又如黃鍾大鏞韶濩競奏鈞天廣樂羣神醉酒時或沖澹其容委蛇其辭如春華怒發羣鶯亂飛遠絕塵壒眞靈所嬉其整襟談道登壇講藝如玄酒太羹淡而彌旨醴泉芝草吉祥止止蓋君之文攜六經之菁華升諸子之堂奧益之以莊屈之詭博放之以揚馬之恢奇不事瑣刻自成馨逸非具絕特之姿駿雄之材烏足以語此乎君懷抱宏

遠又喜游名山大川時與當世賢豪長者上下其議論既侘僚不得志於時而僅以文自見在君以爲說鈴書肆而知者且與經神學海等量而齊觀則君亦可以自豪矣

安岳陶香九女士繡餘草序

孔子曰溫柔敦厚詩教也詩三百篇託始二南太任太姒實基王化家庭教育宮闈爲先里巷歌謠閨襜不廢可羣可怨可興可觀洋洋乎盛矣哉自茲以降代有名媛西蜀一隅席卿雲之遺風挹山川之靈氣家藏和璧人握隋珠浣花夫人傍杜陵之祠宇巫山神女鄰楚國之風騷彤管生華玉臺和艷遂甯楊君仲瑚早歷法曹竭來吳會出其母夫人香九女士繡餘草見示盥薇莊誦悱惻芬芳本謝庭世家傳孔門詩學當夫紡磚月朗鏡檻風低陶寫性情軼劉家之三妹流連光景傲晉代之左芬尤可羨者福慧雙修房教競奏蓋封翁小魯先生樊英下拜荀粲多情疊韻雙聲烏絲格寫倡予和汝黃絹詞據洎夫薄宦頻年吟牋代簡心如結轆思若迴瀾寄蘇蕙之尺書盼秦

嘉之緘札紀事則姑恩有曲發言則女史成箴雖時值亂離而意無衰颯以故齊眉誌慶美意延年仲瑚昆季敷歷清華瞻依庭誥式椽蠡之懿訓引雛鳳之清聲將付手民命爲嚶引讀玉臺新詠媿徐陵作序之才仰絳幔風徽推韋母談經之席戊辰仲春東吳張一塵

蔡望之風雨雞鳴錄序

詩人美仲山甫之德曰柔亦不茹剛亦不吐不侮矜寡不畏強禦孟子亦云富貴不能淫貧賤不能移威武不能屈此之謂大丈夫嗚呼我先民之所以特立獨行撥亂世而反之正者罔不由此吾求諸近世士大夫其能具此德者蓋寡崑山蔡君望之在議壇則發抒正論十駕不疲在鄉里則能禦災扞患冒九死而不辭雖危起居竟伸其志可謂卓犖豪傑也已余以舊主因緣忝在行政之列自民國十年以前未嘗側身議席嗣以鄉人士之選舉濫列省會萬怪皇惑誠如方君惟一所謂不可說不可說者讀望之是編輒有驚鳥累百不如一鶚之感亭林先生不云乎觀哀平之可以變爲東京五代之

可以變而爲宋則知天下無不可易之風俗非吾輩之責而誰責耶世之君子可以興矣

戴叔良從政芻言序

常熟戴君叔良爲三十年前同社老友精勤之色現於眉宇余奔走四方不相晤者二十餘載前歲倦游返里握手道故知君自東瀛習法政歸歷官山西壽陽陽城二縣所至有聲山西本有模範省之稱尤以村制爲之基礎君本所聞以言於省長韓公令至各屬先行調查會軍興不克實行今國民政府委員兼省民政廳鈕公以爲訓政時期首宜仿行村制以君長其鄉邑松江誠重之也先是君曾著從政芻言十篇旬余一言久未報命今身膺繁劇造福梓桑坐言起行不負所學曩者瀏覽劉簾舫汪龍莊諸書以爲親民之官當視茲圭臬但時移勢易民生之憔悴財政之困難有十倍於承平時代者虞詡有言槃根錯節乃別利器以君之才學識必能爲吾黨增光卽以此書爲著蔡矣民國十六年秋日吳縣張一塵

青浦鄒湛如巽廬詩鈔序

青浦鄒生湛如三十年前從余游爲科舉之文余以庚子入蜀癸卯游燕饑來驅人奔走塵俗牽率於簿書期會出沒於驚風駭浪中者二十餘年倦遊而歸得與湛如相見話舊而已垂垂老矣湛如出所著巽廬詩鈔見示讀之意旨高遠波瀾老成其精到處與劍南爲近古人云士別三日後便當刮目相看况余與湛如勞燕分飛蹤跡疏闊不意其詩境之孟晉乃至是也余於詩無所成就偶有撰述等諸牧唱樵吟湛如獨以詩鳴無在而不得考槃寤歌之樂抑所謂予之齒者去其角耶夫亦足以自豪矣民國十六年夏日張一塵

東廬詩鈔序

曩遇金君東雷於汪生星源席次見其高才卓犖逸氣嶽奇傾蓋之餘洒然異之泊君下榻闕園時相過從浩歌倚劍發篋陳書孔思周情勃窣理窟杜詩韓筆斟酌謨觴旣而投袂遠遊弭節燕薊飲馬長城之窟擊筑黃金之臺

春葩鬱而愈揚秋實粲焉可握蹤跡所至藻翰斯披蕤鱸有思迺遂初服長卿賣賦不乏饋貧之糧伯通賃舂欣逢舉案之偶輒復招邀近局胥疏水鄉一日願訪敝廬出所爲東廬詩鈔見示君詩宗仰盛唐不同凡響學王耶之斫地儀屈子之問天金石鏗鏘聲情激越若夫游心冲淡之域極目寥廓之鄉則又指漚鷺以盟心擷荃蘭而爲質蒙叟逍遙之旨淵明閒適之情妙造自然了無罣礙不棄孤陋屬以弁言僕當少壯之年曾學雕龍之技東塗西抹百無一成抗俗走塵此事遂廢況文通之筆已禿君苗之硯欲焚君則尙在綺年已多佳什加以研鍊卓然成家自風雅道衰弦歌聲寂緬懷耆舊登然足音君之是編有如鳳鳴朝陽鴻冥天末也已民國丙子端陽節同邑張一塵

抗戰第三年序

國民精神總動員之目標曰精神集中力量集中抗戰至第三年凡七七二週年紀念自最高統帥以下政府名流之論調散見於各報章雜誌者宜薈

萃成書使莘莘學子如振裘者絜其領觀水者尋其源以符集中之宗旨陳子孝威今之軍事著作家也頃以抗戰第三年一冊見示且曰此七七紀念文或甲地報紙所有而乙地無之其長至二三萬言者精采可縮成什之一或互相引證或反覆申明若繁者簡之畫者渾之枕中祕冊便于取攜如登泰岳之巔一覽而衆山皆見吾以臥病之暇從事於此兼旬矣親爲提要冠諸簡端今出版有期請序之余惟孝威所著若定廬隨筆各種凝事如燭照數計風行海內外聲施爛然所謂用志不紛乃料於神可爲精神集中之明效大驗是編也經目而諷於口過耳而誦於心孔文舉稱正平之言可以移贈其裨益於讀者何如哉民國二十八年己卯立秋後二日張一麐

蘇州文徵乙編序

自言游稱習禮之宗宣尼輿道南之歎吳中文學遂冠他邦大吳巨麗太沖之所揄揚文史汪洋左司於焉推挹典籍所載代有名人握隋侯之珠戶擅和氏之璧遜清之世益扇芬華往聞葉子緣整搜輯遺文網羅別集嘗欲

斷章吳會萃成宏編未竟厥功遽已卽世同年生曹復齋先生儒林丈人騷壇盟主民國初年總纂邑志瀏覽圖書爲蘇州文徵甲乙二編甲編專錄散文乙編全爲駢體惟甲編目錄卷葉尙未寫定乙編徵輯在先成書較備自亭林以次六十四家都凡二十四卷仿吳江陸氏切問齋文鈔之例附以傳略取武進屠氏常州駢文之意限以方隅先生早飲香名回翔郎署暨鄂州出守政績斐然會逢鼎革之期適遂山林之志滄浪亭畔借祠祿以療飢野史亭邊抱遺經而孤往每見其雪鈔露纂手斂目疲淵淵乎金石之聲泛泛乎鳧鷖之侶泊捐館舍置諸巾箱文孫緒長小同嗣音范喬泣硯緬懷祖德將付梓人用以闡揚幽光餉遺學府以余雅素屬爲導言憶當少壯之年喜弄雕蟲之技抗塵走俗學殖久荒有慚皇甫之引言已禿江郎之彩筆他日者能將甲編排比而合刊之則延津劍合牛斗光騰誠桑梓之偉觀詞林之枕祕敢書息壤企予望之民國丙子長夏同郡張一麀

浙西張氏合集序

張子翼成哀其先世一家之詩爲浙西張氏合集十卷都二十人詩五百四十餘首問序於余余受而讀之矍然興曰古之所謂三不朽者曰立德立功立言人之聲音笑貌閱世以後不可復傳將欲追溯先世之功德則文字爲之精神焉譜牒之學不及藝文識者病之顧後之人有其志矣而或先世之文不足觀足觀矣而非累世俱有抱殘守缺之人任其散佚而不爲之所卽欲網羅搜輯又烏乎用吾情今觀浙西張氏之一門風雅世有令聞又得翼成之厚於所親竭十年之力以成此集則夫累葉詩書之澤與夫慎終追遠之思爲可敬也爲可傳也翼成自爲京秩從政餘閒吟詠不輟中間曾宰江蘇之溧陽所去民思頌聲未沫以木強不善事大吏走京師訪友人事變遷世風涼薄勤勤焉舉其本本水源之意以昭先德而示來茲人之度量相越豈不遠哉余家亦系出橫渠自明以上務農於吳江之張家村無可著錄自吾生以上推至明清之際九世皆爲秀才中遭洪楊之亂曾祖以上著作蕩然吾祖吾父詩稿僅存轉徙頻年未能藏編校之役視翼成之所爲又不覺

汗涔涔下也歲次戊午七月吳縣張一麐

謝氏家藏同光諸老尺牘序

風會之所趨事勢之所必至士生其間猝與相遇常人習焉不察智者則燭照於幾先必竭吾才力以赴之然使素所持養者無具一旦見諸行事未必有補於時局之糾紛惟夫卓犖奇偉之士益以踐履篤實毅然有所樹立傳大業於當世垂令名於無窮求諸吾鄉如謝公綏之者可謂難能矣一麐未冠時隨侍先君子於天津寓廬時在清光緒乙酉丙戌間直隸總督爲李文忠公奏舉公賢稱爲體國經野之才民胞物與之量朝命以縣令發直隸其時盛傳公歷任山西河南直隸山東安徽及江蘇諸郡縣災振有大善人之稱洎歸故里則聞城西五畝園有儒孤學堂三年中以電報卒業者八百餘人大半吳中子弟至今蘇籍學生業電報徧中國皆公所手植而養成者也及誦吾友費君樹蔚所爲公家傳乃知公爲秀才時卽潛心宋五子書以身體力行爲宗旨繼入上海廣方言館從德人習言語文字盡讀西人著述能

識海防洋務之竅要又躬歷江海要隘慨然有志於當世之故當甲午中日之役公上書文忠請率舟師從征主張籌款三千萬金購鐵甲及快艦二十號選將督之願辭上海電局而參軍謀書數上不得請遂發憤至嘔血卒以盡瘁公之志雖未售而其忠義勃發固足與日月爭光矣綜公一生心力所萃以晉豫災振爲最著實開同光以來振務之新紀元以經營輪船招商局電報局爲功最高而舉尤創就事後而論幾忘其願力之宏偉而當日民智蔽塞異說蠱起排萬難而成此全國之航業交通機關非任重道遠者不能天下事毀之甚易而成之甚艱是可慨也公謝世三十餘年文孫行惠以家藏同光諸老與公書牘精選付印屬爲序之余不文何足爲賢豪長者重顧念高山之仰止抑桑梓之光榮因撮舉公生平行詣以俟聞風興起之人且見同光諸老與公之精神風采流露於楮墨間有不可磨滅者時局日新風流闕寂後之視今較諸今之視昔又將何如耶丁卯冬至節同邑張一塵

楊樹達漢字之新系統序例序

歐洲各國現在通用的文字多是聲系的不是形系的吾國文字何以是形系不是聲系曾問過燕京大學博晨光君博君告我希伯來以前亦是象形文字自從希伯來改用字母卽如 A 字本是牛角後來借用爲二十六字母的字頭此等例證甚多這樣說來現在國語的音母定不是和歐文一樣的例子麼但是吾國究竟是否全屬形系尙是一大疑問今讀楊樹達君此書說明許叔重說文九千多字中間形聲字有八百多字然後曉得吾國亦是聲系不過聲系中兼有形系罷了楊君說人類先有了聲音然後有語言先有了語言然後有文字這是一定不易的道理試看許氏六書舉江河二字爲形聲的例案吾可斷定原人時代看見江水的洪大就形容他爲江（江鴻同聲故音鴻亦可作音江古音江字必讀洪）看見河水的浩瀚就形容他爲浩（今山西人讀河字如浩字之陰平聲古音河字必讀如醇）所以造江字河字以工可兩個字象他的言語再拿水旁表明所屬字義的符號原人時代說話的聲音雖然不可知然而鹿鳴的呦呦馬鳴的蕭蕭現在的鹿

和馬還是這個叫法（呦呦蕭蕭若以現在讀的音讀他恐怕不對呦當讀一又蕭當讀二又）除非獸類叫法亦有古今的不同不然我這推理法是不错的那麼必先有水流的聲音方造一水字先有火冒的聲音方造一火字亦是一定的了各位好古先生怕有了國語埋沒古代的文字據我愚見自從國語出現以後剖解古代的文字更加精到楊君此書卽是一例講國語的先生們多從音韻學言語學發音學生理學推闡出來前清小學家發明文宇原流盛到極點使後來的讀書人作爲大好材料並不是限定以後的人不准再有變化我們當新舊過渡時代所希望的教育普及不管他什麼方法總使普通中國的小孩子說的看的寫的聽的變成一種東西便是無上的功德騰出小孩子的功夫腦力可以研究各種道理所以我抱定國語是慈善事業一種宗旨讀楊君的書拉雜寫此不能達出我的意思請楊君原諒

孔少霑師遺箸跋

吾師少霑先生易簣後三年哲嗣子闇世兄以遺箸經史孝說八卷強自寬齋詩稿一卷懺廬聯語一卷見示屬爲跋尾余乙酉捷京兆試出公門下執贄進謁如坐春風暨公督學鄂垣招至蓮幕乃患腦病未宿而歸自己丑以至甲寅無緣侍坐乙卯夏秋之間公以孔教事入都得親杖履是時公微患腹疾尙殷殷以國事爲問不圖回籍兩載而遽合龍蛇之讖也公長身玉立藹然儒雅平生無疾言遽色與人語深藏若虛以先世交河府君父子殉難與母太夫人相依如命孺慕之誠老而彌篤其所纂經史孝說自敘鮮民之痛而拳拳於天理民彝孔子曰志在春秋行在孝經公亦此志也孝說僅及四子五經而止史則闕焉其未及成書而已成絕筆耶詩稿未編年月零篇斷紙俱子闇於敝篋中得之吉光片羽安石碎金與聯語同爲餘事曲阜孔氏自巽軒荏谷諸老代有述作公服膺儒先之學而昌明祖訓所志尤閎已刊諸書有曲阜碑碣考與闕里文獻考後先輝映矣余不敏不足以知公之學早承品藻老大無成讀公遺書尤不禁增斯文之痛爾民國九年季夏之

月門下士張一麐謹跋

姚石荃皖中公牘跋

甲午之春始識石荃觀察於京師未有以異也既歸而讀公所爲東瀛學校舉概及東方兵事紀略二書然後知公抱經世之志文學政事卓絕時流蓋考察東瀛學務者公爲先河今其門下士往往擁皋比握虎符蔚爲國器至其言兵事則以大孫吳穰苴諸家與今東西各國治爲一鑪參伍而別擇之斬合於時勢之所宜若夫運用之妙存乎一心非規規於一家之言者之爲也公嘗爲令皖中廿七月三易其地所至有能名其地皆穢悍難治又凶荒盜賊天時人事之交窮大吏舉以屬公爲之設力略定規制掉臂游行于荆天棘地之中卒著殊效虞升卿有言槃根錯節斯別利器豈不然哉愚無知於公所學渺不能測涯涘願以捧檄畿輔竊有慕乎公曩者之政聲思所以請益者公乃授以和陽存牘暨石懷牘三冊命爲校字且詔之曰吏事因時地爲變遷余所爲皆意造不泥古人成法也受而讀之大率以國僑敬仲

之規行呂父杜母之事其防務荒政非通人而兼惠人者不能爲惜其他判牘零落僅存要亦非抗塵走俗者所可一二遇也公今者受特達之知行將大用以成尊主庇民之盛業但陽明心學發軔於龍場清端治行得力於羅城則是編也又烏可以無傳光緒甲辰陽月元和張一慶謹跋

繭蕉盒詩詞稿跋

吳蔗農君爲乙酉鄉舉同年君長余二十九歲文壇老宿獨引余爲忘年交當清光緒己丑壬辰間君賃居柳貞巷胡氏屋余所居祇隔一家時余館盤門汪氏每三日歸省則君已催促者屢矣君雖貧乏然晚食必以酒余年少亦嗜飲輒爲座客劇談暴謔余被酒好爲大言君曰汝病在狂吾病在復自今以後字汝曰去狂自字曰去復余聞而深讖兩人書札卽以爲號也君壬辰以進士得縣令需次江西余留滯里門向所謂性情學問之交深嗟離索泊余蜀游兩載君不得志於當局罷職還鄉居於一壻夏若臣寓所猶及見之嗣余北上津門聞君已歸道山此繭蕉盒詩詞二冊固四十年前常見之

於案頭者單君束筮一日袖以見示云得之於王君芷仙王君爲君之第三壻其夫人爲君之季女猶記君遺嫁時余在賓客之列使今而君猶在者殆將百歲矣人琴之悲滄桑之感三復是編百端交集君詩皆千鍾百鍊而格律極爲渾成所爲文及制義尤夥僅此二冊吉光片羽彌足寶貴集中題先王父生餘詩草至今手迹猶存集眉評語係王潤之同年手筆今亦宿艸矣其見於詩篇者惟余與俞階青同年尙在耳君無子有女子子三人長適潘次適夏三適王此集獨存於王氏不可謂非幸事他日者求吾蘇寓公遺著若能選刊傳世以慰九京之靈則尤所望也

吳堯圃山水册跋

右吳堯圃麀山水二十幀格韻清超墨采噴溢是取徑癡黃而得巨僧三昧一種疏散簡澹之氣堪入神品無塵俗犯其筆端是册爲鄧尉山人徐友竹所寫旋歸柳質卿以贈許翁鶴巢余於宣統間購諸楊馥堂據昭文蔣霞竹墨林今話稱堯圃爲江西人李艾堂云歙縣人畫學黃子久長於小幅得熟

中熟法居揚州鹺商汪貽士家有君子風吳江張玉川看雲樓題跋則謂堯圃用筆追蹤董巨出入元四家論畫詩云江西詩派妙別出堯圃畫筆多清姿元人堂奧爾獨入一空世俗波瀾瀾鴻勳於乾隆間與纂南巡盛典亦老依汪氏向於畫不輕許人而於堯圃獨傾倒如此徐堅字友竹邑之光福人工篆隸鐵筆山水法麓台司農初客長安入畢秋帆幕已而遊楚客陸朗夫中丞家中丞病且貧而友竹盤桓不忍去至護其喪以歸世以此重之著有親園詩鈔烟墨著錄西京職官印錄等書柳商賢字質卿橫金人爲馮中允高弟官浙江寧海知縣余丙戌會試與同寓晚居木瀆遂初園著有橫金志蓮菴詩文鈔許玉琢字鶴巢光福人余於丙戌己丑間謁見之工詩古文詞與汪芑繆希賢相友善其尊人鳧舟卽友竹弟子故柳氏跋中稱鶴巢言先代與友竹有淵源也又據澡雪詞人親園詩鈔序則有友竹館於邗江汪敬亭氏十餘年一語堯圃是册或卽作於是時文墨因緣客中酬酢誠如阮文達所謂名流相遇泱醴快心者矣前輩風流猶堪想見淪茗展觀勝於宗少

文之臥游也

湯濟武爲梁伯強尊人震三先生墓碑文稿題詞

余年十六時得五台徐松龕先生瀛寰志略讀至華盛頓故事輒爲心醉自忖民主政體安得及吾身而親見之及辛亥革命政造共和則狂喜以爲夢耶信耶誠吾國而有華盛頓其人者則生民之禍可息何至泯泯勞勞若是哉徐先生晉人也吾交晉人士得梁君伯強伯強長余五歲而於歐美學者之最新學說如數家珍縱心孤往突過少年竊心服其爲人今觀濟武所爲伯強先德震三先生碑文乃知其私淑徐先生師友淵源有自來矣余之識伯強也實由濟武濟武抱經世才游美之役中道而殞余與伯強今歲爲天台雁蕩之行共數晨夕追憶舊雨相對愴然茲誦遺文墨痕宛在令百年之後梁氏子孫出以示人曰此中華民國革新鉅子薪水湯公之遺墨以生命易共和者也吾安知今而後吾國遂無華盛頓其人耶則濟武將含笑於九京矣

寶積傳衣圖題詞


今歲中秋余因贛鄂構兵往來潯漢間效宋鉞之役吾母太夫人在滬棄養匍匐奔喪以秋末扶柩入城中寶積寺卽寺爲廬因與方丈德林相過從德林出陸君廉夫所繪寶積傳衣圖見示圖中故事具見昌碩鶴逸栩緣鈍齋諸老題記不復贅言康熙志言寺址爲要離故宅曲園老人碑記亦及之吾吳號文弱然當春秋時要離專諸皆邑人二千餘年壯士之居今爲念佛道場努目金剛化爲低眉菩薩佛家以貪嗔癡爲大戒以三者卽殺盜淫之起源人欲橫流天理滅絕飲食男女之極端卽搆探奸淫之獸行僧人以持齋減飲食之孽以出家絕男女之防雖於儒者之道或嫌其過而慈悲度世誠火宅之甘露苦海之慈航也余宿寺中已久因太夫人安窆有期書所見以歸諸德林使寺中永永寶藏之

潘智菴臨懷琳草書卷子題詞

吾鄉潘氏自三松老人以書法名於世一門羣從蔚成風尙若星齋侍郎若

吾師鄭盒尙書皆卓然成家片紙零縑爭相藏弄其潛伏里閭並飲香名者若磨生先生之篆習菴先生之行草亦復紙貴一時不可磨滅習盒魁梧善飲啖金石校勘無一不精此卷臨懷琳絕交書爲吾友單俶笙君所藏雄厚流麗潛氣内含俶笙曾學書於習盒什襲收藏令人增師友淵源之重且以見同光間文采風流溢於楮墨固猶是升平景象故士大夫得以藝事專精更不勝今昔之慨已

心太平室集卷二



心太平室集卷三

吳縣 張一慶 仲仁

上巳修禊記

蓋聞采蘭溱洧讀薛君之章句流觴曲水澤元長之序文禊事之修由來舊矣歲在旃蒙日惟上巳滄浪之北南園之南面山帶川前城後市因茲麗矚遂集勝流友朋兩三折柳代簡池水徑寸圍花作城裙屐于焉相羊蘋藻貢其斌媚遂乃切銀餽敞瓊筵酒未畢客有起而言者曰昔者華林宴集灞水祓除竝際昇平導揚風雅今則海氛不靖邊垂被圍乃吾輩枕戈待旦之秋非搔頭弄姿之日也鄧禹笑人祖生先我百端交集何以禊爲余應之曰禊事之永首數會稽右軍兩絕遂已千古觀其所謂情隨事遷感慨係之者匪特流連光景而已蓋有撫髀興感之思焉典午之朝清談是瘡高論寄於塵尾名士多於鯽魚右軍以高世之才在大隱之列觀其止殷浩之役論謝萬之書萬旣下蔡潰師浩卒安西失律斯其先識無愧知賢無伯倫之沈湎有

嗣宗之塊壘斯則視今視昔隱寓夫離愁一觴一詠匪訊於通脫者矣茲者封狼薦食竹虎交馳材官疲於蹶張戍卒膏夫原野而吾輩猶得從容文譙俛仰物華東望薊雲烏能已已者也若夫習視聽之娛忘薪膽之志走無取焉禊已畢因拾與客問答之言而爲之記

誦芬堂雷氏興學記

吾邑自宋范文正公以宗法創爲義田舉國化之吳故文正鄉里九百年間世家巨族濡染者久以故義莊林立甲于全國近世校邠馮先生議復宗法又變通文正之義而推廣之今去校邠之世又六十稔矣科舉廢而學校興宗族主義小而國家主意大使范公生於今日其不僅以敬宗睦族之義田爲限必矣親親而仁民仁民而愛物聖人彌綸天地之道固如是也吾觀於鄉廡合於前之所云者莫不曰雷氏純一先生先生高祖字允上著醫書甚夥而設誦芬堂藥肆於閭門天庫前世傳其業洪楊之役肆毀於兵先生自賊中逃至上海釀金復舊肆於滬寇平復分設於蘇撮古方爲丹丸而六神

丸爲尤著世所稱雷允上六神丸者也風行中外日本政府視爲漏卮取締之誦其方不可得亦終弗能制不脛而走家以大贏然乃自奉極薄好施於人與王酋山尤鼎孚諸鄉老釀金購米以飽窮嫠公沒而中輟令子文衍善承先志與吳君硯農暨族人之賢者規復舊制歲額至四百七十人文衍又於民國八年助田一千二百畝爲基本金創設純一小學卽以先生之號爲名學有免費額二百以濟孤寒子弟而來學者頗有受餼嫠婦之孤兒先生之遺澤長矣始賃舍於通和坊人浮於舍乃就吳縣已廢學宮墻地鳩工庀材計前後期畢業生一百三十七人十四年度於小學四二制外增設兩級中學得一年級生五十四人益以小學部三百四十九人都四百十三人基本金田價估計十萬元建築及先後補助費約三萬元吾吳積善之家蒸爲風俗至以私財設學無慮鉅萬如雷氏所爲者近世未嘗有也昔范公云不爲良相卽爲良醫先生之風視文正亦何愧焉君子達而在朝則思陶鎔一世之人才於匹夫匹婦不被其澤者輒引爲己疚窮而在鄉則竭吾力之所

及推仁于鄰里鄉黨以完其萬物皆備之身視彼美田宅肥子孫使賢者損智愚者益過其賢不肖之相去豈不遠哉吾以是卜雷氏之日昌不令高平義園專美於前世之君子可以興矣先生事跡余同年生鄒君嘉來既爲之傳尤丈先甲吳君蔭培李君永齡皆有題記茲不具書書其犖犖大者如右

杜氏家祠記

周禮以九兩繫邦國之民八曰友以任得民曾子曰士不可以不弘毅任重而道遠龔自珍解之曰任也者俠之先聲也俠起先秦間任則三代有之周公與曾子之道也吾讀司馬遷游俠列傳恨秦以前匹夫之俠湮滅不見而盛稱漢有朱家田仲王公劇孟郭解之徒以爲私義廉潔退讓有足稱者而下無賢與不肖知與不知皆慕其聲何令人之景仰一至於此蓋戰國四公子之徒皆馮藉豐厚雖好施於國不足爲奇乃若名不出閭巷之間生不遇王侯之庇而羣衆歸往如水就下豈非卓犖大丈夫也哉曾氏國藩曰十室之邑有好義之士其智足以移十人者必能拔十人中之尤者而材之其智

足以移百人者必能拔百人中之尤者而材之同氣相求同聲相應豈不然哉杜月笙先生今之振奇人也居滬數十年爲各國領事所推重清道光後五口通商當事者不知裁判爲國權而付諸領事足爲不平等條約之一先生委曲以全國體弭患於無形之中凡租界達官巨商萬口稱仰近如水電廠之役法水兵酗酒毆斃商務印書館司事及舢板夫之案徵先生苦心調解守正不阿幾足爲辱國殃民之舉其尤爲人難能者公益善舉無役不從如學校如醫院如振災會如習藝所身爲董事者計十有八至冬夏施衣贈藥至纖至悉樂此不疲海內外均目爲善人今又於本籍建宗祠設族學將涓吉日修祀事四方於是乎觀禮一塵嘗讀老氏之言曰旣以與人已愈有旣以分人已愈多吾始而疑之今益信之觀夫樂善不倦至傾其家資者雖閱三數百年其子孫往往寢昌寢熾而刻嗇擊吝之輩不三世而過卽爲墟然後歎老氏之言真名理也又讀桐城張氏筆記稱某道人爲人運氣治病贈以財物則曰天下之物何者屬諸我病家曰此微禮勿過卻道人嘆曰

天下之物何者屬諸爾蓋天下爲公無我無爾君子以杼多益寡稱物平施掠奪人有者固不得藉口以釀亂源而蘊利生孽諡爲大愚宜其爲道人所訶而先生所目笑也余故推本於周公曾子之言以詔世之迷而不知返者聞先生之風當奮然興起焉至杜氏祖德宗功有家乘在茲不箸箸其犖犖大者先生行事未暇詳舉要使後世誦吾文者知吾之讀史遷游俠傳千載下尙虎虎有生氣也

陽山十八人祠記

嗚呼明清鼎革之際江浙數大案幾將讀書種子一網打盡其摧陷士氣使後死者不敢張口談天下事亘二百六十餘年而辛亥革命之事興其間斷脰抉目無所控訴者不知凡幾吾蘇順治十八年之哭廟案亦其一也余去冬至滄關丁君南洲方爲區長與余有中表誼同游陽山山之東麓有土地廟塑象十八人衣冠各異丁君告余故老相傳卽哭廟案中同難十八人之象丁之上世有仲初公觀生紫迴公觀瀾詳丁氏宗譜與痛史所刊哭廟記

略二公皆秀才有聲於時其十六人姓氏但
今婦孺皆知之南洲又曰哭廟諸生懷光衍
嘉興友人書中多不諱語故借哭廟事以罪
哉宗譜云近傳同難十八人已爲神清初林
訟言姓名丁氏自宋以來世爲吳中大家自
鑒于二公文字之獄有隱痛焉南洲服務中
中蹇然舉首席政告成茲復請於丁氏長老
人景行興起雖年代迢隔而無不發之幽光
亡匹夫有責庶一變二百六十年吾蘇畏苦
先聲其所繫豈不鉅哉他日者能訪十八人
某之神則尤使人景仰於無窮也記略稱其
骨不敢歸里不能辨殯葬之所專制時代之
獄之巡撫朱國治移節雲南以刻剝軍糧

幾亦爲巡撫韓公世琦因別案斬于江寧之三山街天道好還亦可爲無罪而殺士者儼矣中華民國二十一年元月邑人張一塵

重建闕里分祠碑記

自歐洲物質文明之極潮而得空前之大戰於是彼之學者有西方文明破產須待東方文明以濟之之說西人在華者若莊士敦衛斯琴莫不舍其所學以研究孔子之學東海西海此心理同也大者君師合一政教不分自孔子集羣聖之大成有其德而無其位其微言大義具在易春秋二書自周以後漢唐小康之世大抵稍近於孔子之一端而其餘陽有崇聖之名陰行雜霸之術歐洲十八世紀稱黑暗時代秦後二千年其亦中華之黑暗時代乎明清以來各郡縣均設文廟其例不能立廟者變其名曰闕里分祠蘇城通貴坊其一也按志始於清雍正二年至乾隆三十七年知府孔傳炯責成府學官兼管祠有田五十畝歲二祭支長元學租銀五兩庚申洪楊之役燬於兵祠址爲鄰居侵占光緒間陸潤庠等呈請巡撫奎俊撥款修復以費絀工

鉅先建圍牆民國肇興此項祠田縣署移交教育局款產經理處僅存田三十六畝有奇繼改歸學款處兼管本年學款處董事函請吳縣知事將歷年祠產收入爲規復祠宇之用先建祠屋兩層計若干椽用銀幣一千四百六十三元有奇董事孔君昭晉爲孔子□□世孫督余爲文記之余嘗游孔子廟堂穆然想見聖人之遺澤曩者禮運大同之說天下爲公幸及吾身親見之又值東西文化結合光明之有其兆也輒著於篇質諸吾鄉之躬行君子是爲記

市北公學建築紀念碑

言論理學者分家庭倫理國家倫理社會倫理爲三寶卽孟子親親仁民愛物之旨論者輒謂吾國倫理偏重家庭而於國家社會之觀念殊形薄弱此豈先民之本性哉閉關日久而專制帝王箝制人民之餘毒不願世有任俠者之以財得民也海通以來滬上士商慕歐美富人毀家興學之舉若葉澄衷楊斯盛者慨施母財大開廣廈名垂當世澤流後人無論識與不識皆敬

之重之視彼蘊利生孽者其度量相越何如矣吳興唐君伯耆鑒於上海市北無良小學致教育權旁落遂於民國四年捐資創設因其地勢卽以市北名焉翌年爲推廣校務計商之在滬名流及朋好同志者組織校董會先後加入者如李君登輝吳君和士等或常捐歲費或規畫進行馮君靜岩首倡基本金千元縉業同人亦歲有扶助於是入校生徒如水歸壑科目規制孟晉迨羣參觀者嘖嘖稱許成市北教育重心矣九年下半年期男女生突增至五百餘名校舍不復能容唐君乃向校董議建築新舍詢謀僉同公舉簡君照南爲籌備委員長簡君乃首認捐金二萬元及南洋烟草公司股分千股爲基本金王君一亭錢君新之吳君蘊齋等亦分認巨資爲之倡於是勞君敬修等各竭力解囊奔走贊助凡政商各界莫不慷慨樂輸尤以黃君奕住款爲最巨不一年而一部分校舍落成計用金七萬元並擬添設中學增辦商科推廣名額當唐君發願之始豈料有此盛況登高自卑積小成大固由唐君心力之宏毅抑海上諸君之急公好義對於社會國家之責任如此其

勤劬也孟子云分人以財謂之惠教人以善謂之忠爲天下得人者謂之仁一舉而三者俱備是真我先民任恤之精神足以風世而移俗者和士屬余爲文將壽之貞石余故樂爲敘次俾覽者有所感焉民國十一年上巳日

嚴裕棠先生蘇綸紡織廠碑記

出盤門百武許層樓竦峙機牙怒鳴則蘇綸紡織廠在焉自清光緒甲午後官商迭主之興廢無常屋宇傾墮舊有紗錠二萬二千五百六十八枚皆已窳敝民國十四年夏上海嚴先生裕棠賃此廠以爲產權不一末由自振折閱隨之越二年冬將所有權全部移轉朽者新之危者易之凡頷頽土木丹漆之工綿歷歲月至十七年秋末歲事百工部居不相雜廁迄無近今所謂工潮者十九年春增設新廠一所計錠二萬枚二十年春又續增新布廠一所計有機三百臺漸增至一千臺其機械則出諸手剝之大隆鐵廠其資本則勿諸其親串執友不假募集自成一家其勤工也各廠均有膳食堂疾病有治療所聘良醫分日省視其專任駐宿者二人女護士一人藥劑由所給

予之工之子弟有小學校宿廠工徒有工餘補習班慮其往返費時則設工村爲樓三百楹雜蒔花木平治道路園亭之美息焉遊焉其心安焉工之以死勤事者有振恤遺族金老病者有贍養金其時間則漸求縮減而程功特多公子慶祥等皆嗜愛科學絕游惰而責勤能彈指華嚴異采呈露觀者嘖嘖稱爲模範工場乃以盈羨力行其德甘棠橋者圯不能支先生獨力成之卽以其名名曰裕棠橋行人稱便其他利益人羣之善舉知無弗爲視彼蠟嗇以自肥者如燭龍之與燭火焉是足以風矣一廛從嚴氏喬梓游時時與游宴見諸孫蘭芬玉潔執弟子禮甚恭余以是知嚴氏之寢昌寢熾將大有造於邦家也是爲記中華民國二十年歲次辛未仲冬東吳張一塵記并書

捐建吳縣圖書館奚萼銘先生立像紀念碑文

我邑之有圖書館也自江陰奚君萼銘特捐建築費五萬元始是舉也非慷慨好義而知以啓迪民智爲亟者不能爲焉今斯館成立逾十稔矣得主其事者之殫力經營卷帙日富閱覽者亦日衆教育當軸追溯厥始議爲奚君

鑄像以留永念館長楊君俊屬張一塵記之爰書其事而爲之銘曰

淪智濬靈典籍是資吳中文史網羅尤宜圖書之府貴先植基匪金奚營懸
久莫施澄江奚氏慨斥巨贖鳩工庀材爰啓宏規巍巍館舍面園背池插架
萬卷二酉可窺福我士民惠彼羣兒閱十一載成績冠時厥功奚自飲水有
思允宜百世鑄金事之

水上公安隊游擊隊隊長李公殉難碑

民國紀元以來兵連禍結猿鶴蟲沙自將校以至士卒死於相斫者何可勝
道獨其爲民扞患奮不顧身以保衛閭閻壯志未酬齋恨以沒如李公蘭生
者誠令人思慕不置也公諱國斌湖南平江人束髮受書慷慨負大志清光
緒三十年考取安徽武備學堂越三年畢業爲隊官時革命風潮先發於皖
戊申太湖秋操熊成基起義公亦與焉事敗賴友人援救得脫辛亥武昌首
義糾同志說防營獨立任北伐挺進隊總隊長會和議成南北統一爲第三
師冷公禦秋部下營長癸丑討袁之役師敗亡命海上入中華革命黨嗣後

奔走湘事參於謀密十一年隨譚公組庵率師援粵任湘軍第六師二十四團團長由郴永會師羊城以解東江之圍十四年回籍省親偵察長江形勢適冷公任江蘇水陸警備總司令留以自佐公頻歲從戎頗厭兵事深願以除暴安良爲天職效忠於警察一途遂由副官長遞遷爲水上省公安隊游擊隊隊長任職四年數禽巨憝顧太湖濱臨三省盜匪出沒靡常自甲子以後潰兵游勇更相勾結不可爬梳沿河村落蹂躪無虛日公與第三區區長兼太湖剿匪指揮龔君汝霖日夜籌防臆舉方略龔君倚如左右手今年一月十二日奉令率部出發十三日午後駛抵吳江縣屬之四都村遇匪激戰內搏衝鋒歷五小時之久匪憑圩抵抗公奮臂疾呼身先士卒爲敵彈射傷胸脅洞穿肩背而踣晚八時始爲從卒尋獲遺骸載歸蘇州閶門外丙舍識與不識皆痛哭失聲游擊隊部駐舊工兵營距楓橋咫尺楓橋居民以公生時部勒隊伍麇市不驚有朱邑桐鄉之遺愛羣謀立石於寒山寺中以表哀思而屬一塵爲之文昭示來許銘曰

具區之濱崔苻所窟洸洸李公風起焱發誓掃羣醜爲民復仇奮臂裂毗生
命蜉蝣輿尸載道哀動方陬人誰不死貴得其所所以死勤民九霄一羽楓橋
細柳靈兮旁皇緬懷遺澤山高水長樹此貞石千秋不忘

陸軍步兵中校馬君玉奎墓碑

自世風涼薄人倫攸斁舉國競逐於功名之會往往忘其身以及其親求其
內行敦篤澹泊自甘惟以先意承志博親心之歡而其他皆非所問此在士
大夫猶難之况生長卒伍之間馳騁疆場之上方且擁高牙建大纛頤指僮
婢呼叱材官而乃終其身爲孺子慕謂生平之樂無逾於事親如馬君者斯
足貴已君諱玉奎字仲良江蘇鹽城人性沉默不苟言笑或稱人廣座朋輩
斷斷持短長君至則罕譬而喻糾紛立解類孔子所稱夫人不言言必有中
者君少孤事母至孝馬氏世習農業所居里曰馬家樓君之考捷三府君任
俠好義有聲鄉里間當清之季君妣董太夫人以國勢積弱尙武爲先命諸
子投筆從戎勿爲章句之學故君年少時卽精射擊所發鎗無不中的者一

時良家健兒皆奉爲渠率民國初元以功充連長遇新興上岡緝私營叛變所過騷然君率所部奮勇彈壓良民賴以安全鄉人德之君於是嶄然露頭角矣二年君伯兄玉仁以揚州混成旅長奉政府命攻寧君是時已擢升營長慨任前鋒轉戰而前所向披靡其在軍中談笑指揮若治家人簿籍不動聲色事無不舉有陶侃謝安之雅量焉寧垣既定以功授陸軍步兵少校還駐鎮江之舊都統署士民安堵塵市不驚通衢大道間不見兵士蹤跡鎮江人每稱其軼事至今不衰四年伯兄玉仁開府淮揚君由營長改任鎮守使署副官及第三師軍械處長等職因功奉陸軍部令補授陸軍步兵中校給予五等文虎章又以緝獲陳小獅子一案給予二等藍色獎章於是董太夫人春秋高矣伯兄玉仁與叔弟玉懷皆銳意治軍不遑將母季弟玉崑又早逝太夫人哀慟之餘時臥病輾轉牀簀君乃絕意進取身任扶持抑搔下逮廁牕中裙之役必躬必親使太夫人忘其疾苦時其起居玉仁奉檄出征歸省太夫人依依不忍離膝下太夫人語之曰汝第以國事爲重勿念老人吾

有次兒在旁朝夕無所苦蓋君當其兄淮揚鎮守使暨護軍使任內謝絕兵柄先後十年一以母之欣戚爲己之盡職與否書云孝乎惟孝友于兄弟施於有政君其有焉彼世所謂顯榮者君固不省也十一年冬太夫人壽終君哀毀骨立痛不欲生未御祥琴已摧恆幹於十三年太陰曆三月初五日卽世春秋□十有□曾祖祥林妣卞氏祖俊士妣劉氏考京元字捷三妣董氏三代均以玉仁貴贈如其官配吳氏繼配楊氏女一益貞無子以季弟玉崑第二子益泰爲嗣余曾爲捷三公蘊幽之文今玉仁又以君事略屬表其墓君之孝行卓絕宜書以詔後人乃爲銘曰

絕裾太真倚閭王孫名纒利鎖或薄其親君獨矯矯日奉晨昏上有賢昆國之貔虎君曰往哉予惟室處豈不欲往有母尸喪寢門侍疾言笑雍容終身之慕不有其躬粵在禮經毀不滅性賢者過之順受其正閔茲孝行孺立頌廉千秋萬歲佳城是瞻

褒揚節孝魚母陳太夫人碑記

鹽城魚君鳳鳴爲其嗣母節孝陳太夫人建坊於縣治沙溝市東北鄉魚家莊魚氏宗嗣之前將於民國十三年六月十五日行落成禮介余友朱君紹文徵詞以彰節母之潛德蓋距節母之歿已三十年矣朱君且曰鳳鳴於當局諸將佐均爲布衣交然持正不阿實爲同輩所敬畏余雖未識鳳鳴第以朱君之言益信鳳鳴之克自樹立其漸漬於母教者有自來矣節母姓陳氏湖北孝感縣宿儒立元公之女江蘇鹽城縣魚公潮江之妻前陸軍第二十三師正軍械官現任直隸全省稽征稅務總局副局長魚鳳鳴之嗣母也年二十一歸於魚婉婉聽從動中禮法歸五年而夫潮江公擗疾節母朝夕侍奉籲天乞以身代不幸潮江公沒痛絕將殉之翁姑泣謂曰若死誠善願遺孤才三歲吾兩人且暮且不保程嬰有言死易立孤難願婦爲其難者以存若敖祀節母收涕謝曰老人言是敢不勉以慰夫子之靈自此遂不復言死清咸豐間洪楊竄東南鹽城一彈丸地警報日棘節母改裝毀容護持翁姑間關避亂晝不敢舉火夜不敢安枕聞兒啼則匪卽尋聲至節母襁負其子

攜一家細弱輾轉伏匿九死一生務得老人之歡心而後已潮江公之沒也其弟潮淦潮湘潮深均年幼未娶羣弱妹皆在室未嫁節母率先習勤人有一定程家無廢事以長以教俾各底於成立獨遺孤不幸於十一歲而夭折天之所以厄節母者亦甚矣後潮深生子鳳鳴以後潮江呱呱墮地卽納諸懷然節母雖甚愛鳳鳴而教督不少懈旣入塾每考問所讀書背誦不熟折蓼責之一跬步有不如法者必痛繩改悔而後止旁觀者以其非己出也或疑爲過嚴節母曰吾惟此一子苟長而失德何以安夫子於地下暨鳳鳴拔起孤寒揚名軍籍而後嘆節母之賢明爲不可及也綜節母生平數十年遭舅姑大故者二爲諸叔娶婦者三又爲諸姑擇嫁爲嗣子授室舉養生送死盈歉有無胥以一身任之晨炊夜作口不言勞諸娣姒次第入門羣視冢婦一人爲進退躬艱而讓易圖匱而致豐閭以內杼機之聲軋軋然刀尺之聲琅琅然閭以外某也耕某也讀某也工商秩秩然自潮江公卽世兩老在堂幼稚滿室寒燈敗絮饑殮不給節母含辛茹苦竭力支撐迨家道日隆仍持以

節儉居家常訓其子姓以無忘寒素家風鳳鳴爲製新裘一服輒易其故者曰人之衣食有定命惟惜福可以長年故終其身不以惡衣惡食爲恥顧節母自奉極薄而仁慈根於天性雖處窮乏往往推食解衣下至廝養亦必善視之使各得所逮晚年熱心善舉不懈益勤有所貸分之財有所負焚其券凡救災施賑之舉靡不爲也秉性貞靜以禮自持浹月經年不出閨闈春秋佳日戚屬游嬉必避節母勿使見闔外之言相戒勿使節母知自夫沒之日長齋繡佛惟與沙溝之大士庵老尼參禪互證精修淨土歷四十年當清光緒十九年十月五日無疾而終年六十六歲民國十一年魯直豫巡閱使以節母事上之中央政府如例褒揚奉大總統先後頒領扁額褒詞爰撮舉事略助諸碑珍以示無極

論曰古之名賢大抵得於母教爲多而以節孝之母成其子之賢者如劉念臺張楊園李二曲顧亭林李剛主尹元孚張皋文諸先生皆博學高名彪炳海內子以母而成其賢母以子而顯其節然則人子求所以揚其親者固有

道矣鳳鳴行誼不減昔賢蓋節母之以身教者流澤長也

許母郁太君暨孝女大姑五姑祔葬碑記

吾友許君博明籍隸吳興潯溪僑居吳門三世矣家本素封藏精蘊善本至夥插架鱗鱗性忼爽赴義如渴吳中賢士樂與之游嘗述其祖德與繼祖妣郁太君之賢且曰吾繼祖妣葬於蘇未與祖考合葬於潯獨以兩孝女祔是有故焉不可以不記請子爲我聲諸墓道之碑余與君雅故其何敢辭按太君郁氏吳縣處士子淵公之女而許太翁樹棠公諱莖之繼配庠生永清永昌之繼妣實博明之繼祖妣許氏先世自歙縣遷潯清咸豐洪楊之難家業蕩盡樹棠公棄儒學賈遇肆主廉知其誠信可倚畀乃盡委之是時商市隆起主客俱羸輾轉賈遷遂以隻手起家富逾百萬公先娶婁繼娶王皆無出早歿訥知太君賢乃聘爲繼室來嬪之日家道猶艱重慈在堂諸待孝養乃移其所以事親者事兩世孀姑使樹棠公盡力於外無內顧憂生丈夫子二永清永昌永清有文名三十而卽世遺孤卽博明也永昌知醫好施貧病就

診者率不取資多數全活女子三大姑四姑五姑惟四姑適劉餘兩姑俱長齋奉佛撒環不嫁以待其親大姑遭其兄永清之喪日夕飲泣不百日而殞五姑年最幼孝行尤篤太君有疾衣不解帶親奉湯藥嘗曰我母百歲後我亦及期而逝果也於太君棄養之周期後二日患心痛而亡嗚呼孝矣先是樹棠公會置田宅於吳中藉娛晚景太君以生長桑梓徜徉山水寄託遙深乃於善人橋之北竹塢購地畝許命爲生壙博明以先塋在潯頗滋然疑請諸樹棠公公曰汝祖母旣愛吳中佳勝且兩女純孝以終將來可成汝祖母之志以大姑五姑祔葬延陵季子所謂魂氣無所不之奚規規於詩人同穴之說哉博明受命不敢違太君躬含章之德廣樛木之仁頂禮法王樂善不倦以恭儉好學訓子孫宜許氏之日昌也贊曰

翳惟賢母言規行矩相夫宜家報以孝女穹窿之麓爰度神宇千春萬秋則篤其祜樹諸豐碑昭茲來許

錢母孫太君墓表

無錫有才士曰錢基博其名噪於大江以南吾友南通張謇稱爲江以北無能抗顏行者吳江費樹蔚則曰豈惟江北卽江南亦豈有第二人予聞其名而未見也會錢君以費君爲介貽書津門寓廬以其母孫太君行狀屬予文其墓道之石且曰小人有母棄養七禩未嘗句人爲文非敢緩也蓋有待也予受而讀之則又未嘗不歎錢君所以砥德礪行發爲文章其得於家庭之教者非偶然也案狀太君孫氏諱某字某祖諱沛考誥贈榮祿大夫江蘇溧水縣教諭諱元楷年二十孀於錢爲祖耆先生元配子四基成基治基博基厚女二素琴月琴基治先歿基成優行附生基博以書生參淮上軍事以民國七年八月授陸軍少校加中校銜基厚爲無錫縣知事掾屬掌教育太君歿於清宣統二年十一月十三日年五十有九翌年四月葬於開原鄉徐巷之原孫故高貲富室而祖耆先生家素貧寒旣嫁卽屏除服飾豐嗇不改其常度得失無介於容儀雍睦娣姒姊妹妯娌列屋如雞棲機杼之聲相聞湫隘交錯怡怡然閭閻然未嘗有違言諍語也祖耆先生沈厚有大略望之寬

仁長者然遇不平事慷慨激昂不避強禦急人之急家人生事不誰何門內之事一委太君幼躬承將敬事夫子三黨姻戚吉凶饋問之禮秩然不廢其教子也且暮課讀不輟背誦無躓字然後已其愛子也均平如一雖壯無異嬰兒詔以寒暄餌以瓜果餽醢莖羹手自調糝其視諸子婦未飢而錫之食未寒而命之衣有疾則爲理湯藥誠無起視雖在彌留猶促令歸寢慮其過勞視母之愛女有加焉其治事也早作晚寢饕餮必躬賦事程功有程有要入其室樵枷必整枕簟必斂箴管縠裘不易其所珠翠勿耀膏澤勿施衣不重帛歲時賓祭始御新衣不持齋不佞佛不信陰陽祈禱之事其明於大義不惑於世俗瞽巫之習尤爲人所難能自世衰道微婦德日墜往往馳驚于紛華跡弛之俗于古者胎教之美內則之馴謹往往以爲迂遠而不屑道源之不清而欲流之潔得乎綜太君生平相夫之敬幼幼之慈齊家之肅貽謀之勿墜先志皆足以爲世法宜其篤生賢哲光大門閭可不謂賢乎哉予不文未足以表太君潛德因著其大者使後之人有所感焉

故勳三位陸軍中將昆明繆君墓誌銘

君諱嘉壽字延之姓繆氏先世籍江南明初有諱彥德者徙居昆明十五傳至君祖東森公清咸同間以扞衛鄉里功薦州同不仕隱於商生子五君父楚珍公居長有丈夫子四人長次不祿惟君與季弟嘉銘有聲於時君年十七爲縣學生慨清政不綱棄舉子業入雲南武備學堂總辦柳旭器之錄送日本學士官因病不果行畢業後任巡防營管帶駐守石屏拊循閭閻迭獲巨匪旣而謝事遠游期交並世豪傑騰越李公根源適歸自日本遇於廣州要歸滇襄辦講武堂時革命之謀彌於全校發縱指示君悉與焉光復後任軍府高級參謀隨李公出巡迤西爲總司令部參謀長時宇內戰事方殷西陲一隅人心兇懼君機牙四應使迤西三十餘郡轉危爲安其功有足多者元年三月都督蔡公特任爲大理陸軍第七團長軍民翕和頌聲洋溢奉大總統令補陸軍步兵上校給予三等嘉禾章二年回省任陸軍製革廠廠長督署軍需課長掃除積弊勞怨不辭癸丑以後中央恃勝而驕君揣知不免

於戰以故蒐集軍實不遺餘力護國軍興饒精不匱君固計之熟矣出師以來任軍需總監兼步兵第十九團長旋升任第九旅長軍務院參謀部第二部長專任後方勤務苦心擘畫卒成護國之勛袁氏既殂黎公繼位充善後代表入都事竣回滇奉令晉陸軍少將簡任雲南財政廳長復調任陸軍第二衛戍區司令兼蒙自道尹在職年餘政聲鵠起南防之民稱道勿衰晉陸軍中將授勳三位給予二等嘉禾章二等文虎章南北議和奉軍政府令派充滇省全權代表君建議多關國家根本大計總代表唐公紹儀甚重之九年丁父憂回籍會川粵政變滇局糾紛軍額驟增度支耗竭當局復強以財政相責是年冬充代表赴滬蓋滇政變時有公款百餘萬存滬各方爭向提取君毅力堅持以省款仍歸省有且指定專作地方實業教育交通之用滇人德之後以省政棼亂奉母居海上嘗侍親禮佛於普陀靈隱布施藥品不惜巨金迨丁母喪哀痛逾恆歸櫬回滇中流言將不利於君友人尼其行君曰此身親之身也卽有不測死何懼遂成禮而還君旣以主滇政者不能用

其言遂脫離政治優游滬上復以氣候不良徙居香港偶感風寒竟不起君
生於清光緒甲申年十一月二十日未時沒於民國十七年戊辰六月十一
日戊時春秋四十有五配余氏子三人安成勛成申成君資稟過人宅心仁
恕內行敦篤富於智謀余與君聞名而不相識君弟嘉銘馳書李公屬余以
薶幽之文不獲辭謹詮次行狀而銘之銘曰

滇池首義羣雄奮起巨十七年前仆後繼英英繆君天挺人豪治軍籌餉勞
苦功高吾謀不用身隱光韜齋志以終留名青史千秋萬春昆明之水

清光祿大夫湖北襄鄖荆兵備道曹君墓誌銘

君諱允源字根蓀曹氏先世自歙縣徙吳遂占籍吳縣曾祖山登本生曾祖
士傑祖元錦考愷業世有潛德具詳君所爲墓記及行略中家故以懋遷饒
生產自君之考遭咸豐庚申之亂挈戚友避難者七百餘人盡供其服食器
用於滬又焚責券二萬有奇家以中落而督君讀書益勤君生而岐嶷九歲
成五言詩卽驚其長老始工爲駢儷文繼乃銳志經世之學治古文辭以南

雷亭林二家爲法光緒壬午舉於鄉主講皖省淮南書院丙戌成進士觀政兵部由主事遞遷員外郎郎中辛丑以京察一等出守直隸宣化府壬寅調守山東青州府乙巳復調安徽徽州府再調湖北襄陽戊申調漢陽府兼新隄關監督嗣復還襄陽原任歷權直隸口北道湖北安襄鄖荆道花翎二品頂戴誥授光祿大夫按部所至凡其地之河渠水利學校實業倉儲捕務事無鉅細胥綜核名實手定規程其在宣化也值拳匪初平前守議賠教案一百四十四萬金力爭大府以省款分認餘由府民籌集無怨言其在青州也故事駐防滿營兵米由州縣解銀而府以銀易錢放米君曰此市道也盡革之以銀徑解滿營擴清百餘年積弊其操行廉潔大率類此君自言少卽究心經世之術恥爲無用京曹碌碌蔑以自見既除一郡朝夕研考其利病得失輒蘄於民物有濟未及施行十年之中遷地者三四以爲憾事然而直督袁世凱以人才薦東撫周馥以循良薦鄂督陳夔龍以賢能薦獲上得民比諸兩漢循吏徒以守正饗諤恥不以道未參大政是君之自以爲憾者乃其

所以賢也辛亥國變襄陽民乞留不得浩然東歸卜居蘇州泗井巷閉門却掃發篋陳書經史百家鉤元提要庶幾深寧所南之遺顧天性和易絕不以崖岸自高至於表章文獻發揚潛德毅然以守先待後自任一篇之中三致意焉君既不願膺徵辟乃就大吏聘爲省立圖書館長喜其地接子美之滄浪亭也館中原存圖書七萬餘卷君續購三萬卷自爲書目續編三編其第四編垂成未終卷中間又被推爲吳縣修志局主任勞心焦思伏案不輟疾篤時猶手顛作翻書狀喃喃不休可謂盡瘁也矣所著書已刊者復庵類稿八卷續稿四卷外稿二卷鬻字齋詩略四卷詩續一卷淮南雜誌二卷未刊者蘇州文徵甲編若干卷乙編二十四卷昔亭林先生有言文不關六經之旨當世之務者一切不爲又言文以明道也紀政事也察民隱也樂道人之善也君時時稱述以自况故其文皆有關近世掌故兢兢於人心風俗之轉移同光以來吳中諸老未能或之先也金壇馮煦謂其文遠希歐曾近亦不弱堯峯竹垞知言哉君生於清咸豐五年十二月八日卒於民國十六年二

月七日春秋七十有三配程夫人有賢德先卒子恭翊外交部科長駐檀香山領事恭植前浙江補用同知恭燮前候選鹽大使先卒女四長適泗州楊毓瑛次適大興惲寶惠次適同縣鄒應歎次適無錫沈林鳳威孫二克崇克纘余與君有壬午齊年之誼辱爲文字交恭翊筮於十九年國曆某月某日營葬於吳縣五都五圖萬青字圩狀元浜花園山之麓啓程夫人兆而合窆焉來請銘銘曰

吾鄉先達近推校邠君步其後踵美前人謂爲塞耶固監司之洊歷澤被生民謂爲亨耶胡丁龍蛇起陸之會徒窮年著作以終身廉能不劇磨亦不磷旣完眞而抱璞豈和光以同塵有文嶽嶽有子振振千秋萬歲視此貞珉

馬捷三先生暨配董太夫人合葬墓志銘

自清政不綱羣雄逐鹿辛亥武昌起義各省聞風響應爭相雄長江淮之間豪傑夥頤十餘年來其能以功名始終屹然爲一方重鎮者卒不數覩惟今淮揚鎮守使兼新編陸軍第三師師長馬君玉仁以蘇人而領蘇軍保衛梓

鄉戰功卓著身名俱泰勛績爛然非門庭積累之深何以得此君新遭母董太夫人之喪贈公捷三先生先以清光緒某年葬於某縣某鄉某原銘版未具茲將以民國十二年某月日啓贈公兆以太夫人祔因余與君辱有縞帶之誼奉公行狀以闕幽之辭爲請不敢以不文辭按公諱金元字捷三江蘇鹽城縣建高市人曾祖某祖某父某力田治生世濟其美公天性肫摯才幹恢張自其少時卽嶄然見頭角孝友傳家服勞奉養處分家政規畫裕如金心在中銀手如斷家有田百餘畝躬率傭保是穠是養晨而作晦而息手胼足胝未嘗言倦仰事俯蓄皆終歲勤動之所得以爲吾力所自致則吾心安焉彼非分之財逐末之利視之蔑如也自奉至儉而見義必爲恤貧賑災傾橐勿惜所居地名馬家樓爲鹽城阜寧兩縣分界處地勢華離民俗強悍官力之所不及往往持械私鬪或聚爲萑蒲釀成土客歧異之習公憂其頑梗挺身犯難凡鄉里嫌怨輒與排解或窮數日夜之力強聒不休其因財物而互爭每陰償其值損己益人了無得色鄉人感之事無鉅細得公一言立自

折服有王彥方邴根矩之風又嘗謂外匪之來必有內應堅壁清野保甲爲先乃與村民堅明約束以故奸宄帖服桴鼓不驚蓋馬家樓一帶以及左近各村鎮數十年無私鬪無外匪皆公感化之力有以使之羣稱爲鹽阜之樂土焉馬氏聚族而居蔓延於兩邑境內公慨宗法之不復議譜牒之重修常欲建立宗祠籌設祭田設施未竟中道而歿公生於清某某年某月某日歿於清光緒二十年十二月十四日配董氏爲阜寧世族董公康田長女年十八來歸逮事舅姑先意承志處娣姒間雍睦有禮佐贈公操作夫耕婦饁相敬如賓暨贈公以積勞病歿太夫人年垂五十諸孤未立恩斯勤斯玉仁幼讀村塾苦無良師乃命改習騎射時清廷議立憲廢科舉太夫人以國勢積弱非尙武不能自強督諸子投筆從戎歷躋貴顯天性仁慈以睦宗族恤孤寡爲己任嘗典釵珥全一婦人節鄉鄰借貸恆施與錢米無吝色民國三年秋大饑值太夫人七十壽命節筵資銀千六百圓助賑他如鹽城孤兒院淮揚水災北五省旱災先後助賑無慮鉅萬清江浦惠粥廠歲濟米石以爲常

嘗訓玉仁等曰吾家起自田間家傳忠厚幸汝曹力稍裕當濟困扶危玉仁等謹識不敢忘歷經大總統獎給紅紫綵綬銀質褒章題予扁額頒贈褒詞以民國十二年某月二日病歿子四玉仁由新勝水師營哨官歷幫帶管帶積功自團長旅長至今職次玉奎由衛寧軍哨官積功擢連長至營長次玉懷由緝捕隊隊官積功自營長團長至旅長次玉坤以哨官擢至營長民國元年夏轉戰浦口六合間所向有功事平積勞中暑先卒立祠城北太夫人聞祠成而悲之疾之所由作也女四長適劉三適唐四適計惟次早卒孫男若干人孫女若干人銘曰

自古名將淮揚鍾風氣剛勁骨相雄馬氏羣季氣貫虹長君專閫勛尤崇敦詩說禮何雍容水源木本由而翁翁不自爆惟劬農戴星出入勤田功咨無匡因成悒懔慨豈與流俗傭仁聲義聞衆所宗耕者讓畔民無誑椎埋屏迹奸宄空樂郊適彼歌昌豐義田規制繼范公惟桑與梓必敬恭嘉耦相莊志行同活人無算霑恩釀韓丸歐荻教折蓂桓桓諸將門庭中佳城蔥鬱松

蟠龍英魂颯爽藏幽宮福祚奕禩垂無窮

常熟丁芝蓀先生墓誌銘

虞爲言子故里生其鄉者類皆講道德能文章秀異甲他邑若夫丁陽九百六之會以文學通乎政事巋然爲一方壇坫所宗則丁君芝蓀其人也君狀貌清癯恂恂無疾言遽色而聞一善見一義則奮迅趨赴如不及同輩咸推重之邑有大政諮而後行自爲諸生以幼學博覽聞於時不沾沾爲科舉業用高第選入南菁書院出定海黃元同丹徒丁叔衡諸先生之門與院中高才生相切劘其學益進尤留心當世治亂之故不以篤舊自矜清光緒甲午庚子間世變益亟閣時務者率深閉固拒敝帚自珍君獨聯合同志倡設中西學堂於城中是時一塵與家弟一鵬在蘇亦設蘇學會與中西學堂長老或駭爲大厲君獨貽書通問風雨相聞是爲余與君納交之始厥後風氣日開凡常熟禁煙勸學縣自治次第發動皆以君爲之魁江蘇初設諮議局當選爲議員又斥私財獨力開辦丁氏小學校造就學子無慮千百終其身不

渝人有所求未嘗不量力扶助而不以爲功鄉里有爭端得君一言立解其素所樹立者然也宣統辛亥武昌革命軍興江蘇響應獨立常熟黨人迫縣令去職邑中無主常昭兩署差役鬩刺龐某幾斃人民兇懼時君居繼祖妣陸太夫人憂避居滬邑人公推爲縣民政長君不忍桑梓糜爛歸就職卽逮捕肇事爲首差役繫之獄餘則編爲警士亂乃息西南鄉地保李同者公言抗租賦無所出君名捕之論法棄市遂無復抗者民以大安方事之殷也不逞之徒蠶起蟻集君乃募勇士爲防衛隊百餘人事平以費絀議裁汰其桀黠者蠶蠹有異謀君密布方略先收械後資遣遂帖服無可乘者邑徵糧小戶向由經書包攬代完印發單據上下其手費不貲君痛革之令畝收筆墨費二分遂爲例辛亥大潦之後民多餓孀則大發倉或舉縣債以工代賑修復圩堤百六十有六圖白茆河故道久淤君移書縣議會決鳩工開濬裁灣取直大暢水流其他新施設如貧民習藝所農事試驗場單級教練所師範講習所皆前所未有而剏爲之終其任所得俸悉捐作縣治路燈之用邑人

至今稱焉期年政成大府稱之曰能調長吳江縣適在癸丑金陵獨立之際又承辛亥水浸劫奪之餘四鄉囂然不靖君本刑亂用重之義嚴治痞棍刑其首要盜風漸戢境內晏如其清訟獄也時知事兼理訴訟君治牘恆至漏夜聽斷廉平庭無留滯爲民國以來所僅見其興教育也周歷四境學校而視察之廣學額節經費手訂視學規程時其報告參伍而獎懲之學額驟增而任事者無或懈其除漕弊也邑中戶糧紊亂震屬尤甚君洞燭奸藪正已率物使吏胥人足贍其生自捐廉雇員核准戶糧漕務大起積弊什去八九矣其修水利也邑瀕巨區勢汗下吳淞入海正流旣梗阻太湖七十二港太半湮塞君巡視縣境通牒大府請命巡按使韓公國鈞可之乃大治太湖下游開濬黃沙路等港君自捐一年餘廉俸大修垂虹橋浚江城經流諸要瀆教農民修築圩岸如在常熟時後此瀆不爲災實拜君賜其勤課最也案設一氈一簿條記之與僚屬酬對時默記於簿自朝至於日中晨僚屬受命益虔如師保之於子弟初辨驗契弊絕風清成績爲全省冠一年後教化大行

君以盡瘁病莫能興又值洪憲政變已兆端倪遂
章密保簡任職道尹非其志也既謝事旋里遇公
爭奉軍進退潰兵過境頻歲驛騷與邑之賢者摺
被聘爲地方款產處主任其時公私匱竭墊放殆
銀圓十萬有奇而耗費過半矣其施於有政如此
目錄校讐之學見有佳書必搜討鈔錄於鄉邦文
黃不輟所刊虞山叢刻皆表章先哲昭示來茲爲
良耜校刊先哲遺著精審絕人所著有一行集若
五卷未印者十餘卷日記若干卷去歲以其子就
文酒時相過從談讌甚懽春間忽患肺疾足癰一
爲意卒之前一日尙赴公園品茗眩暈扶歸不料
可哀也已君生於同治辛未某月某日沒於民國
十大父某祖妣某氏陸氏考某妣徐氏本生考某

兼祧配周氏先卒繼配方氏子五人安雅美初皆孺周氏出元民民生劍峯方氏出元民民生亦孺女美均周氏出甚慧而孺劍峯肄業上海持志大學奉母命將於二十年某月日卜葬於虞山北麓陸店先塋來請銘爲之銘曰才足以濟時變而僅藉鉛槧以傳志不願乎仕宦而蒼生必賴以獲全命與時之相忤寧獨夫子而始然昔平江之結社吾與君上下而周旋倏風雲之變幻荃蕙化而爲菅一瞑不視羣飛刺天將上訴九閻以冀吾土兮下爲百世學者所憐

雷理卿先生墓誌銘

君諱文均字仲穆號理卿吳縣雷氏先世爲江右籍明初有諱唐者官於江蘇之常熟始家梅里是爲君十二世祖傳鳳霄公諱翀以成化進士出知河南彰德府爲學以慎獨爲本致知爲宗而歸本於誠意三傳由無錫遷吳至君五世祖諱升字允上乾隆初舉鴻博不就隱於醫今所謂雷允上藥肆名聞中外者也高祖諱桂廣西蒼梧縣知縣曾祖諱夢熊祖諱榮泰本生祖諱

榮河考諱慶和本生考諱慶鑣生君兄弟五人君次三自君考以上皆以名德尊重振匱濟貧有恩於州里君幼而岐嶷十歲卽值清咸豐庚申之變考妣昆弟均以身殉君被擄置軍中從容定計得乘間逸出長老驚異事平歸里受業於叔父甘谿先生先生樸學醇儒於後進黜許可獨深器君君博覽經史百家通其微言大義尤潛心於宋儒之學雷氏自鳳霄公爲宋儒學允上公繼之皆以敦品飭行睦姻任恤蔚成家法初允上隱於醫著經病方論金匱辨正要症論略丹丸方論諸書行世而設藥肆於金閭庚申城破肆亦毀至是君叔父子純公與族人謀復業命君爲佐君於是不得不輟學旣而甘谿先生以族中老成彫謝環顧子弟無出其右乃以君總肆事之成君夙夜勤劬數十年如一日衆情悅服業乃大昌益自謙抑謂非祖宗積善不至此小子何有焉先是允上公遺命子姓建祠規制未備至君乃歲提肆中贏利儲宗祠建設費卒於城中西麒麟巷鳩工庀材行落成禮君以鳳霄公未遇時仗義疏財及貴益好施與允上公亦謂願得負郭田數百畝與九族共

之而以餘財贍三黨故紹述先志急人之急甚於己私自奉菲而遇人厚凡各行省有以水旱疫癘兵禍地震見告者未嘗不傾囊相助也凡本鄉善舉如恤鰥育嬰掩埋惜字未嘗不糾合族人之賢者羣策羣力務行其心之所安也橫塘彩雲橋爲水程孔道日久傾危工煩費鉅君慨然任其事積成巨款與濟生會協力興工得以速成行旅至今稱便光緒中葉籌辦靖江急賑當道給見義勇爲扁額旌其門或勸請謝卒弗往蓋君之行善出於天性其不自表襮多類此嘗詔其子學懋曰吾未嘗學問而生平主旨在至誠不欺吾無他功德而生平行事在實事求是又曰積財以貽子孫有時而窮積德以貽子孫則取之無盡用之不竭嗚呼雖古之賢人長德何以加茲君雖自謂未學然世之讀書萬卷者其所行視君何如君子之學貴乎躬行實踐世運之盛衰風俗之淳漓靡不由此聞君遺言益使人慨歎唏歎而不能自己也君性仁慈愷悌而以禮法自持言必謹行必慎和而不流中立而不倚教子弟愛護甚至而督責彌嚴自任肆事精力盡耗年六十方退休然於家事

不懈益勤寢興有定時祭祀必誠敬布衣蔬食不以爲苦惟孳孳爲善至老而不衰體質夙強年踰古稀步履一如少壯其卒也以微疾竟不起時民國十五年夏曆二月初二日生於清咸豐辛亥九月十八日享年七十有五鹽運司運同職銜晉封朝議大夫配黃夫人先於清宣統元年三月二十三日卒君沒之翌年合葬於吳縣五都五圖狀元浜青雲字圩子二長學懋縣學生光祿寺署正出嗣君兄翰卿公後次學志縣學生候選鹽運同後君四年卒女一雪徵適同縣舉人弼德院祕書官吳銘常適吳後六年卒孫五傳徵傳洵殤存者傳泳傳濛傳湛女孫三學懋以君沒八年而薨幽之文未著具狀來乞銘迺詮次君行誼以告後世銘曰

舉世渾渾惟利是視庸庸言獨行抱義繩其祖武服膺儒宗防儉於逸圖匱於豐匪以自殖曰周人急貽爾子孫匪財伊德積善餘慶天道有常臨之在上質之在旁

蔡桂初先生墓志銘

君無錫蔡氏諱學輝字桂初先世自宋祕書郎卽世洪公隨高宗南渡之杭州再遷吳縣洞庭西山十一世而遷無錫板村大父諱文漸考諱某某君生未十年洪楊難作錫當孔道不可居避亂於太倉之紗谿事平歸里生產蕩然又遭考妣之喪哀毀旣無以自活時主母周太恭人在堂諸弟姊妹皆幼稚君晨而就傅歸而問寒煖安否未嘗以貧廢學應童試縣列前茅然終以爲門戶計棄而學賈有贏乃爲諸弟姊妹謀婚嫁凡宗族鄉黨之疑而待問急而相求者未嘗不倚君以辦凡邑之道路河梁廟宇興作夏而藥冬而衣米未嘗不施與各省荒歉賑濟未嘗不先也族有義莊推君董其事剏修宗譜期年而成旣以施於家乃以及於鄉清光緒甲午以後國人銳志興學無錫漸染於薛庸盦華若汀兄弟徐雪村父子之風教莫不磨厲爭先風起雲興爲全省冠君創鴻西學校以惠子弟又闢桑圃數十畝以興東鄉蠶業鳩資設繭行以收回利權蓋鄉政自教養始君知之矣娶某夫人恭儉仁孝君嘗患流注疾三年而愈夫人禱天乞代心力交瘁以積勞先卒繼娶三娶皆

華氏子二均從丁君梅軒習醫培畢業於南菁書院暨日本早稻田大學歷任京師黑龍江河南湖北等省要職並有聲於時女子子六其一適宜興賈士毅孫男七人孫女十人曾孫女二人君生於清咸豐四年八月初四日卒於民國十四年陰曆十一月十三日年七十有二余與培八年前在京師相識去春聞君在籍爲齊氏潰軍所苦辟地至蘇州姻家轉徙流離遂以病去世均培以某年月日葬君某原屬吳縣張一慶銘諸幽余悲夫軍興以來日相斫以厲民奪我父老子弟之生者無極也遂爲之銘曰

羣龍無首潢池弄兵方州開府豕突狐驚吾言不用瓦解土崩錫山峨峨滬寧之紀庠序盈門桑麻匝地民也何辜遺此大厲以君耆德迺降鞠凶封狼狽揄殃及而翁我銘諸石待事之定上訊三光下示無竟

許劍青君墓誌銘

君諱人俊字劍青吳縣許氏先世自歛遷蘇文學孝行代有聞人曾祖諱有第妣氏蕭祖諱本華妣氏蕭考諱家鼎字廣園妣氏盛三世皆封資政大夫

以孝行賢節褒揚詳奏侍郎綬章所爲許孝子傳及廣園公墓誌君生而岐嶷少服先人庭誥翬翬修持稍長從名宿蔣理卿先生學出語驚長老治經史略觀大義不屑屑於章句之末以阿附時尙用是不得志於有司遂走大江南北佐郡縣錢穀綜覈名實所至有聲宣統己酉以郡丞需次粵東適同邑嚴孟繁觀察守廣州委治文牘兼總佛山新涌權務課績稱最暇則留心經世之學習法家言期於致用辛亥觀察擢巡警道仍從之任與聞機要革命軍興曹部一空君獨留守不忍去黨人有知君者請廣續任職君以藍太夫人在蘇春秋高婉謝之歸里佐紅十字會長沈仲禮君籌設南京分會時江北苦戰未休躬往救護隆冬風雪僕僕臨淮蚌埠間口不言勞民國二年癸丑任職上海鎮守使署翌年春奉委接收滬南北兩市廳改爲工巡捐總分局主辦總局權務革弊竇償官逋稅入駸駸大起庶政一新時外人擴張租界之議日熾有識之士力謀因應君惕主權之坐失愴他人之我先合南北縉紳羣據正論卒杜覬覦乙卯兼上海護軍使署職己未擢軍需課長辛

西兼長滬北工巡捐局護軍使何公茂如倚如左右手滬北地勢遼闊華洋雜處費絀事弛外權侵軼君始至卽整飭計政規畫總捐以其贏餘充作市公債基金如光復寶山中興各路工程用節而事舉信著而人和至今彰彰在人耳目聞北水電以官營業日見腐敗君力請改歸商辦又僑商興築動滋葛藤君防患未然機牙四應羅致賢能咨諏謀度政以大成癸亥夏宋君漢章等以外人越界築路滋蔓難圖君勦議興築大遼環租界四周闕之衆議僉同君乃考核今昔界址著爲成書至今推爲準的焉是年江浙戰事已伏萌芽一磨奔走寧杭說軍事長官雙方簽訂和平公約最後至龍華介君見何公署名約尾君歡喜贊歎以爲我兩人有同心也孰意越年甲子野心家首發難端呼籲無及一磨因憂傷憔悴而君之肝疾亦由此伏矣其後浙督盧公與何公釋兵自退君力贊其成暨盧公宣撫南來君不忍兵戎之再見留滬經歲振導和平旋何公爲北都軍事總長延君北行君以國事日棘主張南北聯合以紓國難其間徧游燕薊遼瀋居庸醫無閭自謂百聞不如

一見勝讀十年書矣歸而閉門自修間涉內典客歲
陸銀行今春倭寇淞滬商業阻滯里門一夕數驚君
成黃疸遂以不治嗚呼傷已君生平好深沈之思遇
善賢豪長者喜從之游尤重然諾周急難有杜陵廣
持身必謹於微接人以德而不立崖岸宦游三十餘
年就養留子婦侍奉所至獨居公廨端坐治事無聲色
五子書以存誠爲鵠自號誠道人嘗繪五十學佛圖
擊宜享遐齡年未六十遽歸道山識與不識同聲悼
年二月初八日沒於民國二十一年六月二十四日
先卒繼配王夫人子兆鳳吳淞中國公學商科畢業
政部參事上行走范夫人出兆鸞上海交通大學鐵道
薛文尼大學商科碩士鐵道部任職王夫人出女兆菴
源兆嘏未字兆毅適同邑雷傳鈺均王夫人出孫慶藻

慶美余與君忝附姻婭諗君行證兆鳳等將於某月某日卜葬於某山某原來請銘不敢辭銘曰

吳中烽火肇甲子勞心焦思冀兵弭曲突徙薪等敵歷天發殺機從此始滬北經營草莽委知君心碎痛徹髓君家昆季如連理孝弟門庭毓瑜珥菩提證果脫塵滓千秋遺愛留桑梓靈兮往來具區埃我銘昭示無窮紀

劉正康君墓誌銘

君諱敬讓字正康浙江鎮海人曾祖引齋祖樵莊均有聲庠序考諤臣字文山嘗刲股療祖母疾以孝著且習醫家言君幼孤母盛太君鞠育成立就傳於其伯父某某叔父某某年二十客蘇州爲木商遂爲吳人吳故名都大邑縮轂寧滬君以客籍賈人無憑籍無緣引羣倫推重皆曰能賢其所設施如興復會館立同鄉會建殯舍以聯鄉情立市民公社練商團保衛團以維治安叛游民乞丐習藝所閭門外半濟粥廠以振貧乏公家之利靡不舉也凡市政興革民治弛張以及乾餒雀鼠之爭靡不受成而取決也津要徒隸雜

沓並進他人視之如理筭絲君口講指劃批卻導竅游刃有餘人人各得所欲以去然君固痿痹須臾而行耳失聰二十餘年而神觀之強壯夫不逮可謂異人也己自辛亥光復吳瀕江海兵事頻仍稍戾樞機立卽糜爛甲子齊盧戰後直奉遼瀋迭爲雄長漂搖隳馳迄無寧歲相貴相斫蓋五六年直至國民軍定蘇而止其間起伏明滅無論勝敗予取予求長吏輒委君集事君從容談笑薄犒而善遣則帖然無他窮困者待以贍給傷病者待以療治信足格豚魚仁足周鰥寡痾僂塊坐雜賓滿前日夜不得休息九一八之役外患忽乘上海孤軍撐距援兵不至寇遂略闡北吳淞瀏河取嘉定逼太倉吳中大震軍將士紳與君議防守恤流亡調舟車集竹木瓴壁至纖至屑多多益辦越五棋八一三又爆發供應救護亦如之蘇州陷君避光福余徙難民五千居穹窿山下食不繼乃就居商借市肆萬金以免凍餒季布一諾植瘠噓枯求諸貨殖游俠傳中殆罕其匹寇耳其名詞於門令爲助卒以智計走滬而氣益弱耳益聾再遷避囂隱姓名自詭方舍給弄孫莫以花木自娛仲

冬忽病篤醫藥罔效於太陰曆己卯十二月初六日去世距生清同治十有三年八月初十日得年六十有六識與不識痛惜失聲娶楊氏先君一歲卒子賡華女秀清淑清卜於三十年十一月二十日殯於蘇州五龍公墓以余與君共患難久屬爲兆域之文不敢辭緣以銘曰

匹夫崛起爲民之望脫非殘疾宜君宜王丁世多故羣蜚擾攘機牙四應恆幹摧傷天方蹶寇盜披猖歌離弔夢涕下霑裳我銘其寤百世毋忘

長男爲宣墓誌

中華民國十五年二月二十日卽太陰曆丙寅正月庚辰日長男爲宣之喪已及期其父張一麐乃啓先室願夫人之兆而附諸壟側余年四十二始生爲宣先有兩男皆不四五歲而殤清光緒三十四年爲宣生於天津髫髻患心臟弱疾泊入幼稚園及師範附屬小學誦聲琅琅如夙習者又體輕孌健時升屋或坐林木上爲笑民國十年余舍京而南賃屋里中以兒輩入上海交通大學之附院爲宣時年十五向就傅未嘗外宿往往挑燈起棹書強記

夏間患瘡由校役送之回蘇城瘡愈乃留瘕塊在腹中半歲始覺之是時男改入東吳中校除寒暑假外須宿校舍中然雖病令輟讀則泣至十七歲夏江浙齊盧之戰乃避兵滬上者兩次最後於十四年太陰曆正月八日沒于滬寓鴻慶里時奉軍逐齊燮元於無錫之第五日也兒純孝嘗謂其母曰我不願娶婦母老男事母便孰意不數月竟以怛化命矣夫次男爲杭將輯其遺文付刊以校課無暇而止軍興以來人民之橫死無告者何限吾於男又奚悲耶書而納諸壙俾後之人有所考焉

心太平室集卷三

心太平室集卷四

吳縣 張一麐 仲仁

費君仲深家傳

君諱樹蔚字仲深又號韋齋取西門豹性急佩韋自緩之義又服膺明之黃梨洲則號願梨抗心清之左文襄則號左癖或曰迂瑣費氏爲吳江望族詩書科第之澤冠其邑祖元鎔爲休寧訓導父延釐同治乙丑進士由編修洊升宮允督學河南盛年引退與同邑吳望雲祭酒崑山朱研生府丞後先歸隱有吳中三高士之稱始卜宅於蘇城長慶里君少孤兄樹榮早殤事母陸太夫人以孝稱從同邑施子瑾溧陽強希衡先生游卓犖有經世之志自始不屑學帖括喜讀近代名人傳記過目誦心長老驚歎吳憲齋尙書奇其才以女妻之清廷旣下詔改試策論乃應童子試冠其曹爲諸生甲午後同人設蘇學會購書傳觀君年才十六七每數日輒易一書余是時始識君竦然異之一試秋闈援例爲主事旣而改直隸州知州分發河南赴引過津謁直

隸總督項城袁公一見器賞君與項城長公子爲僚壻不欲以姻婭進身時
余先入幕府乃以薦賢書介於項城共數晨夕決疑定計遂結爲兄弟交嗣
項城入樞府余與君每半月輪值於淀園君於鹽漕河農諸大政上書累萬
言議改革勢格不行洎宣統改元項城歸隱會東海徐公聘輯東三省政書
及入長郵傳任君爲員外郎兼京漢路某職未幾丁太夫人憂歸里不復作
出山計翌年革命軍起雲陽程公自蘇起義余適病程公知君名羅致之君
許攝事不受名義但力持地方秩序嗣余入都書問不絕責難規過有古人
風蘇城貧民生計日絀糾朋好醜貲設公民布廠力不繼幾中止君慨諾籌
濟廠以不敝迄今無恙民國四年政府復諫官制設肅政廳舉肅政史時籌
安議起物論沸騰應召入都直言極諫有媒孽之者見幾而作襍被還鄉用
元遺山還山吟韻寄余中有穎川文若何足羨之語十疊唱和以見志厥後
帝制取消項城殂謝余亦盡室南行君爲相宅於鄰兩家晨夕往還情好益
摯遇雨暘愆期輒不寐憂形於色遇不平事則又義憤填膺奮發急難不稍

避振興電燈公司屨入外股羣情激昂各公社分辦小引擎爲抵制君與同志勦蘇州電氣廠以相抗筆舌焦勞卒收回主權羣民營電業之基礎遇市府壓迫則據理力爭經費竭蹶不惜舉債以應強毅不屈此其一端江邑震澤鎮民賴絲業爲生農之貧者往往取倍稱之息於富室力不能償則農產入於富室貧者益貧君憫焉與同志合設江豐農工銀行以微利貸資於農民因以紓實爲舉國農民銀行先聲至於商榷秋勘成數核定縣征收費以恤民艱議浚江邑太湖港濶以興水利斥貲修理聖廟以存文化纂修吳江人物志以式鄉賢皆犖犖大者江邑父老咸稱道弗衰甲子齊盧之役蘇城傷兵雲集十室九空里中深識之士集紅十字會推君理文牘事凡重要文電會務規畫均其手定忽駐軍偏裨秦某乘間樹幟軍心不服致五六兩團譁變君則擇軍中之良者使鎮撫反側籌備餉糈收合餘燼蘇城危而復安嗣後孫軍西至奉軍南來以及國軍莅蘇拯溺揀焚間不容髮或計令移徙以免波及或躬迓顏行以聯情感余固無役不與尤以君之策畫爲多事定

輒約友人觴詠以資陶寫間亦仿桐城義法爲文然於民生艱困蓋無日不縈於心江邑震澤世業田千六百畝頻歲不登斥產完稅猶不足請於縣府願以田歸公不得請則大戚恐責租於疲農而有所不忍也今春自杭歸又爲長函以請詞甚哀乃書未發而疾作矣先是君以體肥屏除菸酒常進蔬食攝生之術不謂不謹特天性慈惠年終設饑寒維持會賴以舉火者無算睦姻收族敬老憐貧時有一夫不獲之憾一日詣余色不懌問其故則曰吾頃見老者攜一孩匍匐泥塗乞食彼何辜耶宅心之仁類此配吳夫人伉儷甚篤諸子皆學成露頭角諸孫繞膝人以爲福不知君悲憫之懷固未嘗有永日安也竟以二十四年國歷四月八日卒實太陰歷三月初六日春秋五十有二識與不識聞之失聲知其風義之感人者深矣余年來衰病侵尋每相存問猶記上年流涕爲余言君勿憂脫有不諱後死者不得辭其責君少余十七歲孰意余轉爲後死者耶哀哉余何忍爲君傳而又何忍無言耶君生丈夫子三長福燾瑞士卜朗比廠電器工程師上海新通公司工程師無

錫華新絲廠工程師次福熊又名鞏英國牛津大學畢業生國立浙江大學教授又次福煦交通大學畢業生遊學美國攻土木工程女子一令宜美國哥倫比亞大學碩士歸吳縣王守競孫四世基世垂世增世桂孫女一川如皆幼瑤瓊瑤珥世有傳人其亦可以無憾矣所著詩文集甚富其孤將移寫付梓以告邦人

清故資政大夫知府銜候選同知沈君家傳

沈沼字用侯別號芷汀其先周聃季之後世居河南開封洎宋靖康末有揚州守名都遠者從康王南渡著籍句容後徙居嘉定十世至諸生大業遷崇明遂爲崇明人又七世國琮家始饒樂善好施知縣事范國泰贈以任卹高風額國琮生例監生元明是爲君曾祖考元明生候選同知進忠進忠生候選州同龍輔是爲君祖若考本生考例監生龍佑以君出後龍輔世雄於貲龍輔尤慷慨仗義嘗建樂善堂以養窮老減質庫息金以惠鄉人君秉其教終身不改君長身玉立貌清癯而膂力特強好談兵習武術時海疆清晏人

未之奇也咸豐十年太平軍陷蘇州太倉諸郡縣崇明雖在江以北而訛言
日至烽火宵騰會鎮將遠出守備單弱居民惴惴震恐君淬厲奮興受團練
大臣龐鍾璐檄召募里中少年以兵法部勒激以義憤日校閱行陳旁及技
擊蹶張壁壘森嚴步伐精整賊偵知有備不敢犯邑以是安尋江蘇巡撫李
鴻章檄全軍赴上海助剿逆黨事平而歸是役也閱時凡一年有奇士卒丁
夫之資糧軍諮記室之俸食與夫旂幟器械帷幕金鼓刁斗之屬糜錢數十
萬緡君多多益辦舉重若輕於是聲聞遠邇初用助賑例以監生議敘布政
司經歷銜至是朝命以募勇殺賊之功加同知銜又以重建玉城樓櫓橋樑
璽書褒美賞戴花翎又以海盜披猖君造艇舡三雇民船二募勇巡洋獲盜
酋張梟狗等二十八名盜風遂戢李公以君肅清洋面費鉅功著照軍營立
功例上聞報可以同知歸部選用並賞加知府銜又以輸銀助餉例得二品
封典後數年日本擾臺灣朝命飭辦海防如粵匪亂時未幾罷光緒九年法
蘭西越南之役海上騷然君年已六十聞警投袂而起召集所部以待命已

而兩江總督左公宗棠江蘇巡撫衛公榮光以君曾著成效檄君兼辦水陸兩團朝命爲東南團練長開府建牙曾不轉瞬乃積勞遘疾以逝惜哉君生平事業在練勇禦賊而凡邑中義舉亦見無不爲賑荒修志建城郭成橋樑敗糶暴骨之掩埋孤寡無告者之存活親知故舊之周恤學校書院公車賓興之待以集事所費不貲其諸記所謂輕財重義者歟食指數十百人各庀其事內外秩然無聲色狗馬之好市井奢靡之習教子尤嚴延名師課誦無姑息人服其義里有爭訟一言立解有王彥方管幼安之風君卒於光緒十年十月十六日年六十有一元配陳夫人監生冠英女先君若干年卒繼配顧夫人監生日忻女丈夫子一應熊縣學生側室姚孺人出女子子三長陳夫人出適顧某次顧夫人出適倪某三側室江孺人出適縣學生祝志緒孫一人鴻熙孫女一人君爲人恂恂似不能言而遇事果決不顧其私義聞仁聲著於江表邑之人述義勇者至今能道之焉

論曰昔曾文正撰江忠烈神道碑謂忠烈家居時團結丁壯密繕兵仗事發

有以禦之一戰破賊遂焚其巢厥後轉戰於鄂贛皖粵之間卒爲名將無他其素所備豫然也君之始事與江忠烈差同如紹興包氏湖州趙氏皆援絕力竭終以毀滅君獨功在桑梓卒完其鄉崇明懸絕海外與內地殊然則君之所遭固未可謂不幸也君子居鄉則急一鄉之難居國則急一國之難豈以生死利害之見擾其中哉余故推論之以爲有位者風焉

袁覽孫先生家傳

清光緒之季一麀客天津參北洋幕府寶山袁君觀瀾自上海來津調查新政周諮博訪精而語詳洒然異之入民國後忝長教育引以爲貳凡部事悉倚之益相得越數年出尊人覽孫先生行狀屬爲家傳一麀受而讀之爲最其要以告當世知言君子傳曰先生姓袁氏諱鎮嵩字晉堂又號覽孫九世祖鳳岡公明季自鄞遷居嘉定縣之吳淞千戶所清雍正五年析邑乃著寶山縣籍曾祖約亭公諱佳士善醫好施與祖朗齋公諱文炤以文學品節稱於時有子四人長穀廉公諱翼道光壬午鄉舉第二歷官江西大庾玉山等

縣知縣次淞逸公諱翟豪於文酒不問家人生產事先生之父也次秋岩公諱堅能詩早卒次野漁公諱增以武生爲吳淞營外委把總殉洪楊之難先生髫齡讀書不事章句從淞逸公詣其伯父江西官署稍長穀廉公器其才令習吏事年逾二十以巡檢分發浙江同治初元署常山縣草坪巡檢旋改淳安縣典史兼辦威坪釐捐地當皖浙衝道洪楊軍屢豕突先生單騎橫槊馳驟嶺谷間與官軍策應土匪有鹵掠者輒捕誅之官軍克金陵孽酋洪福擁衆竄入縣西境先生練團勇籌防衛境賴以安先後參兵事三年同事或累擢至顯秩而先生以尋常敘績願未嘗自陳功伐第捐資招流亡旣其去時憫故令王公虧帑以應得俸銀資之歸其櫬浙撫楊公昌濬義之檄辦遂安縣龍安茶捐時齋匪童正元聚衆揭竿撲縣城縣令李公甫下車倉皇無措先生立以所收茶捐濟亟集丁壯器械拒守翌日事平故事撥款須候上官檄有尼之者先生弗之顧卒彌大變其署長山巡檢也前任以苛擾擾民怒至縛而撻之知先生至大悅夏旱創議濬河事未集而調還塘工之檄至

紳民遮道留不可則泣送之謂數十年無此好官也蓋先生宦浙四十年治績昭昭類如此而東防塘工終始凡十二稔尤爲人所難能先生治塘工必親巡歷脫遇險植立風雨中督工搶修或持紙繖步行二三十里盛暑工頭偶獻瓜必正色却之盡絕浮冒尅扣人樂爲所用嘗以百日修完潑損坦水工千五百丈節費萬緡老於工事者咋舌驚歎先生性伉直不爲上官所喜卒不能盡竟其用嘗權台州海門釐捐尤以肥著名先生不名一錢歸人或迂之母孫太夫人素識大義謂之曰自汝父之歿我瘞十指忍飢餓以長育汝曹今汝爲吏不爲民詬厲以清白貽子孫我滋慰矣先生既屢以事忤於世則益事斂抑剛銳之氣一變醅和而於立身大本則辨別至嚴終其身不易所守晚年移疾歸僑寓滬上以中歲積勞患肺喘日端坐手一卷倦則偃息以爲常先生生於道光十六年三月四日歿於光緒二十八年正月十日配秦夫人事姑孝待人恕而自奉至約或質衣飾不令先生知故先生之廉且勤內助與有力焉子三長希濤舉人三任教育次長卽吾友觀瀾也次希

濂以諸生留學日本法政大學專門部法律畢業任浙江永嘉地方審判廳廳長出後竹一公又次希洛以諸生留學日本私立日本大學高等師範部畢業任江蘇公立南菁學校校長出後秋巖公女一適同邑朱庭禮孫男三粉鐵世良孫女九世承其學如日方升益知先生之令德遠矣所著浙江東防念汎石塘工築圖說一册刊於湖南李氏山水入門一卷藏於家一鑿識觀瀾晚不獲侍先生杖履聞先生歸田後題詩讀畫天懷曠逸簞瓢屢空處之晏如觀瀾昆季皆駿雄奮發卓然有以自立然後知廉吏之不可爲而可爲也聞先生之風侔乎遠矣民國十年一月吳縣張一鑿

嚴春泉先生傳

嚴先生贊清字春泉江蘇武進人也爲芝亭府君第三子入後於某某府君自其少時勤學有至性咸豐庚申之變先生方十齡侍其府君與母太君間關避亂轉徙至江北資用乏絕先生輒樵于山野以薪易米歸助爨書聲琅琅與太君機聲相應太君悴甚左目生翳聞人言以舌舐之當愈先生乃日

於黎明時舐之舌奇淡至不能辨味如是匝月翳盡退常州復乃奉親歸里弱冠後教授生徒自給如是數年幡然有四方之志遊皖習簿書錢穀之術歷佐府縣幕持正不阿非公事不入顯者之門主者皆重其才而憚其風采中間府君與太君先後謝世撫諸子成立精力稍稍耗矣晚年感時事之日非慨然欲躬耕自食乃於皖之建平北鄉購山地四千畝藝菽粟薯蕷之屬操畚鍤雜傭保間山麓平疇彌望一碧顧而樂之輒攜書卷閒吟隴上值旱潦不時歲收歉薄乃易樹穀爲樹木先後栽松十餘萬株烏柏油桐數千株棗稱是竹數萬竿茶百數十畝蒹者以夷塢者以潤不毛之地變爲鬱蔥經營八九年筋力日衰諸子固請歸里乃委其事於莊頭而歲時督察之終其身先生持己以正接人以誠性樂施與友人以貧告貸輒分所有以與之或至典質無靳幕游垂三十年未嘗干人以私人亦不敢以私請謁民國三年四月二十七日卒於里第年六十有四子二保謙保誠皆有聲於時一廉官教育部時保誠任總務廳會計其治事綜理微密蓋得於庭訓深矣保誠出

事略屬爲傳緣事牽率延未應命旅居多暇出篋衍得之因撮其略以詔後之人

張一塵曰余往讀龔自珍氏所爲海門先嗇陳君祠堂碑輒穆然神往以爲當今之世天之碩民莫農若也神州沃壤斥鹵千里而民日患貧操觚之士有能負耒耜以助國養民者必其人篤於根本而恥爲分利者也如先生孝於其親大施於戚友幕遊旣倦退而明農其所成就蔚爲森林知本哉可不謂賢乎哉

吳節母傳

余年十六應鄉舉於江寧主上元縣學訓導吳丈振宗署時訓導未有子越四十年見其子曾善於里中已爲江蘇第三監獄典獄長恂恂稱其家兒曾善適丁其節母張太君之憂督爲家傳按狀節母張氏爲清故國學生張嵩山長女自其在室時父病祈以身代兩次割股療親疾清光緒十四年歸吳府君越四載府君卒母年才二十有九哀毀骨立水漿不入口者三日時遺

孤曾善祇三齡親族以撫孤勸勉乃矢志守節足不踰閨門嘗自署其字曰毅貞以見志督曾善課不稍寬假性好施與承府君命月捐常款任城鄉保嬰恤養事宜達三十年歷久不懈又獨立創設民立女子高等小學校一於邑之鹽倉巷最近本省水災慨輸巨資不畧己名去年捐第三監獄囚棉衣被四百餘襲凡窮乏來告者未嘗不仗恤鄰里詬誶爭鬪之事未嘗不排解而調和也晚歲奉佛持齋體不衣帛以民國十一年三月二十六日期誦佛號端坐而逝春秋五十有八經大理院長董康等請予褒揚論如例

張一塵曰易稱地道无成然古名人魁士多得於母教而名父之子或且墜其家聲蓋男子多客游婦人乃專其職於保育故女學爲教育根本天下之公言也節母撫三歲兒至於成立卽府君不死何以加茲坤象稱柔順利貞豈不信哉

饒母章夫人傳

余同年生饒君延年之元配章夫人既沒而哭之痛其嗣孟任以書抵余請

爲文傳其母世之能文章者衆矣而必徵及余余其奚敢辭按狀夫人在室時幽貞婉孌君之外祖母說其賢而爲君求配年十九歸于君君故孱弱善病術者謂當天夫人聞之則于其身以衛其夫幸則偕老不幸則願以盡瘁先驅狐狸於地下今夫人逝矣而君固無恙君以爲匹婦之志可以回天匪術者之不中也其信矣夫饒故巨族君之考資政公友于兄弟五十歲同居無間自夫人之歸舅姑稱其知禮內外宗黨皆曰賢歲丁亥五月資政公聞其叔弟之喪而病且篤夫人則預籌附身之屬不以告姑與夫資政公以七月八日歿治喪如禮既其姑余太淑人無疾而卒卒之前命夫人爲更衣盥洗西笑而逝君有賢婦如此日誦佛寫經以乞其婦之壽而夫人竟以今年七月八日歿矣歿之前三日孟任爲延醫處方夫人屏不御曰四十餘年水淵之懼龜玉之慎天將許我弛負擔胡以藥苦我爲善事爾父善教爾子善保爾令名可也昔晉處士顏含病有人請卜之含曰自有性命無勞著龜夫入所言千載同符求諸尋常鬢眉尙難之殆詩所謂女而有士行者耶雖張

子所言存順沒寧何以加焉

贊曰君子之道造端乎夫婦故漢匡衡謂福之興莫不本於室家道之衰莫不始於梱內吾觀夫人之所爲於其夫有起死肉骨之恩終其身得舅姑之歡心以施及後世澤流子孫無夫人則無饒氏矣宜君之嗚咽不能自己也世之謀人國者得吾說而存之則芻狗萬物之風其亦可以少息也夫

李母馮太夫人傳

吾友費君樹蔚謂余無錫李德章方雅士也以其母馮太夫人事略乞予爲傳嗣李君寓書督促其詞甚哀蓋距太夫人之沒十五年矣太夫人宜興馮氏年二十三贅某贈君於其家贈君以商業拚閱歸而力農太夫人佐以針黹督德章就傅德章夙爲外祖母所愛憐而月始歸省則大忤太夫人至涕泣長跽以感其親然以貧故終不能竟求學乃訓蒙自給而劄記疑義閱旬日一質於師卒以學成駸駸乎有聲庠序矣先是贈君以受負訟於官往返城鄉幾得疾太夫人不欲傷親親之誼因勸分田息訟而自茹苦忍饑境以

益窘德章奔走衣食將往贛太夫人倚閭送別泣下霑襟其沒也正在旅次贈君恐過戚以疾聞迨德章匍匐回里不及見母引爲終天之恨求文于當世賢豪長者以不死其親次子蔚章三子德章皆先自樹立以奉太夫人之教于勿替女三皆適人亦婉婉有母風

張一塵曰德章方主講無錫女子中學無錫教育爲吾省最太夫人事親以孝相夫以正教子女有法度德章績學能文終身不忘其母之教母子天性也子之賢者多染於其母故古者有胎教而今且有以哲嗣名其學者如德章之思慕其親篤於天性則夫所以昌明女學而仰答母氏之劬勞者固自有在文詞云乎哉

龐母俞太夫人傳

太夫人姓俞氏常熟龐丈幼卿之配而吾友甸才之母也諱慈幼與諸昆季讀書於從父寅生孝廉家塾穎悟絕倫博通經史嫻習吟詠有班左風祖考芝軒教諭尤鍾愛之考幼蘭公早世太夫人佐母氏庀治家政條理秩然無

長幼內外皆嘖嘖稱異年二十嬪於龐龐故虞山世家然幼卿公早失怙恃四壁蕭然自太夫人來歸以針黹佐幼卿公治生家日以起撫養小姑與叔自成立以至婚嫁皆有恩禮洎叔夫婦先後物故則卵翼其孤子女亦如之幼卿公自補博士弟子員三薦秋闈不第其從兄桐堂通政劬盒中丞皆通顯敦勸游宦捧檄浙垣公性淡於仕進再期卽歸里不復出鹿門偕隱處之晏如也太夫人生四男三女其一男二女皆幼穉幼卿公年四十卽患偏枯症轉側需人家中事一決諸太夫人時長子旬澄長女蘭英均未成年旬材尤釋太夫人持躬以儉教子以劬一絲一粟皆手自料量辨色而起親操井臼節衣縮食以所餘購置薄田並於城北建造新屋鳩工庀材胥自經畫清光緒戊申幼卿公卽世旬澄兄弟先後留學東瀛未畢業太夫人哀痛勞瘁集於一身及二子學成旬澄歸娶迭長蘇閩各法廳事長女亦于歸同邑徐君震侯旬材留充駐日公使祕書歸國後歷充省公署要職乃迎養太夫人至金陵晚景優游有版輿之樂然每舉古人爾俸爾祿民脂民膏語爲兒輩

箴砭故旬材束身圭璧公而忘私一惟母教是率旬澄於民國甲寅猝逝婦亦繼沒無後太夫人命以旬材長男炳安後之太夫人明於治事仁於接物凡有善舉必量力捐輸親族有齟齬必竭誠排解所論是非曲直各得其平年踰七旬精神矍鑠晨起焚香誦佛號夜閱報章詩詞娓娓爲孫男女輩講解去春徧游金焦六橋諸勝策杖登山不言其勞神明強固今年仲春忽患寒熱邪伏脾胃不能食者八旬日竟以不起春秋七十有二彌留之際神志湛然口述律詩十六韻以詒後人且囑付身後事至悉願謂旬材子婦曰人無百年不死之親親亦無百年不死之人余老壽復何憾汝等勿過哀嗚呼母之於子無往而不慈也余與旬材交最摯至金陵每主其家一門愉愉令人敬慕余去秋遭吾母之喪今又聞太夫人之耗鮮民之痛同命相憐又不禁淚泫泫下也

李母闕太夫人傳

太夫人姓闕氏騰衝李文蔚然都尉之配而吾友印泉總理之母也憶民國

六年印泉自陝西省長謝事入都始獲款接懽然如舊相識泊十年冬一塵盡室南旋則君先已買宅吳下爲寓公且在旁近闢園林廣植花木蔬果卽以太夫人姓氏署其園曰闕園爲版輿養志之所是時吾兩人均有事親之樂乃去秋一塵奉諱銜悲令春太夫人又以宿疾不起風木之感同命相憐印泉以太夫人狀命爲表揚以載諸家乘其何敢辭按狀太夫人先世籍江西臨川明季入滇由楚雄再遷騰越祖諱連科妣陳氏父諱自有妣趙氏世業商鄉里稱爲長者太夫人幼而寬厚習於儉勤姑節孝黃恭人於稠人中相見異之爲都尉委禽焉年十八歸於李氏都尉年十四卽隸兵籍嗣從戎邊境不皇起居家中事一以委諸太夫人事姑黃恭人致敬致孝料量鹽米纖屑皆中程都尉埽氛衛境終其身無內顧憂皆曰微太夫人之賢不及此李氏素以造醬釀酒治圃世其業太夫人躬率傭保辨色而起日旰而不休值恭人臥病先意承志湯藥必嘗廁牖必親自澣滌不假手他人亦不言勞雖壯男猶愧歎弗如而太夫人夷然任之迨黃恭人歿哀毀逾恆待人有恩

而自奉至菲殘羹冷炙甘之如飴荆釵布裙敝而不棄有勸以節勞者太夫人正色曰物力艱難豈可暴殄古人竹頭木屑且儲以備用貧家尺絲寸縷有求之而不得者吾何忍棄之性至慈窮乏者踵門乞請畀以多金勿吝數十年如一日也都尉兼資文武太夫人以慈母而攝嚴君義方之教篤生偉才子根源卽吾友印泉雲威將軍前農商總長國務總理次子根漢國民革命第十六軍第三師長駐節廣西馬平太夫人自就養於蘇晚景康娛起居健順去秋忽發頸瘰至今年一月而潰體以日衰將逝之前寢室異香氤氳合家跪誦佛號太夫人從容言曰阿彌陀佛與釋迦佛面容相類我不能分別惟觀世音菩薩爲我所認識耳言已含笑而逝春秋七十有二佛說西方世界名曰極樂其國衆生無有衆苦但受諸樂故名極樂云人生如白駒過隙惟有甚大福德者雖恆幹無不敝之理而神魂與天地相始終太夫人生有自來則仁人孝子之不死其親者超三界而登佛國非倖致也吾聞國之治亂視乎衆生業力之淺深印泉昆季旣率太夫人之教思所以大無畏而

悲憫衆生者撥亂世而反之正是尤孝之大者已

許母藍太夫人家傳

太夫人藍氏江寧處士範五女幼孝謹父殉洪楊難太夫人隨母樂挈弟徙海濱茹苦崎嶇將護必恪母病經年卒撫弟持門戶備閱諸艱年十七歸許公廣園時新遘兵燹家徒四壁太夫人椎髻操勞以女紅佐其乏事姑蕭節母如母姑治家嚴肅太夫人怡聲下氣先意承志能曲得姑歡廣園公負米遠方無內顧憂者以此先是伯姑蘇攜子順避兵江淮太夫人力贊廣園公尋歸割宅居之旋爲授室張親若姊妹數十年無間天性勤樸以劬勞相夫起家子女盈前食指繁多太夫人每未明而興躬自操作伺姑起往侍盥櫛奉滄瀧督教卑幼各勤所職日有定程孩提在抱手不輟業夜則伺舉家燕息更爲老稚成衣履縫紵補綴每至深宵冬不爐夏不扇者數十年居平惡衣菲食無珍貴之飾玩好之娛親串中有以游讌相邀者恆託詞謝之見人困厄視若切膚貧而求助者靡不周也親故之不能舉火者周之靡不至也

其或孤癯無依則教養之恐不及也長則爲摒擋婚嫁雖鉅金不惜也子孫進奉常節儲以施貧乏有勸以毋自苦者太夫人曉之曰我膏衣食以濟人中心之快遠勝口體之娛且以爲子孫式也其克己愛人如此太夫人事姑相夫四十年夫亡後持家政又二十年體癯而神清遭喪哀戚又操勞逾量始感疾苦然強自振厲不肯稍卽晏安治事寬嚴得中深明大義諄誨卑幼往復不厭子孫無間男女皆令專力實學期有裨於世民國初憫皖北兵禍命人俊人傑襄辦寧徐鳳宿紅十字分會拯救瘡痍無算鄂豫數省災亦令人俊協助籌賑戒以盡心康濟勿驚聲華晚年門庭日盛愈自視歆然兢兢以盈滿爲懼民國十年辛酉四月二十一日晨起盥沐復鼾寐若無疾者神識恂恍醫治不效又三日而卒年七十有四葬吳縣堯峯山麓廣園府君墓子四漢森人俊漢熨人傑女適汪孫七女孫十曾孫五詳陳尙書夔龍撰廣園府君傳茲不具書

張一麀曰易稱地道無成而代有終世之張女權者譬之如許太夫人之以

賢孝勤儉相夫耄而益恭卒昌其世洵坤德之無成有終者雖相內庸行無殊奇絕特求之輓代蓋亦難矣廖與弟一鵬夙交人俊昆季又有姻連親見其一門羣從肫肫孝友然後知賢母之流澤長也爰詮次事實爲之傳俾垂諸家乘焉

儲亦樓筵室莫竹君女士傳

吾友儲君亦樓喪其筵室莫女士造余廬述女士賢德甚悉詞甚哀乞爲傳因詮次女士事略以塞吾友之悲女士諱琴軒字竹君浙江德清莫氏長於吳興故大家女幼隨宦走燕京就養於戚串章氏章君授讀於交通部技正李季虞家亦樓夫人李晚秋爲季虞女弟固多病有子殤於痘承其姑孫太君命入都歸寧擬爲亦樓置筵焉會亦樓謝山東高等法院庭長事旅居都門晚秋請其兄約亦樓往章氏與女士晤談甚洽遂歸於儲既偕亦樓夫婦南歸備極恭順事太君盡孝太君病則中夜焚香默禱親嘗湯藥鄰里稱其賢翌年生子仁太君始得含飴之樂晚秋亦愛如己出門以內怡然也旋亦

樓調任湖北浙江等省法曹女士留秦縣故里晚秋病臥不能任操作事無巨細一以委之儲固寒素女士尤屏絕浮華篤於待人薄於自奉敝衣蠹食雜婢媪傭作以爲常歲丁卯秦罹兵禍城中商民被寇蹂躪什九女士挈兒與家人昇太君避亂北鄉輾轉槍林彈雨中得無恙太君語之曰微子力吾家老稚殆矣時亦樓道阻不得歸也是冬亦樓遷吳縣地方法院未及迎養丁太君憂女士盡禮盡哀行路悲歎晚秋力勸女士隨任於蘇而已力疾留守女士諾之僦居齊門七姬廟街繼亦樓歸葬太君女士兩度往來江北往往風雪中蜷伏墓廬手指皸裂亦樓出席法庭時攜兒旁聽爲剖析是非井白針黹之餘每課讀以代父職亦樓宴會賓客則手自烹調有絡秀之風繼生第二子德時亦樓方于役溧陽家無應門之僮賴鄰婦爲之料理女士體壯健每當舟車多頓一肩行李襁負而行未嘗言倦居家洒掃洗濯米鹽縫紉乃至廁踰煩擱必躬必親晨起灌漑卉木布置器皿皆有常程亦樓工書畫則爲之磨墨調脂伸紙壓卷迨亦樓辭官執律師業尤持節約以助其廉

有所獲必肩鐫未嘗有私遇訟者貧苦或轉予之令人感泣今春因滬戰返泰掃墓省視大婦事定仍回吳久瘁之身遂患咯血亦樓爲職務奔走女士恐傷其心未敢直言而不知其疾之甚也竟於八月十二日夜分因血壅氣閉而逝傷已女士雖在蘇時以藥品衣服食餌寄大婦歿之前半日猶挈幼子德徒步出平門索所貸子金親購食品作書付亦樓門生致泰城既含斂檢得破舊補綴之童襪四詢諸仁曰此吾母日間往閭門將以施某貧戶之子女者嗚呼賢已亦樓又言女士精女紅能獨出心裁善烹飪能別饒風味擅書計習詞章黎明卽起夜深就寢終其身備嘗艱苦無一日安所居七姬街爲張吳王時故事慨然想慕其爲人奉佛持齋日誦心經觀世音經各一卷發願以生平勤苦所蓄施捨功德造福來生年僅三十齋志以終鄰近婦女聞其喪均失聲亦可見感人之彌切也亦樓將命二子扶柩回泰縣葬於南馬莊祖塋子仁年十一德纔四齡云

贊曰吾讀詩至江汜小星之章謂文王之化起於闔門而逮於邦國乃知娣

姒之間性命存焉觀女士之孝於君姑孝於大婦以事其夫而教其子者雖古之高明婦人何以加茲天不假年鞠躬盡瘁宜亦樓之哀痛逾恆也雖然自古皆有死死而令人不忘其德亦足以不朽矣

故代理大總統馮公事狀

公姓馮氏諱國璋字華符直隸河間人爲明開國勳臣馮勝之後永樂北徙馮氏由應天著籍河間清之初葉有任將軍者其後家世耕讀所居爲河間城外之詩經村卽漢毛公講學處田園之樂詩書之澤迨公祖若父時尤豐亨豫大父春棠有子四人公其季也昆季性均豪放不事家人生產讀書餘暇恆走馬擊劍爲樂又比歲荒歉則益困贈公折賣房屋以供子束脩至公就傅時乃無一椽之庇公幼而岐嶷每橫覽時局慨然有澄清天下之志論事不作凡近語願生計益盛親族靡能周之者至爲傭力以自給旣乃偕三兄負笈省垣肄業蓮池書院且讀且謀生計輒以貧廢學於是公年二十七矣時公族叔祖曉亭公就大沽直字營幕乃投筆而起走大沽統將劉祺營

次爲走卒祺固儒將與語大奇之清光緒甲申乙酉間直隸總督李文忠公鴻章懲於淮軍之暮氣創設武備學堂於天津徵取各營穎異之士祺卽以公應公潛心力學每試輒冠其曹然課餘之暇不以武備廢文事公諸兄皆入縣學仲兄以拔萃貢成均聲譽尤著時方右文公常愧不如諸兄無以承老父歎值年假回籍應科試時功令特設數學附生額公以明算故一試而捷武備生多出卒伍文試獲雋自公始文忠喜曰武校出文生矣是年應戊子順天鄉試應薦未售仍返校中受課己丑正月丁贈公憂貧無以葬厝柩宗祠中室三楹才足蔽風雨公痛甚旣貴乃遷葬且葺祠而新之曰以志吾終身之恨也庚寅學成畢業留校爲教員諸生帖然欽服當是時淮軍諸將領多以行陳起家謂功名自馬上得之於軍學多嫚語姍笑文忠雖知之固亦無以易諸將也畢業諸生多淹滯侷僚久之始任用卽用亦不稱其才公輾轉兵間依功軍統領聶忠節公士成麾下公以東三省與俄接壤窮冬蒙犯霜雪乘耜犁周行邊界詞其屯壘鄂博以及山川阨塞過目而誦於心如

燭照數計自冬徂春乃返蘆台報命忠節悉公能會甲午軍興凡戰術軍儲多資以擘畫是役惟功軍獨全且屢與敵抗有戰績論者多忠節之知人是爲公用兵發軔之始東事既歲忠節駐屯蘆防委辦軍械局會裕京卿庚出使日本欲得南北洋具軍事知識者與俱以溝通中外武學忠節以公名薦充武隨員日本軍學方孟晉公以夙所誦習參伍考證日與其將校游如故陸軍大將福島安正中將青木宣純等皆時時過從研覽其圖籍章制日積月累成書數大冊歸而上之忠節忠節未遑深考乃上諸前大總統項城袁公則以爲鴻寶也謂軍界之學子無逾公者袁公方創新建陸軍於新農鎮留充督操營務處公爲之集兵學專家討論折中而兵法操典營制釀章以及各項圖說次第成書與合肥段公正定王公有陸軍三傑之目袁公練兵公固與有力焉迨袁公撫山東仍以督操營務處率武衛右軍先鋒隊其時拳匪方熾濟南東昌泰安曹州各屬蔓延披猖公從袁公後解散懲治不旬日而俱竄時端王載漪柄國祖拳匪謂之義民八國聯軍入京東省一夕數

驚袁公命公駐德州扼其衝先是直隸教民受拳匪之害頗劇或引聯軍深入冀復仇保定河間滄州深冀一帶遍地烽火獨至德州則斂兵不進如畫鴻溝北方避難者狼狽至山東公言於袁公爲東道主且收其材武爲己用袁公因以收衆望舉足繫天下重輕公實左右之辛丑袁公移督直隸以拳匪餘孽之未清與外人駐兵之未撤也益銳意練兵設軍政司於保定分兵備參謀教練三處公則爲教練處總辦先設練官營以張君士鈺爲幫辦遴派教員修明操法於是北洋舊有之軍與新成之軍教練漸歸一律袁公建議設陸軍學堂由小學而中學而大學計十二年畢業而先設陸軍速成學校以應緩急之用一委公經營締造公於保定建陸軍學堂齋舍操場以及儀器自修各室皆取各國新制復延聘外國軍學家以廣教材而師範學堂經理學堂軍械學堂亦附設於其中又於直隸各屬分設陸軍小學堂以備中學之選其時准軍宿將多若積薪棄之則無以恤前勞任之則與新者又格不相入袁公又建議設將弁學堂仍一委之公准軍宿將于于而來年之

高者且逾六十武職則至提鎮文職則至道員且有侍衛一班以宮禁之虎臣廁於諸生之列資望既峻約束良難公獨剛柔得中四方材俊一聽公部勒舉北洋各學堂造就之衆至數千人今之上而統帥下而校尉內而部曹外而幕職凡北洋軍學出身者非同學卽其門下士也自其任教練時淬厲人才講求韜略設陸軍編譯局而以武學官書局分布各省各省言軍事者於是靡然從風矣既清廷設練兵處於京師分軍政軍令軍學三司以公領軍學司正使往來京保間逾年段公祺瑞出督各學堂公遂入京就職其入手大指則已有學堂學營之行省統一其教條未有學堂學營之行省迅立其基礎一年小成三年而大備參合程度制爲章程使各省殊塗同歸斟酌畫一公本以軍學鳴於時至是益臻恢廓中間彰德大操太湖大操以及直境會操頻數靡役不從均學術爲之發蹤指示也未幾陸軍部附設軍諮處以公爲正使又廷議設陸軍貴胄學堂而加公副都統銜兼任總辦並附設王公講習所諸來學者皆世爵懿親管理之難過將弁學堂倍蓰乃王公貴

胄既服公之學又愛公之誠久之以師禮相將無復有貴人狀態矣宣統紀元軍諮府成立公爲軍諮府軍諮使其上有大臣二人公以軍諮使承宣於下蓋已攬軍事之大綱以爲得行其志矣乃先後條陳時事至數萬言大要謂各國練兵均有注射之的如甲之練兵則對於某國乙之練兵則對於某國有所對則地理之講求器械之演習將校之指揮偵探亦必有所豫期一旦有事則知己知彼習慣自然我國練兵則茫無所據既無成謀之在握豈有勝算之可操是宜定練兵之宗旨又謂中國幅員廣漠地勢不同省各幾師多寡未當且師以省配各有畛域非國防所宜是宜改置軍區擇其險要利其交通合數省爲一區區各數師無事則會操有事則分哨庶乎全國指臂相使呼吸相通至於定教育普及之程籌通國皆兵之法築軍港以復海軍闢工廠以造利器凡其犖犖大者無不慷慨言之而樞府一未采納公乃憤吾謀之不用浩然思去其官值西陵與祭墜馬受傷方有元配吳夫人之喪而母孫太夫人又已逝世屢乞假不得請公亦箝口結舌隨聲畫諾不復

言天下事矣然清廷固知公之可大任也辛亥之秋武昌事起陸軍譚變總督瑞澂出亡舉朝震駭以陸軍大臣蔭昌率第一軍南下以公率第二軍繼之未幾而以公代統第一軍屬第二軍於段公祺瑞於時公疊膺保薦已官副都統矣既至鄂大捷於漢口乘勝進薄漢陽礮線及於武昌督署其左右之者則今之李督軍純王督軍占元陳督軍光遠也清廷以功封二等男公辭不受惟一以平亂爲己任漢陽既下鄂事垂定而湖南陝西雲南山西貴州江西江蘇浙江廣東廣西安徽福建四川山東各省皆追逐湖北民軍之後或就其都會或一郡一邑或一省而至十數處宣告獨立紛紛設軍政府人心已去大勢瓦解江寧爲南北綰轂之區亦爲民軍所有事益不可爲漢口旋泊之各國軍艦爲保護僑民組織陸戰隊於租界登岸其領事等往來調停力勸休戰遂訂三日間休戰之約再訂十五日間休戰之約段公祺瑞以兩湖總督來代公軍公遂回京授爲察哈爾都統接統禁軍而和平談判漸已就緒段公率諸將要求退位公以無位則帝號不存位爲虛政爲實政

可讓位不可去力爭累日故禪讓詔書不言退位而言遜政然朝旨雖已允行而滿蒙人心則洶洶不能帖伏訛言朋興其主力實在禁軍禁軍皆八旗子弟其人率忠勇強力訓練三年頗稱勁旅遜政之詔遲久而不敢發將待公之安撫而疏通也公知其上級將領深知大局之無可挽回不欲重糜爛乃進其下級官長目兵而勸導之告以朝廷之憂危國家之破碎與自古有國者滅亡之禍徒足以毀宗而殃民日夜開誠軍心感化公乃爭優待皇室條件爭待遇滿蒙回藏條件雖不能盡如所求而裨益於清室者至鉅至此乃宣布遜政而公之心苦矣民國成立公任總統府軍事處長仍統禁軍蓋公於禁軍如父兄之於子弟也元年之秋出任直隸都督禁軍全體軍官合詞留公乃以禁軍隨行特授勳一位官陸軍上將旋兼署民政長時民權初張各省登進官吏多取才於土著公獨延賢俊畀以職司凡曹掾僚屬但問其稱職與否初不限於籍屬其知大體多類此直隸五河爲患公欲大借外債興工修濬以計百年之利格於羣議未果行始終以爲憾事蒞任之翌年

湖口發難公馳書規勸蘇粵湘贛四省告以邦基甫定休養爲急萬不可自相殘賊重傷元氣卽有小不憚何爲苦吾民旣已不可休矣乃奉令任第二軍軍長充江淮宣撫使統所部南下將行言於袁公願以首功讓定武軍身率一軍由津浦鐵路按部徐行以爲後援定武軍倍道由淮揚折而薄江寧公則以大軍駐浦鎮隔江而陳會師金陵閱五十日而事平公不敢自言功也袁公倚公爲長城給予一等文虎章復以江蘇都督屬公旋任爲宣武上將軍督理江蘇軍務給予一等嘉禾章會歐洲戰事起或謂中國介於列強之間非變更國體無以圖存蓋醉心於德皇威廉之霸與俄皇尼古拉斯之強謂是帝國君主之效而不知其將敝也於是道路傳聞有項城將帝制自爲之說公以袁公爲當世人傑未肯深信因具密啓暢論時局中多諷諭嗣有事北上復乘間直陳袁公指天誓日力辯其無事後始知左右密謀得以少緩數月者實憚公耳未幾有人設立籌安會昌言中國宜采君主立憲制詭託學說函電紛馳京外士大夫趨之若鶩公獨謂此舉非出項城意漠然

置之先是段公祺瑞以不附帝制罷陸軍總長外省擁疆寄爲軍界山斗者獨公耳二三權要務欲推公爲領袖以主其事游說之使絡繹於途公皆婉言謝絕或怵以危詞亦拒不納方江蘇請願代表之入都也公謝不見或強之則左右顧不發一言可以見公之志矣滇省護國軍起政府議主用兵公迭電密陳請勿輕開戰禍實則冀望兵諫者有以感悟項城使劫運可以潛消而令名之永保也於夫東南各省先後獨立蘇當海陸之衝憤激選事者爭與各省響應地方幾受其禍賴公有備事起卽平南京爲長江流域四達之區天下有變無不被兵革甚公者謂爲叵測去公之謀益急內召爲參謀總長欲令回京旁觀多爲公危公處之泰然不少措意會所屬軍民合詞請留不果行卒之桴鼓不驚晏然爲一方保障至今吳人德之項城旣逝公爲位哭之甚慟蓋以爲春秋之義不從亂命而從治命苟利國家死生以之所以報也黃陂黎公依法繼任公首通電各省要約一致擁護又主張回復約法召集國會自西南護國軍起滇黔之師已及湘粵而各省區統兵之官或

逐帥自立若湖南浙江四川廣東旋仆旋起不可爬梳公仗義執言屢有建
白蘄規復統一以鞏固國家而解人民倒懸之苦奉令特給一等大綬寶光
嘉禾章旋國會補選公爲副總統仍領江蘇督軍事時德國以潛艇擊沉中
立國商船犯衆怒政府主與協商國共同抗議行將與德絕交中外爭持異
同靡有定論公以丁巳二月入京助段公祺瑞定大計乃於三月間由國會
通過絕交案方事之殷也段公以羣議掣肘立辭出都公則親至天津和解
與段公聯袂回京而後自之江蘇本任德旣不悅絕交之後第二步卽爲參
戰乃國會意見與政府不協各省督軍集於京師調停無效公屢電剴切勸
解瘡口曉音然政府改組國會解散而復辟之謠竟成事實矣公馳電各省
聲明聯銜奏請之不實會段公祺瑞馳入馬廠軍中急電公轉告今曹經略
使錕今江西陳督軍光遠爲段公內應合力平之是時黃陂旣退位段公電
公速入京依法代理公以長江重地風鶴頻驚須自鎮守而專任段公以討
伐已則諭定武軍宿將以大義皆受命惟謹蘇皖間得以晏然無事公之曲

突徙薪有以弭之也京師事定公請黃陂復位黃陂不應段公及各省督軍省長環電請公卽速繼任以維大局不得已於七月六日允卽代理大總統職權復以段公及各省教促於八月一日至京造黎公邸次再請復位仍不應乃就代理之職其一切大總統應有之典禮公概辭不受曰余固代行職務者也先是公在南京時段公電請組織閣員公以內閣擔負責任如所請未易一人既至京師拱手受成凡閣議所可者無不可也惟以素性愛好和平期與國民求一日之安不願復言兵事與西南諸帥函電交馳聲淚俱下迨和平破裂長岳震驚諸將扼腕裂眚公投袂而起欲自將視師會言者力阻乃已然終以宇內之不統一往往私憂竊嘆引爲大恨或繞室飲泣傷國勢之危殆民生之流離至於長夜失眠十旬九病憂能傷人信矣幸今大總統徐公以十月十日就職公依法卸任如釋重負先是新國會開幕之日公蒞兩院行禮歸則集文武屬僚於懷仁堂自爲演說願避賢路以俟徐公其言深切蓋民國以來先後兩大總統一堂授受此爲紀元蜚語四騰有如市

虎流言止於智者公早有以防於先幾也卸任後少滯京邑尙與熊君希齡
梁君啓超汪君大燮等議設大學研究科以資高等學員之深造公豈嘗一
日忘世耶今年春歸河間故里桑麻場圃略作自娛與族中諸父老子弟喁
喁話舊布衣草笠從耕夫牧豎于隴畔見者不知其爲貴人人亦往往忘
之說者謂公之平民主義根於天性子弟等私幸謂公畢生艱苦藉此頤養
可延天年公則曰世變亟苟無治本之道使失所之民得安其業何地可爲
樂土吾輩其忍獨寧乎十月復從河間蒞津以舊部十五十六兩師官兵積
欠月餉再至京謀所以安之者居兩月將返津矣十二月十日忽感寒疾醫
治不愈二十八日夜逾十時汗出面赤神氣上越則呼曰速爲吾正衣冠易
簣而逝病中諭諸子曰家事吾無所念惟吾長兄子尙幼汝曹其善視之彌
留前二日呼親朋口授遺命卽今所傳上大總統遺書及通電反復丁寧於
和平統一之業者是也公性質厚於故舊周之無吝色世言公善自封殖公
嘗語人曰項城雄主吾學蕭何田宅自肥之計多爲商業以塞忌者之口耳

自公治軍督學皆披星而起無間寒暑日昃未食往往十日而九體素強健經墜馬後筋骨間時作痠痛漢陽之戰或經旬不眠神觀內損由是勞倦不如少壯時又好深沉之思獨居冥想不與人謀然其推賢讓能忍人所不能忍卽與公習者亦不能盡知也教諸子以嚴厲聞近世高門華胄鮮不縱欲敗度爲當世羞公長子家遂躬耕於鄉被舉爲國會議員公戒以毋驚聲氣次子以下皆恂恂不與人通饋遺世以是多之病中譚語皆國事或兵事不及其私嗚呼傷已距生於咸豐戊午十二月初四日享年六十有二配吳夫人繼配周夫人皆先卒筵室氏彭氏程子家遂家迪家邁吳夫人出家邁彭氏出家週程氏出惟家迪早卒女子四長適陸軍中將陳之驥餘均未字孫海岱海嶧海岳海岱海崑海崙以海岱嗣兄後公之葬未有期公子家遂屬一麀狀公行一麀自丁巳從公入京長祕書其丁巳以前事皆訪諸公故人參以平日所聞稍加論次以待世之觀覽焉民國九年一月吳縣張一麀謹狀

族叔誠之府君事略

君諱是謇字誠之始名是言應童子試乃改今名入長洲縣學清宣統之季長洲合併入吳縣故遂爲吳縣人曾祖會淇祖運頤字春甫以文學著而不永年考世棻字清士浙江富陽縣典史生男子子二人長諱是詩字詠之君其仲也君於余爲諸父行而余年長君一歲在族系則同六世祖願不以親盡而疏者蓋君天性之厚處已於至毅而遇人以甚忠雖行道者能言之靡論宗族矣君自言妣胡太君懷妊不及月而生故小弱異於常兒長老竊竊憂其不壽清士公當洪楊亂時嘗以身護其戚產萬金而致之戚德甚爲援例納浙江典史以報尙記余幼時見清士公與先府君媿媿道家常語其笑態君絕似之清士公歿君纔十二歲伯兄詠之公以授徒餬口君從胡太君命爲學徒於常熟某質鋪吾國商業質鋪規律最嚴君晝而傭力夕而暗誦鋪掌潯溪閱見清先生老儒也奇之遂教以舉子業卒游於庠仍反鋪鋪主亦不以常徒遇之當前清光緒丁亥間先府君宰正定詠之公北游出春甫

公遺詩府君錄副本命余受之是冬余因事回籍君亦在蘇適族叔伯英公病歿於浙之塘栖鄉與君爲同祖昆弟君倡議迎其柩歸余出資共雇一吳江快船指塘栖啓櫬而納諸舟君與余夾棺臥者兩夕昇諸胥門外墳屋葬焉是爲余與君共事之始一日君游觀橋市失其時計衆見某甲拾之甲脅於衆不敢匿君已得物行數步復返予某甲銀餅一其所爲大率類此中歲習醫有診者必徒步往不受酬或爲具肩輿必跳而走光緒甲辰乙巳間君經商折閱余時在北洋幕府適奉天督練處闕軍需官以君名薦蒞奉未及期不習爲官中寒暄徵逐返津改充北洋糧餉局會計時余兼署天津同知余生平不善治生而又不甘省嗇君助余稽核徵收調節出入使幕府所得薪俸儲積以備不時余乃得於宣統元年盡室南行君亦辭糧餉局同歸爲余經營家務辛亥獨立余或病或奔走寧滬家中無巨細皆倚君民國元年秋北上送孳君自以精力日耗又素習子平家言謂將有咎自是回里不出惟日至公民布廠且理族中事之至纖至悉者方辛亥國變里人中或因貧

闔室自盡余聞而酸鼻商弟輩及友人募貲設廠以養男女工徒因君性好善屬焉廠本絀幾中止幸董事費君仲深力任摒擋乃獲全君一聽約束惟謹余去臘南返過君舍見色瘠不華因勸爲導引靜坐之術臨歿前一月尙謂學靜坐後今冬居然不咳矣不料立春以後四肢浮腫竟於十二月十八日申刻棄世嗚呼哀哉君生平啞於口不能盡其胸中之所欲言又短於肆應之才而惟以赤心推人腹中雖遭疑謗不改其度敝衣徒步自同寒蟬人謂君何自苦乃爾不知君以此爲樂彼世所樂者君固弗樂也自君之沒吾族諸父行遂無一人族之譜牒及邱墓祭掃以及宗親三鄰之貧而無依者皆無所倚仗知與不知咸太息泣下而况余之蚤驅相憐者邪君配江孺人子三一新一振一敬女二適王適侯一新京師警察廳司法處科員聞君病馳回里門正易簣之日也殯之翌月將葬矣懼君之行誼久而無傳故略述梗概以備志乘之采族姪一麀敬狀于京師旅次

太夫人哀啓

哀啓者先繼祖慈氣體素旺自言幼頗尪瘠中年疊遭離亂操作過於婢媪老而不疲神明湛然雖六十年前事能記其年月先曾祖考味魯公與先外曾祖吳公少山爲莫逆交遂以先祖妣歸我先祖考韶笙公爲元配生先考寅皋公產後未逾月病卒仿東坡崇德同安故事以先繼祖慈歸焉時味魯公暨先曾祖妣蔣太夫人在堂先叔祖三人祖姑母在室者一人先考先姑母均幼稚先繼祖慈親操井臼孝事舅姑撫諸小姑叔及先考均有恩至庚申之變全家避鄉間味魯公留城不肯去城破前一日爲程怡庭表伯祖強曳出城全家均未攜衣物而先外曾祖舉家均躍入東麒麟巷南岸河中惟先舅祖詠梅公年幼躍最後積尸水涸不得溺而蘇有傭媪負之出城就食吾家先繼祖慈旣感流離之苦又痛母家骨肉之幾殲號泣呼天無復生趣味魯公旋捐館無以爲歛遺詩有疾病死應爲有福流亡歸已盡無家二語可以想見洪楊時代寒士清况先祖考奔走乞貸得以成禮昇棺出入紅巾中至西跨塘先塋安窆而身自挈眷求食於滬哀毀積勞神經虧損先繼

祖慈奉先曾祖妣純孝凡十餘日炊爨廁踰縫紉抑搔米鹽瑣屑之事皆獨任之先曾祖妣患乳癰已潰先繼祖慈日夜爲洗滌十餘次若是者十年如一日聞先叔祖誦穆公每舉以告人謂孝婦事姑未見如吾嫂匹也亂定返里諸叔祖先後入學爲諸生先祖考得以館穀及書院膏火餬口同治癸酉舉於鄉先繼祖慈出所有爲兩小叔完姻推燥就溼共苦分甘妯娌視長嫂如姑諸叔亦視長嫂如母吾家自橫渠公後隨南宋渡浙輾轉徙吳江之武漢勝堂港明嘉靖後又遷蘇城自不孝一磨一鵬以上爲秀才者九世相續惟韶笙公成進士願自庚辰以知縣發直隸卽用至丙戌乃得補正定縣令二十月而病不孝兄弟每見正定府君四更卽起治事早膳時堂訊已畢省視河工捐廉修治觸發舊勞年餘卽病假歸才半年見背積逋未了不孝兄弟以筆耕餬口私忖先代如有餘財以遺子孫則不孝兄弟殆將墮落無以自立先繼祖慈每述先曾祖妣之言曰喫虧卽是便宜便宜卽是喫虧故先繼祖妣在諸母中以懦名生平不能作欺人之言行欺人之事自少至老習

於勤動未明而起歲以爲常先考以清宣統二年病疽先逝不孝爲章賴先繼祖慈與叔父教養得以長大成業先繼祖慈八十後因勞輒憊須臾又忘之其勤劬爲中年人所不及性至慈聞人困乏至爲之涕下迄今親串有孤苦者罄所蓄與之且責諸孫繼之有不應者則怒旋亦恕之故先繼祖慈篋中衣飾存者蓋寡不孝一慶等歲時奉獻一饋諸他人孫婦輩常私語以爲笑樂自癸卯壬子丁巳三次迎養京津間舟車跋涉歸夏氏潘氏姑母均前卒家人諱之二十餘年繼而覺之曰吾老矣懼目之失明故不泣也前年江浙構衅先期迎至滬寓每聞親友艱困輒悼歎不置不孝一慶等出入虎穴有時忘其身以背臨深履薄之戒老人轉不介意以爲攬轡澄清分所應爾今年舊曆十月朔九十生辰不孝等私自稱慶不孝一慶爲江浙協會推往漢口臨行問老人所苦謂除輒弱外無痛苦故於中秋前三日就道不料十八日起微有不適不孝一鵬請醫診視謂右脈已絕乃急電促歸不孝一慶適奔走潯漢之間電局查無下落不孝爲章在津充任中國農工銀行經理

聞電卽歸先繼祖慈於二十日服藥二十一晨服人棧湯後尙起欲梳洗謂今已稍愈乃日加未氣息漸微撫之已絕不孝一磨得第四電由大北公司轉漢總商會卽晚星奔舊曆二十七日乃至滬寓不及親視含斂終天之恨無以爲人謹濡墨和淚繼述崖略以俟大人君子錫之銘誄感恩不朽苦塊餘生語無倫次伏乞矜鑒

紀念章太炎先生

太炎先生捐館後門人徵集遺著與平生言行將載於制言特刊紀念專號余惟君之治學浩如煙海無所不通非末學膚受所能評論故獨述與君交誼始末以見一斑當清光緒甲午後士夫恫國勢之日蹙有志於當世之務爭言維新余亦糾合同志爲蘇學會於唐家巷小學時擔任在滬購新學書者爲祝君心淵祝君寓滬昌言報館與太炎朝夕晤一日祝君持楮書稿示余余將鈔錄一通未及半而君自滬至余乃訪君於道前街逆旅談甚久君是時稱近世文人推重汪容甫與王壬秋是爲余與君相識之始楮書由祝

君倩毛上珍刊印出版會員邱君公恪年最少與君甚相得時赴滬訪君稱述其言行惜公恪不永年旋即世云庚子余往蜀中游幕與君音問遂疏但聞君已出獄赴東瀛發揮民族主義辛亥革命都督莊君思緘在蘇君偕唐君演來督署作竟日談旋返滬翌年中山讓位項城君因王君揖唐邀之北上項城以余與君雅故令任招待之役且聘爲高等顧問余商揖唐謂君久無室家之樂宜爲蹇脩卒以張君伯純介紹與湯國梨女士結婚焉一日君告余以邊事日亟欲爲籌邊使以償夙願言於當局允之君乃開府吉林爲熊成基先烈開追悼大會又以謀墾殖請款於財政部不得則大怒馳書告余余力言於項城匯款三萬圓以濟時長江七省同盟已有風說君謂北方空氣不佳將圖南遂離吉往滬未幾又入都行授勳禮時至余直廬縱談余勸其講學以餉後進旋以言事激切幾被幽囚幸黃陂緩頰事乃得解項城既沒南北紛爭君往來兵間列帥重其名亦不能盡用其說卒在滬著書講學君於蘇城爲舊游地嘗買宅於侍其巷以地窄未遷李君印泉金君松岑

請君在圖書館講學吳中俊秀子弟翕然從之是爲國學會之嚆矢君乃卜築於錦帆路自標章氏國學會以別於前會今年春夏之間粵桂已有違言君上書當局得報意甚厚且令其門人告余將謀一晤適余小極約以後期乃未旬日而君已病革趨視之則於兩小時前已薨逝矣傷哉余與君相識四十餘年近歲同住一城故舊之情久而彌篤人天永隔薄海同悲君之學行自有千秋固無俟余之揚摧矣

汪荃臺年丈私諡孝惠先生議

執友汪丈荃臺以中華民國十四年一月十六日薨於里第友好咸集謂宜如顏延年誄陶靖節之例諡曰孝惠先生而徵其說於同邑張一麀先生事實詳見餘杭章炳麟所爲傳謹按諡法五宗安之曰孝慈惠愛親曰孝秉德不曰曰孝協時肇厚曰孝又柔質慈民曰惠愛民好與曰惠先生孝乎惟孝施及三鄙剛亦不茹柔亦不吐生平無疾言遽色而決大疑定大計則屹然如山岳之不可搖至其勤施於民并禦災患可謂愷悌君子存榮沒哀者矣

於禮樂記聞其諡知其行也表記先王諡以尊名註云聲譽雖有衆多者卽以其行一大善者爲諡耳白虎通諡者何也諡之爲言引也引列行之迹也一謚又按記郊特牲曰古者生無爵死無諡註云然則生有爵死卽當有諡自是前代之禮也古者諸侯受諡於天子卿大夫受諡於其君帝制尊王以爲常例然且視陶徵士之諡靖節出於友好所爲者已弗如遠甚或謂國體已號共和則生旣無爵沒亦應無諡余曰不然共和國以道德爲重諡者何行之迹德之符也白虎通又曰死乃諡之何詩云靡不有初鮮克有終言人行終始不能若一故據其終始從可知也誠懸此議以爲鵠今之國民其能如蔡邕所謂郭有道碑無愧色者吾見亦罕矣吾輩之諡先生非爲先生也凡爲聞先生之風者噉然而起爭相愧厲以爲共和國講道德之國民此物此志也謹議

雲南李公燦廷哀誄

維中華民國十八年己巳冬月賓川李公燦廷卒於昆明里第是年臘月吉

日葬於五老山之陽翌歲一稔其叔子培炎于役京邑道出吳門介友人騰衝李君根源以誌銘碑傳之文枉顧敝廬屬爲哀誄嗚呼山陽思舊之銘已將改歲申郎無愧之作敢有諛詞惟公望出隴西籍源江右因隸軍符於黔國遂綿土著於滇池代嬗英芬夙懷任俠考晉卿公雅習奇佻之術熟精靈素之書栽董奉杏林活人無算參郝詵蓮幕有功不言既稱續命之田亦號投金之瀨公導乾坤之清淑毓川嶽之寶靈幼學篤於繩樞慧心出於髻齒寢挾鉛槧夕敝典墳雖丁劍炊矛淅之時不廢彈琴詠風之樂由是騰茂實蜚英譽擢魯侯之芹龍頭早佔伐吳剛之桂鸚薦常膺已而土芥浮榮紹衣門業以上醫醫國作春風風人得秦越人之方既嘘枯而植瘠飲蘇仙公之水且匡困而咨無陰德比諸耳鳴行路概諸肺附至其功崇桑梓力遏萑蒲巖部勒於鄉兵助扞禦於大府分寬饒之饗者士卒傾心過康成之鄉者黃巾斂手旋被舉爲鄉議事會議長公則闢文翁之石室大集中纓輸卜式之家財兼資修甍計設立初等男女學校創辦中區高等學校蒙稗開悟俊雅

聯翩入王烈之鄉皆羞爲盜沐蘇瓊之化相揖均田君子之澤常存達人之
功不泯時則鄧侯賢子各有專長王氏諸郎俱邀辟舉乃就烏哺之養近依
雞足之山沽酒命儔香山九老之會提琴召侶竹林七賢之班陶陶乎忘其
非我非魚汎汎乎聽其呼牛呼馬然且舍王珣之宅以建精藍指子敬之困
以蘇窮士里名通德山號後隆分人愈多老氏之言斯驗爲善最樂東平之
訓有焉先後所輸無慮鉅萬澤流百世比于公之生祠舉火千家思杜陵之
廣廈正值懸弧舞彩獻南山之六章壽公忽聞飛錫升遐識東坡爲五戒再
世蓋公自年將曰晝悟徹無生一念彌陀六根清淨鐘聲梵唄宣我佛之宏
慈洱海蒼山了多生之大願及其沒也頂熱如火魂歸於天不有異徵曷彰
穆行嗚呼過九京而思隨會入大梁而叩夷門仰止之懷無間遐邇諫長之
僭曷任主臣辭曰

南詔奧區古稱佛國臨濟燃燈大巍無極厥有居士苦海慈航一朝怛化放
無量光文恭端毅同其吉祥惟公之生業隆堂構聲雋一夔褒然舉首名場

屢躡初服方還世傳大藥術著靈蘭不求酬報或恤單寒盜矚其鄉乃嚴刁斗扞衛有方強梁退走敬教勸學通商惠工大施於國不有其功或建輿梁或施糜粥或罄檀施華嚴樓閣庭盈玉樹家擁瑤環馨羞絜膳閒居閉關茶半香初琴歌酒賦解帶虛廊扶筇老圃生平大節祛膏黜奢令終有淑貽穀無涯屢散千金施及諸子蔚爲國華永光悼史哲人既萎悵望松楸發言扞藻記之素旒

祭湯明水文

中華民國五年四月十二日吾友湯君覺頓以廣西代表名義赴會於廣州之海珠爲賊所戕罪人未得至十月二十二日同人等謀所以追悼君者海內外無論識與不識皆爲感慟一塵等與君交五年矣以爲學術之淵深性情之篤厚同輩無不斂手推服而猝死於非命上爲天下惜下以哭其私乃臨風醞奠而爲之文曰烏虜覺頓而竟逝耶當吾與君之相識在民國元二之交每謂使君理財吾國其庶有豸耶君之厄於羣小也余輒以公道護君

而孰意由今思之皆成夢囈耶方浮雲之蔽日余告君以將爲尸諫之史魚
今余猶僂然僅存而君乃奔走崎嶇以及於死耶君之赴津赴滬也余與君
消息不得通迨四月初始以電訊勸君回京詎料時不兩旬而凶耗已至耶
君之遵海而南也本投身虎狼之淵而竟不死乃死於樽俎笑談之際耶魂
而有知使射穎考叔者其能高枕無憂而已耶抑君旣厭濁世之嶮巇遂乘
雲御風浮於碧虛而不復下視耶君之文學經濟固卓然專門名家矣而聖
聖恂恂不慕榮利非古所稱高世之士耶信皇天之祐善人何夫子之不復
愍遺耶有母在堂有嫠在室其何以慰君於無旣耶有椒其馨有蘭其薰其
何以塞平生契闊之哀與昏姻之誼耶君旣以身爲犧牲將子遺之民何以
使瘠者肥而呻者起耶嗚呼覺頓已千古矣嗟國事之搶攘其藉君之靈以
請於上帝耶尙鑒

王紫雲先生小象贊

善務處長王
清泉之翁

儒文俠武兼之實難惟公嶽嶽義膽忠肝力學有餘兼精武術居賈療貧載

星而出至誠格盜古有彥方失物酬絹卒感強梁時世多艱投筆奮起焚券
馮驩施於軍市大水爲害躬援溺人汎舟四出拯我生民決河之灾或繫其
婦公輸以金仍還其耦凡所施捨義泣鬼神近古之俠誰歟比倫專闔從戎
扞衛鄉里裹創復蘇履危如砥樂善不倦率以終身自奉則儉與人則仁桓
桓長君實總警政十載三吳萑蒲以靖繫公明德施及孫子愛國愛民遺言
在耳神山峩峩海水蒼蒼英風偉貌質之在旁

商團團長鄒椿如君象贊

先賢端木貨殖之雄敵吳存魯氣吞王公佳兵不祥商則尤痛師端木不能
則師子路烽烟瀕洞戴胄而趨以扞吾圉以友師徒鄒君洸洸哀然舉首朝
露梁摧年未及耆擊鼓思將闐闐漣漣後有作者買絲繡之

平江李蘭蓀隊長象贊

瀕湖羣盜紛如毛民不安枕思驃姚李公奮起傾其巢大呼陷陣聲如潮敵
彈雨飛中公腹猶督而曹毋畏縮巫陽下召歸天闔一軍嗚咽千家哭是真

男兒不虛生七尺之軀千秋名是真男兒不虛死以死衛民天所視嗟吁吾民慎勿呻靈旗呵護公成神下有妻孥上老親何以酌公吁吾民

張福申象贊

昔余年之髫髻兮時劍侍於君家君咿唔而婉變兮粲玉雪與蘭芽繼勞燕之分飛兮又同官於畿輔君三宿而抽簪兮余塵壒之爲伍桑海之變遷兮向粉榆而道故報李而投桃兮將永以爲好也何日月之不居兮倏巫陽之下召也歎人生朝露兮霑余襟以浪浪庶翱翔而歸來兮薦寒菊以馨香

范厚甫君象贊

希文嶽嶽先憂後樂創爲義田施於宗族明德之後代有聞人賜山光復祠宇重新宗風再振莫不多君父老喁喁觀鄉結社廚願紛羅君尤健者爰開廣庭迺揜羣雅我游青冀曾幾何時遽聞噩耗掩袂漣洏有書在楹有菊在徑靈兮何依支劬清馨

楊叔英君象贊

猗歟楊君亦儒亦賈操奇計贏遂躋華廡仁能及物義不徇財噓枯植朽榮
獨是哀桑梓敬恭皤然長者抱朴精廬庀材結社未臻毫畫永式扮楡何圖
奄忽鸞鶴天衢葛仙之嶺聖湖之鄉靈兮往來山高水長

武進許稻蓀君象贊

萬國交通商以戰雄漏卮誰塞墨守輸攻許君嶽嶽杼柚在胸機牙四應歐
美趨風君少孤露母教是崇韓丸歐荻遂昌其宗秉姿忼慨異于常童麥舟
輸范債券焚馮旣富方穀靡美不從善人是富天心至公匪君之富而公之
傭君身雖逝神遊昊穹錫山蔥翠綽楔龍巖古稱遺愛昭示無窮

木瀆徐甸孫先生象贊

猗歟徐君今之古賢術操圭頓行媿淵鑿敦禮睦族竭誠奉先泉明課子昌
黎窮年人亦有言爲善最樂惠溥鄉里澤及溝壑載麥舟輸置田命續掇拾
遺文料量敵籠載其高義不慕浮榮龍威可隱牛眠勿爭自甘藜藿永謝犧
牲滂仁及物曠義好生包山之峯香溪之社山高水長靈兮上下述德詩刊

鑿楹書寫是曰天民以詔羣雅

美國柏樂文先生象贊

天下爲公胡中胡外翳我柏君實行博愛活人興學獨厚於蘇蘇人德之教
澤涵潘君年古稀重洋西渡忽聞噩音老成終古水源木本有識同悲廣衢
傑構謝君所貽

吳江黎里都金宗兄象贊

瓜瓞勝堂吾祖之墓諸父拏舟於君焉主疇昔之歲君過吾廬愛女摟網營
救馳書曾不再期驚聞君耗長吉嘔心修文赴召鄉里嗟歎經師人師臨風
嗚咽天道難知

錢新之母曾太夫人象贊

猗歟賢母坤輿粹鍾旣嫺姆教亦曰女宗作嬪儒家食貧自屨荆布釵裙躬
操井臼折筭督教誕育奇英阜財圭頓先識陵嬰義粟仁漿感均行路天命
宜謚遐齡純嘏未臻大耋遽歸太清皋魚之痛備極哀榮僕亦鮮民同悲罔

極藉此管彤以表明德

韓止石省長元配王夫人象贊

猗歟夫人巾幗之鵠載其賢聲膺茲多福八座稱榮七旬行祝恒化崇朝凋
霜碎電觥觥夫子志在蒼生云何悼痛哀過於情夫人之德非恆可旌夫子
清貧才豐境齋百兩未儲一甌是息當其來嬪了無愠色井臼親操鉛華勿
飾以相藁砧勤修內職少君提甕樂羊斷機迭膺守令洊涉監司汴粵遼皖
鴻案相隨以勤互助以儉自持四十餘載一埤敦遺夫子歸耕相期終老桑
梓呼號敦促就道重長鄉邦義不能拘是時夫人偶嬰末疾料理米鹽詎敢
暇逸節署起居沈疴漸失豈圖鸞鏡遽爾分飛往生淨土遂謝房帷親朋雷
歎妯娌腸摧况於伉儷涕下如糜物有榮枯月有盈昃唯此芳徽永永無極

劉實甫先生元配蔣夫人象贊

滂喜名媛生有至性伏女傳經曹娥厲行觥觥夫子珥筆中樞監司隴右不
遑寧居事靡洪纖一埤遺我教子義方母兼代父鵬鳩如一樛木逮下仁孝

烝烝澤及矜寡
竭來金闈就養子舍未臻
耄耄恒化崇朝安仁痛悼
皋魚悲號式瞻遺挂白雲在霄

心太平室集卷四

心太平室集卷五

吳縣 張一麐 仲仁

汪荃臺世丈七十壽序

吾吳風土清嘉人文蔚起生其間者往往有鉅人長德靈光巋然足以爲鄉里光榮而資後進以矜式凡大疑大計諮而後行若夫當陽九百六之會出萬死不顧一生之計泰山崩於前而不動麋鹿觸於後而不驚雖危起居竟伸其志足使懦夫立頑夫廉履險如夷泊乎無與則吾於世丈荃臺先生僅見之矣贈公和卿太年丈爲鎮江府學校官最久生丈夫子四人先生其叔也伯兄藥階年丈與先大夫爲癸酉同年仲兄芝房季弟蘭楣兩世丈與一麐同舉壬午鄉試先生乙酉拔貢又與一麐鄉舉同歲文郎袁甫公使又有同譜之誼故余家與先生兩世通家熟聞其盛德潛行今歲先生年七十里中同人謀所以爲先生壽而督一麐爲製錦之文不敢辭先生由拔貢官內閣中書嘗隨其仲兄出使日本嫻習外交旋入湖北蔡毅若觀察幕中有所

撰擬皆曲中肯要是時張文襄公爲兩湖總督竦然異其文詢知出先生手風左右諭指令入幕未遽許也已而庚子北方拳變起軍書旁午乃逕札委督署洋務文案時幕府人才填咽而先生實總其成每一稿出文襄擊節歎賞是時聯軍入京湘人唐才常創自立會將於鄂中起事謀泄被獲士大夫列名黨籍者甚多先生乘間焚其簿始告文襄曰窮治必興大獄滅其迹則人心自安文襄歎息而罷其陰德多類此漢上繁華甲海內幕府諸彥或不免游譙之娛獨先生坐處有常不徇習俗以節署爲家文襄善夜談或至天明乃寢先生晨接見賓客晝治文書夜白事漏盡則假寐待旦其精力有過人者中間文襄權篆兩江及入都議政無役不從洎文襄回任鄂中檄署黃州府篆尋調漢陽未幾又調武昌兼幕府如故先生入參機要出綰大郡雖躬躬謹畏而忌者滋多乃稱疾解印綬前後居幕府七年鬢髮皓然矣及文襄入樞廷屢招不往簡湖南常德府旋補長沙爲政慈祥豈弟每決獄錄囚則悽然不懌嘗有士人以革命嫌疑被逮大府欲置重辟先生愛其才卒脫

之宣統庚戌三月湖南饑民嘯聚徧攻撫藩以下官署獨相戒無犯郡守先生徒步勸諭而反側以安其功德之入人有如是者辛亥蘇州獨立先生以居憂在鄉前都督程公延以賓禮先生知大勢之所趨於程公保境安民之意樂贊其成而於名位則謝卻會南北統一故大總統袁公夙耳其名乃就養入京備顧問乙卯籌安會忽張異幟一日先生袖其七不可之說造余寓命奉以進余曰余備員禁近理宜面折廷諍公何爲者先生笑曰吾旣爲此文預備往軍政執法處去矣子其爲我達之時羣蜚刺天忠而被謗是文出人人爲先生危然亦竟以不危帝制議寢而全國已騷然矣由今思之使用先生之言何至軍隊之複雜財政之危殆民之憔悴於虐政迄今日而無術回天耶然則先生當日之批鱗抗議視死如歸有足以動風雨而泣鬼神者豈可求諸尋常得失之林耶旣而閉戶著書作救亡論十九篇其要旨在提倡道德改造社會其言如布帛菽粟之一日不可離道旣不行浩然思歸居城東故廬被服儒素綜生平高節皆人所難能而澹泊寧靜與物無忤今年

臻壽靈神明不衰康強逢吉備於一身文郎哀甫公使東行有期將以三月間回里稱壽先生以世亂未平力戒鋪飾一慶等敢援古人旅酬頌禱之誼以致鄉人愛敬之思先生其莞爾而進一觴乎

段公少滄雙壽序

徐州據江蘇建瓴之勢土厚水深民族龐厚生其間者必有鉅人長德國之大政諮而後行後生小子之間學者得所向慕靡然從風足以動四方之觀聽則莫不嘖嘖推蕭縣段公少滄民國十三年歲在甲子六月初四日爲公六十九生辰先期四月十三日實公德配尹夫人華誕邦人士謀爲文以導揚盛美而督一慶任祝嘏之詞一慶幸獲交於公有年稔其家世與政績其何敢辭公之先德榮祿公紫滄先生以文學起家繼治軍旅曾爲湖南糧儲道在官清勤無餘財捐館後公還蕭縣孝養重闈益劬於學光緒乙酉以拔萃貢成均次年廷試授七品小京官隸刑部乃奉嫡母王太夫人居京師供職而歲一歸省其生母尉太夫人於蕭癸巳考取軍機章京庚子隨扈陝西

入直草制嗣充領班章京刑部秋審處坐辦由主事遞擢員外郎郎中京察一等以道府用丙午署京師外城巡警廳丞百事草創游刃有餘旋簡廣東高雷陽道署提學使時新政勃興設校育才士氣大振以宅王太夫人憂謝事返里皖撫金壇馮公重其爲人調充督練公所總參議凡調護將領訓練士卒一以委之服闋簡直隸清河道己酉聞尉太夫人疾心動馳歸旋棄養讀禮不出時天津徐公以樞相督辦津浦鐵路事調充南段總辦綜覈名實俾底於成會辛亥政革南北軍鬻集其間悴心勞形卒以無擾旋督辦江北清鄉捍衛桑梓厥功尤多甲寅巡按湖北鄂當中原脊脊又興廢舉墜洪纖畢張鄂人大懼丁己以勞乞病戊午被選參議院議員庚申旋里次年任海州商埠督辦翌年兼徐州商埠督辦凡輟迹所履皆前無所因遺大投難罔不就理雅愛交游篤於故舊京朝諸老輩如南皮張文達高陽李文正長白榮文忠壽陽祁文恪皆折節推重瑞安黃侍郎爲督學受知師公敬禮三十年如一日長安尙書薛公爲廷試師並郎曹長官夙相契尙書身後爲刊所

著律例遺著行世其生平義舉類此公性忼直遇利害侃侃直陳無所隱然寬中不念舊惡人亦以此樂就之又好任卹官京外三十年解囊周急無慮巨萬辛亥後所營典肆以虧累輟業親友儲款至今猶陸續清償而所貸與貧窶者輟置不問遇鄉里後進推挹獎勸如恐不及苟有所求未嘗不視力所能以應之至待昆弟尤親愛無間言凡皆出於天性之自然絕無所假借緣飾也公長身玉立鬚髯若神近歲臥疾年餘善自攝養精力康復神明不衰與客談讌娓娓忘倦人以爲期頤之徵焉德配尹夫人系出名門席榮不靡逮事兩姑備事孝養公官京師夫人輒留治家事衣不重帛食不重味待戚黨以誠教子女以道有小姑適樂平汪氏夫婦早世遺子女來依外家飲食教誨以訖成立逾於所生公子芝晉觀察以丁酉拔貢官徐海道尹調甌海道尹乞養侍親孫二人曾孫二人均嶄然露頭角一門之外雍雍如也抑一鑿重有言者民國成立十三年矣風雲變幻起滅無常江左爲東南重地安危治忽恆與大局相爲消息丁陽九百六之會懷乎若朽索之馭六馬賴

有老成碩望如公者主持清議吐納中流使官斯土者如射之有鵠如御之有轡以免於覆餗之羞則公之耄耄齊眉同堂四世不獨家之慶抑亦國之光也已

江仲琴先生八十壽序

比歲一塵在省議會與江君亮甫接席得親其言論風采洒然異其爲人顧雖獲與亮甫交第以知之也不深鮮能窺其涯涘同人中有與亮甫雅故者則爲余言其在鄉里勇於任事不事聲華標榜而儕輩中常推重之以爲冠倫魁能設有疑難糾紛一言立解非其風義之篤誠信之足以見孚於人何以得此記曰不順乎親不信乎朋友夫親不順而友不我信則友之旣信必能類聚氣感更以事親之道相勸勉此古人養老乞言之典所由來也近世士大夫實本此義故往來投報必體我友之意以致敬於其親而致敬之大者則莫如祝壽之禮撰爲文詞敘述懿行禱其康強逢吉以博老人之歡而益廣吾友之孝思桐城吳氏謂今之壽禮勝於古之冠禮以此也今歲舊曆

十月十九日爲亮甫尊翁仲琴先生八十壽辰亮甫兄弟將捧觴爲壽先生聞而詔之曰止方今國家多故統一無期川湘閩粵之烽火未息其離鄉背井流離瑣尾之情狀老弱婦子呼號嗟歎之聲息目不忍見耳不忍聞吾儕幸生江淮清晏之地然連歲災祲元氣未復但望雨暘時若汔可小休老人得扶杖而見太平於願斯足敢言壽乎亮甫兄弟以先生盛德潛行著於遐邇凡嫺嫺故舊咸仿古人贈言之例以致敬於其親而淮屬同人督一鑿爲文以祝無疆之福其何敢辭聞先生詔亮甫兄弟之言竦然曰先生之言利溥哉近世士大夫好爲浮靡往往年未及老卽以壽稱賓朋羅列綺席滿堂水陸珍錯以豪華相競甚至徵歌選舞梨園雜進樺燭明鐙達旦不休流俗效之寢成風氣今先生歲逢大耋而欲然不自滿足之懷洵可型家而訓俗是宜壽亮甫因言先生秉性豪爽慷慨好施幼時讀書日數行下不屑爲章句之學邁粵捻之亂投筆從戎爲前江北幫辦軍務陳星使招入幕中贊襄機務積功遞保五品銜以府經歷歸部選用家世擅刑名錢穀之學乃挾其

術宦游於皖歷筦正陽關盱眙關虹口蔣壩口等處權務所至綜覈名實剔弊恤商所得廉俸不以自私多用之於善舉在盱眙時疫疾盛行死亡載道乃出資購棺埋葬不可勝計又貧家生女擲郊外無人養育者爲聯合同志收集棄嬰雇媪哺乳平時好行其德大率類此左氏云行道有福荀子亦言美意延年先生有焉是宜壽辛酉秋大水田廬淹沒運河堤岸岌岌不可保先生諭亮甫爲我衰老不任事汝應成吾志力拯之適兩晝夜大風雨亮甫會同官紳督夫役奔馳培築堤以不圯又爲餅餌賑民之餓者活人無算非先生義方之教曷以灑沈澹災是宜壽綜先生平生行詣自奉甚儉而接人以慈太和之氣蒸爲家慶以故孫曾環侍神明弗衰時與鄉先輩周君衡甫楊君小坪等作九老會以自娛更相酬唱天之報施善人者固不爽也洪範曰予攸好德汝則賜之福亮甫兄弟遵先生之教其益樹德以爲邦家光繼自今晉祝期頤一慶將泚筆以待之豈敢搆飾虛辭循世俗之禮而爲長者壽哉

江陰錢以湘先生七十壽序

蓋聞積善餘慶，犧經之粹言，美意延年，荀卿之吉語。是以田稱續命，卽商家
斟雉之符，糧號饋貧，逾泰上成鳩之族，何必借靈沙於葛井，始慶眉梨分甘
液於酈泉，方徵綰綽哉。以湘先生吳越家聲，暨陽人傑，肫肫孝養，幼稟曾閔
之風，侈侈隆富，長習頓圭之術，而且財經，簞籥義重，嵩衡鄭莊，置驛以通賓
鮑，叔分金而濟友，以敦鄉里，則券千石而可燔，以散親交，則火百家而待舉。
善人是富，和神當春，凡所建設，可得而言。邑瀕沙洲，時虞水潦，先生憫流離
之苦，廣施予之仁，貸粟監河，瘠者銘恩於挾纊，沈菱巨浸，窮黎鼓腹於康衢。
復以振款之餘，創爲保釐之局，使摩笄之感，無恫於白頭，羽林之兒，卒全於
黃口。先生於是辦江陰賑務，修沙洲大岸，設保節田焉。戊己之交，蘇屬大祲，
室如懸罄，民苦陸沈，牛種大無魚，轍已涸，先生乞晏嬰之粟，延壺士於春桑，
修鄭國之渠，庇喝人於夏樾，男錢女布，黍谷回其春暄，尺宅寸田，畎澮循其
故道。先生於是辦吳江震澤，崑山太倉，常熟昭文等處義賑，督修圩岸，大江

之濱人文所萃啓杜陵之廣廈圖史紛綸仿安定之分齋巾纓舞忭先生於是捐建存古學堂繼改徵存學校蠶桑之利未及澄江不有先知奚開風氣先生按古公之遺什擴螺祖之利源於是十畝閑閑戴駕之音不絕千機軋軋同功之繭紛飛將匡困而咨無必家給而人足先生於是勸人蠶桑特設繭行於青陽鎮長壽鎮並設信昌錫昌於滬錫以挽利權海通而後百業凋零工女則杼柚其空行買則金泉外溢先生乃集股開辦利用紗廠設德成堆棧又立油餅公所布業公會戶炫王陽之術家儲陸賈之裝鼓鞴運機堆吳門之白練通閩帶閩躍秦隴之朱提譽望滿於商場膏澤流於旁郡論其才技足了十人溉及梓桑奚啻百萬更有人所難能者魯國展禽信行岑鼎淮陽季布諾重千金□□先生故主南潯顧氏以錢莊折閱被囹圄之羈先生職納棗餽拊循家室仁心施於苗裔義行重於邱山時閱八年髮爲半白他如管常平之倉穀歲積紅陳築馳道之金椎衢舒素履敬宗睦族置希文之義田推食解衣積邨超之陰德在他人以爲奇節而先生不過緒餘茲

值古稀之年作長春之宴伯霜仲雪子舍承歡瑜珥瑤環孫枝挺秀老子婆娑以酌斗嘉賓鞠脛而稱觴立德立功立言貨殖廣龍門之傳多福多男多壽康衢效擊壤之氓謹序

朱智仁先生七十壽序

滬上麥根路有精舍焉拓地數弓建築屋宇其旁雜蒔花木以爲園圃疊太湖石爲假山春秋佳日花鳥繁紅蘋魚漾碧有老人扶杖遨遊其間望之如神仙中人不染塵壒則涇縣朱君靜安昆季以娛其尊甫智仁先生爲頤養之地者也今年五月吉日爲先生七十壽辰靜安昆季將奉觴上壽先生以時局不靖物力艱難各省災祲頻仍議蠲義賑每一念及已饑已溺之思不欲鋪張華靡取快於世俗之所爲命哲嗣罷稱祝之舉靜安昆季以先生盛德高誼足以式鄉里而詔子孫者不可無文以張之乃以徵壽事略屬一塵爲序古之君子一燕飲之間必起而爲壽願壽非可以倖致也記曰大德必得其壽語曰仁者壽蓋必有不忍人之心而又得所馮藉以勤施不懈天人

協應不事導引自享大年故曰樂只君子令德壽豈今觀靜安昆季之所稱述先生其足以當之矣先生世居涇縣東鄉之溪南邨其先出自徽國文公明德之後代有達人贈君一長公經商於渝經紅羊之變飽經患難崎嶇奔走遂致不起先生雖在髻丩孝友出於天性事葬盡禮時人稱之八歲卽入塾讀書發憤刻勵嶄然見頭角顧以家計拮据不能卒讀每於課暇仿古人牛角挂書故事習耕以療貧或間爲商賈營什一之利與德配洪太夫人鴻案相莊融融肅肅始至滬經商主裕源紗廠事究心於機器紡織之學精心擘畫所詣益精性不喜俯仰隨人頗欲卓然有所樹立乃創朱智記花號信用著於遐邇家業日隆挈眷移居滬濱先生性好施與自奉儉約而不私其財苟有以急難相求者輒傾囊助之人或言謝則正色相告曰當仁不讓吾行吾心之所安而已豈博名譽者耶孳孳爲善老而益劬於鄉則設義倉以贍族建橋梁以利涉於滬則慈善團體勸捐者輸金以濟之窮民之流離而無告者糾集同志以贍之其仁心之所周浹磅礴鬱積釀爲太和勞積則資

多力竭則酬至故營業日臻發達康健逢吉神明不衰天之所以報施善人者洵不誣也易言積善之家必有餘慶彼蒼蒼者豈能按戶而籍之以第其功德哉毋亦如播嘉種者必獲良苗選美材者不生惡木和順積於中而英華發於外有不期然而然者耶繹先生所言當仁不讓等語直有民吾同胞物吾同與之量豈與夫煦仁子義要譽於鄉黨朋友者所可同日語哉靜安昆季仰承庭訓或自設商店或投資他廠皆能奉揚先生之仁風以垂令問於無窮其垂裕後昆者正未有艾孟子以樂善不倦爲天爵若先生者固得乎天爵之至尊者也故表而出之以爲世之樂善者勸其他尋常頌禱之詞概從略焉

灌雲杜香谷先生暨德配潘夫人七十雙壽序

灌雲杜君叔鳴八年前相識於省議會時議會以賄選風潮醜聲四布叔鳴與諸同志力持正義侃侃不阿有富貴不淫貧賤不移威武不屈之風卒挽狂瀾於既倒心竊異其爲人越數年叔鳴導余游海州相與登雲臺之巔而

汗漫於東海之濱萬壑千巖氣象雄偉知其間必有鉅人長德足以樹築範於一鄉者惜乎未登杜氏之堂而爲鹿門之拜也今歲六月十六日爲其尊人香谷世丈先生與德配潘夫人七十雙壽之辰叔鳴自滬來蘇徵一廛爲侑觴之詞何敢以不文謝先生爲灌雲望族奕世有聲至尊甫宜甫先生尤慷慨好施與鄉有大政咸以諮之先生至性過人習於孟子親親仁民愛物之理遇有急難拯溺救焚惟恐不及夫人潘氏爲灌雲處士象賢先生次女詩禮名門嫻於內則雖在髻髻智勇性成年十五羣盜伺劫其家羣衆惶駭失措獨以火器射擊退之盜驚爲神二十三歸香谷先生盤匱滫醢禮法自持自兄弟子姓以及宛若梅甬各供其職內外秩然先生初讀書謀進取一試未售喟然曰士以實不以文近世仕進無非求富貴利達與其無補於國曷若求諸家吾有田可耕胡僕僕名場爲乃浩然歸里庀治田疇歲有羨餘以濟貧乏清光緒丙午倡辦民糶親查災戶計口授糧宣統己酉民國甲寅兩次大水又設廠施粥夫人則親督婢媪執炊爨全活無算自科舉廢而學

校興糾合族人剏求實兩等小學於其鄉中經亂離徙帑青島校亦中輟事平又規復而擴充之增女子學級以開女學風氣緣是近村男女學齡兒童尠失學者復擇穎異無力之生徒助資游學都會俾造高深才駿駸駸嚮用主其事者爲五公子味清皆秉先生夫婦命也辛亥光復灌雲僻處海隅人民不解革命之說強者乘間豪奪弱者兇懼莫知所從先生謀於族人欲請兵有以軍興餉絀縣庫不能供億爲慮者夫人曰吾所缺者兵耳餉則吾所自有何慮衆議乃決先生罄家財爲倡鄉人咸感奮樂輸因購械集團自衛灌東得安堵無驚迨保衛團制施行率先成立迄今將二十年邑之東南半壁匪患以靖主其事者雖爲味清亦先生夫婦教督之而成者其他贊助公益靡役不先雖素封之家有所未逮生子女七人長友仁弱冠補博士弟子員以先生倦勤代治家事次理之早逝次卽叔鳴畢業於北京國立法學校任江蘇省議會議員又次味清畢業於上海浦東中學卽主辦小學及團防者也又次述之畢業於北京大學女二人皆適名族芝蘭玉樹萃於一門瑜

珥瑤環雍雍無間可謂盛已先生年齒少於夫人以今歲爲夫人設悅之期鄉之人將躋堂慶祝先生以時局之未平物力之艱難不願鋪張胥飾而潛德懿行足以矜式朋儕摩厲族黨者不可無以表章書洪範九五福壽富皆歸諸攸好德其言攸好德則歸諸有猷有爲有守又曰予攸好德汝則錫之福福者備也德備而福亦備也壽者酬也酬其德也酬其猷爲守也先生夫婦義方之教使教育保衛諸大政隱然於一方之重而培元氣於無形其爲德於國家社會豈有涯涘宜其聰明強固餘慶綿延也豈敢撫拾浮詞而爲長者壽哉

陳子宣先生暨德配周太夫人七秩雙壽序

陳君哲侯自山東高等審判廳任所迎養尊甫子宣先生暨尊慈周太夫人於濟南翌年三月十一日爲先生六十九生辰周太夫人年正七十哲侯昆季乃具先生之行事馳書京師督一鑿一言以紀其盛美余之不文何足以爲先生重雖然人之情有所甚敬愛則莫不欲其壽古之君子一燕飲之間

必起而爲壽鄉射禮曰古者於旅也語鄭注云禮成樂備可以言語先王禮樂之道也旅而相酬因以爲壽於是致頌禱之詞蓋在鄉里之間爲尤篤焉余始識先生于浙中時哲侯方從日本法政大學畢業歸國自入民國哲侯以江蘇湖北高等檢察廳檢察長歷遷山西山東高等審判廳廳長哲弟惠農以律師馳名省會被舉議員對於國事及地方公益時時有所貢獻二君者道出都門恆過從談讌每心儀其人而益歎先生義方之教不可及卜陳氏之寢熾寢昌也先生邃於學以丞倅隱于浙顧嘗以隻身解寧海械鬪案讞嘉湖縱盜武弁論如律平反溫州關某黨獄任茶絲釐稅整頓中飽而不以病商當道恆倚重之周太夫人又能以柔嘉勤淑率先子婦門庭之際雍雍如也書曰身其康彊子孫其逢吉先生有焉詩曰儂爾籩豆飲酒之飫兄弟旣翕和樂且孺哲侯昆季有焉當春和時草木萌動羣鳥啁啾扶杖於齊魯之郊仰觀泰山膚寸之雲興俯挹濟水之清流而哦詩倚聲於其間以爲笑樂吾知先生必欣然而進一觴也余不足以尊顯先生獨舉其好德錫福

之徵以爲先生所以垂裕後昆者未有艾也

兩湖巡閱使吳上將軍五十壽言 代權編初

民國十一年四月吉日爲吾兩湖巡閱使上將軍吳公五秩攬揆之辰公威振華夏名聞列邦凡有血氣者於公再造河山之盛業無論婦孺皆能言之湘珮商人也以合資營紗廠業於鄭州鄭爲京漢孔道綰轂南北交通便利凡國有大徵發師行而糧食靡不於鄭是經凡公之將領士卒隸於麾下者道出於鄭商民奉如師保親如父兄稱頌之聲不絕於耳孫卿子所謂桓文之節制湯武之仁義惟公兼而有之湘珮在商言商不敢作出位之語謹就商人公意所仰望於公而爲國家百年大計者稱述其一二焉嘗讀左氏傳言武有七德禁暴戢兵保大定功安民和衆豐財謂之七德或疑豐財義與經武何涉不知此正武學之至精而推之致乎其極者蓋暴亂不戢則商旅不通貨物壅滯民旣無以生息而國家亦失租稅之源故大易以聚人曰財與禁民爲非相提並論古者大刑用甲兵故禁民爲非之大者莫重乎武理

財之道寓乎其中公自爲秀才時卽有范希文以天下爲己任之志洎習軍事雍容有儒將風七年湘南抗命全國騷騷公提師轉戰而前先克長沙進搗衡陽所至壺漿載道卒以西南悔禍全師而歸自湘鄂以至保陽如行衽席之上九年參戰軍三師搆擊公晝夜單騎行數百里拊循將士埽穴擒渠京師復安脅從罔治翌年關外內侵京畿震動公指揮若定未幾肅清民之望之如慈父母湘又不靖毀棄盟約公集各路之師進據岳陽貳而刑之服而舍之又復賈其餘勇鏖戰宜昌卒與蜀構和不復犯鄂昔岳武穆善以少擊衆敵爲之語曰撼山易撼岳家軍難又傳武穆所部謂餓死不擄掠凍死不拆屋公用兵之神出於天授而紀律嚴明萬衆一心人謂武穆再世故舉世厭兵而於公之麾下無不歡迎之者非倖致也生平不慕榮利薄田數頃家無餘資飲酒賦詩蕭然儒素而惟國是之安危民生之憂樂無日不往來於胸中嘗欲大舉治河以除水患又率部下植樹通道提倡兵工吾儕小民日託庇於公之宇下求所以振興實業而期於和衆豐財者永永無極敢援

野人獻曝之義以爲公壽並爲國壽公聞之或欣然而進一觴乎

丹陽林玉堂世丈八十壽言

代

今歲仲冬之吉爲吾友丹陽林君力山之尊人玉堂世丈八十攬揆之辰玉昆金友鞠脰奉觴瑞應駢闐龐褫流衍紹文汝圻與力山盟聯郭李誼結雷陳水乳交融肝膽相照欣遇引年之典幸隨猶子之行敢進頌言以侑康爵惟丈孝思錫類至性過人居廬循擗踊之儀同氣篤友于之愛鬚然李勤旣割宅以同居夢繞惠連每陳籩而雪涕迹其穆行足挽頽風丈少習儒書輒驚長老值紅巾之倣擾遂阜帽以遠游蓑楚家傾稻梁謀亟迺習頓圭之術冀療季憲之貧傭保雜居市廛不擾日出而作戴星而歸季布之諾等千金韓康之言無二價化行闡闡名播鄉閭大兵之後比戶爲墟丈觸目傷心掩骼埋胔仁施被於身後陰德比於耳鳴御季路之敝袍而解衣推食學展禽之不亂而特立獨行綜是善心遂成庭誥力山昆季鳳鳴山谷龍躍天衢捧句漏之丹砂挹酈泉之菊水九五福曰富壽無如好德之榮八千歲爲春秋

更上期頌之頌

黃母陸太夫人八旬晉一壽序

嘉定黃君允之以今年四月吉日爲尊慈陸太夫人八秩晉一壽辰將稱觴以慶太夫人則曰此奢徵也其勿爾回顧八十年來所經歷所接觸無在而不生昌黎王圻之感勤惰奢儉之報不可誣也造物既勞我以生當盡忠於社會而效忠之術莫急於分財教善吾族義田既賴夫子之力以告歲事而夫子所創普通學校基金未充無已其節浮靡之財助教育之費以爲百年樹人計乎允之謹諾不敢違普通學校者君之先德私諡文惠先生所設而君之先兄鯉臣先生實主之文惠先生以道德文章魁於鄉里私淑亭林梨洲之學當遜清同光間卽持變法論爲拘迂之士所駭怪太夫人以爲是非毀譽不在一時文惠先生設普通學社於其廬戊戌庚子國變迭作選事者輒聖其門作中傷語親朋詫相告太夫人每命抹去不爲動亦不告文惠先生且謂學不宜限於男子命鯉臣昆季更爲普通女學社開風氣之先並遣

長婦廖斌女公子守淵守蕓入務本女塾學師範次婦施儀芬入啓明女學治美術不獨嘉定女學之鼻祖抑江蘇女子教育之先河迄今北起哈埠南抵星洲莫不有嘉定女教員之轍迹而北洋安慶之女子師範江蘇女子蠶校之創建莫不以兩女公子參與經畫伊尹謂先知覺後知先覺覺後覺太夫人當之矣太夫人在室時習文史嫻於家政值亂離遷徙指揮輸運勝於壯男洎嬪於文惠先生上事翁姑下督僕媪門庭之內秩如奧如文惠先生幼學不暇治生以太夫人治理有方家業且日起憫族人之不贍也斥資爲義田有尼之者太夫人曰族之不恤奚以家爲卒促文惠先生訂定規章爲一邑冠何其盛也前史所稱賢明婦人若修治內行恪共婦職樂善不倦篤於本支得其一節皆足以揚芬彤管垂教方來而以太夫人視之則皆爲小節漢人稱嬰母知廢陵母知興當貞元絕續之時具高世先幾之哲求諸巾幗中已如鳳毛麟角之不可多覩而况華路藍縷絃誦被於一方男唯女俞聲教迄於四海斯曹大家宋若昭所不能望而大江南北莘莘學子所同聲

贊歎者已易曰至哉坤元君子以厚德載物夫惟其積之也厚故能布溥流衍而不竭於用又曰積善之家必餘慶所謂善者孰有大乎得天下之英才而教育之者乎孰有過於取人爲善與人爲善者乎今者年踰大耋神明不衰瑜珥瑤環孫曾林立允之具絕特瓌異之才率其女昆弟若諸婦羅拜堂前爲老人壽一門之中羔雁充庭桃李成陰其爲榮耀殆超出富貴勢厚之家萬萬也邦人君子必有聞風而興起者彼尋常頌禱之文固不足爲太夫人重矣

饒苾僧母吳太夫人六秩壽序

廣濟饒君苾僧自天津貽書京師以尊慈吳太夫人六秩壽辰督一塵爲文以質當世賢豪長者一塵自民國初元辱充公府祕書之職每誦武昌黎公通電苦口婆心感均頑艷如天雞鳴而旭日騰牛渚然犀而百怪遁景也則詢其幕府誰實主之莫不曰饒君苾僧以是饒君名震天下武昌爲南北中樞又軍興未久訛言四起一夕數驚饒君奉命往來京師時參預大計左右

黎公弼成統一其事深祕世莫得而聞也既而黎公踐元首位君恂恂願居人後漠然不加喜戚於其心洎黎公避位津門君閒關相從弗去人以是益重君而未知君之在約思純不矜不伐歷夷險而弗易其節蓋得於義方之訓者然也太夫人少失怙恃育於伯氏年十八歸贈公饒季登先生饒氏世守寒素又遭洪楊之亂廬舍蕩然太夫人家故素封既來歸則屏撤鉛華曲盡婦道舅蘊山公頽年多病姑張太夫人患痼疾十餘年太夫人親滌廁隴躬自調護老人肝火熾意稍拂逆輒盛怒雖詬詈必起敬起孝無愠色張太夫人嘗撫之而泣願太夫人他日得賢婦如太夫人之事已也贈公授徒自給家無宿儲太夫人以女紅佐甘旨日米數合先以飯其姑而身食粥糜膏分而寢辨色而起浣衣汲水雖懷妊弗少休督諸子讀書至專然不使知家計以分其志光緒癸卯茲僧舉於鄉贈公亦以甲辰充縣中學學監家稍稍振矣茲僧既游學日本諸弟亦負笈入省縣學食指日繁費用增夥贈公以名德宿望由武穴中學校長遷縣勸學所長視事未久以勞遽卒於任所輿

尸還鄉太夫人一慟而仆時苾僧爲福建學務公所科員俸給至薄太夫人斥產以治喪踰百日苾僧仍赴閩諸弟幼勢將輟學太夫人晝夜泣悉典衣衾幃帳之屬資三四兩子入中學日攜幼子於親族之門嗚咽流涕求肯爲發蒙者三年之中葬夫教子曰爲其難日食不能下咽以是積瘁成疾心甘之而不以爲苦也贈公之學由博返約藝而進於道歸本於身心性命之間善醫不受人饋遺雖至貧困必存一兼善天下之心太夫人守其遺緒以成諸子學業積善餘慶詢不誣也國體變更苾僧以文字勳名顯祿亦較豐太夫人布衣蔬食一如其舊常以世變之靡常仕宦之易陵替日討諸子而訓之苾僧善體親心亦不欲以鋪張揚厲傷清德今年太夫人春秋六十之辰謀爲文以稱祝昔歸熙甫壽王子敬之母也述子敬之言曰回思二十年前如夢如寐如涉大海茫洋浩蕩顛頓洪波巨浪之中及夫風安浪息放舟徐行遵乎洲渚舉酒相酬此吾母今日得以稍安而吾兄弟所以自幸者也其言之美且摯如此熙甫自以爲所能言者莫是過也今苾僧上念太夫人之

幼勞與熙甫所云風安浪息舉酒相酬者若合符節將有以施於家而達於國其所以壽太夫人者在此已

賈母孫太夫人六十壽言

凡國家之盛衰豐歉恆與財政爲消息若日之松方俄之槐特達而在上則以其理財之手腕措國之危者而使之安其次則有專門名家鉤稽研究助爲成書以供當世之參考求諸吾國蓋如鳳毛麟角之不易多覩惟吾友鎮江關監督兼交涉員賈君果伯所著民國財政史分別部居裒然成帙於近代財政源流及補救方術皆能言所以然之故迨充華會專門委員其所陳諸政府折衝樽俎者規畫詞令彪炳一時當世之精於計學者未能或先而不知其好學深思以成其名而昌於國家者皆稟賢母孫太夫人之教也今年六月旣望爲太夫人六十設悅之辰同人謀爲文以揚太夫人之盛德而督一鑿爲祝嘏之詞一鑿獲交於果伯有年其何敢辭太夫人姓孫氏爲無錫石塘灣望族少承其父幼安先生暨母尹太君之教通曉大義嫻習家政

年十九歸贈公桐卿府君賈氏世居宜興東北隅之蕭塘聚族而居且耕且讀太夫人秉性儉約昕夕習勞自其祖姑劉太君姑杭太君先後棄養門以內事無鉅細畢集一身舅啓濬公性方嚴遇事不少假借太夫人婉婉盡職米鹽瑣屑料量綜覈俱有法度乙未六月啓濬公歸道山府君以痛父情切擗踊號泣越五日竟以哀毀卒曾不旬日兩遭大故時兩子未滿十齡幼者方在遺腹太夫人所處殆及生人所難堪致疾殆賴天佑賢孝分娩後疾亦漸瘳嘗泣謂其子曰汝父平生篤謹方壯卽以孝殉親吾不從汝父於地下者冀汝等成立以紹先志耳蓋守節扶孤三十年諸子皆蜚聲騰實諸孫亦嶄然頭角羅列滿堂而太夫人之心苦矣其至行有如此者辛壬之交蘇省行紳富捐太夫人念國步艱難節衣縮食集若干金屬所親面繳邑宰鄉吏以捐款未經過付心銜之日思抵瑕媒孽會里中豪滑虎冠輒欺凌孤寡冀丐膏潤覬覦巧取得閒輒發嘗有鄰人酗酒忿爭傾沸油於某販之身灼膚創甚旣控於縣鄰某逃逸胥役無所得則嫁禍於賈氏謂鄰之逸實賈氏傭

縱之時果伯方肄業小學校校長白其冤而胥役持之急莫可理喻太夫人則從容謂橫逆可勿校而創者亟須療治慨然出醫藥費某販卒平復邑宰亦微聞構陷狀寢其事其雅量有如此者坤道吝嗇古人所譏太夫人儉以持躬而寬以接物偶遇農田逋欠廉得其實不索償並給以牛種之貲租穀之散給各戶者數逾千石族譜失修太夫人爲敬宗計出資續成之邑中竺西鷄山振聲諸小學及彭城中學宜興中學次第建設太夫人率樂捐以倡之里中修橋築路公益之事苟有請者未嘗不解囊而相助也鄰里戚郇之或患天災者未嘗不視其親疏輕重而竭力以周恤也辛亥之役濱湖多盜時有被掠者一日盜將窺其家遇農人問途徑農人以太夫人力行慈善不以實告乃免於禍其好施獲報有如此者晚年耽佛學晨起禪坐晏息誦經慈悲之心老而彌篤遇春秋佳日輒往翠微金焦九華天竺普陀寶華諸名山覽剎虔誠頂禮供奉香華嘗曰余之學佛非爲福田利益計蓋以末世衆生流轉苦海造成塵劫冀使此心得有皈依無所纏縛耳果伯自東瀛畢業

歸國部試獲雋壬子由財政部調京歷長會計庫藏賦稅三司旋充參事兼
主辦公債局管理總務廳等職每歸省太夫人輒教以居官之道慎言敏事
憂國恤民尤當杜苞苴遠邪慝及任今職又誨以權務與民生休戚相關外
交以國際信義爲重及奉派華會專門委員復以慎重邦交維護國權諄諄
誥誡故果伯所至有聲中外推重非太夫人之教不至此仲子士鐸董理家
政叔子士彥畢業大學商科曾任銀行要職今充財政廳簿記主任孫男十
二人孫女六人一門之內和氣融融太夫人顧而樂之甲寅之歲奉大總統
頒題急公好義扁額給予獎章人皆以爲華太夫人歆然不自足同人等所
望於果伯者彼其抱高世之識秉絕特之姿方今財政紊亂民生凋瘵已至
水深火熱時天相民國將欲起衰扶敝則必由理財入手果伯其益厲所學
儲爲大用以繼美松方槐特之前徽是今之施政一方者在他人視之已足
揚名而顯親而在果伯猶未盡其量也豈敢撫尋常頌禱之詞爲長者壽哉

王母袁太夫人六十壽言

曩歲薄游杭郡始晤王君伯秋於湖上旅邸是時君以學校事來自金陵侃侃談金陵市政規畫不倦又嘗於蘇州青年會講壇聞君演說歐美市政及所通變而宜於吾國者有味乎其言之抑其氣度之春容詞令之茂美非學養兼到而足以敷其所志者殆未易一二觀也君主金陵法政專門學校教務者有年曾游日本美洲學法律政治歸國後出其所得以餉遺邦人在教育界錚然有聲隱爲東南山斗矣今歲陰歷八月之朔爲尊慈袁太夫人六十設悅之辰校中同人督一簾爲壽言以彰太夫人之儉行竊惟古者飲酒有上壽之禮後之人行之於生日而明以來有所謂壽序者假於文士之辭以稱述令德昭示賓友之來賀者因爲以其親之光寵雖曰非古抑亦仁人孝子之用心爾矣顧非其子之賢不足以顯其親亦非其母之賢不足以教其子而底於大成今觀伯秋之所以稱美其親者非獨一門之內太和翔洽而太夫人之膽之識有非尋常巾幗所能望者茲又難能而可貴也太夫人爲江左望族袁文炳公之次女歸於湖南建威將軍記名提督平公在室時

事其父母先意承志友于兄姊婉婉有節既嬪於王時提督公方靖粵難轉戰東南數省治軍江淮間先後垂三十年無暇顧家政凡閭內之事一以委諸太夫人提督公得以專力於軍事太夫人治家嚴肅尤以世祿之家習尙奢侈爲大戒故躬行節儉雖有僕媪供役使而鞠育子女及縫紉針黹一切煩瑣瑣屑之事咸自任之辨色而興夜分而始寢每以大義勸提督公曰必無以妻子之故撓而心損而壯志其教伯秋兄弟以誠信謙和相敦勉擇明師益友薰陶涵育舉以弗渝某歲提督公治軍淮北所部因緝梟檢查淮上來往船舶有榜人拒之致與巡哨鬩誤斃一人榜人婦乃集市井無賴數百人勢汹汹訐於轅門提督公出巡未返軍中無主官佐逡巡無措太夫人謂榜人拒絕檢查固撓法然因是隕其生於情可憫命左右召榜人婦至先懾以法繼原其情出金周恤之榜人婦感激涕零率衆引去軍民折服其鎮攝人心有如是者清光緒己亥詔求中興宿將提督公將入覲未果以疾歸道山時伯秋兄弟均幼稚族中不肖者覬其家產訟於官鄉之大姓復慫恿之

且爲通款於郡冀收漁人之利太夫人燭其奸不爲動親集族人慷慨開譬願以田產均分於衆卒不成訟而事平其明於大體有如是者壬子之役省垣客軍雲集寓中遭暴徒剽掠先後三次太夫人從容發所藏遺之暴徒爲之動容默避去而太夫人面不改色處之夷然其臨變沉靜有如是者凡此犖犖諸大端雖丈夫猶難之太夫人皆指揮若定人之度量相越豈不遠哉至其天性仁慈好拯人急難御下有恩禮婚嫁子女豐儉得中在常人皆可稱道而於太夫人已爲小節伯秋兄弟負笈東西洋及國內各學校名聞遐邇成績爛然非太夫人之教不及此自國體改革擾攘十餘年若涉大川茫無津涯所賴有英絕領袖之士明於當世之務而洞其利害得失之故以指導羣衆納諸正軌伯秋懷抱闊遠敷其教澤更有所以大造於國人者其詣力所至未可限量卽所以爲太夫人壽者亦莫大乎是太夫人聞之必賞其友爲能於言者也是爲序

誥封恭人旌表貞孝毛母袁太恭人五秩壽序

當天地否泰絕續之交必有爲之柱礎者以幹旋元氣於無形而乾坤乃賴以不敝自忠臣義士以及孝女貞婦所以立人道之極者其成就雖殊而持以與氣數相爭壯山河而光日月則一也我宮保項城袁公當庚辛之交以隻手支全局由山左晉督畿輔豐功盛業萬口能言至其門庭之內潛德穆行孝友彬彬蔚爲禮宗世或莫能言焉某等辱與公爲累世交又相從最久稔其家世特詳我公功在蒼生泊然若無與於其躬獨盛稱其姊貞孝奇節苦行殊絕當代貞孝爲贈公篤臣先生次女義理之學得諸庭誥自其童時卽洒然異乎常人年十五因母疾焚香默禱朝夕無間持小刀自割其股力弱不得入旋易菜刀截小指兩節入藥奉母病遂得瘳手裏傷痕聞者歎異旣笄而許字毛氏未婚夫病沒貞孝時年十九痛不欲生請於其親至夫家抱主成禮奉祖姑及其姑純孝如在室時撫夫兄子爲嗣以養以教迄于成人秉性方嚴有丈夫氣動必以禮舉家嚴憚之先後經江督馬公御史李公請旌於朝特旨報可綜貞孝生平大節皆常人之所難能有一於此已足增

人倫之重而以一身兼備之且出於閥閱高貴之家非夫單門下戶有迫而然者當其一意孤行毅然內斷於其身之存亡家之完否皆所不計勞身忍性銜悲茹苦天下可歌可泣之事孰有逾於此者耶卒以起瀕危之親延已絕之祀所謂與氣數相爭而以人事勝天行者也凡得天厚者其天獨全故雖窮愁憔悴而無所於傷且加之強固焉今歲三月爲貞孝五十壽辰袁公迎居節署禮事唯謹將奉觴爲祝自世道不古禮教陵夷得貞孝堅苦卓絕之風以廉頑而立懦與我公旋乾轉坤之偉略輝映於一堂然後知德門積累之厚非偶然也若夫尋常毫畫之頌詞有不足爲貞孝重者故不敢以進花翎二品頂戴商部右參議楊士琦翰林院編修于式棧翰林院編修傅增湘花翎二品銜署理長蘆鹽運使陸嘉穀花翎二品銜山東登萊青膠道何彥昇花翎二品銜候選道婁春蕃花翎二品銜直隸補用道阮忠樞花翎二品銜直隸補用道劉燕翼花翎鹽運使銜直隸補用道蔡匯滄分省補用知府袁祚虞知府銜候選直隸州知州吳煥四品銜直隸候補直隸州知州劉

寶泰分省補用同知王叔鑫候選同知陳維敬四品銜直隸州用直隸補用知縣王書臣直隸州用直隸特用知縣徐沅直隸特用知縣張一慶候選知縣盧廷俊直隸卽用知縣胡商彝同知銜直隸補用知縣張壽齡同知銜直隸優貢知縣沈祖憲同知銜直隸補用知縣潘傳第候選教諭周家祿游學日本大學畢業生金邦平附貢生謝愷同頓首拜祝龍飛光緒三十一年乙巳仲春之月穀旦

擬淵明歸去來辭

歸去來兮復輿旣駕吾將行念勞生之可惜余曷爲乎長征世何年而懷葛人何代而義皇實一瞬而卽至翩然返乎故鄉雨霏霏兮清路風澹澹兮洗塵隨輕舟之所至驚時光以嚮晨載循家弄忽見東籬兒童應門老妻下機宅旁五柳俟焉成圍置酒列坐清露未晞解葛巾而散髮傾秫酒而解愁望南山之蔥鬱羌悅目以何求琴無絃而亦韻園雖小而可遊日襄羊於人外悟天地之蜉蝣聽清泉之瀼瀼樂鳴鳥之啾啾忽白日其西匿指孤雲之自

浮歸去來兮將戢景以窮居嗟我生之不偶聊假日以自娛誌山經之荒怪
與古人以爲徒及初春而秉耒欣前于而後喁或釣魴魚或擷園蔬既千于
於巖窈亦溯洄於川塗偶臨流而解襪欲乘風而揚裾觀萬物之得所信吾
美於遂初已矣哉三良荆卿去弗作曷不翩然遊太虛胡爲乎鬱鬱有所懷
太上既難復世途又不諧離離兮春草灼灼兮春華招隱士以共語及時行
樂夫何如

沖和雅澹神似六朝人手筆

原評

有似黃金擲虛牝賦

有序 益致精神 爲頌

昌黎睥睨八代浸淫百家於文則豐於遇則嗇懷荆璞而屢刖投夜光而不
售怨老嗟卑殆難自遺黃金擲牝之言非獨爲崔侯傷亦兼以自況也不然
薦士一詩纏綿深摯詎於崔侯愍焉遺棄蓋崔旣浮沈散鬻公亦淪落閒曹
公之於崔有如驂斬讀此詩者當與送窮之文進學之解比類觀之若以爲
短崔侯也抑淺矣

噫吁嚱芻狗紛紛棘猴瑣瑣白髮催人青氈老我玉卮無當嗟聲價以誰論
楮葉難成惜心思之已左縱使裏蹠麟趾席珍之待聘宜然無如蟲臂鼠肝
畫餅之充飢未可當崔立之之投詩韓公也豈不以瓊詞騰躍寶思連翩等
黃金之珍貴乃白屋以遷延以公爲西域賈胡宜邀心賞以公爲南陽豪俠
不吝腰纏陳之於五都之市酬之以萬貫之錢庶幾別澤搜巖勿謂雕蟲可
薄況乃同工異曲本成印駟相憐殊不知枯魚合轍窮鳥同遊各抱崑山之
玉並遺滄海之珠一則隸大理官未離掾屬一則爲國學士坐擁生徒卽令
東馬嚴徐夙工辭賦叵奈蛟螭螻蛄等辱泥塗人海逢君季布之諾言終負
文章誤我彌衡之刺字都無則以爲黃金之擲虛牝也三品英英雙南赫赫
借瓦礫以爲緣付泥沙而不惜匪懸秦市與虎皮羊質以同譏不入燕臺恍
海市蜃樓之無迹隨珠雖貴雀亦可彈鄭璞誰知鼠還難嚇太息連篇累牘
積薪之居上何時也如投海捐山買菜之求多無益夫以昌黎日月光垂斗
山望貴百寶恣其陶鎔萬端由其經緯然良馬不逢伯樂伏櫪歎歎真龍見

困豫且謗書騰沸鑄六州之錯而何裨懸五石之瓠而無謂呵莫邪不祥之
冶筆硯將焚擅王陽能化之奇工夫妄費良由康瓠競進瓦釜爭鳴被紫朱
於土木衣文繡於犧牲大都雜沓魚珠濫登重席轉使輝煌鴻寶頓損連城
然而良賈深藏豈自媒而自衒達人知命終何慮而何營雌伏無傷儘忍十
鞭之辱雄鋒未鏗要求百鍊之精已矣哉陰晴移於一瞬日月走其雙輪愚
公移山而山容不改精衛填海而海水無垠釣龍伯之鼈寓言荒幻覆鄭人
之鹿夢境逡巡無不逐年華於逝水感蹤跡於飛塵卽看時局滄桑有類舉
碁之不定何論詞章鞏悅漫誇下筆以如神

相題有識通篇雙管齊下題蘊畢宣其一種慷慨悲悚之致雖劉笳桓笛
不是過也 原評

正誼書院舊作詩賦鈔本通稱後爲野圃族弟乞去繼問之片楮無在
杭兒同舉中有其先世鈔本得二首題遠九鈔之以留鴻爪一塵注

漢家兵馬如日月賦

以凡有血氣莫
不尊親爲約

舊唐書高昌傳先是其國童謠云高昌兵馬如霜雪漢家兵馬如日月新唐

書作高昌兵如霜雪唐家兵如日月按自漢以後彼中人通謂華人爲漢自唐以後亦謂華人爲唐二書或漢或唐皆謂中土云爾與秦漢之漢無涉也昔唐太宗之有天下也日髓來享月竊用誠邊兵嚴其壁壘塞馬壯其鑣銜何物螳螂敢肆當車之怒曾如貔虎將同薙草之芟應童謠於龍尾騰士氣於鮫函但觀羲御望舒容光必照始信神軍殲騎義勇非凡高昌王文泰者鄰鐵勒而居繼車師之後大蟲太子之所經回鶻公主之所守去京師四千里而羸傳世祚百三年之久不過燭火飄揚熒光腐朽列蕃部於西陲拱長安於北斗何敢夜郎自大小邦不畏其威極宜倚漢如天尺地莫非其有而詣闕無期閉關自絕通突厥而連和破焉者而被訐逐日等夸夫之愚捉月同詞人之拙耀機槍於蒲類之城扇妖彗於挹婁之穴殊不知記筆畫塗沸湯沃雪有疾雷迅霆之怒雄兵已整旄頭若飄風驟雨之來良馬多稱汗血先是有謠於高昌國中者謂將氍帳坻頽穹廬羹沸危麴氏之宗祊煩漢家之都尉我已僵同冰藹慄慄難支彼方耀奪燭龍桓桓可畏其人則逐捕無

從其言則深長可味使羶肉酪漿之族聞者寒心有金戈鐵甲之聲望之奪
氣果也白羽書飛黃皮袴縛校尉傳烽嫖姚絕漠其兔起而鶻落也如翔陽
逸駭於扶桑之津其鷲視而鷹瞵也如熾阿振起於金樞之壑曳虹霓以爲
旌詔招搖而張幕足使金石焦枯湯泉銷鑠既日升而月恆何霜饜而雪虐
將灌海而澆之詎負隅而撓莫豈不以太宗是時雨露恩醲風雲氣鬱頡利
懷仁龜茲貢物吐谷渾搏頽來朝薛延陀歸藩請乞固以大海東漸流沙西
託若木出而氣霧開金波舒而浮雲詘杜房接迹於朝堂褒鄂聯鑣於圭紱
不少虎頭之將刻石祈連方歌狸首之詩射侯服不奈何自安絕域竟鑿凶
門師子王跳梁無忌天可汗授甲頻煩以燿火掩日輪之彩以嚙星乘月御
之垣比之烈火燎毛雷動臨榆之塞擬以泰山壓卵雲興細柳之屯卒令玉
石俱焚自外照臨之族直到藩籬已破方知華夏之尊况我國家玉鈇厲銳
廟算稱神凡秣馬厲兵之屬皆沐日浴月之人其有阻北庭使揚東海塵者
則有鷹揚元老豹略從臣合兩淮三楚之師同殲蟻子厲橫海樓船之卒直

搗鯤身何論乎李唐之征伐而何有乎炎漢之和親哉

猶是春閨夢裏人賦

以十年征戍
憶邊陽爲韵

噫吁噉羅綺埋塵鬪饑飲泣怪鴟晝啼妖狐人立昔紅顏而蚤凋今白骨而
誰拾賸燐火之數叢少毳衣之一襲玉關則路隔三千錦瑟則絃淒五十曩
之歌臺舞榭金谷瓊鈿朱軒繡軸玉勒雕韉長干之梅可弄章臺之柳未眠
亦嘗吹鐵篴敞華筵呼窈窕樂蟬娟玩春光之旖旎寫閨思之纏綿樂而忘
死千春萬年未幾而羽書火急畫角雷鳴將軍下令都尉移營絃管歇兮擊
鼓動羅紈藏兮寶刀擊妻孥決別夫壻吞聲夜夜刀環之望年年沙磧之程
聽啼鶯而莫轉隨旅雁以長征烽火連天旌旗掩路白刃交鋒黃皮縛袴中
宵而刁斗頻驚絕塞而衾裯不具猶復夢裏家山閨中機素人面同圓春風
暗度言紅豆之相思忽黃梁之已寤魂飛故鄉心羈遠戍奈何塞草不青陣
雲如墨肉薄相爭命懸不測膏流荆棘之叢血染茅蒐之色獸走壙而途窮
鷹磨牙而穴匿風嘯雨嘯之辰雪虐霜饕之域歸骨無方傷心何極丈夫衰

草以不歸少婦凝妝而猶憶萬里迢迢存亡信遙篋捐素扇帳冷紅綃擲金錢而暗卜盼玉札而無聊悽悽切切暮暮朝朝安得捷書一到別恨都銷方且鞭玉馬珥金貂印懸肘綬橫腰貽胭脂於北地罷笳鼓於西遼那知夫樓頭顏筆江上皮囊此縈思於衾枕彼授命於疆場蟲沙幻化鴛帳淒涼華箏夜咽寶瑟秋僵問華胥其何處怨靈修之不老苟百身而可贖兮願永託於巫陽

蚪髯客入扶餘國賦

以題爲韵

新舊唐書俱無扶餘國後漢書云夫餘國在元菟北千里三國魏志云在句驪鮮卑二國間晉書永和二年夫餘爲百濟所侵西徙近燕通典夫餘南接高麗後高麗得其城地置扶餘國城唐乾封二年薛仁貴破高麗於金山進拔夫餘城新唐書亦云李勣伐高麗拔夫餘城按元菟爲今海城蓋平復州自開元以北千餘里皆扶餘境後爲高麗分據僅有故城通典新唐書所言是也故新唐書東夷傳云高麗本扶餘別種蓋唐初已無扶餘等國蚪髯此

事僅載唐小說中正史無之卽唐人他著作亦無之或有以虬髯爲蓋蘇文者彼據高麗國史蓋蘇文事與虬髯類故以爲說然虬髯既知太宗爲眞天子何以入高麗後屢抗朝命且虬髯既傾家以付李靖致太宗成大業則太宗豈以怨報德者其非蓋蘇文彰彰矣要其事跡俶詭如神龍見首不見尾正當作蜃樓海市觀耳不必爲之曲說也

海水東流連檣萬舟旌旗雲涌鼓角風遒四海沸騰讓眞人之虎視一方雄踞爲此老之菟裘回思逆旅追陪別來無恙料得英雄狡獪小試其謀問蠻夷大長之書音沉魚雁望渤海神州之境氣作龍虬唐貞觀中有自南蠻中上言者謂扶餘之有主與我國以無嫌環裨瀛而爲界警斥堠而常嚴何來舸艦千艘洪波鼎沸遂使江山一角故國師燬其事則逼人咄咄其主則厥狀鬖鬖至今新政更張勢成傅翼尙有遺民念舊痛切攀髯于是李藥師聞而歎曰此殆虬髯客張仲堅乎昔與客萍水相逢金蘭莫逆呼一妹而通家識三郎之異迹日炯有光鬚張如磔談兵法而縱橫奮革囊而跳擲豈不思

整頓乾坤澄清疆場乃自一見於太原再觴於坊宅此別幾時相思寸積幾
幾謂作江邊狎鳥之翁署海上釣鼈之客矣其時我皇方振策雁門還轅馬
邑髯旣瞻天日之容儀識風雲之會集不願作千金子坐擁貲財不願封萬
戶侯相隨簞笠其來也如野鶴之難羈其去也如冥鴻之莫及或者赤松作
伴尋煙水以徜徉豈其丹穴熏君建旌幢而出入而乃別開金穴更製銅符
換蓋海飛雲之製招高睨隅目之徒遂傾巢窟坐擁膏腴豪傑心傾而爭附
酋豪面縛而爲俘况兼絕代佳人親操桴鼓合與同行將士痛飲醞醕名王
我自爲之笑井底之蛙齷齪賢者不可測也似天池之鳥搏扶猶憶夫高門
鼎鼎廣廈渠渠釵環夾侍珍錯紛臚去如脫屣載不盈車豈其沙作黃金又
致萬家之產抑且婢多紅線未傳二紙之書胡爲乎紗帽紫衫指揮行陣鱗
堂水屋湧現儲胥客殆仙乎圓嶠方壺之際國於水者新羅百濟之餘說者
謂事屬離奇詞多粉飾其地則蜃樓海市外國傳所未詳其人則烏有子虛
良史家所未泐且文皇旣無封敕之章而衛公莫報贈投之德不過華胥幻

造同諸子之寓言也如黃石荒唐爲功臣而生色塵寔擾擾恐山林無此奇人海水茫茫問何地可容樂國然而衆口交稱千秋恍遇開卷如生執鞭所慕客有志厲鷹揚情慚羶附儼錢鏐吳越之蕃比洗氏高涼之固不數虎頭燕頷將令嚴明從教鹿耳鯤身義旗徧樹安得籌邊之策付與安邊請移作賦之才爲之治賦

人貓賦

以柔而害物
曰人貓爲詢

新唐書李義府傳言義府貌柔恭與人言嬉怡微笑而陰賊褊忌著於心凡忤意者皆中傷之云云又以柔而害物號曰人貓翳彼豎奴號爲鼠將比剛蟲之搏執儻獬廌之觸邪豈與夫袒護頑讒排擠良善者同語哉使義府得附於貓義府之幸也以貓分謗於義府貓之不幸也因戲爲貓辨冤之詞而更定義府之讞罔兩問景鷲鳩笑鵬假物而鳴古有斯製遂作賦曰
司直先生屏居多暇蕭杌寡儔沈沈戶牖悄悄離憂有貓蠢然止於堂陬羌延頸而欲企若搖尾以有求初磐辟兮貌婉繼滄躍兮意道儵圓目而傾視

紛盪腦以伏柔或傾盆而倒盜渺何恩而何讎先生起而數之曰咄哉汝貓來聽吾辭以汝皚皚其質宛宛其姿或馴伏於穽籠或徘徊於階墀汝貌不惡汝心宜慈何儵睥而萬變迺狙擊以奔馳似妖狐之九尾類蛇首之雙歧實萬家之巨蠹能不嗟夫殆而且汝豈李義府之後身乎昔義府忝竊紫紱恣行狡獪倚昭儀若駮蜚與敬宗爲狼狽亦復氣作春和容如雲鶴而樽俎險於戈矛談笑酷於徒欽功狗受其摧殘俊髦遭其陷害於是贈以貓稱屏諸人外汝族之王此焉爲最是故友益幾危長孫被誣搏噬徧於臺省毒螫加於圭紱鸚鵡之翼遂成仗馬之鳴多吃趙高之鹿依稀邳都之鷹髣髴其生也則貓兒之性可憎其死也則貓鬼之靈難乞蓋彼則噬人而汝則害物今汝見食而趨見羣而譟飢則踰垣寒則入竈穴有鼠兮汝吞罍有雞兮汝暴使易牙爪而衣冠易羽毛而舞蹈噉名士若鯽魚穿骨鯁如魯縞外紆緩而透迤內刻深而疾媚曷怪乎褻奸臣之奸者必汝乎是號貓乃俯若有思恍若有謁貓不能言對以臆曰豨鼠子之襍褻每馮依乎勃窣或簡册兮以

強曳或衣裳兮被齷或搖撼乎戶樞或飶噏乎糠粃是故投之者忌器熏之者瑾窟貓乃顧而迴旋奮其投粹窮此輩之根株報主德于毫忽是貓之功非貓之闕彼林甫虺蛇其性蜂蠆其身似餓虎之逐逐猶獠犬之狺狺不能解羽黨批逆鱗而肆豺狼之惡傷騶虞之仁貓方將搃其胸鬻其脣聚鼠輩于一社執而付諸虎臣庶雪貓之恥以謝世人先生曰嘻汝言不祧是唐人之冤汝幾黨李之名標如義府者情同鬼域行比鷓鴣猶汝曹所不屑譬稂莠之亂苗其益厲汝吻修汝翹慕觸邪之法吏效捍敵之票姚行將錫汝以麒麟之號以愧夫人不如貓

立夏三朝開蠶黨賦

以題爲韵

麥黃甚黑之天柳暗花明之邑瓜皮艇子雲浮箬帽山邊鱗集正柴門靜掩滿箔霜團何桂棹輕搖沾衣浪溼道是西陵苗裔舫聲似吳語同柔妝成南國清和人影傍斜陽小立時則赤帝乘權青陽告謝穿樹鶯殘銜泥燕卸櫻結實以紅嬌筍含苞而紫蛇儂攀陌上之桑君拾山間之柘眺鷺脰湖旁之

景已餞殘春值馬頭賽後之時爭迎首夏爾乃沈沈茅屋采采筠籃歌絲車
設食葉聲酣數此日光陰莫問先庚先甲評今年價值喧傳溪北溪南且隄
防雨散風驕勸將減半好分付簟涼枕膩穩與眠三一葉吳舸浚波手招望
鱸鄉而解纜依蟹舍以停橈欲乞龍精借種而儼然已有也如蟹戶專門而
別自名標編成里諺之詞唱出風風雨雨盼到機絲之日幾經暮暮朝朝猶
憶夫蠶苗冬浴蠶母春催上巳粥膏之祭元宵屋土之培月映三潭儂綠蘇
隄之柳風和三泐未黃鄧尉之梅驚心賣杏時光九陌之錫簫驟換轉瞬倚
桑天氣一溪之奩鏡新開則有小姑問訊新婦閒譚擊楫而帆痕斜挂插花
而波影遙涵占菱童蓬女之先一種行腔緩緩指雨笠煙蓑而外幾家綠蔭
穆穆也同布穀綢繆農先買犢生怕浴川辛苦人嬾如蠶亦有茶戶提筐漁
家曬網酒徒挈隊以遨遊騷客尋詩而俯仰靡不蘭渚扶筇蘋洲盪槳欣三
伏之猶遲惜三春之已往孰若此蠶房鱗比子孫永享其休蠶市駢闐賓主
儼分其黨客有問俗蘇臺尋幽釣渡麥天之晨氣初濃柘館之梯痕尙護數

聲款乃篋筐隨蒲席同懸一舸漣漪泉響與權歌齊吐省識蛹蛾卵繭勞他
寒女之機直教纖纈縵絲補入揚州之賦

牡丹爲花王賦

以牡丹花之富貴者也唐詩

朝擢秀於池台兮夕評芳乎林藪頌香國以提封兮選名園之舉首梅爲百
花之魁兮祇高人之所友蘭爲王者之香兮亦空谷而是守疑儼體於冕旒
兮贈春王之印綬宜雄長於諸天兮皇錫名而曰杜夫其亭亭玉佩燦燦珠
盤雲縵縵而低護露湛湛其紛團御山龍而施采兮戴錦鳳以爲冠洵奇姿
之天挺兮實希世之大觀抑芙蓉使下第兮壓桃李於春官帝臨觴而有喜
兮詔花史使書丹于是紅藥舍人之職紫薇郎吏之家學士則青蓮並美尙
書則紅杏爭誇靡不拖綠綬戴烏紗承華蓋而列仗參玉版以排衙命修竹
而起草俟木筆之宣麻謂宜加封乎十等兮資管領乎羣花乃國於洛陽之
地帶以曲江之湄圍屏作邑列錦成帷設芳壇爲茅蕝兮習贊謁之威儀又
加之以湯沐兮抑膏沐於芍陂旣削桐以爲珪兮又刻竹以爲貽彼千紅與

萬紫兮曾不足以儷之爾乃蜨使躡躑蜂臣奔走山爲羣玉之排館是仙春之舊披姚氏之黃袍兮曳魏家之紫袖鶯兒展其歌吹兮燕子嚴其斥堠屈桃李爲嬪嬙兮長桐孫之貴胄夫何羨乎金谷之繁華兮與玉樓之豪富翳東離之秋菊兮有隱居之逸氣出小池之芳蓮兮亦君子之臭味終寒瘦之自慚兮曷若此花之噴沸信國色之傾城兮嗟難得其鬢鬢卽水仙之稱玉兮猶等之于凡卉是宜召詩王於陳芳兮俾揄揚其矜貴百花之芬菲兮競妍華于春社合低首於此花兮迺眞王而非假雖蘭芷其不芳兮矧彼穠之妖冶羌流盼以無言兮恍御香之衣惹日正午而欲扶兮又似沉酣於玉辮發擘韞之光儀兮長服媚於帝者嗟嗟時有代遷兮榮枯遞捨物各有魁桀兮位分高下詎人類之至靈兮對名花而暗啞慕李郭之封王兮無爲花所笑也

限譬十算乃得爲吏賦

以去食足而知榮辱爲類

漢書景帝紀後二年詔曰今譬算十以上乃得官廉士算不必衆有市籍不

得官無訾又不得官朕甚愍之訾算四得官應劭註古者疾吏之貪衣食足知榮辱限訾十算乃得爲吏十算十萬也按仲遠漢末人此古者卽曰漢初時耳成周之時鄉舉里選尙已降及春秋不更庶長稍稍冗濫商鞅因之賜民爵爲等十八不聞訾選也漢定天下乃有五算爲吏之制景帝裁之革十爲四夫吏果貪耶雖十算何濟果不貪耶雖無訾何害陵夷至於孝武入訾補吏流品雜糅究厥濫觴伊誰之咎折以三代之法度當不其然因本此意而爲之賦曰

漢之興也鑒暴秦之致亂由貪吏之非幾嗟簞簋之不飭繫身家之本微謂夫初離白屋忽進彤闈譬窮鳥之得粟似飢鷹之脫鞵俾貧兒以驟富雖瘠土而亦肥爲閭左亡命之徒助成虎翼疑上考循良之事不屬牛衣披仲遠之遺聞識高皇之科則蓋其時當天初平尤加意興斯民休息凡游徼亭長之司鄉老嗇夫之職仿周官之計必以廉擬夏書之刑加諸墨苟三歲之食貧乃百端而培克無中人十家之產易釀官邪必賀錢贏萬之臣方宜肉

食于是限十算以爲警乃一官之得錄旣非落魄無賴之徒不爲坐藏貪汙之續若淮陰乞食只宜長此沈淪如曲逆長貧未許辟爲掾屬其始也且收其功於屠狗販緡其繼也已兆其端於賞官納粟蓋以守職則有餘而以勸廉則不足故景帝二年之詔有吏警四算之辭謂商賈旣不聽爲吏而廉吏又未必多警例以斤金直萬之條則十算已有十金之重準以石米千錢之價則十算已多百石之糜是庸減其泰半酌乎前規使履絲曳縞之徒無相傲也庶圭竇華門之士勿致餒而夫膏粱之中無氣節衡門之下有英奇十算固掩耳盜鈴之舉四算亦攘雞損日之爲雖釋之以警郎進相如以警吏隨然而十年不調四壁徒悲爲時流所見鄙己名實之交虧其餘盜金摩足者流關茸莫問轉恐挂角負薪之輩寒峻誰知迨其後縣官心侈大府錢傾輸財助邊無虛日補官入穀有常程除鹽鐵官作吏以武功爵爲名所忠之言奏可貢禹之議不行窮子旣難期印綬賈人亦濫列簪纓夷銓衡於市井浸販鬻夫公卿乃祖以馬上得之未識三升之典有士自田間來者休言一

命之榮則嘗攷周禮之經地官之籙胥徒府史簡其人旌黨比閭立之督但見竇與辨物升由州長之門未聞內府取羸爵等夫征之贖則此十算者下以開侯國之酌金上不同荆人之獻玉惟登朝而已利其資乃得志而遂專其欲此馬遷作史憤傳貨殖之書而崔烈知名終羅臭銅之辱也

悶尋鸚鵡說無聊賦

以韻為約

猩屏隔重麝香徑寸玉斗量愁瑤函緘恨眼將倦而無眠顏非醜而微困好似紅蠶春懶無那傷情除非青鳥書傳更誰排悶爾其繡戶沈沈長吟短吟畫燭欲暝古苔自陰呼皓月而不諾賸清風之見尋拾墜權于綺幌通客訊於素琴最傷心千里夢魂慣迷瘦蝶有彈指一腔恩怨交與靈禽徐移漏箭靜對燈檠何堪岑寂無限淒清題幽芳於木末激孤籟於瓶笙欲覓知音歎人世半多凡鳥更攀情話趁閒時相付籠鸚夫其性慧宜人心靈識主宛轉調喉翩躚刷羽增窳辱于家奴感飄流于異土亦復徧閱炎涼能言甘苦卿真解語直將喚起蟾蜍儂亦多情或者前身鸚鵡蘭蕙之心笙簧之舌一種

相思兩情細說整質於翠衿霏清言於玉屑數急景之晨昏訝今年之風雪
應呼小友居然心事分明屢顧奚童生怕春光漏泄時則淒涼廉幙徙倚
甃爐煙未歇茶夢方蘇欹枕而燭痕將熄巡檐而梅影同癯咽荒雞於野外
瘖宿鳥於林隅獨立花陰訊狸奴之睡未欲操琴弄招鶴子以來無暮暮朝
朝虛堂寂寥仗金籠之作伴依玉檻以生嬌小語而旋驚屈戌低吟而欲贈
瓊瑤繫芳心于雲海和寒吹於霜條在鬢絲禪榻之旁發音嘹唳于急鼓疏
鈺而外對景無聊蓋放翁身世羈棲生涯流寓官拙如鳩盟清於鸞鳳在箴
而倏暗鳩爲媒而見妬結驕難伸鬱伊誰訴奈何輒喚如聞子野之歌忍俊
不禁替誦正平之賦

平原君相士賦

以多者千人
各百數焉

平原公子風流自多華簪雲集珠履星羅頗聞躡躡擔簦就君侯之館舍大
有黃金白璧招豪俊於岩阿最難高士魯連竟爾辭金不受可惜大賢孟叟
未嘗載酒來過時則冠蓋駢闐履綦風雅或抵掌於庭前或聯肩於稷下問

諸君之伎倆不過狗盜雞鳴邀一顧之恩榮多半狐威虎假堪笑手藏敝袴
以待功臣更誰頭斬美人爲辭楚者而君之於士也則虛懷結納厚幣招延
逮干旌於下邑列尊俎於賓筵後車誇驕從之多奇材什九比屋頌主人之
德食客三千有談天炙轂之徒莫謂諸公碌碌是鼎食鐘鳴之族無慚濁世
翩翩爾其扶持寒峻藻鑿人倫匪唐舉相人之法如孫陽相馬之神果登輪
扁之堂幾無曲木儼入夔牙之室盡奏陽春居然索驥圖形堂下鮮濫竽之
客從此登龍增價座中無彈鋏之人何物毛生託居廣廈聲名未顯於門閭
姓字不聞於朝野頗似雞蟲爭食惟小人之是求亦如狗馬充庭非吾家之
所寡豈有處囊錐利未能脫穎於臣門何圖插血盤盛竟定合從於楚社君
於是喜得真龍悔求凡馬微斯人庸有濟乎笑餘子何足算也在牝牡驪黃
而外豈無伏櫪之悲彼異同堅白之談枉若懸河之瀉大抵豪門上客都如
南郭先生方知末路英雄不少夷門監者嗟嗟綺席宵陳高門晝闢華燈萬
重乘軒三百驥附尾以爲榮蟻慕羶其奚益鮮衣榆食者擊轡而摩肩煙視

媚行者倚裳而連迹風寒易水空聞壯士之歌雲擁西河誰式經師之宅然
 如平原之拭目英豪傾心寒素當時擁篲以相迎後世繡絲而爭慕雖連牆
 三載幾埋賢士於風塵而舉火千家盡感乃公之禮數迄於今山林寂寂幾
 人爲傾蓋之歡人海茫茫何處是驅車之路

射蠶貫心賦

以貫蠶之心而
 類不絕爲類

蝸國神功蟲天手段大好圍場是真妙算惟不物斯能物物沒羽何奇由無
 形而得形形儀毫不亂漫道侯張熊虎借爾么鬻直如巢破蟪螟若然洞貫
 稽列子之寓言得紀昌之異術其明則象罔猶輸其捷則蓋門非匹殆將求
 董澤之材選雕弧之質下鴻鵠而嬰機殪熊羆而伏鑽方謂匠心獨運囊括
 雌雄何圖生面別開材徵蚤蟲是蠶也蠶肝等瑄蚊翼同垂肖琵琶之半面
 當畫戟之一枝欲誇飛彈之能蛻丸待轉或借含沙之力蟻矢相遺倘遇離
 婁轉望洋而問若遇逢莊叟將問道以求之爾乃藉之薄義注以纖鍼儼蠅
 鬚之微動恍蚋背之遙臨試作壁上觀似車輪兮坎坎本爲囊中物當戶牖

以沈沈不若蜻蛉猶有雙飛之翼是何蟲豸尙存一點之心電掣星馳弓弦乍離射棚恰值貫革無欵適洞胸而頽臆匪志目而中眉試思賦誦阿房今猶解否卽使智藏傲絮爾亦何爲不同蝘腹纖微能容郭索一任蚤鱗浮踊難作之而是蓋神遊勃窣跡棄躓筌惟課虛而責有方志壹而情專迴非蕪鹿空虛翻疑一夢應笑棘猴變幻枉廢三年卵有鬚而鈎有毛乃非冥造尻爲輪而神爲馬論不空懸然而術縱神奇詞惟崎嶇是蟲也猶有迹之依稀是心也猶有名而髣髴無論捫衣剔縫未克忘機况乎挾矢張弓尤爲假物輸海上釣鰲之侶得意無言問江頭狎鳥之人委心曷不噫嘻境判洪纖功齊巧拙攻堅而金石可穿久齧而泰山可折恢張眼界視江山爲螻蟻之場開拓胸襟納天地於蜉蝣之穴何必畫道成之腹而後發的呈能取州綽之衷而後挽強稱絕也哉

心太平室集卷五

心太平室集卷六

吳縣 張一麀 仲仁

蘇州之武士道

今之蘇州以文弱名於當世吳人豈真弱哉孔子曰寬柔以教不報無道南方之強也君子居之老子告弟子曰吾齒尙存乎曰無曰吾舌尙存乎曰有老子乃莊語曰舌柔故存齒剛故亡道德經云天下之至柔馳騁天下之至堅民國二十年矣蘇雖屢經兵革然較諸河北及湘鄂贛諸省其幸不幸何如卽公債庫券悉索敝賦而乞丐流亡較諸江北鹽阜之艍艍船其幸不幸又何如無他蘇人無帶隊之軍官無投軍之丘八非不能強也不屑強也雖然吾蘇固以文弱名於當世矣其所以弱之故則三烏鴉雀搗之力爲多昔不及義之風清乾嘉閒孫嘉淦之南遊記已言之矣然遠考歷史上之蘇州申公巫臣教吳乘車教之戰陳是以今湖北人教蘇州也吳王闔廬問伍子

緝詩云三鳥害人鳴黃
鶴四條除爾風鳴龍

又因物質生活之便利養成驕奢淫佚羣居終日言

胥伐楚之術子胥曰爲三師以肄焉一師至彼必皆出彼出則歸彼歸則出楚必道敝亟肄以罷之多方以誤之旣罷而後以三軍繼之必大克之闔廬從之楚於是乎始病是以蘇人困湖北人也吳伐楚濟漢而陳五戰及郢處楚王之宮是以蘇人入湖北之江陵也吳王夫差敗越于夫椒遂入越越子以甲楯五千保于會稽使大夫種因吳大宰嚭以行成是以蘇人而敗浙江之寧紹人也至武士之名者王僚之子慶忌走追奔獸手接飛鳥要離者有萬人之力慶忌歎爲天下之勇士鱗諸設劍置於魚腸以進遂弑吳王此皆春秋時之武士道也秦漢而後項籍殺會稽守殷通起兵叛秦會稽卽今之蘇州府漢末羣雄並起孫堅父子獨步江東周瑜陸遜並爲名將唐末吳越錢鏐與淮南楊行密爭蘇州累戰而後定蓋得蘇州則三江五湖可以爲限不然則錢塘不能一日安宋建炎中金人入平江而兩浙皆爲摧陷及濱江置守許浦一軍藉爲防衛元并江南海道運輸平江最爲繁富及張士誠據之而運路中絕大都有匱乏之虞士誠富強爲羣帥之冠蘇固以財賦稱雄

其險要亦爲浙西阨塞宋范仲淹爲將西夏有小范老子胸有數萬甲兵之
譽明韓雍平兩廣大藤峽威震南服二公皆蘇人以將略著于兩朝歷史非
若今之舌下無名士筆底無英雄也當明魏忠賢提騎四出莫敢誰何獨至
蘇州逮周順昌時蘇人羣起擊之巡撫毛一鷲至匿于溷藩以免五人之墓
赫然在虎邱之旁忠賢緹騎從此不出孰謂蘇人不武哉至蒼頭技擊冠倫
魁能遠者無論已近若甘鳳池橫行于建業馬遠林授命于丹陽以及一隅
之力與太平軍抵抗者如前論白頭之張沁湄等數人雖匹夫而與盤踞蘇
州四五年之大敵相持永昌周莊竟安七邑非蘇州之武士道而何吾聞李
秀成之將行也告慕王譚紹洸曰蘇如不能守莫如退保穹窿山其地形勝
進可以圖蘇州退可以入太湖紹洸不能用其言致爲郅王等所殺使秀成
之計售則由太湖以上援宜常下規嘉湖則曾國荃雨花臺之師未必不受
牽制左宗棠未必能入杭州太平天國之氣運或將延長三五年平吳之功
未必卽操勝算吾嘗登穹窿最高之箬帽峯而望三萬六千頃之太湖穆然

想見伍大夫之英風偉烈而祝吾蘇州武士道之魂兮歸來吾蘇州三十萬之父老子弟乎亦將有感於斯文而羣呼起

蘇州之農業

揚州之田在禹貢爲下下而今日言財賦之區必推江之南浙之西則五代間楊行密錢鏐之功在百世也王船山讀通鑑論言之甚詳篋中無此書故不錄武肅有帝王之資而不務遠略日夜焚香告天祝中國早生聖人以救人民當五代神州雲擾荒淫殘暴之時獨盡力於農田水利俟宋太祖太宗混合宇宙歸命於朝至今享其利者千年以視軍閥之旋起旋滅塗炭生靈其相去何遠哉明太祖平吳怒蘇松嘉湖爲張士誠守乃籍諸豪族及富民田以爲官田卽以其租簿爲稅額曰令吳人世世罵張士誠也楊憲爲司農卿又以浙西地膏腴增其賦畝加二倍雖其後屢有增減尙爲全國之冠馮林一先生減賦書詳載之賦雖重而民之生活尙不甚窳一則由康熙乾隆時之蠲免田賦湯斌林則徐諸賢吏之修濬水利郝宣徐光啓諸專家之注

意湖田范成大陸龜蒙諸名流之提倡農漁器具不至如河北江北之水旱
爲災屢煩蠲賑人事爲之非天幸也吾遊穹窿山麓之雙堰全山四面居民
賴以灌溉者稱數十萬畝共二堰二池五閘以蓄穹窿之泉水明成化中知
縣雍泰修築清康熙三十年知縣王霖重修後久廢至雍正間巡撫高其倬
乃修築之道光十六年巡撫林則徐委吳縣賀崇禧浚三堰二池五閘至於
今賴之閘有二橋吾友李印泉名之曰湯公隄林公橋以比於西湖之蘇隄
虎邱之白隄其近處有朱買臣之藏書廟爲湯林二公祠卽祀文正文忠二
公者光緒間李紫璫超瓊爲縣令又重修之李公亦近今之循吏也其他若
白茆湖澱山湖金雞湖陽澄湖凡入太湖之口皆有林李應實時蒯德之
遺跡見於蘇州府志者碑記甚多自民國以來漸見廢弛韓紫石方惟一丁
芝生曾施工焉兵革不休農人困於租稅溝洫或成阡陌港汊塞爲管茅吾
蘇州之父老子弟乎欲興復農田水利以達民生主義則電力屏水之機農
具製造所之械濟關蠶校之種胥門水關之開通以流城河之惡

左傳有汾
澮以流其

惡 吳江龐山湖之設計以繼通海公司之墾牧宜亟起而圖之詩曰邦人君子莫肯念亂誰無父母又曰雨我公田遂及我私孟子曰出入相友守望相助疾病相扶持凡集會保衛衛生諸大政均由農田而起其諸君子亦有樂於斯乎

預防湖匪策敬告吳中士民

太湖之匪自總指揮胡君祖玉痛剿而後吳人至今思之近日又復四出嘯聚劫財綁票鄉里騷然殷實之家早遷城市其安土農民偶有斗石之儲卽爲匪所魚肉太保阿書猪羅阿妹既經正法而餘匪別戴其魁甚至浙境濮院全鎮被劫蘇之橫涇胥口等處凡瀕湖各鄉如入無人之境聞匪大隊出劫身穿制服並放步哨盒礮機槍器械精利其爲潰軍逃亡勾結各幫不問可知水陸警隊聞訊馳往十不一遇匪常爲主而我常爲客故匪暇而我忙匪逸而我勞匪設伏守險以待我而我轉中其計

如游擊隊長李公國斌陣亡之役

陸警每

一分所警卒不過數人安能禦敵縣轄公安大隊四隊中只有三隊在鄉零

星散布不能集中水公安隊則舟械竄敵欠餉或三四月分防各區亦與陸隊散漫者同一弊病保衛團條例頒佈後各市鎮均有數十團丁保守本鎮已爲盡職四鄉無論矣夫今之保衛卽昔之團練清胡文忠公林翼常言以兵衛民不如以民自衛茲將胡公函牘摘示一斑

其請通飭修築礮堡文云 上略 愚見以爲召遠方之情民以充練不如卽本

境之農民以自守 中略 田疇許遠尙保鄉里塵埃之中何地無才何才不可

策用惟官不先用則傑者思亂懦者風靡耳 中略 愚以爲言戰不如言守用

兵不如用民用民力以自衛尤不如先用地利以衛民破天下之至巧者以

拙馭天下之至紛者以靜公輸之善攻不敵墨翟之善守譬之於棋負者誤

於進取勝者以慎守爲算其切喻矣熊公襄愍經略遼瀋惟扼形勢繕守具

主固守不浪戰身之去就係遼存亡然考其方略不過築堡插柳以防衝突

盧公忠烈督兵大名鄖陽依險立寨築土垣以保民流賊遇公必敗所至飢

疲川楚教匪嘉慶二年德侯奏請堅壁清野合州龔牧所陳調兵之害添兵

之害痛勇之害及四難十利各策其時以糜費擾民之說阻隔不行而糜餉擾民尤甚至額侯經略川楚於六年內復奏奉行立見功效乾隆之季楚苗不清福和二帥以重兵剿辦不勝而傅公重庵創立礮堡以制之鎮筆總兵富公志那攢司事者之歲費金錢妄爲招撫遂以參苗之資歲十餘萬畀之傅公以成設礮堡之功楚人至今賴之治安已近六十年云云

胡公爲咸豐名將所言如此同時左文襄公宗棠亦湖南兵事名家其致胡公論團練書尤爲洞見利病今亦錄要如左

上略 粵西用兵以來談時務者皆知團練保甲之利 中略 自扞鄉里人有固志熟於地形便於設險愚者亦能出奇怯者亦能自奮此其利也若使與猾賊驅逐於數十里外彼鄉民者不習行陳不知紀律不走則死耳烏覩所謂利哉且無事之日竭民之財力以養兵有事之日復以其身命代兵冒險而赴敵卒之訓練未嫻十戰十北糜爛其民以求一日之僥倖而不可得仁者之所不爲也 中略 客有自軍中來者每言粵西大吏嘗有事於團練矣賊未

至之先鄉民排仗呼號亦似可用比寇至則各伺便逃走勢不可禁創議者旋亦喪然自失尤之者至謂團練不可用愚以爲皆過也團練原制賊要著所以未覩其利者正坐不用礮堡之失耳有堡以安其老弱婦女米糧器具有事移置其中則人心自固堡四隅各置一礮礮居壯丁弩銃礮石各守具預貯其中兩礮相距遠近總以砲石相及爲度層留銃眼不限多少外環深濠暗設機筭計堡之大者週不過一里可藏數千人一堡四礮壯夫乘礮禦賊者常不過百數人須人既少可以更番疊戰晝夜不懈儲峙薪汲先時籌辦守其一切預行安設有警入堡坐須其來此不過智勇過人者而後可爲之也鄉民室家在此身命在此又憑高依險不至與逆賊併命須臾怯者可使勇愚者可使悟彼何肯遇賊張皇伺便奔潰哉中略兵法曰謀定而後戰又曰善用兵者制人而不制於人賊知之而我不悟此勝敗利鈍之機所由分也

胡左二公往來兩札足爲吾輩保衛團之導師或謂礮堡宜於陸地若瀕湖

各鄉零星散處築堡設礮頗難下手不知學古人者當師其意胡公所云用民力以自衛尤不如先用地利以衛民最爲扼要瀕湖一帶港汊紛歧山邑以山爲障澤國亦以澤爲障此定例也每鄉必有市鎮角直一鎮自民國以來匪不敢入預備故也能用地利故也吾嘗考洪楊時代各鄉所謂白頭者與鄉人研究之前事之不忘後事之師也

香山人多業工匠饒膂力亦自相團集人衆而雄賊至輒併力驅之嘗直衝至胥門而返此一事也木瀆河橋村張基池字沁湄賊警迫卽招義勇賊擾木瀆橫涇數十里中輒迎擊卻之所隸民團日衆遇賊十餘戰未嘗少挫五月九日賊大隊掠鄰村基池督衆馳救始進賊披靡大呼躍入所率衆不能從基池猶衝突斬三人忽刀脫於柄遇害此一事也其時各路鄉鎮白頭團勇四起其大著者永昌徐氏周莊費氏扼守最固忠王殿下僞同檢熊萬荃與之約各不打仗面訂和議

以上均採潘應生先
生蘇壽康處記錄

癸亥十月李鴻章收復蘇

城奏保候選道徐佩濡加按察使銜卽永昌徐氏白頭自庚申至癸亥相持

四年而賊不能擾此利用水鄉之效也孰謂吳人脆弱哉

今瀕湖各鄉如蘇松嘉湖環湖而居者誠有人焉師胡左之意堅壁清野擇市鎮要害之處設瞭望臺一四隅設礮樓壯丁更番守之使匪至無所掠伺其懈則偶一出擊所謂制人而不制於人我主而彼客我忙而彼忙我逸而彼勞各畫防區毋越境出隊使懦者自奮愚者自悟各衛其身家妻子食糧器具設胡潤之左季高生於今日不易此言至軍警設險之法則有李印泉先生吳郡西山訪古記中方略在吾利害切身之邦人君子盍起而圖之

建築蘇鄧洞汽車路意見書

予蘇人也生長於太湖流域之鄉太湖者蘇之寶庫也亦文庫也太湖之佳處曰鄧尉曰洞庭汽車道之以蘇鄧洞名由此也一塵嘗旅杭之西湖矣中外人士之旅行西湖者歲計金錢無慮千萬何以無盜劫之虞杭人熙熙於湖光山色中其思想之高遠娛樂之雅潔視蘇何如又嘗之日本之神戶橫濱日光箱根矣西人在華者歲往日本避暑或漫遊以爲東方之瑞士歲糜

金錢以五千萬計日人晝而勤作夕而遊行其旅館郵亭之林立文學藝術之日新視蘇又何如返視吾太湖豈不杭之西湖若日本之神戶橫濱日光箱根若但以交通未便設備不完耳五年前與舍弟一鵬在滬宴楊君叔英席君錫蕃奚君鶴年等於酒樓謀爲長途汽車集資之舉席君謂洞庭人可任全數之半諸君亦唯唯樂成吾弟以愚昆季皆貧子慮半途中止逡巡不前然欲發達蘇州舍此無他策中略爰囑席君鳴九徵求山人意見莫不歡迎彭君雲伯調查滬上汽車四路深知利病爲意見書以求同志之共同發起俟發起人担任招股之數足卽計日興工工必求堅事必求實股存銀行非董事長與工程師共同簽字不得用銀必一次收足息必開年始發虛收實支不可也蝕本發息尤不可也試言其利

一利於實業者自閩門胥門西南而上如跨塘善人橋光福香山皆蠶桑區域洞庭絲繭價值又高民九與嚴君孟蕃同遊洞庭調查東山歲入三百萬一絲繭二魚蝦三果品大宗二三兩項皆有時間關係鄧尉橘梅亦然銷路

之大厥惟上海設使朝出於林淵午入於滬市物鮮則價貴時短則本輕前之費二日時間者今以三小時可到冰鮮水果腐敗之數減少甘美之度增加二百萬者必盈三之一矣求過於供則漁林兩業更旺種桑養蠶之戶更夥農產園藝藝術益改良其利無窮矣

一利於治安者西湖經民國十五年杭城無喋血之事歐之瑞士大戰時能守中立不似比利時之破壞者一爲中國之公園一爲世界之公園故也名勝所在歷史所留貽雖有闖獻不敢入孔林雖有拿破侖該撒不敢毀耶路撒冷各省軍閥皆有別墅各國富豪皆有投資此西湖瑞士所以能長保治安也齊魯之戰吳人痛心化太湖爲西湖化七十二峯爲瑞士何不可者太湖古稱盜藪飢寒所逼開賭販私盜亦猶是人耳此路一通雖雞蛋花生一茶一點皆足販買營生某君所謂太湖無匪蹤者誠爲遠見若杭若瑞皆其先例也

一利於文化者太湖流域文化奧區吳派經學獨步一朝歷史地理金石目

錄天算小學諸家屈指難數今稍衰落矣自蘇州開埠滬寧通車青年子弟沾染奢華茗酒倡優虛糜歲月以視西湖之公園運動打槳賽跑碧草如茵綠波如畫增人智慧移人感情一爲天堂一爲地獄矣縮地有方卽回天有術靈岩穹窿天平堯峯楞伽莫釐包山之勝景范墳玄墓蠡湖胥口之歷史情形巨區模型礦物標本俯拾卽是天然改觀又吳兒脆弱於今則然不知闔閭故宮實在橫山西施妝台亦傳香水餘皇長鬣夫差戰場吳之霸也入楚敗越轉移風氣當在交通意人馬可李羅遊記謂蘇州能加以膽力可以支配邦人取其所長舍其所短文事武備兩者相需不出十年一洗舊染矣一利於商業者吾華商業道德聞於歐美洞庭山幫以三十里地可與寧紹齊名推其原因宋南渡時由嚴葉席鄭等四大姓擇地東山以殖其民如美洲之新教徒有冒險進取思想又湖岸線之長與陸地比例如英倫日本之海岸線過於大陸各國故商業雄於一時湘蜀閩粵靡不有山人足跡故吳人文弱保守而山人特殊焉今以汽車道聯之將洞庭奮鬪之氣與蘇州巧

慧之心合成結晶薄夫敦懦夫立商業隆富操縱金融忠實不欺揄揚信用此交通之關於商業者也

標此四利以質邦人其他遊覽之利怡性情延壽命葛洪之所窟宅龍威之所往來上接仙靈飄然天際名所案內

案內日本指南之名稱

奚翅東京路政指南甲

於寧滬保存古跡之利則王鏊備考沈周畫圖青邱之所吟哦漁洋之所歌詠遠則伯鸞五噫近則越縵七居凌雲有期御風可致凡斯佳勝屈指難言至公司權利一曰車捐二曰客票三曰貨運四曰旅館五曰公園有乾隆御道爲之基有金山石礦之料照各國通例則滬寧營業益加路局必爲扶助循大部法令則公司條例不廢保息亦可請求律以浙省成規工兵本可築路擬諸山西成案代賑必在興工其籌備事項一徵求發起人二編造預算三公司組織四招股章程依道路條例購置路基調查建築材料購置汽車現已次第籌劃層遞進行其分段建造以蘇郊至木瀆爲第一段木瀆至大村爲第二段大村至大缺口爲第三段木瀆至鄧尉爲第四段股款收足第

一段即從蘇至木瀆做起通車以後再招新股而二而三而四不敢猛進慎之也或須變通則股東公舉董事後由董事會決定凡吾同人各抒所見加以平議尤所願聞

火災感言

蘇州接官亭南首之草棚火災甫告結束而三山會館背後之草棚又告焚如上次火災捐得二千一百二十一元有奇樂善之心人所同有但焦頭爛額何如曲突徙薪彼首都上海之平民住所皆爲草棚大火而起蘇獨後人今公安局取締草棚而江北人貧不能租瓦屋鄙人嘗言諸當局所捐萬元造屋百間或二百間如唐山工房之例以煤屑與石灰塗屋其磚則相度洪楊時燒過之高墩墩下必有牆脚此可調查即以工代賑而有高墩之地主則計畝給賞由建設局設計代辦所須出錢購買者惟石灰與木料與玻璃耳如五十元一間則萬元可二百間如百元一間則亦百間地主出賞先令富戶墊出即不能百間何仿先造一二十間以試之蘇人喜爲消極之救濟而不

爲積極之預防則盍反其本矣

蘇州市鄉公報十週紀念頌辭

市鄉公報主筆忍公以元宵日爲十週紀念屬爲文以張之且言是報于丙辰正月元宵出世實爲民國五年之二月十七日記二月十八日余在政事堂與右丞楊君士琦談川東道尹與內務總長朱君啓鈴電云南川綦江均入蔡鐸滇軍之手曹錕以禦蔡由湘到渝北軍不利三月十日項城派余祭孔子恭代行禮十一日早六時行祭禮大雪余默禱天若不亡中國願孔子在天之靈勿使帝制成立先一日朱君啓鈴持祝文商諸楊君士琦應否稱中華民國大總統致祭余謂人可欺天不可欺應用大總統字樣故民五丁祭祝文尙是大總統袁世凱致祭於先師孔子之神載在內務部檔案可爲項城未稱帝之證亦余所以報項城也越十二日帝制取消之令卽余屬稿孔子之靈蓋陰相之然取消則取消矣民五後各省紛擾民苦兵革至今不休其端皆自丙辰開之是報產生以後八方多故卽報館中艱難困苦之狀

忍公啓中已自言之余不復贅獨論報館天職蓋古之史家者流梁任公謂有國史有民史報章則民史也是報以市鄉爲範圍近於史家鄉土志之類君子居一鄉則友一鄉之善士居一國則友一國之善士市鄉報之職亦欲使鄉人相觀而善忍公告余曰他報或藉報外之經濟而吾報則否柳下惠曰伐國不問仁人余因忍公之言而益之曰饋賂不及廉士苟有以不義之財而嘗試之決不入市鄉公報之門此其可記者一也春秋之義善善惡惡報章之直何獨不然苟有變亂黑白淆惑是非者亦決不出諸忍公之手此其可記者二也敢作頌曰道人木鐸一鄉所宗誰爲健者庶幾忍公

吳縣各界聯歡社募捐啓

詩曰相彼鳥矣猶求友聲矧伊人矣不求友生蓋言一手一足之烈不可以成事故敬事之道必在合羣合羣之益厥惟互助其在農業時代出入相友守望相助疾病相扶持則百姓親睦自世變日新交通便利舟車之所輻輳文物之所薈萃貨物之所轉輸如吾吳者襟江帶湖公路四達西駛首都瞬

息卽至澄錫嘉湖旦夕往還吳人雖文弱乎以視燕趙之士慷慨悲歌者何如哉試徵諸近事自甲子齊盧之訌奉軍孫軍之更迭訖國軍統一而稍稍底定然一二八之役外患憑陵間不容髮無老幼無男女奔走呼籲悉索敵賦以相支持賴天之佑得免兵禍非諸君子合羣之助得離於劫火者幾希湘鄉曾氏有言君子之道莫大乎以忠誠爲天下倡莫辱於處己於安而遺人以至危是故臨事而周章無措不可也倖目前之苟安上下泄沓而無備尤不可也德國名將魯屯道夫曰一國之國防力爲民族中之一成分視其民族之物力經濟力及精神之大小而全體戰爭中之國防力之大小以定其中尤以精神力爲重要則吾所以培養此精神力者可不早乎記不云乎天下無事則用之於禮義天下有事則用之於戰勝此吳縣各界聯歡社之所爲作也同人等志願雖宏能力孱弱所賴四方賢達共襄厥成擬建會所一區附設運動場圖書館以備馳驅而資講習人之欲善誰不如我楚子文之紓難漢卜式之輸財古有其人今無多讓凡我同志盍興乎來此啓

致楊建章 文格 爲教育局請官地書

前在議壇諸承教益並蒙召讌口角流芬瀕行時帥座談及圖書館事謂須將平民教育公民教育國語教育納入其中聞之神王在滬時因蘇州駐軍離市太近帥座擬將營地營房賣卻在離城十五里外重建營房日前先遷至葑門外之舊六團營房愛民之誠溢於言表弟歸時已囑閭門商家組織公司預備先買五團營房但詢諸團長崔錦濫估計六團營房收拾修理須萬元上下是以遲遲未遷而吳縣教育局潘起鵬君則云教育經費因墊軍用幾將不繼查台營官地局案卷蘇州上津橋舊五團操場前據吳子和報領計七十六畝五分每畝估洋四十元又蘇州葑門外寶帶橋舊六團打靶場前據錢禮耕報領計一百三十八畝每畝估洋四十五元又寶帶橋舊六團營房西操場地五十三畝三分三厘每畝估洋四十五元據經吳子和錢禮耕等報領嗣經蘇軍張旅長中立來局報領以上各地先後呈請前督辦公署核示皆未奉到指令等因查營地歸個人具領不如由團體報領而教

育爲地方命脈帥座熱心提倡遐邇皆知吳縣教育經費已萬分艱難莫如將前項地畝援案以總司令指令撥歸吳縣教育局免其繳價如六團打靶場操場目下未能出賣亦請將五團將廢之操場地七十六畝五分先行指令台營官地局准給教育局以泯爭端而培學款我公參畫民政當以爲然除五團營房另有商人組織公司候令價領外茲囑該局長潘君起鵬持文上謁乞賜宴見並代陳帥座特與維持實紉公誼

致圖書館函

外公民版股庫摺七年公儲百
元者十張十元者七十二張

敬啓者一鑒於前清宣統間不自量力擬在課桑園舊址議設圖書館自捐千元前河南巡警道蔣奐庭君在豫自捐及募捐合成千元共計兩千元存入豫康莊立摺友人馮守志君願任建築基礎清理界址之事並未動用前項捐款辛亥十月豫康倒閉此款陷於困難之地是年十一月馮守之君商議付還右軍營營地收回大來堂等租屋需用洋四百十九元六角經潘仲午丈慨捐三百元一鑿湊出一百十九元六角應用自後因將入都呈明都

督府此項圖書館由馮守志資完全責任惟豫康倒閉之兩千元纏訟經年方得清償壬子正月一慶入京爲公府祕書經改革之後公私竭蹶家事無暇過問而鄉里貧民至有關門自盡者議設織布廠以收容貧民因將豫康收回之款提出一千元作爲股本卽今之二門口公民布廠是也惟圖書館二千元之款除以公民布廠抵去一千元及付還右軍營一款一慶湊出一百十九元六角外尙有八百八十元四角於甲寅年購存三年六厘公債票八百八十元滿擬俟馮守志君開辦圖書館時交出以清手續無如圖書館至今尙無眉目而三年六厘公債抽籤殆盡一慶頻年坐食亦未另款存儲適直蘇州圖書館落成開幕同一嘉惠士林前項八百八十元四角幸有七年六厘公債尙可相抵若不於此時清算捐入年復一年不獨現金無從籌措卽公債亦日漸消磨益滋神明之疚查公民布廠已由一慶取過息金三百六十三元九角六分亦應一併交付今送上七年六厘公債百元者十張十元者六十九張合洋一千六百九十元又上公民廠摺存現洋一千元所

有公債票餘多之款卽抵補歷年息金不相上下應請貴館收入捐款項下以了一塵十餘年來未了之願

蘇台雜綴

一某君云蘇城內外當店計有五十家每家至少當本二十萬元共有一千萬元此一千萬元之月息至少有十萬元供給此十萬元者皆城廂一十餘萬之當戶也寒來暑往則脫離荷花大少之身秋收冬藏則交徽州朝奉之手彼元妙觀前天天穿喫喜酒之鮮衣華服者或三日而在長生庫中或入其家而不舉火者多矣此所以爲蘇空頭歟

二吳縣田賦委員陳請每畝收方單費兩角最可怪者說明此項換給田單從前所有田契方單及驗契均作廢紙無效退一步言之善後局之單民初之驗契尙非黨國猶可言也民十六年後之驗契亦可謂無效則今之有效者安知不爲後之無效不啻自取消其政府之權也民國以前之內外債民國政府不敢取消建設公債發行從前之一切庫券公債不敢取消無他威

信然也。若如吳縣財政局云云，則今日之方單，明日可以無效；明日之方單，後日亦可無效。是何言歟？全縣田額合計可得三十六萬元，局中手數料若干，成以城區捐務百分之十三例之，可得三萬元左右，巧則巧矣。其如政體何？縣農民協會緘口不言收租之業戶，亦瞠目而視，豈有延緩騰挪之術，可以上下其手乎？然彼自業之田主，鄉愚目不識丁，悍吏追呼何求，弗得是不能不責望於批准立案之省政府，尤其是吳人主席之省政府。

三文文肅公震孟墓，據李印泉先生吳郡西山訪古記中云：在天池山北竺塢志銘。徐枋撰見居易堂集卷十三，又云：按文肅墓地廣十餘畝，爲吳江縣知事海昌沈兆九君所有。立沈恭守堂，界石文肅墓，則壓於沈祖父墳之羅城圈邊，已詳余記中。中略又按新葬者爲兆九祖考沈意文先生壽榕同光間官吾鄉監司，二十年宦績武功皆有可紀。吾師趙樾村夫子出公門下，根源當在晚學生之列。今輯補蘇州冢墓而不及之者，冀兆九仰體先德，另遷吉壤，使意文先生之靈得以安居。文肅邱隴亦獲保全，豈僅吳人多沈氏之

義哉云云因某報有誤以沈之陽宅爲文之陰宅者不知文肅陽宅在文衙前卽今七襄公所李氏並刊有文氏家譜詳記文肅之子秉孫點墓穴故表而出之以告吳中考古家

四元妙觀整理委員會曾在縣政府開會議決成立以整個元妙觀全部爲範圍其原因爲觀中某道士所管房後餘地在大成坊巷山門後相連之址有私行割售情事故有調查之舉然至今此會杳如黃鶴不聞其調查報告若何元妙觀爲吳中古蹟唐名開元宮宋改天慶觀建炎中燬于兵紹興十六年重建元元貞元年始改今額明洪武中爲正一叢林正統間造彌羅閣清初施鐵竹真人爲住持卒於康熙一十七年見彭南畝墓表稱其志行高潔名聞四方憫人之意不自惜受人之施不自私此是何等人物今之道流目不窺老子之書而日與屠沽爲伍求其格於神明難矣觀於無錫之元妙觀民元秦毓鎰長民政割其大部份爲無錫公園蘇人性好和平而羽流乃不自愛惜攤棚林立驢馬同羣不知委員會諸公對此如何感想

五有自越來溪至城者言橫涇拔除菱草雇農人爲之給以每畝三元及於溪上而溪隸吳江不應吳人代爲芟除出而止之遂成口角吳江人因以槍船數艘自衛如再來者必擒縛之夫拔除菱草功令也以三元除三畝之菱此款何人所給砍下之菱可以飼牛若爲私人所有農民必不服况侵及鄰縣之地萬一發生械鬪則風波大矣聞主其事者爲顏有渥丹之某君然某君向以公正稱恐土豪假其名而魚肉鄉里有地方之責者盍防患於未然乎

六曾滌笙與胡潤之書云三四十年来一種風氣凡凶頑醜類概優容而待以不死自謂寬厚載福而不知萬事墮壞於冥昧之中浸潰以釀今日之流寇豈復可閤弱寬縱又令鼠子蜂起曾胡二公當時懲辦匪類主猛不主寬卽一家哭何如一路哭之意微聞今之水陸警界遇有盜案送交法庭必令偵探對質盜或以無證據不起訴或處刑數月卽釋則偵探及爲盜所仇因之業探者卽知盜所不敢上聞夫法律所以保護良善消滅罪惡也乃至綁

票越人之犯發邱摸金之徒可以掉臂遊行逍遙法外無怪朱毛等之裹脅平民歸如流水也公等卽不爲國家社會計獨不爲自身及妻妾子孫計乎抑監察院與法官懲戒委員會可以熟視無覩乎司法獨立各國之通義也移植於吾國則其效如此人乎法乎吾無以決之

七康濟穹窿山詩云吳人好遊不好山只從虎邱覩雲鬢縱教鼓柁穹窿去除却拈香無可語蓋嘲吾蘇人憚於出門得至虎邱已云雅趣至游穹窿山者只有進香之客而流覽全景者實罕其人諺曰陽山百丈高不及穹窿半截腰其峻可知頂有大茅峯亦曰箬帽峯晨起陟之雲冉冉在足下隨風飄揚如煙霧飛鷹盤旋俯視乃見飄飄乎有天際真人之想矣由蘇州往善人橋汽船銅元祇六十餘枚自善人至上真觀乘輿亦只一百二十枚耳自木瀆至光福必過善人橋聞建設廳孫廳長設計蘇木路將展爲光木路年底必爲光洞路是木瀆光福洞庭山聯爲一氣瞬息可達此路成則明年吾吳氣象一新矣國人往往重都市而輕鄉村東西諸國皆以鄉村開發爲亟近

歲以來湖中多盜鄉人小康者羣避土著而爲市民不思集中財力自保梓桑遂使大好湖山日就衰落可謂短視夫浙之西湖世界之公園也每春間天竺進香歲入六百萬而綁票盜竊之案絕無僅有此何故耶交通便則保衛周抑沿湖之民清茗一壺雞卵一杵皆足分遊客之餘貲而自求口實其他龍井茶西湖藕蕪菜魚羹之土產滿載而歸更無論矣貧民得以溫飽誰甘爲盜而九死一生者誰歟目光遠大惠吾吳民功不在香山東坡之下八自民十六年以後吾邑地方建設之狀況惟有王廢基公園惜無古木全是人工如三元坊之府學如已廢之長元學皆有千百年老樹何不如北平之社稷壇闢爲中央公園一東一西可供遊息往游山西太原文廟除五王殿孔子殿兩廡仍扃閉外其他五王殿之左右兩間陳設如旅館爲來賓宿舍大成殿及兩廡左右則爲講堂者凡四櫺星門內之兩廡房則爲圖書館博物館明倫堂則爲容二千人之大講堂無不裝以玻璃油漆壯麗入門買票人只兩銅元男女分日不同以昭肅靜迥異乎他處孔廟之鞠爲茂草者

吾謂樵屋門外蒼松翠柏可作茶寮肺病之人天然療養北平之公園有太倉某君肺病已至三期日涉公園遂成健者此其明效大驗也邦人君子盍起圖之

九雲邁漫錄云讓雖美德亦有分際人唾吾面拭之可也聽其自乾不亦過乎以此術治身猶可若以治國則國勢必弱民氣必靡宋人尙此等議論故割地納幣獻表稱德而不以爲恥此之謂懦非讓也必如文帝之柔南粵斯爲之仁武侯之和東吳斯謂之智漢避楚越象吳斯謂之勇有智仁勇而能讓斯爲忍小忿以成大謀非包羞蒙恥之謂也今者萬寶山之案日人噉鮮人驅殺華僑以達併吞滿蒙之目的國人義憤文電紛馳將有抵制日貨之舉動然不聞昔日之反日基金有吞沒大宗數十萬之黨員乎不聞香港進口之瓷器有標明請用國貨四字于其上而視其底有隸書加藤兩字者乎所謂國恥果在彼而在此耶彼日本之廣瀨中將何人耶東鄉大將何人耶吾願吾國人先問彼國國魂之所在而毋徒以五分鐘之熱度貽笑外邦也

十中西藥學服食品中一日氣二日水三四以下乃及植物穹窿山氣候似廬山之牯嶺仙家服氣此爲最宜晨五六時爲深呼吸或練拳術一次熱氣拂拂自腹下達湧泉至於水則有百丈泉在寧邦寺大湫不竭清可見底置銅元過於盪面三四個如饅頭式不溢以洗衣服不用肥皂自然清潔又穹窿寺之法雨泉味亦清冽中西藥房購礦山泉自外國裝來頗貴實則我自有的國貨何必用洋牌何奴性耶

十一善人橋西北有馬岡山土人鑿取紫石爲硯故亦名硯瓦山城中河沿街之硯攤皆此山物也近有王姓子弟取山土爲洋灰和沙及石屑爲之西跨塘附近有席棚下堆土石屑纍纍者卽此余將使化學家化驗之硯瓦性稍嫩故不佳價賤故學生多用之然坑底亦有佳品余覓其一爲大硯作扁額書用之視歛品爲佳但不及端溪石耳往過蠡市某村農人多作眼鏡爲農暇副業專諸巷中眼鏡皆所自出也自橫塘以西天平穹窿鄧尉香山諸鄉民婦女皆繡戲衣燦爛奪目余欲仿歐美新圖案若靠枕若桌布若浴衣

若席墊開一傳習所使專作出口貨又欲商合作社在新農村組織銷費購買等社以抵禦鄉間之高利貸鄉民不知合作社爲何物余以合會告之卽了然若一方面使鄉民爲社員一方面用借本之意使金融流通合作事業必大盛于善人橋此余之理想也

十二前日余步行至藏書廟朱買臣藏書之處歸過善人橋將雨乃喚轎而還轎夫三寡婦一路閒談此鄉之中無不知李大人且稱爲孝子此李大人卽吾友印泉先生也印泉所居墓廬曰闕塋村在小王山下爲李母闕太夫人之墓墓廬五間四廂右首又三間墳丁所居余戲謔之曰山君今新村之總幹事丁先生余名之曰山神土地土地到任三日矣聞土地奶奶將設一託兒所使農忙之小兒寄託于其家飲食之教誨之以樹幼稚園之基礎丁先生在燕子磯中外皆聞其名近聞總司令使爲軍官子弟學校校長丁先生祇允爲顧問又棲霞山師範學校丁先生本爲校長教育廳又留之固辭乃薦賢自代余戲謂丁先生狡兔有三窟但先生之薛當在穹窿山可高枕

而臥矣乃歌曰丁先生來吾蘇其蘇

十三余所居之穹窿寺卽姚廣孝之顯忠寺姚在永樂時爲少師其爲僧時居此寺東有積翠寺一名皇駕庵明建文帝遜國時曾稅駕焉遜國諸臣錄帝祝髮爲僧約左右不離者三人楊應能葉希賢稱比邱程濟稱道人往來道路給運衣食者六人郭節稱雪庵和尚宋和稱雲門僧趙天泰稱衣葛翁王之臣稱老補鍋匠牛景先稱東湖樵夫馮權稱塞馬先生更歷名勝主吳江史彬家會奉文索帝行蹤次日帝同二比邱一道人行餘皆星散當稅駕穹窿時九人具在孤忠苦節上比夷齊擬作穹窿寺聯云從歷史論人最驚奇建文稅駕廣孝登朝有一棒當頭和尚誤矣爲名山生色更慨想少穆興農潛庵講學看千巖在目先生歸乎質諸鄉老以爲何如

十四此次我國水災難民五千萬以上被災區域達十六省之多華洋義賑會美人云連年若無內戰則僅以軍費十之一供防災設備卽有天災亦不至如此無可措手老子云大兵之後必有凶年信矣吾嘗考道光二十九年

之大水時則在嘉慶三省教匪連年混戰及英法聯軍五口通商以後於農田水利置諸不問故有二十九年之結果以比康乾兩朝叠派河工大員用帑數千萬于堤工塘工者相去不可以道里計卽洪楊兵事善後如應寶時蒯德模見于蘇州府志開濬水源繕完隄防之事亦復史不絕書吳縣李超瓊修兩堰五閘頗爲僅見直至宣統辛亥而始以大水見告自民國成立內戰不絕所謂運河工程及太湖水利祇有測量絕少工役又農民因生計窘迫大溝大洫任其堙廢吾少時所見浜汶近多淤塞此如人身血管祇存大血管而毛細小血管皆不通又如大腹便便而咽喉細於餓鬼其不至崩漏者幾希矣凡事豫則立不豫則廢此焦頭爛額爲上客曲突徙薪無恩澤千古同悲也

十五往年江北難民就食江南者以百計今年高郵邵伯興化泰州東台鹽城阜寧淮安寶應之飢民以千萬計必有滿街乞食門前鵠立之一日吾人當接濟其衣食以維人道而迓天和而對於住的問題尤須預計歷來清鄉

章程以編查戶口爲第一義乃若江北人之草棚則門牌無可訂其艗艗船則行蹤無定登記無所施萬一有不良分子利用之混入其間宣傳主義則闖獻之禍何嘗不因荒年而起此非危言也吾錦衣玉食之同胞必有夢想不到者則盍豫爲之所耶

十六吾往者創爲平民住宅之說擇官荒空地一二十畝蓋屋二百間平均每間宿六人則二百間可住一千二百人其造法則邱君鞠農謂可如唐山工人住宅以石灰與煤屑爲屋面與地面只須買木料其磚則以工代賑使江北人扒去高墩而取其牆脚爲磚料彼高墩之地主當然以代價給付乃有地權員生季美謂余採用北方灰頂曾經研究南方天氣陰濕石灰性質未必能如北地之堅結耐久而該項分量極重需多費木料支持於經濟上殊不合算欲求省便受用還是以輕便圓木作架上蓋冷攤瓦片四圍則不妨以亂磚疊牆門窗隨意附着于木架上吾以質諸於王君凌霄此種住宅五十元可一間乎王君曰可矣余因思借款一萬元蓋此二百間之住宅先

令江北人之有草棚者遷入其中前兩月不出租金至第三月則酌收每間一元至年終則有二千元再蓋四十間如此則草棚可以陸續取消高墩亦可漸成平地而又有提高江北人生活之狀非一舉而數善備乎目前所騰出之草棚則以待今年流亡之就食者一便于稽查二便於統計不至散入四鄉流爲乞丐或卽以所造住屋收容難民俟春融時再取消草棚亦可草棚之患不獨戶口無可清查且火災易于延燒卽論人道主義理應如此質之好善者以爲何如

十七三民主義卽民有民治民享主義訓政時代卽訓其有三者之權能也由訓政而入憲政必使其習練使用民權又必先使官有者爲民有以察其民治之是否勝於官治吾縣公款公產處成立最後然所收入之款盡入於銀行而不留于處所一面收入一面支出全由銀行經手以大反官廳私行放利之惡習公款以地方附稅爲大宗聞此項附稅各局藉口於建設教育各廳之批令不令公款公產處與聞已屬可疑近見報載又有財政局已經

交出之款產仍令縣政府提還之文是則絕對官治不令民治抑何與先總理之說背道而馳耶從前軍閥時代尙有縣議會參議會之設人民得以稍稍與聞地方財政不意青天白日下之國民政府省政府獨使其所任用之官吏而不信任稍具民有民治雛形之公款公產處夫官有國款省款僅僅此地方款向爲市公益事務所管轄者乃又還之于官此誠官吏萬能抑知從前之財政局此地方附稅之全部每月利息入之于官抑入于私耶今之款產處利息公開聞區區者年終歸公之利息亦有五六千元然則從前財政局連省縣地方各款之利息省廳從未過問入之于官抑入之于私耶飢則依人飽則颺去官治之效如是試起先總理而問之何者爲民有民治民享耶吾以問諸廉潔政府之賢明長官

十八吾至山中宿穹窿寺之壯哉樓印泉李君題額壯哉二字出明吳文定公詩此寺俗名茅篷沈歸愚先生有詩云茅篷結空巖已及萬仞半直上無鉤梯疑是連雲棧左右圍青山如缺環一面其前湧太湖萬頃流汗漫境荒

鳥不巢磴險樵或斷山僧熟道機邀我話公案左右圍青山四句寫出寺中勝處下二句則已變換形勢因上海信女賈氏捐貲興復大殿旁起五間樓鳥既可巢而與上真觀交通之路完全修築無磴險斷樵慮矣歸愚使重生今日必爲狂喜最妙者法雨泉出寺後山中比惠泉有過之無不及一清見底可治腸胃皮膚之疾余每歸必攜一壺佳茗淪之延年去疾自謂桃源昔張良從赤松子游于此山取赤石脂見陸永康上真觀記且云攷留侯實錄及穹窿者十凡三四志穹窿者必始於留侯云云吾未見留侯實錄當從藏書家訪之逐逐人海中六十餘年何止俗塵三斗自入山寺讀禪宗語錄道藏全編吾家子房如在几席間飄飄乎有凌雲之氣朝日未升見參星之橫轉暮烟四起招明月爲故人此情此景雖神仙不過如此

十九新村事業在兩月間須作成者一小學四所甲善人橋乙劉村丙塘灣

此三處原爲教育丁藏書廟單級小學此爲新二民衆學校四所三民衆閱

報處四所二三兩項四缺五民衆茶園四所據以原有茶館津貼代用六民

衆運動場二所

一在藏書廟一在善人橋左近

七農事試驗場二所

一在藏書廟後一在寶林寺

八小公

園三所

地點在學校左右

九民衆演講台一座

在藏書廟後可容千餘人

十民衆娛樂社二所

地點

與運動場同

十一築路委員會十二保衛訓練委員會十三合作事業指導會十

四石櫬二百張新村職務總幹事丁超幹事周儒修錢啓蒙毛遂之李□□分任四校校長幹事馬君爲醫院主任馬君在北京協和醫院五年畢業曾任上海總司令部軍醫棲霞山鄉村師範校醫精於中西醫術幹事劉烈生君黃浦軍官學校教官精于軍學圖畫現任爲新村總教練卽保安主任李印泉君助手合作事業則請農民銀行朱慶曾君分設合作社於善人橋間諸鄉人蠶忙時借本一元須還一元一角餘或一粒米還至粒半多至兩粒半則爲百分之三十至百分之十此種高利剝剝鄉民太重農民銀行至多不過百分之一百二嘉惠農人實非淺鮮石櫬二百爲沿山民衆休息之所丁先生告我云我們作事至少一人當二人之用前十四項工作丁先生一指揮又須至各校示教一年以後必有驚人成績出現于新村此可預買

者也

二十新村事業至多故經費亦逐漸膨脹所幸吳稼農縣長極力主持建設局錢敬人局長教育局吳廣涵局長財政局沈子敬局長共同贊助亦有地方開通時事熱心公益之友人以精神物質兩方面惠我無涯此尤可預賀者也尤難得者李印泉君廬墓多年與此鄉父老子弟如家人父子雖有小小阻力立即解除並以誌謝

申報民國十二年之東南增刊

長江流域自武漢而下若贛若皖若蘇若浙若閩若粵所佔海岸線特長如修蛇之赴壑長江灌溉之利與美之密昔西北河同爲世界所艷稱故文化及富源皆居中華重要地位顧粵省已入珠江流域範圍而鄂贛二省皆偏於長江之西部故就東南區域嚴格言之不出皖蘇浙閩四省就四省樞紐言之尤以蘇與浙爲中堅所以然者因上海爲世界有名商埠中外人民五光十色之所薈萃其鐵道交通則西至寧鎮東至杭甬皆以滬爲起點滬雖

蘇屬而以民國歷史上之關係癸丑以後中央派兵駐紮淞滬若昔之楊善德今之盧永祥皆開府於浙故淞滬一帶軍警勢力名義雖隸於蘇而統系實側重於浙使蘇浙二省搏成一氣訢合無間其勢足以左右東南之全局而無動搖若皖若閩亦隱視二省之離合以爲從違比歲多故中央政局之不寧至於無總統無正式政府無統一國會未有若今年雙十節之怪象者前清庚子義和團之亂若無劉忠誠力主東南互保之約袁項城以小站軍隊橫亘於山東則光緒庚子之後至宣統辛亥之前神州久已陸沉子遺之民更無可安喘息之餘地東南一隅之維繫全國顧不重哉江蘇以金陵形勢之地一有戰事在所必爭辛亥改革武漢勝負未決而聯軍已下南京由是總統府也留守府也莫不於江蘇是宅癸丑二次革命南京被兵禍特劇自是北軍南下勢力布滿於長江各省然而督理江蘇軍政者若馮河間若李英威皆自立於各省軍府以外而不依附何種勢力以自存故帝制之役河間洒然立異英威亦不與督軍團合併卒焉高樹和平之幟江蘇亦幸而

不入戰事旋渦夫項城之後軍事以馮段爲集中洪憲之役復辟之役馮段之動作相同洎馮以副總統代理元首段爲總理一則主和一則主戰以政見之不合致外省軍事當局之統系亦永不能聯此北洋派所以破裂而人民生命財產日寄於漂搖風雨之中也齊督承英威之後雖亦合肥門下而於直派之漸染也深蘇浙唇齒相依浙之盧督向惟段之馬首是瞻且其資望視齊爲老因其趨向不同之故未免小有違言讒間之人遂造爲種種謠言市虎杯蛇相驚伯有實則兩省軍政長官皆有不忍於地方人民之善意且目光所注皆知東南完善之地萬不可稍紊秩序陷大局於不可收拾而若贛若皖皆與蘇之齊督桴鼓相應閩則與盧督亦有連雞之勢蘇與浙苟有成約則皖贛閩三省亦決不輕啓衅端重以兩省紳商之文電呼籲促進和平遂於八月二十一日宣布和平公約由兩省軍民長官上海護軍使先後簽字蓋章煌煌約章載在盟府雖此後大局解決仍在中央而不在地方然東南保境安民之聲浪既已聞於鄰省播諸外邦倘人心所同擴而大之

以及於長江上游則生民之禍或可稍紓慨自民五以後和平期成會也和平聯合會也因範圍太大情事萬殊一蟻潰堤牽動全局今先就蘇浙二省在歷史地理上天然可合而不可分者以爲之兆雖謂全國和平之基礎於此發端可也爰將公約原文重載左方以爲民國十二年雙十節之紀念

此約

尙存上海浙江興業銀行
中及今思之能無感然

冰壺先生傳

先生姓疏氏辛其名漢時有疏廣疏受者並爲達官一朝致仕去隱於圃子孫世其業見者不知爲仕宦後也先生之生已在宋太宗時頗能守其家法時抱甕灌園以爲娛簞瓢屢空泊如也性廉潔不苟取與居所食惟鹽豉少許而已風骨凜凜雖嚴寒而蔥蒨之色溢於眉宇人以之高其節號爲冰壺先生云與人交落落少所合時從麴生游生性剛使酒稠人廣坐中或歌呼自豪人始與接怡然以蘇席及半乃卓厲風發幾不可遏逮先生至則談言微中劃然冰釋生退而自失輒語人曰我慚見先生也旣而先生名漸播貴

人或折節下交先生一以其道處之廷臣蘇易簡聞之于朝太宗賜便服往謁先生歷階上殿陛下歛歛生風太宗喜曰得秀才如疏某者可矣然先生終以疏野之性不習城市之身歸里詔賜良田一頃以贍之晚年性好禪間與玉版和尚證大乘法聞者齒冷而先生不顧也後裔蕃盛一支居吳門者范仲淹微時過之與爲斷金交云

擬文心雕龍神思篇

古人云誠之所至金石爲開其神思之設乎思之不遠神焉所附故綿邈之致蓄乎寸心滂沛之原行乎萬里單微一綫通鬼神之情狀經緯萬有籠天地於毫芒思之時義大矣哉故思之至精神與爲搏神居於虛而志氣爲之驅使思運於實而文藻欸焉奔赴志氣所湊神隨而摩盪文藻旣會思卽其筌蹄是以結構文思貴在清渺超心鍊冶養志冲夷綴學以儲才方聞以窮理殫精以研慮優游以出辭然後使熊經鳥伸常盤旋於一氣煙霏霧結悅滅沒以千形此蓋屬文之嚆矢立意之鈐鍵夫神思始開條忽萬狀根柢疇

昔旁皇未來言堂則意滿乎堂言室則意滿乎室當其染翰不覺盈涌泊乎終篇乃見警策何者創始則難爲力觀成則易爲功也是以思爲之經語爲之緯視之無端察之無形或翻鴻乍翔而故示閒暇或飢鷹求食而彌見馴迅是以絺章繡句無取塗澤逆萌追勝務在陶鎔也人之才力亦判洪纖文之體制斯分小大楊雄有河東之作司馬有茂林之書班固則三都著名張衡則祕飾雲霓文之大者其思之大也羊勝所傳惟有屏風之賦中山所作不出文木之篇宋玉惟見夫短章蔡邕廡工夫碎體儉而易周豐而可殺文之小者其思之小也若夫英偉之士議論崇宏究其居要仍在微芒智巧之人理致周密驗其取勢乃復遼廓居要故不涉於漫衍取勢故不病其拘墟深淺雖殊並歸研鍊若力小而任重節短而音促以斯問世吁其慎矣是以田畝不分難云繡壤井竈糅錯安見傑構必如常山之蛇一擊應首砥柱之浪九派通膺不有精思固難望乎極詣矣若其參伍錯綜譎鴻紛或孕奇於至夷之中或耀明於極幽之表究厥濫觴涓涓而已尾閭旣洩澎湃乎無垠

至於鉅補造化意窮天人愚者視之十不得一工倅不能喻其巧離婁無以施其明微乎微乎非至精者孰能與於斯乎

徐福論

慨自祖龍不綱鷄首是剪毀裂冠冕燔燒詩書納儒生於陷穽淪禮官於草莽子衿盡其薙草鄉校條焉土崩其間脫離鞶鞶之牙委迤虎狼之穴者則有博士伏生樂人竇公孔鮒開壁以納書叔孫識時而歸命類皆蟬蛻塵滓非朱絲之所撻鴻冥天羅雖弋人而何篡若夫濫吹方士之中智免瀛海之外目笑田橫之島歸骨何方心睇角里之山采芝偕隱如徐福者可謂明哲保身飛遯之創局者已當六國之既滅覬萬世而無窮北築長城南連閩越刻石鄒嶧之嶺伐樹洞庭之顛愬恆榦之不老惟神僊之是慕但使揆張佺偃祓飾松喬無不榮列屬車俯視圭紱福以爲徑直不可以全身也故迂怪以取容欺誑不可以久持也故天矯以離世賤秦氏之山川已無淨土得桑田於滄海卽是仙鄉卯髻之童男多於劉安之雞犬垂髻之童女勝於劉綱

之夫婦不減華胥之壤頽陋菟裘之營何其龍躍鳳翥踔厲霄漢者歟所惜者輻輳晏駕金刀握符元二之命既蘇陽九之運潛轉計始皇沙邱之歲訖高祖櫪陽之年代未甚繇福當尙在不以是時隨尉佗而歸漢先呼韓而入朝占海水之波驗青雲之律遂通使命俾正首邱長爲蠻夷之人不習中夏之化犬羊之與處而蛙黽之與居此則福之短也

譙周論

自古忠臣烈士雖當其君危急萬狀之時必委曲圖全苟延歲月以待其後不得已則效命於社稷至死而不辭未有勸其君舉全國之圖籍拱手而授諸新勝之敵人猶自託於知命之士老成之謀罪大惡極如蜀之譙周者也當後主之世周已爲光祿大夫位亞九列矣其所傳諫疏僅止游觀一事耳不聞諫後主以親君子而遠小人也當鄧艾之入陰平後主使羣臣會議或欲奔吳或欲守南中七郡夫艾以孤軍深入糧食不繼而盈庭擾擾蜀可謂無人矣奔吳誠非計若其悉舉舟楫保守江州徵論南中乞師東國姜維一

軍亦由廣漢間道入衛蜀都視田單復齊之勢有加焉乃周以兩世舊臣首勸降敵周之罪擢髮難數矣周嘗推杜羣之意以爲先主諱備備者具也後主諱禪禪者授也如言劉已具矣當授與人也其熒惑衆聽語鄙不經多此類吾知周之欲降魏固不待鄧艾之入而始決也且周果通曉術數則艾之入陰平彼當推驗而先知之何無一言貢於後主哉然則史稱其頗知天文者亦不過造誕妄之語陰行其攜貳之私耳使蜀無周猶未必亡也黃皓亂之於內譙周亂之於外則謂周之罪與皓同可也

書史記刺客傳後 其一

世言史公好奇故凡里巷間可驚可惜可悲可喜之事皆一一載之今觀其所爲刺客傳信矣雖然史公之爲是書蓋憂憤不得已之作焉傳言曹沫以下五人若專諸聶政事成而身殉之者也若豫讓荆軻事未成而亦身殉之者也惟曹沫以屢北之將要盟於立談之間魯地歸而身亦無恙此固其卓卓者故以之爲首然沫旣不能制勝於前而冒危難以劫當時之霸主其幸

而得全天也此何足以傳者沫且不足傳而况其下者乎然則史公之傳之何也曰史公以言李陵事得罪自陷蠶室而陵臣僕於虜曾不能學曹沫之所爲登單于之庭而搢其胸以雪其敗軍之恥上負漢廷下負史公公之爲刺客傳意在斯乎且公嘗傳貨殖傳游俠矣識者曰漢法肉刑當贖公怨夫家貧而不足以贖而友朋中又無疏財仗義如朱家郭解其人者故於二傳三致意焉其贊刺客傳以爲皎然不欺其志豈不憾李陵之不能爲曹沫諸人哉嗚呼史公之書未有無爲言之者也而後之人以爲詬病何其謬哉

書史記刺客傳後

其二

匹夫而擅殺人大罪也一言而以身許之此天下之亂民也三代之時烏有所謂刺客者哉故刺客者衰世之事也史遷爲刺客傳列曹沫以下五人五人中惟沫爲近義耳然沫以屢北之將於敦槃之會而抵死以刼萬乘之君雖能成功亦危已哉他若專諸之刺吳僚助其主而賊君者也豫讓之刺襄子已爲方正學所譏聶政有烈士之風而暴骸都市荆卿有壯士之慨而坐

斃秦庭不過其事可驚可愕里巷傳之後世稱之耳蓋世衰政亂而人多蓄忿于是刺客興焉雖以留侯之智博浪一擲猶效荆卿之所爲幸逢地上老人折其少年剛銳之氣而卒爲王者師漢興以來風沿戰國高祖柏人之役條侯七國之師其時跋扈強藩陰養死士以備緩急視史所著刺客五人相去遠矣史公此傳首以曹沫以見爲人臣而能洗其屢敗之辱以返君之侵地者刺客猶能之而不爲刺客者何如耶

化兵爲農之預備

吾讀章君行嚴之言曰邇來論政之士每好指摘人身而不根求治法尸視西憲自忘本來此誠治道之隱憂而愚所爲不敢苟同旁皇無己者也嗚呼何其言之悲而婉也其結論曰一言蔽之吾爲農國不能妄採工業國之制度今圖改革請從農始章君遊歷歐美考察多年而所以貢獻於國人者乃惟此重農政策此其易於炫人以自炫而趨於歸真返朴之一途者固有至理存焉耳

夫今日吾國之危機在乎兵多已成中外輿論自華府會議以限制軍備爲目標彼英美各國平時養兵甚少然戰時出兵皆數百萬人戰事畢則其所裁者復故額而止彼誠各有所業故聚則爲兵而散則復爲農工商若吾國之兵則其所招募者皆素無恆業之遊民恃尺籍以博升斗之食一旦給資遣散其習於不耕而食不織而衣也已久不啻放百萬虎狼於民間矣故非先化去兵之性質而歸諸於農或工則裁兵二字仍非根本解決之辦法也然則聽其爲兵而養之可乎曰惡乎可使仍今日之兵額而財政足以濟之猶可言也乃者國債已欠至二十七萬萬以上已不自裁必有他人爲我裁之者他人不直接爲吾裁之必有間接迫我以不得不裁者夫中央政府本賴各省以爲生譬如手足之扞頭目也今以外省兵餉之不足乃截留中央稅源以自活猶不足則濫發紙幣拍賣官產預徵錢糧以苟且敷衍於目前試一按從前所爲富庶之區無一省不舉債卽無一省不破產者此種危象真所謂盲人騎瞎馬夜半臨深池也軍事當局其能忍而與之終古乎

今縱不能復兵農合一之制然使兵與農之間先爲過渡則莫若古之屯田爲宜遠者若漢之趙充國晉之羊祜陸抗唐之郭子儀莫不寓兵於農以耕爲守近者若左宗棠之於新疆周盛傳之於新農鎮皆有成法可師棄槍械之利而習耰鋤之勞變獷悍爲樸淳洗囂張爲馴順其利一也習隴畝之甘苦知稼穡之艱難與民狎處則無陵壓之風有家可歸則知生成之樂其利二也穀價日貴副產日多耕者之所穫視額餉之所入爲贏或且願去兵籍而附於南畝無裁兵之名而有裁兵之實其利三也兵餉月僅六元五角生活程度益高則兵之視之幾與向之綠營相等若由今之道而不爲之所兵所入之款尙不及一勞工雖不欠餉且岌岌不能自贍而况乎積欠累累將由中央而波及各省萬方一概險象環生乎

是故今之高級軍官明知此局之不可以久如馮軍之於南苑閻督之於山西盧督理之於浙江或提倡工場或開通道路蘇常鎮守使朱君則爲織布皮革籐器諸工廠且率部下種蔬菜濬溝渠入其壘者無不感歎稱美朱君

告余以種蔬一部言之每一卒月可得菜銀八角統計全部歲計二三萬元以上凡此所爲皆能預爲之地以達其愛兵愛民之實心者也夫化兵爲工利用其訓練之餘閒以爲習勤之補助意固美矣顧尙不如化兵爲農者亦以吾爲農國二千年前之歷史兵農本不能分而又有歷代屯墾之史事足以供我之參考者不少也

國語淺說

民國十一年四月廿日
國語月刊第一卷三期

做父母的因爲對於子女十分憐愛凡是我們從前多走的冤枉路總教他們少走一點是一點譬如從前走二點鐘方才能夠走到如今只要走一點鐘就能夠走到那麼在同樣的時間以內所走的路程可以加到一倍難道不是最可喜的事情嗎以上這個比喻就是教育部訓令從九年秋季起把國民學校一二年級的國文改做國語的比喻

我是做慣了文言文的覺得把文言文改作白話文不如逕直做國文的容易但是一個人不應該把我自己做本位應該把全國的小孩子做本位假

如我現在仍舊是一個五六歲的小孩子一個字不認識那麼還是請先生教給我白話文有興味呢還是教給我文言文有興味呢自然一定是白話文好多了不過做先生的本來能夠做很好的文言文我們偏偏要逼着他做國語文使他倒反覺得有些困難我們要知道這種困難不過是暫時的只要鼓着勇氣去做自然有一天可以把這種困難免除且試試看我料到再隔幾年國民學校的成績一定比從前大不相同總而言之從前的國文教人家越不懂越好現在的國語就要教人家越懂得越好孔子說辭達而已矣這就是國語教育的精神

至於這一般創造音標和提倡國語的人並不是沒有學問的人他們也會研究過本國文字的源流和音韻沿革而且對於東西各國的文法都也會做過一番工夫所以才能夠見得到說得出讀者諸君有志研究國語的我現在介紹這國語月刊給你們就等於介紹許多精通國語的朋友給你們大戴禮保保其身體傳傳之德義師導之教訓與近世各國學校體育

今之規國勢者必推本於民力民德民智之進退以爲強弱之差而求三者之日進無疆則必由教育始體育以強民力德育以助民德智育以潛民智此東西各國教育家之公言也何其與言聖人之言若合符節乎中庸之達德曰智曰仁曰勇智育者知之事也德育者仁之事也體育者勇之事也懸三達德以爲鵠而令一國之民盡納于其中一道德同風俗父兄之所詔勉師長之所命提胥於是兢兢焉無中外無古今未有不以教育爲重者也大者自王子以下入學與齊民齒故雖東宮之官有保傅師以尊諭教之職其爲學程則無殊大戴禮保傅篇曰保保之身體傅傅之德義師導之教訓其分職任事隱與體育德育智育之義類相同至善所歸歸於一軌事不必相師而其理固然無可易也卽如周官六藝之綱以今例之射御純乎體育禮樂純乎德育書數純乎智育自國學鄉學以逮家塾黨庠先魯通以植其本後專門以致其精計當時必有編定之書條分而縷晰者其大略雖見于二

戴之記而其詳不可得聞自周之衰學官失職不獨民力民德民智之日退即保傅師之輔導君上者亦不能舉其官漢唐以後科目取人歧學校貢舉而二之士大夫溺於聲律對偶之學累千餘年其敝也衛生之不講體既羸矣公理之不明德日偷矣科學之不講智亦窒矣苟不采各國學校之長以復三代盛時之意何以自立於萬國間哉普之勝法也其相歸功於小學校之教師日本蕞爾小邦自講求學制三十年遂抗衡泰西諸國是故興國之事萬端而學校爲之鈐轄教育之事不一而三者爲其精神國家殫心學事不厭求詳而州郡偏隅猶未能普及即有之而於體育德育二門或闕焉不講即其所謂智育者無以棄舊染而獲新知竊聞日本明治之初專設師範學校以造就小學教員後令每一學區必設一小學校因體育之缺也文部省設體操傳習所因德育之衰也頒發小學教員須知使明忠孝信義其餘關於智育之事如格致化學等無不重實驗而思改良彼固上下一心要亦無科舉以撓其中故收效尤易耳竊爲今日學校計當仿日本之意分省爲

若干區區設若干學學必設師範一科專其途重其事以尙武爲主則人人有勝兵之材以善俗爲先則人人有愛國之志而又講求名數質力諸學以恢實業而息嗷言凡足以阻害其學務者無不去焉凡足以獎勵學業者無不爲焉則學校其蒸蒸日上也夫

漢武帝造白金爲幣分爲三品當錢多少各有定直其後白金漸賤錢

制亦屢更竟未通行宜用何術整齊之策

特科首編稿

錢幣之說言人人殊往往挾萬乘之尊加雷霆之威而不能操其輕重及其敝也設法以救之而敝且益滋此豈徒民之不信已哉蓋亦有公例存焉漢武帝以國用匱乏而少府多銀錫造白金三品其一重八兩而龍文者直三千其二差小而馬文者直五百其後復小而龜文者直三百其後白金漸賤而三銖五銖錢法屢更而徒紛擾白金民弗寶用終廢不行雖以令禁之無益夫三品之幣其所耗銀錫與鑪炭之貲必不能如其所直固也然使武帝定幣之時少府金錢果如所出之幣之數則雖方寸之楮民且信之而況其

爲白金乎哉惟其本無母財而爲幣以籠天下之利幣卽降值而與之爲比抑銀之爲幣唐始行於交廣之間終漢之世銀不爲幣以金銀本位之說例之兩無所居直銅本位已耳銀既不爲幣則三品白金僅後世銅鈔之比銅爲主而三品爲寶錢法旣殺亂矣三品復何所附麗乎宋孝宗以內帑易楮幣藏於內庫一時楮幣貴於黃金金元行寶鈔明亦用之其敝也挾千萬之鈔而僅直一二錢故鈔幣之與金銀以虛實相權乃可通行無滯苟不相當必窒礙而難行此計學家之定例也誠欲整齊之所出之幣縣官按其錢直隨時收還而納稅輸租與見錢同價則雖欲民之賤之而不可得矣或曰武帝因貧故而造幣今償以見錢則無裒于貧不知千萬之財以千萬之幣輔之則千萬卽得二千萬之用如武帝所爲則千萬者可降而爲什伯夫果孰爲利而孰爲害者竊聞日本明治十餘年大藏省僅存紙幣金銀正貨絕迹市場自松方正義爲大藏卿獎勵出口創辦銀行八年之間紙幣漸銷金銀倍積生產日進利息降低然後知理財之道消息至微非桑孔朘削之徒所

能見及也皇上特派重臣考求財政臣以爲今所尤急者在統一銀幣之制令各省不得私自重輕宜由戶部頒定章程民藏生銀者許其報官更鑄予以利益定銀幣爲若干等子母相權普鑄銅圓期于各行省畫一而後已復立國家銀行于京師凡各行省銀行皆隸焉凡殷實之錢商則皆驗其資本以爲國立銀行焉然後視資本之多少配以紙幣資本十而紙幣五之則周流不滯大信咸昭頒預算決算之表以防濫費之源檢入口出口之數以察盛衰之故推廣生利之路減少分利之人庶幾轉貧弱而爲富強也至于仿行金鎊則需蓄積生金當今之時尚無此力此臣所未敢率陳者已

周禮農工商諸政各有專官論

特科次
揚稿

三代以上君師之權合一教之以學而官之以材是以庶司之職各有專門或世其官或氏其業誠以治天下至纖至悉也分功愈詳則有以致精而無旁鶩其學之有成者則官之學尤邃者則官尤崇焉故官與司異名而同實觀夫孔子云天子失官學在四夷而漢班固之述九流尙謂某家者流出于

某官是可以知其故矣古之官制莫詳于周禮一書往往所屬之官卽責以教民之事大司徒之辨土宜司稼之辨穀種遂人遂大夫之簡稼器草人之掌土化稻人之修水利非深于農學者而能之乎考工記謂百工之事皆聖人之作金木諸工以興製造梓匠諸職以司工程倨句之形必明夫弧算凍染之用實肇夫化學至於一官之掌文字別其名詞一器之微分析及于毫忽非深于工學者而能之乎司市掌市之治教政刑量度禁令民貨不售則歛買之民無貨則賒貰之而又禁其僞飾平其刑罰凡夫量度質劑凌雜委瑣者無不治焉非深於商學者而能之乎惟有專官乃有專學管仲治齊令農工商各爲一鄉其言曰少而習焉其心安焉不見異物而遷焉其得周官之遺意者與雖然周之時封建之世也王畿不過千里而諸侯又分治其疆轄境小故察屬也周分職繁故舉事也易自漢以後司農將作水衡諸職祇爲天子之備員卽諠辟代興不過加意于力田一事至通商惠工之政幾以爲微末而不足觀其亦戾于周官之意矣今夫天之所生地之所長農出之

工成之商通之古今之通理也政之要在理財財之原在生利而非重其事專其官則不足以更新而去舊夫今之戶工二部固農工所隸也顧以文牘過繁又無專官以分其責遂不暇及於民事謂宜于戶工二部多設專司略如日本農科工科之目又別設商部以保利權卽就各部之中設專門之學派大臣監督之選農工學成者教習之又于各行省遍設實業學校俾就專科數年之後農產日多工業日精商聯日起雖富甲五洲可也孟子曰無政事則財用不足安有政事既修而猶貧之足患哉

桓寬言外國之物內流而利不外泄則國用饒民用給今欲異物內流

而利不外泄其道何由策

特科次
編稿

易言神農爲市聚天下之民致天下之貨交易而退各得其所凡善言商學者舉無以易之西人言兩國通商有兩利而無獨利非所謂各得其所者耶然則閉關絕市之說不行於文明之世也久矣漢桓寬鹽鐵論力耕篇言外國之物內流而利不外泄則國用饒民用給大意以匈奴與漢互市用漢一

端之縵易匈奴累金之物爲詞蓋匈奴貪漢繒帛而漢亦得其橐駝駿馬之用是亦所謂交易而退各得其所者矣蓋一國之中因其地方人功所限勢不得盡物而備之如英之曼支斯忒專業紡紗織布法之來恩專造絲貨德之波希米專造五色玻璃瑞士之專造金練表苟易其俗則不能良交相爲市厥利維均自夫公理不明以通商爲大蠹雖賢智者或不免焉彼以爲異物內流則利必外泄不知國與國相市彼以其物來亦必以我物往然後贏厚而轉移速商賈之道類然海通以來數十年而關稅入款遂爲度支大宗豈非其明效哉英儒斯密亞丹謂通商之利有二一曰出有餘一曰補不足夫一國地方人功之所產而至于有餘者物雖供而莫之求也故有餘則無利通商者致有餘之產於方求之國而鬻其最貴也物有其不足者有求而莫之供也故不足則生鬱而事或不周通商者致他所易供之貨以濟吾土所不足而買其最廉也今以桓寬之言例之凡異物內流必吾所不足而買其最廉者耳則彼之攜我物以外出者必吾所有餘而鬻其最貴者耳夫如

是又何憂利之外泄乎雖然一國貧富之差卽視其入口出口之較率出浮于入者富入浮于出者貧出入相抵者爲平欲增出口之貨惟有獎農業勸工藝保商業以開其源仿造洋貨抵制外物以節其流以吾華之地大物博而出口者有生貨而無熟貨則民智不開爲之也嘗以戶口之率計之其游惰不事事者殆不啻百兆苟能開其智盡其力假一日之中人加十錢之入則一日而贏錢千兆矣積日成歲其爲利豈有涯涘況以機器代人力所得猶不止此哉若夫洋貨固我之所求而彼之所供也我之求之者旣以仿造而日稀彼之供我者亦以滯銷而自退日本區區三島尙以工商進步歐人至謂爲東方之英國我國有四百餘兆之人民擁廿六萬種之物產苟能用之何不饒不給之有哉

心太平室集卷六

心太平室集卷七

吳縣 張一慶 仲仁

蓮幕集

擬復成都將軍綽 哈布

珪月圓時朵雲飛下敬譙勝亭仁兄世大人
蜺旌弭節虎帳籌邊遙企樽輝
適符藻頌承示打箭爐鈔電各節英藏交涉頗費綢繆英人乘俄日之爭遂
思染指藏番愚蠢邊備空虛西南藩籬關係重大各國狡焉思啓噴有煩言
執事韜略素嫻機牙四應必有嘉謨入告以紓朝廷西顧之憂此間公私順
平堪紓廛系

擬復總理學務處嚴京卿 倅

津門接席暢挹高談頃荷惠函重勞存注敬譙興居迪吉橫舍騰權式符臆
祝弟承乏北門力小任重古之開府往往訪求耆俊妙選英才況時事方殷
探本窮源首在國民教育執事此邦領袖惠然肯來固由大義所難辭抑亦

鄙人之榮幸鄭子皮有言虎帥以聽誰敢犯子請爲台端誦之其有當興當革但使利重害輕必有以安孔子思之身無慮掣宓不齊之肘也尙祈壹意主持毋施謙抑碩軀平復堪慰遠懷法政速成科議有就緒東渡之期計當不遠此項官紳須根柢素深方收事半功倍之效高見諒亦同之

擬復倉場侍郎桂

春

欣奉華函備承琢節藉騰月亭仁兄大人籌先入政節勵九秋遙企澄暉式符頌臆弟愧膺重任罕補時艱每考中外轉弱爲強之原端由教育冀藉此日滋培之效徵他年心德之同莊誦來楸諄諄以教心爲勸儒家教善兵家練心一以貫之弟不敏亦嘗致意於斯曾囑學務處編成國民必讀一書印發各學堂軍隊分投演講冀使耳濡目染漸能衆志成城以定教育之宗旨茲呈數冊以備觀覽并乞鑒正是幸

擬復美國進士李佳白

兩奉惠函以貴門人所譯百科全書重煩誦讀缺然久不報甚以爲歉藉謹

道履康彊禮堂踰濟溥文明於九夏聯歐亞爲一家先生之志可謂篤矣承
示范生所譯之書祇因煌煌巨冊校閱需用是稽遲裁答頗聞日本原書
首尾完善今茲出版似是西瓜東鱗但用力之勤不可湮沒旣蒙諄囑當飭
省中學務處考核施行俟有覆文再當布達殷拳盛意緬佩奚如

擬復署理山東濟南府長山縣曹

開

昨奉惠書並鈔稿圖片藉悉賢勞赫著富教兼籌欣賞之忱匪言可喻長山
近傍鐵路膠濟一帶刻已自闢商場交涉日繁剛柔皆困持平辦理所賴折
衝樽俎之才周村一隅地耳然百貨輻輳都市殷闐必爲商業之中心點執
事雖牛刀小試處斯繁劇百里侯固大有可爲也說帖據理與爭遂使彼都
人士降心相從可見公道自在人心無分中外惟能者方展其長耳

擬復調奉候補道錢

鑄

昨奉惠書具悉種切奉省兵燹之餘正資教養執事兼財政學務而綜理之
賢勞可念戰事漸平貿易當見興旺雖元氣未能遽復苟客貨源源不絕亦

於餉項有裨西人以戰爭爲文明之母天津自庚子以後學務轉較他省爲盛蓋士民創鉅痛深幡然易慮迎機而導正在此時大箸小學模範一書驪珠已得但須養成師範以免乏才之歎執事神識開朗無怪當道之爭迎新任將軍趙次帥一時人傑必能相得益彰敬事賢者勉勸光彩大川舟楫正賴長才

擬復前布政使王

廉

頃奉賜函猥以課更改章欲謝安定治事之齋續永叔歸田之錄惟執事神州耆舊魯殿靈光新進後生正資矜式雖章程不無改易仍須有老成碩望坐鎮其間若一旦奮袂言旋則于繫維賢者之初心殊多悚歎尙祈暫留講席統攝庶僚俾得入坐春風振浮式靡庶公門桃李勿悵臨歧鄴下田園未容招隱敢詠白駒之什毋闕金玉之音

擬復順天學政陸

寶忠

幽草成陰文茵遒暑敬維冰壺懸鑑玉尺持衡載誦華楸式符藻頌畿東北

各屬蒙執事莅堂考察合科舉於學校之申蔚起人文定堪操券承示堂中注重西文致中文功課鬆懈此自近時通病定章高等初等小學堂無庸更習洋文本爲慎防流弊尊函所指想是中學遵永承宣等屬文風本陋當時考取入學者非由小學遞升根柢未堅深虞凌躐已違飭各屬注重國文以冀挽回積習宣府王守殫心學務漢廷二千石稱職者加秩褒勉不易其位經爲奏請賞給二品頂戴業蒙俞允足以鼓勵賢能矣赤城周令旣著政聲當令留署一年以慰士民借寇之願畿南文物較勝邊方翹企高軒曷勝軫念

擬復山東吳藩司

廷斌

昨奉華楡備承藻飾藉譜經營財政功效昭然自各省爭鑄銅圓互相撓越盈餘所在勢不能不謀自保之方但以堂堂大國幣制淆雜競劃鴻溝貽笑外人終非長策尊論欲改鑄金鎊以救錢荒自是老謀深算但平時旣未儲生金遽難措辦姑思其次則惟有以銀元爲本位而銅元爲之子款式價值

均歸畫一任其流通無此羸彼絀之弊此亦不過小小補苴耳至正本清源則須有國立銀行以平市價須鑒定平色以杜市僧之欺須大收生銀官爲更鑄而不利其值條目繁夥更僕難言亦非封疆所能集事執事綜核長才蓮帥倚如左右手移晉之說當係訛傳容將尊意達諸當事俾久於其任以裨大局正私衷所企望者也

擬復兩江總督李

興銳

快覩鶯遷尙疏燕賀迺荷蘭言於遠道適符葭溯之私衷敬諭且烏雍容援鞍矍鑠指金陵雙戟臨淮爲社稷而生陳丹戾六箴衛公是干城之寄翹磨吉藹曷罄揄忱姪畿疆坐鎮驚北地兮三秋海水羣飛仗南天之一柱邇來薊遼交涉頗費周章永定河工尙煩撫輯執事沅湘耆宿魯殿靈光尙祈度以金箴資爲寶筏聽鼓鞀之厲響聯笙磬以同音

擬復考察各國政治大臣端

方

月前接奉還雲祇以簡閱師徒久疏裁答甚歉甚歉執事捐貲興學理當風

示百僚迺復謙挹逾恆屬令勿邀獎敘高風讓德紉佩莫名子輿氏言分人以財謂之惠教人以善謂之忠爲天下得人者謂之仁執事爲天下得人宜其功高而心彌小也使星何日蒞津亟圖良覲河間之役中外觀者尙足鑿心數年來討論軍實差免詬病堪以仰紓愛廬耳

擬復代辦直隸留學生監督馬道

廷光

昨奉惠函以前派速成師範生不足充專科教習擬照湖北浙江等省辦法留習各種專科畿輔患少教員蓄艾三年誠爲急務業已行司議派籌訂章程至選派學生不如就自費生中因材施教旣慰遠遊之望亦無筭濫之虞蓋慮周詳自堪甄采應與另囑速成生改爲常期一節由司核復再聞現在本省自費生有四十二名之多風氣漸開咸知向學維持調護深賴長才

擬復農工商部溥尙書

昨修賀東諒達典籤適奉惠書過蒙飾序藉悉釐延卓午運翊昌辰握筭疇八政之樞拜槐陞五明之錫薰風解愠祝露傾忱弟久領封圻愧無建樹恢

張實業有志未能自外貨灌輸漏卮實甚幸大部設立以來挽回利權維持商政已收效於無形至劬農勸工事相聯屬得台端主持一切所以隱培元氣造福蒸黎者必有碩畫蓋籌提綱挈領尙祈周行示我俾有遵循是所至禱

擬復上海蓬路廣學會

李提摩大
莫安仁

昨荷惠函諸承飾序藉悉履約安豫馨鐸宣揚引企仁風莫名祝露某忝居政界無補時艱迺荷嗜痂不遺在遠遵寄照片一幅以副執事惓惓期望之心至尊箸大同報輸入文明視人如己定當紙貴洛陽至派銷各屬一節閱報係民人自由之權若以官力派銷似非善法高明之見諒荷鑒原

擬復日本南滿洲鐵道會社總裁後藤

新平

津門小駐縞帶聯權方謂款接有疏不足以安從者迺荷馳書辱謝愧不敢當來書盛稱兒玉大將之言以僕爲可與言事僕誠無似何足辱大將之知顧以閣下之推誠下交私幸我亞洲同文之邦歎若一家永踐盟好毋爲彼

碧眼兒所笑此僕所私心禱祝而刻不能忘者也滿洲鐵道關於國際交涉者至多來書謂商工細故睚眦末節貽累大體致傷兩國親善之和氣閣下之言及此豈惟敝國實圖賴之抑所以造東方之和平杜西人之口實者胥持此言益見閣下之明固有非尋常淺識所能窺測者敢不拜嘉承贈玉照一方英姿颯爽如對故人當什襲珍之以表閣下之厚愛臨穎神馳諸惟珍重

擬復劉 永慶 等同鄉京官公函

昨奉公函備承飾序藉譚升華日上履祉雲蒸臺省回翔鸞軒曷既承示豫學堂章程大致本南皮奏定之章實爲嚴密惟鄙見所及有不能不上備芻蕘者如教務齋務庶務三提調名目定章惟大學堂方有之豫學既爲中學以下程度似應遵中學堂教員管理員章酌量改定凡學堂層遞太多師生懸隔往往易起風波東西各國教育名家每以通上下之情爲宗旨況來學者皆同鄉故舊尤宜聯以性情至學堂基礎存乎教員要在精選通材足勝

師範總以出洋游學得有文憑者方爲上駟諸公熱心桑梓必有成竹在胸固無俟某之喋喋也學中經費計歲息結費並豫撫歲籌之款本生火食之費約常年收入已近萬金中州冠蓋如雲集腋成裘當非難事某擬捐萬金以爲外官倡雖無杜陵廣廈之力聊助文翁石室之需惟望鄉里後進互相琢磨以蔚國華而繼洛學此則回望嵩雲所日夕禱祝者耳

擬復江蘇巡撫陳

慶龍

昨荷惠函備承飾序藉悉鼎茵集祜帷幄宣猷曷勝歡忭蘇省創辦徵兵人知尙武以江南之文弱自不及江北之驍雄惟選將求才甚爲難得楊游擊任性誤事自慚薦舉非人劉錫鈞人尙樸實惜才亦不長耳承執事加以鞭策必應奮効馳驅弟閱歷多年不患無應募之兵而患無勝任之將江南陸帥學堂蘇州武備學堂開辦皆已有年想可識拔一二儲之夾袋也

擬復東文學社中島

裁之

昨奉損書承囑欲招李暉等五生就學貴國具見玉成才士造就生徒之至

意甚盛甚盛但敝國學部新章遊學諸生須核實考驗按期彙送長期就學者須有兩學堂以上畢業程度且通曉外國語文方爲及格否則須在本國補習今學社五生未經考驗與新章稍有不符且直隸官費學生現無缺額無憑貲遣重以誣諉容俟緩商然執事提攜獎掖之心固所感叙無既者也

擬復河南提學司孔

祥霖

前奉惠書正思裁富繼閱邸鈔敬悉榮膺簡命視學豫州化被梓鄉情殷藻頌汴省風氣蔽塞近以鐵路大通又爲外力所震士紳矍然思奮已有轉機得能者提倡而輔翼之使大河南北羣以國民教育爲事弭無窮之隱患復自古之中州學校如林惟公是賴某北門忝筮依舊薪勞所幸雨澤應時近畿安謐堪紓愛注

擬復日本大隈

重信

井上醫士來津攜手書出示具見殷殷垂念之意愧不敢當清秋涼爽政體健康欣慰無似井上氏本爲貴國同仁會員自能推濟人利物之心惠及鄰

國蒙執事紹介尤深感佩貴國文明發軔由醫學而來敝邦此術尙未發明得該氏倡導仁風實於開通智識之道有所裨益不獨衛生免病而已也東方和平之局已成義問仁聲震於歐美伯維新者碩曩贊居多尤令人仰企不置耳

擬復張季直殿撰

頃奉惠函並日本議會史等三種各二百部仰見提倡憲政嘉惠後學之苦心自明詔旣頒薄海臣民言嘯事雜某曾飭學習法政之員撰立憲綱要一冊顧卷頁簡略於彼中成立變更之故未暇臚列今得尊處編譯之日英二史本末俱備龜鑑昭然有裨於政學界者不尠已違將原書發交提學司並飭照價寄繳以副雅懷各國立憲之初必有英絕領袖者作爲學說倡導國民公夙學高才義無多讓鄙人不敏願爲前驅

擬復道員銜順天增貢生李

照

展誦瑤函備承藻飾責難之雅陳義之高所以期望鄙人者甚厚此積薪厝

火長沙所爲痛心改絃更張江都於焉扼腕者也鄙人受事以來兢兢夙夜
慨夫世變之日亟而苟且者之不可以爲治嘗欲掃除而廓清之然而地望
愈崇因應愈困言事者甚易而任事者甚難來函云云實已洞見癥結區區
苦心不避勞怨但深察事變之故有未可遽以操切相繩者昔曾文正手平
大難功蓋一世馮林一上抗議四十篇文正知其善而不能盡用今日時局
之艱百倍於當時鄙人之才又不敢望文正來書分析八條皆得要領自當
懸之心目參酌施行盛意殷拳良用緝佩濟南官報已遵囑札飭此間官報
局核復另檄以聞

擬復東邊道張

錫鑾

昨奉華函備承飾藻藉譎敦槃決勝鑪鼎生春引企巖疆莫名頌龔東方戰
爭未竣因應爲難固圉睦鄰深資蓋畫鳳城設學自是要圖由我發端則將
來學課升階俱歸一律且維繫人心隱培元氣主權所係消息甚微此事以
款項爲先而人材尤亟但使有略通教育之士相助爲理便可有成承詢天

津中學堂年需經費章程及學徒程度條目查畿輔各中學堂曾于前年奏定暫行章程繼奉到欽定新章又復遵改其中程度條目備載無遺今各檢寄一部以備甄采至經費一層津郡歲入三千金又制錢一千二百緡其餘各屬多寡不齊皆出自屬縣籌派者居多尊處創興學制情形不同先立規模徐圖完備亦抵制之一端也

擬復日本留學生監督馬道

廷亮

昨接惠函敬悉種切留學海軍學生王統既據該校長復稱成績必佳又經楊星使面加詢考堪以勝任海軍此項人才本形消乏該生于舉世不爲之際孤絃獨張自當改給官費以成其志卽祈傳知該生益加奮勉法政科官紳試期在卽俟該校考驗既畢亦希將成績表函遞前來藉覘勤惰仍乞隨時勸戒文行交修上爲祖國之光榮下顧一身之名譽或有英絕領袖之士出於其中是所厚望

擬復顧亞蘧編修

張

昨奉惠函并治秋尙書原書均悉天津大學堂經沈道攀畫精詳嗣因事南
行改委丁道代理丁道辦事素稱認真此次重訂章程悉遵京師奏定之文
分清權限本無不合惟其任事過勇立法太嚴或有不便於學生之處已囑
其徐事轉移不可操之過蹙自得治老函後曾託嚴範孫編修會同督辦梁
道備細查詢知教務提調羅惇勳業已回堂丁道亦並無意見反對破壞之
說恐係旁人煽惑之詞未可據爲典要若一經查辦轉啓學生輕視總辦之
心於敝處用人任事之權不無窒礙治老見事最明必能諒此苦衷以冀徐
圖補救乞轉達一切是幸

擬復山西巡撫恩

卷

昨荷惠書猥承宏獎藉悉籌邊著績望歲騰懼引企吉暉莫名頌悃弟忝膺
重寄彌愧榦材處槃根錯節之交懷履虎涉冰之懼祇以受恩深重未敢告
勞儻成效難期仍擬乞退以避賢路耳晉省礦務交涉鑄錯已成過與爭持
又失外人之信用但可於原約範圍以內略圖補救若溢出原約範圍之處

則寸步不能再讓自李生蹈海全省罷學梁恪思始思轉圜惟政府因賴輿論爲後援而民氣太張不可不防其暴動丁臬司爲民愛戴深賴維持刻正與英人磋商俟有頭緒再由部與英使接洽先此布復以紓廛注丁臬司事畢當遵囑飭其速歸也

擬致學部

昨接端大臣函稱各省遺派學生既少揀擇其自費者無奇不有且有一字不識貿然來學者非明定妥章不可似宜各省設遊學預備科使有完全普通始令出洋就學等情前奉大咨擬于天津武昌廣州江甯重慶合設學校爲遊學預備自是統籌全局之圖應請明定章程通咨各省不俟彼之限制而我自限制之庶幾通才輩出流弊毋滋不致受人以口實也至此次返校者確有二三千人除已回華者不計外不安分之徒祇有少數大勢業已平靖堪慰蓋懷

擬慰瞿中堂

稿

宦海波生石尤風起以傳巖之霖雨爲泰岱之閒雲在朝廷援責備賢者之
條放歸田里在執事本富貴浮雲之素養望江湖有溫公獨樂之園不驚寵
辱但謝傅東山之墅奚慰生靈雖鵬路以暫紆終鶴書之再召弟投身政界
蒿日時艱讀芝焚蕙歎之篇欷歔不絕感覆雨翻雲之局攻錯誰資敢問起
居藉鳴結轡

擬賀醇親王

載澤

昨閱邸鈔敬悉榮膺恩命入值樞垣伏維殿下河間崇儒東平樂善以親藩
肺腑爲帝室股肱際百度之更新作羣僚之儀式昔成周定鼎姬旦功高近
日本初元彰仁績偉幹旋危局驥企宏猷某久守封圻愧無建豎詠單心於
宥密莫分宵旰之憂勤欽夾輔於屏藩實效壤衢之懼忭

擬賀度支部尙書

載澤

頃閱邸鈔欣悉聖慈倚重榮掌度支欣賀不可言喻上年立憲詔下卽以清
釐財政爲言凡百事宜俱從此出以執事之公誠明達人望翕然一旦管領

財賦事宜益見聖明之知人善任顧吾國財政紛雜如牛毛繭絲著手清釐實非易事向者計臣宗旨多以節奢爲能鄙意今日時勢百廢待興若不從高處立關處行而徒斤斤於肢體之間終歸無濟日本明治之初其困難甚於我之今日松方氏出而轉貧爲富遂得要領願執事效松方之所爲參以吾國之情勢先其大者遠者而毋務其小者近者使內外寬然有所振作大局幸甚辱叨摯愛敢貢其區區之誠專泐申賀

擬致貝子

載振

昨閱邸鈔敬悉拜疏辭官急流勇退溫綸嘉許誠格天心雖時事艱難非賢者潔身之日而聖恩高厚正親臣養望之時從此東閣招賢南陔舒嘯暫享林泉之福玉韞珠藏終爲磐石之宗龍騰鳳舉深宮襲其讓德薄海引爲美談某蒼幸同岑葭常倚玉願爲蒼生而再起爰憑丹牘以據誠

擬致兵部侍郎徐

世昌

畿輔興學以來惟天津一隅最有起色推原其故在造就師範廣設小學教

不躡等師有專長本原既清趨向自正京師爲首善之地歷經官立順天五城中學堂惟少小學堂爲之基礎良由事權不一籌款艱難弟忝任曁寄近畿重地亦在統轄之中自當協力同心不分畛域已與嚴範孫京卿商定設初等小學於京師並函致李幼雲京兆照料所需經費由敝處設法籌撥執事梓桑重望範孫學務名家惟祈遇事主持並熟商期衷至當將來相機推廣使鴻都講誦學校如林爲天下倡知大君子必樂觀其成也

擬致河南巡撫陳

奏電

初夏清和陽春布濩遙瞻檠戟無任軒輦敝省地處腹心錮蔽甚於他省統計在東留學者全省僅十九人大半由他省派往自費者寥落如晨星將來鐵道開通門戶洞啓長此閉塞後慮方長頃接河南留學生函稱拯救之方宜一面派人出洋學習實業專門以備他日自闢利源一面派人學習速成師範使其歸教鄉人計每縣派二三人歲費無幾地方雖貧不難辦此一縣有數人曾經留學風氣不慮不開擬求仿照直隸各縣措解師範辦法籌款

派人等情囑爲函懇前來察閱該生等所稟自是要圖欣逢執事建節是邦
登高一呼衆山皆應用敢據情代籲乞台端核辦施行造福中州靡有既極
不勝企感

擬致襄辦練兵大臣鐵

頁

東西各國自強之本在使人人知國家與國民之關係有一無二非忠君愛
國萬不能全身保家是以衆志成城如手足之扞頭目其教育宗旨亦在乎
此兄忝膺重寄勞心焦思惟夫鍛鍊國民必有以作其忠義之心乃足圖存
而禦侮因令學務處撰定國民必讀一書使各堂學生暨各隊兵丁人手一
編家諭戶曉冀養成國民資格以自立於驚風駭浪之中執事憂國忘家必
有同見茲奉上五千部卽請會銜轉給京旗各兵丁以資講演或於明恥教
戰之方不無小補耳

擬致駐日留學監督丁道

惟魯

昨據直隸同鄉會邢生之襄等函稟以直隸舉行地方自治僅從天津辦起

意有未慊請推行全省等情具見諸生殷殷桑梓之懷惟於當局苦心未能相諒鄙人所以由津試辦者非厚於此而薄於彼也蓋地方自治須割官權之一小部份以付諸紳而官則性喜專斷懼侵其固有之權紳則跡近要求易借爲抵抗之徑其原因則皆由素無學識假公濟私官紳程度維均無庸偏諱若全省同時舉辦設有衝突全局俱隳惟擇一二處慎選良吏賢紳厚集其力以爲模範期以三年或可普及此正爲愛惜良法非有所緩急先後於其間該生等望治之切固所願聞而稟函又不便批示請傳知直隸同鄉會共喻此意囑其發憤爲學以備回國任事之選並使父老子弟共知之

擬函致正定包主教

備略嘉獎

前以貴堂女工藝廠規則精良特派考工廠提調周牧家鼎等查看仿辦茲據回述情形繕呈圖摺並荷慨贈女工成績欣慰莫名貴教會本愛人如己之懷作教善分財之舉苦心毅力遐邇同欽然非閣下愷惻慈祥安能增貴國之光榮進吾民之幸福如是耶某忝在疆寄欣逢貴主教實心任事沾漑

一方正擬仿照改良以廣執事無窮之仁術中心好之何日忘之合籍燕函以申謝悃

擬致學務處嚴編修

日前文旌枉顧忽忽未盡所懷敬維道履鵠酥適符臆祝昨據駐日使館楊京卿函稱日本各學校除宏文外向無特開速成師範班者以致學舍不敷衛生有礙且教授之法無可比較高下難分因與岸本學士商定於經緯學堂中另設速成師範班其教授之法較宏文有過之無不及若不逾六十人之額祇須交開辦費一次續派來學換回畢業生此項無須另交三年後始酌交修補費若干以二百元爲度至講習室之軒爽寄宿舍之潔淨均勝宏文現擬將尊處及他省新派師範學生送入該堂肄業嗣後添派仍可分送該堂等情查前據使館寄到經緯學堂章程業經移行尊處諒在鑒中茲據前函理合布聞惟希查照爲荷

擬致駐日本楊大臣

福

月前接奉回電知黎君淵係四川官費未易禮羅不勝悵惘惟敵省現擬專設政治法津學堂於天津發端宏大非專攻政法卓著熱心者一切課程規制無從下手商諸嚴範孫京卿謂必黎君暨湖南范君源濂聯袂偕來方可大舉范君於湖南學界極力提倡功效已成畿輔興學之端尤關重要想賢者或不我遐棄也除託嚴京卿手書勸駕外祈台端代致拳拳務使兩君惠然肯來以成中國前途之盛舉不獨鄙人與有榮施而已至黎君四川官費當由直省籌還一俟復允後卽電告錫清帥時局日亟人才至難載詠白駒欽遲曷已

擬復三品卿銜

學部一等 路維 官張

輦轂七旬波瀾四起乃承寓書存問感何可言此次朝廷宣布立憲釐定官制俱由兩宮聖明毅然獨斷某不敏豈敢貪天之力以爲己功而執事乃以大久保相期惶愧惶愧方今世變之亟任事之艱如運百斛舟於驚風駭浪之中而欲其誕登彼岸行百里者半九十豈不信然但天時人事相逼而來

得英絕領袖之才如執事者鼓吹羣倫隱然爲輿論之母萬流仰鏡喁喁向風蓋諸君子之熱誠毅力使然當軸者祇從而利導之豈曰能賢此後來日大難百端待理尙祈讜論嘉言勤攻吾闕是所願聞

擬復度支部尙書

載澤

京華聯襟諸荷關垂公誼私情相見恨晚昨荷手示敬承起居曼福宿衛宣勤一德格天殊令人五體投地也京朝官制誠如尊諭所謂性質全失基礎不堅某曾擬遵二十日諭旨體察情形隨時修改之意設法補救大致欲合軍機于政務處以復閣議附編制統計兩局于該處以重事權商諸育周菊人兩尙書俱以從緩爲宜緣是暫不饒舌至外官之議上意注重州縣造屋者自平地築起睿慮本極周詳而非將層遞管轄之官簡其等級則亦無以達硃諭注重州縣之本心現在外省復電未齊似應俟鄂甘等處來電後再由卓裁抉擇某回津後清釐積牘苦不得閑公通識熱心誼無多讓苟有一得必當罄竭愚誠以副下問恃有公在固無慮阻力之多耳臨穎神馳諸惟

珍攝

擬復直隸提督馬宮保

玉鳳

昨奉惠書祇悉壹是貴營擬設學堂改練警隊鴻猷碩畫欽佩良深查此案前准部咨綠營改練巡警當飭警務處妥協籌議旋據該處稟請通飭各鎮協派送官弁至省考選百人歸保定所設巡警學堂教練一年其綠營兵丁擬由各鎮協按警務處稟定傳習所章程自行教練業經批飭通行尊處如需采擇可飭該處鈔呈辦法章程請核或將內地各鎮協歸保定教練邊關各綠營由台端就近教練悉候卓裁定奪來示俟學堂開辦二三年後將已受教育之制兵編爲獨力警隊以保衛邊牆內外自是老謀深算至併入各州縣巡警恐各該地方警務尙在幼稚未便與各營鎮歸併辦理致難調和當俟地方巡警逐漸改良方能合轍高見想亦同之又尊意選派畢業生一名充當教習查警務科目甚多一人是否敷用天津所設巡警學堂畢業者尙不乏人如有調用之處當聽候復音再行飭選也

擬復岑宮保

香燭

笙磬同音旌磨在望前聞養疴滬上
符私祝弟封圻虛擁建樹多疏慨吐
識略匡時耿耿私衷相依蛩駘會聞
望兼而有之蜀雖邊遠士馬稱雄八
煥新猷必有爲各省示之模範者惟
珍衛

擬復岑宮保

香燭

高君來津齋到惠書並荷寵錫多珍
材幹歷年竭力經營犯羣疑而不避
心乃崇獎逾恆益滋惶愧蓋舍本相
量欲爲朝廷建長治久安之計去年
制迺羣言蠶起熒惑萬端出都以本

日時艱靡知所措適聞峴旌北上聖眷方隆吾道不孤令人神旺至郵傳事宜弟向因兼差過多實未能有所整頓迺承虛懷下問愧無以質高明執事砥柱中流事關全局鴻猷碩畫當更有大於此者弟德薄能鮮公既推心置腹敢不效肺腑之誠倘不棄芻蕘時通音訊幸何如之北洋公所空屋居多如尊處有需用之時儘可應命並無周折也

擬復天津道毛

慶藩

昨奉惠書所以代爲謀者至深且遠非執事相愛之篤安得聞此肺腑之言銘感何極某任事以來慟時事之日艱與國權之浸替自維受恩深重不敢效蹈常習故者之所爲徒以張皇補苴無益於治因欲求根本大計爲朝廷建萬世不拔之基德薄能鮮胥動浮言是用辭去各項兼差以明其遠於權勢蓋功名之際處置甚難以曾文正蓋世鴻勛猶時以盛滿爲慮某獨何人敢忘此義顧列國競爭一日千里深恐從容雅步噬臍無及耳以執事之明必更有所以進我者願不吝金玉爲幸

擬復王前藩司

原

頃奉大楸敬悉驪駒在門歸歎已賦繁維無術祇益慚惶鐘鼎山林不分軒
輅昔南州高士徐孺貴於三公東海獨行鍾離式於九牧矧執事歸田著錄
藏書滿家獨抱遺經嘉惠後學靈光殿峙湖海樓高雅俗之所同欽頌懦聞
而思起某本擬屈留几杖籍鎮浮囂惟思長者謝遠遊之冠賦遂初之句區
區芻秣不足以瀾高賢回望德星可勝爰繫

擬復山東巡撫楊

士驥

河間肄武粗具軍容中外推崇已知非分迺蒙揆張宏藻脗飾奇葩比以基
亭比谷之奇觀不過大輅椎輪之具體祇滋慚作奚當掄揚自軍國主義風
靡全球武裝平和星羅環海公法非禦人之具鐵血爲經國之謀某自握兵
符常持此旨願羽毛未滿形式徒存對內則似高於瀟上棘門對外則難望
于大山兒玉良由軍隊精神先在國民教育以故羽林投戈而論道虎賁畫
地而成圖下至汪錡童年小戎女子莫不心存敵愾志在同仇以此視彼瞠

乎後矣執事鎮撫三齊講求七德作京畿之左輔擁士馬之雄圖所期宏此遠謨如驂之靳越句踐之十年教訓晉悼公之三駕馳驅各紆壯猷以挽積弱精衛填海魯陽揮戈有志竟成交相助勉而已

擬復學部

接奉惠函祇悉一是惟新祺迪吉定叶頌忱南學奏改成均學堂造就師範爲四方觀聽所繫具見提綱挈領樹之風聲曷勝額手北洋師範學堂雖地址已定而常年經費尙無的款可籌原擬提用銀元局餘利自限制鼓鑄銷數又復日絀此項已不可恃擬按自費辦法用款無多年來辦理新政歲出浩繁東挪西移只可爲得步進步之計三年蓄艾時不再來而艱窘情形往往捉襟見肘尊處提倡學風理應協濟但心長力短如何如何敢布腹心諒蒙涵宥

擬復孟侍讀

慶榮

去臘接奉手書敬悉供職京華總持宗學望實並茂忭頌奚如師範學堂教

務長一席繼起無人尊意羅張兩監督可以兼攝自當遵辦暫虛此座亦寧
闕毋濫之一端也

擬復陸都憲

賈忠

昨奉手函諸承指教藉譎豸冠建績烏府姚聲仰企喬雲適符祝露承示畿
輔各學堂不免有空文寒賁名實相違之處洵屬至言學生良楛不齊地方
官虛與委蛇尤成積習推原其故皆由人材缺乏師範寂寥各守令不知講
求希圖無事當遵飭益加注意以弭隱患而肅紀綱至學政養廉由外省酌
籌經費誠恐參差不一擬姑爲籲請加俸若不獲命再當由本省籌商書吏
承差兩項大加刪汰添給薪貲盡慮實爲周密別牋擬改學政爲提學道明
復舊制隱一事權高見尤堪紉佩容當函商大部奏請睿裁學務初興千端
萬緒仰蒙忠告無任神馳

擬復賀熱河都統廷

杰

蒐軍歲役繼以莅盟京國久淹藝勞如舊迺蒙飾序彌益歎忱藉譎移節灑

陽榮膺簡命未知騶從何日抵都遙企旌麾莫名鼙鼓熱河外連蒙徼內蔽
京師舉凡經武修文興利除害深資偉略以固長城李衛公之籌邊趙充國
之列戍早經借箸詎待揲著弟槃敦周旋汲深縵短約計月杪可返津門榮
戟辱臨無任驥印

擬復山西布政使張

紹華

載誦琅函諸蒙瑒飾重以珍裘疊錫矜寵有加藉藩筱船年伯大人竹杖扶
鳩租圭綏燕福星在望祝露同符姪自媿幹材迭膺重寄方寸心之滋疾迺
異數之匪頒敬登帶膝貂裘以拜贈言之雅奉璧元孤袍褂還供養老之需
被體知暄銘心圖報謹上鹿茸兩架藉怡稟壽千春黍谷回溫想朱履白髭
之度麥邱晉頌協黃童白叟之歌

擬復考察各國政治五大臣

頃奉函示以趙將軍咨派留學生替鏡隨同出洋考察政治惟該生雖經奉
天奏調實未在奉當差某因天津擬開法政學堂無人辦理敦促再四該生

始應召前來甫解行裝未便催令就道且該生一去則學堂無接手之人昨已函求午師謂出洋多一哲生尙在車載斗量之數直隸少一哲生并乏晨星碩果之存且養成法政人才以待他日之實行憲政影響所及尤爲宏大仍求暫行割愛免使隨軺該生得盡其教育之長學堂不至廢已成之局皆從者之賜也

擬復日本佐佐

友厚

昨奉手書並寫真一幅開械雜誦如接光義感謝何極陸軍演習尙在萌芽明眼觀之必多缺點迺蒙獎掖慚歎何如東洋平和互有利益大教於亞洲時局洞若觀火某雖不敏敢不勉從貴國諸君子之後或推或挽以期達於目的耶五大臣遣外考察遽有暴徒之事兒子幸免不測承念至爲感泐適因事暫緩其行將來觀光貴邦必令奉教于閣下之前以增其智識也

擬復日本大本營參謀次長長岡少將

外此

昨荷手書敬諭譽望日隆起居納祐至以爲慰貴國復東亞之和平義聞仁

聲騰於歐美屬在脣齒敬慕何如敝軍此次秋操僅具形式究以教練未久程度尙低迺蒙過獎之詞祇增內愧立花大佐快承教益端人之友相得益彰承惠寫真帖全份披覽一過覺大和尙武之風隱躍紙上尤足爲同州賀耳

擬復張尙書

百勝

前荷高軒枉過未盡所懷祇以談判初開千頭萬緒致稽趨答悚歎奚如當俟議約稍閒負荆請罪耳承示學部一節已與慶邸及樞府諸公略陳梗概執事清流重望迺復謙挹逾恆讓善之誠令人敬慕不置貴門人胡魏二生函陳東方事宜不爲無見謹當遵存座右以代借箸之籌亦見賢者之惓惓君國知無不言也良覲匪遙可勝企念

擬復謝雨宮

敬次耶

昨奉惠書會人事牽率缺然未報迺復辱命並贈以貴國最尊貴之鎧與刀開函縱觀光采四溢覺大和尙武之精神與君子贈言之情誼載以俱來心

感何極但鄙人於友朋餽遺之物向皆辭而謝之誠無德以堪之也今以閣下拳拳之盛意不敢固辭謹受小刀一柄以爲光榮其鎧一襲大刀一柄仍以返諸執事竊附古人受飧返璧之意不敢負閣下投瓊贈縞之心奉揚義俠之風提倡勇敢之氣敢拜嘉貺達諸下執事並謝不敏

擬復張運司

昨展惠函祇悉一是鐵路指款作抵本援津浦成案而言郵部謂假借虛名藉蘇困涸三省自應一律維持但鐵路之有無餘利全在辦事員之能否得人未可狃京奉近歲之贏餘謂必概操勝算且設有不測如亂民拆毀等事不能以尋常虧耗相衡此次擔保之款似須聲明只作虛抵不能實支設有前項意外事誼仍須由度支籌撥且外省既爲擔保亦應有派員查賬之責以免虛糜如此立言較密可防萬一之虞希轉達密商爲荷

擬復王聘帥

七卷

昨荷惠函具悉十三協餉械情形每年尙少念萬兩其礮馬工輜各器械亦

須擇要添置江北地方重要自應未雨綢繆可由台端詳細奏明請指撥切實有著之款並函致邸堂暨鐵帥懇其代爲主持目前帑項艱難處處捉襟見肘但軍糈事關計授固應知無不言耳

擬復榮中堂

昨奉手書垂詢病狀孳愛之忱溢於楮墨兄少卽羸弱長歷艱危起家於軍旅之中受命於危難之際自奉使朝鮮以至撫魯督燕所遇皆動魄驚心之事前兩年卽因血氣過耗虛火上炎身熱時作世方多故不敢不力疾從公近乃日益委頓頭暈心跳目眩耳鳴不寐諸證相因並至醫者云憂勞過度非藥石所能濟宜專意靜養方有轉機是以籲懇天恩暫擬休息現雖少減尙難平復素性愚拙不敢告勞受病之深亦在於此知關綺注醜縷陳之弟脾濕外延雖係癩疥之疾時方溽暑祈珍重調攝爲禱

擬復東文學社長中島

裁之

接奉內田公使轉交手書語重心長且佩且歎學社教學由執事苦心擔任

者六年於茲敝國學習日本文者日夥惟執事開山之力經營艱苦聞者心折況敝國人士之親沐熏陶者耶尊恙旣須調理自當暫釋擔荷以悅心神豈敢重勞賢者違卽函致嚴範孫侍郎請其就近奉商擇人接替冀無廢執事已成之局侍郎熱力學務且與執事雅故必能處置得宜也

心太平室集卷七

心太平室集卷八

吳縣 張一麐 仲仁

古紅梅閣筆記

少承庭誥服習儒書壯作漫遊回翔幕府西至巴蜀東暨遼瀋入察哈爾而登長城過娘子關而抵太原踰伊闕而訪佛龕陟太山而觀日出升禮曲阜禮孔子廟堂躡屐履雲龍謁留侯祠墓雁蕩則仰視諾詎那之瀑布天台則俯臨智大師之道場普陀望落伽之峯包山瞰林屋之洞關山戎馬飲岳陽之酒樓泉石煙霞玩匡廬之雲氣若乃渡瀛海適樽桑濯足乎箱根放舟乎松島履綦所至更僕難終憶自橐筆津門歸休里閉遇義軍之突起叱咤風雲許國是以馳驅棲皇雪柳旣而搏鵬將息倦鳥知還乃動地鼓擊降臨桑梓魚頭爛額無補時艱息馬投戈幸歌復旦而吾年亦將耄矣同人以飯生經歷可補國聞屬綴簡端冀留夢影酒闌燈炮拉雜書之昔東齋記事北夢瑣言雖隸雜家無傷大雅茲所纂輯意在存真苟有

然疑寧從蓋闕以所居爲宋吳感紅梅閣舊巷輒以名之民國十九年冬
江東阿斗自識

侯官林錫三先生天齡按試江蘇遇幼童輒拔置堂號以便考察余年十二
應童試題爲孟子天與賢三字余誤爲此節上連萬章曰一章起講卽云昔
堯以天下傳諸舜舜以天下傳諸禹不知其全在下文且童子何知因多食
餅餌內急欲如廁未具草藁促完卷而候啓門旋見元和訓導張廣文克
己踵門大索令就其席補草余不願乃指其頭上之銅頂曰爾不補草稿此
物不能載也強拉入席補訖而候啓門者祇三數人耳門啓後先君領至候
考處大泄瀉方歸榜發有名覆試時以雛鳳清於老鳳聲爲詩題檢前場卷
則起講卽勒紅帛惟詩題白露爲霜余首句曰釀得秋如此則大圈特圈先
生造就童穉愛才若命惜翌歲卽歸道山時官年祇署九齡次歲己卯鄉試
先君以年幼未令與考十六歲壬午鄉試正主考爲仁和許星叔先生庚身
副主考爲南海譚叔裕先生宗浚監臨爲安徽巡撫壽山裕祿有事先還皖

省由兩江總督左文襄公宗棠代之次場禮記題一年視離經辨志余以志字作史志解如周志軍志天文志地理志之類以經史作兩大比卷出仁和梁師枚房薦諸許師已定爲第六名舉人正副主考例以各人取中之卷互相磨勘譚師以經文禮記題他卷未有如此解釋者乃調取通志堂經解皇清經解令十八房徧繙不得乃抑置副榜第二名及榜發拆彌封見官年祇十三則大譁文襄乃調三場墨卷視其有無槍替痕迹檢畢實無可疑乃曰此小子將來當有出息許師假歸杭州彭雪琴尙書宴諸湖上詢以所得門生何者可意許師曰此行得一童子爲奇耳友人勸余至金陵見左公以稚嫩畏見生客未卽往未幾左公因法越戰事離江南他往平章軍務去矣追念哲人自傷老大讀李白但願一識韓荊州之語輒於邑不已

左公督江南在光緒七年辛巳之十二月時七十歲明年壬午四月因閱兵出吳淞至上海過租界西人除道換升中國龍旗聲礮十三響觀者如堵詫爲從來未有之事又明年癸未法攻越南破南定公疏請籌辦海防六月法

攻越南益急自請赴滇粵督師未許但已遣王德榜自永州解軍火濟邊軍就募廣勇數千人十月檄德榜於永州募十營號曰恪靖定邊軍再明年甲申正月德榜軍至廣西南寧三月以目疾乞病曾國荃繼之於時滇粵邊軍潰退北甯興化相繼失守獨王德榜軍五千人扼守諒山鎮南關而法人兵船分駛福建江南海口公聞警憤極會目疾稍愈乃銷假以王德榜軍單請增遣前浙江提督黃少春於湖南募新軍繼進會法使復詣天津請和詔停募召公入見五月至京師仍入值軍機法人復犯宣光保勝諒江南北洋戒嚴公復請飭黃少春赴邊未成行七月法人大舉入犯閩洋福建海軍潰敗馬江法轉攻臺灣詔公以欽差大臣督辦福建軍務八月抵江寧調舊部五千人從行法已奪踞基隆公攻滬尾九月公取道江西入閩十月抵福州人心大定首議調兵援臺遣道員王詩正率恪靖援臺各軍自泉州潛渡法船集媽祖澳公冒風雨巡視長門金牌墩台申嚴軍律封塞海口法軍引去翌年乙酉二月王德榜率定邊軍會前廣西提督馮子材大破法兵於諒山法

人復請和詔停戰公密陳要盟宜慎防兵難撤五月疾劇乞休七月薨於福州士民巷哭按諒山之役彭玉麟奏稱馮子材苦戰兩日之久非王德榜截其後路斷其軍火關內外夾攻亦不能如此大潰而閩當馬江敗挫一夕數驚非公至亦無以懾法人而使其引去吾國咸同以後對外用兵惟公之收復伊犁與戰勝諒山爲空前絕後之舉乃李公鴻章甲申五月復張蕡齋函云聞有請恪靖南征者此老模糊顛倒爲江左官民所厭苦移置散地固得矣然夷情大局懵然必有能發不能收之日云云其然豈其然乎

故事鄉試獲薦者例往學政衙門自填親供余壬午中副車後十月間往江陰謁學政黃漱蘭先生體芳時先生長子仲弢年丈紹箕爲先君庚辰甲榜同歲以翰林院庶吉士未散館助乃翁校士余入廳事候未久見一紅頂花翎身不滿四尺而鬚眉甚偉者出見客酒氣薰人卽閱卷小印酒仙過目四字之漱蘭先生也先生任京職時彈章不絕臺閣生風當時有四矮子齊名比諸翰林四諫先生與張文襄公之洞皆其一也談次訓小子須多讀書余

對以寒士無力買書爲苦先生曰吾已與左季高商定奏設南菁書院汝可以選入院中讀書繼命仲弢年丈出見而先辭客入內齋矣翌年余因先君需次於直隸省城待親北上不及入院讀書然江南人才淵藪以南菁爲最吾鄉若曹元弼胡玉縉之經學曹元忠金天翮之詞章皆一時之選他郡如武進之劉可毅謝鍾英無錫之孫均揆松江之姚文枬于鬯趙世修並負物望辛亥以來革命先覺如前江蘇都督莊蘊寬今黨國元老吳敬恆鈕永建皆南菁舊友漱蘭先生之提倡宗風其功不小

南菁山長始則張嘯山文虎其後黃元同以周丁叔衡立鈞皆老師宿儒與浙江話經精舍之俞曲園四川尊經書院之王湘綺同時濟美厥後繆藝風荃孫金石目錄輿地之學卓絕一時乃藝風以洪憲江蘇代表首列其名遂爲平生之玷聞當時僞造國民公意者以江蘇文物之邦須求一老儒爲弁冕乃由省當軸餌繆以白鏹二萬先致五千爲壽俟登極後補贖如約不料西南起義代表取消一萬五千之契約遂成泡影藝風不容於公論抑鬱以

終夫以藝風之學雖不能比事林船山梨洲之蒙難明夷開有清一代風氣欲如近世王湘綺樊雲門之俳優嬉戲身享大年固自易易乃名山壇坫尙不如投閣之大夫吾悲藝風吾思牧翁後之君子當陽九百六之交其亦知所自擇夫

先君以庚辰進士爲直隸卽用知縣辛巳挈先慈到保定需次三弟兩妹均幼待行余與長兄均留蘇未往自余十六歲中副榜館于回龍閣程榜香先生之子受甫宅中課其二子癸未偕兄乘豐順輪至保定協署前寓所時保定蓮池書院山長爲武昌張廉卿先生蓮池不許外人應試余借先君門生滿城康炳宣名考課先生點名時願而異之屢列高等廉卿先生書名滿天下續藝舟雙楫以爲鄧完白後一人首列神品余卷評語綴於一冊時時臨摹後入蜀中同幕見而借去竟爲所攫至今惜之時蓮池高才生如鹽城劉仲魯若曾永年孟紱臣慶榮滄州張化臣以南（卽今中央委員張溥泉君之父）皆著有日記蔚爲通才姊夫江陰夏閔枝孫桐家有藏書余每借觀

之先君漫以輜軒語書目答問乃稍識國學門徑時先君奉委監守朝鮮大
院君李是應差李是應者朝鮮王本生父也羈禁於保定府舊道衙門派文
職兩員武職兩員監守之每半月文武各一員輪流交替出入之鮮員必登
於簿入市則飭役隨之慮其通消息謀脫逃也先君值班則挈余往焉衙門
自大堂內有廳堂五大間文武兩員各住兩間又進則五大間上房右二間
爲大院君住室左二間朝鮮文武隨員居之鮮語鈎輻不能辨其文號稱漢
而大半俚野不可讀凡彼國信至委員拆閱乃達去信亦如之大院君年已
六十許能畫蘭余以扇乞畫款稱某某雅士聞先有乞畫者君問華人給事
何者爲尊稱對曰老爺渠卽題款曰某某老爺此扇遂成笑柄後告以此乃
奴稱主人之名不可用方以雅士呼之其隨員多使酒任氣委員時時裁抑
然以其瑣尾流離不能峻也其食時置肴於地衆踞踞作環形飲啖與島人
不甚殊一日彼國王遣使來聘閱其名刺則新科狀元南廷哲刺長六寸與
華之翰林院庶吉士同南爲彼國壬午舉人以年家子禮見先君焉入內堂

大院君高坐胡牀南北面跪奏如臣工召見禮隆重擬於上皇大院君眷念故國憤欲東歸必多方拊慰之始已入其室所閱皆范文正王陽明等集在朝鮮以篤舊不容於東學黨故錮諸直隸省城附錄李文忠光緒八年七月二十四日與譯署商定朝鮮內亂一稿以見此案厓略

上略 七月十九日行次吳淞英國威使來晤出示駐日英使巴夏禮近日密信詳述日本政府之意亦知朝鮮亂黨滋事由於大院君李是應主使甚不願與李是應交結中國派兵前往如勘辦內亂非日所可撓越若欲爲朝鮮主持日本交涉之案日人必不甘受並將所索條款大略開陳等語是夜接振軒制軍電報馬道等誘獲李是應解送到津正喜辦法深合機宜告知威使同聲稱快中略惟李是應已解赴京都請旨辦理竊謂李是應藉不樂外交爲名爭權內閔肆毒宮闈實爲禍首罪魁其人奸狡梟桀勢能挾衆以逞第處人父子之間誠恐殺之不當囚之不可縱令回國則後患滋大似宜仿元朝至元年間高麗忠宣王忠惠王父子相爭將忠

惠流竄揭陽故事設法拘禁安置勿令私自走脫或潛通消息煽惑其黨以致死灰復燃之處尙祈卓裁密陳云云

又同年八月初三日與譚署籌安置李是應一稿以見保定監守情形

上略連日違旨會同振軒向李是應究問該國變亂緣由及著名亂黨乃
壹意狡展堅不吐實中略似宜請旨安置保定省垣優給廩餼嚴密防閑

並祈特頒明詔由鴻章等移行該國王俾國人知其永不得歸方可消逆
謀而免後患伊子李載冕現既退去兵柄據下提督馬道等皆謂其庸懦
無能不爲國人所親附若知是應不歸黨勢已孤亦無能爲役也云云

中日之戰爲吾國強弱關鍵梁啓超著李鴻章一書論中日戰爭之禍胎足
爲論世之鑑今附錄如左

上略朝鮮本中國藩屬也初同治十一年日本與朝鮮有違言日人遣使
問於中國蓋半主之邦其外交當由上國主之公法然也中國當局以畏
事之故違答之曰朝鮮國政吾國素不與聞聽貴國自與理論可也日本

遂又遣使至朝鮮光緒元年正月與朝王訂立和約其第一條云日本以朝鮮爲自主之國與日本之本係自主者相平等云云是爲日本與朝鮮交涉之嚆矢光緒五年英美德法諸國相繼求互市於朝朝人驚皇躊躇不決李鴻章乃以密函勸其太師李裕元令與各國訂約其奏摺謂藉此以備禦俄人牽制日本云云光緒六年駐日使臣何如璋致書總理衙門倡主持朝鮮外交之議謂中國當於朝鮮設駐紮辦事大臣李鴻章謂若密爲維持保護尙覺進退裕如倘顯然代謀在朝鮮未必盡聽吾言而各國或將惟我是問他日勢成騎虎深恐彈丸未易脫手云云光緒八年十月侍讀張佩綸復奏請派大員爲朝鮮通商大臣理其外交之政鴻章復奏亦如前議是則鴻章於屬邦無外交之公法知之未悉徒貪一時之省事假名器以畀人是實千古之遺恨也自茲以往各國不以中國藩屬待朝鮮也久矣光緒十一年李鴻章與伊藤博文在天津訂約載明異日朝鮮有事中日兩國欲派兵往必先互行知照於是朝鮮又似爲中日兩邦

公同保護之國名實離奇不可思議從此兩國各執一理輾轉不清釀成
大變實基於是

梁君論李鴻章致敗之由甚詳俟甲午戰事起後再摘敘之茲不贅

光緒乙酉余年十九歲以副貢例得應順天鄉試與家八叔父於五月入都
先住延壽寺街長元吳會館繼遷至虎坊橋吳鈍齋年丈家年丈以編修考
差同鄉中往來者如顧緝庭肇熙許鶴巢玉瑒顧若波溘（時在順天府尹
沈仲復先生署中鬻畫）顧平叔允昌戴藝鄂錫鈞吳慎生均金（卽孽海
花所謂女壻頭銜新內閣丈人腰斬老中堂之吳鋆）貴州巡撫潘偉如爵
尙未赴黔京卿吳憲齋大澂入覲而歸天津南書房翰林陸鳳石年丈潤庠
是秋簡山東學政是同鄉京官文酒談讌極盛時代貞元朝士文采風流殊
有玉堂天上之感八月入闈題爲實能容之三句次題子華使於齊一章三
題孔子嘗爲委吏矣一節主考爲潘祖蔭翁同龢奎潤童華監臨官爲沈秉
成（順天府尹）余卷出曲阜孔少霽先生祥霖房薦至奎星齋師潘文勤

以翁文恭名位相埒推文恭主持全榜解元鹽山劉若曾南元通州張謇余列第十名故事順天鄉試前十名順於未揭曉前進呈御覽余官年祇十三歲軍機大臣拆彌封進呈兩宮見余年齡甚稚異之許星叔師時爲軍機大臣奏稱臣上科典試江南已中式張某副榜矣太后見名下末一字不識軍機奏此與麒麟之麟字同八月試後先歸保定電報中式後家八叔未第仍送余入都覆試卽由都隨鳳石年丈赴山東學政之任課其長郎燦林讀書記覆試後回保定川資不足第三日旅店飯食借諸車夫先君需次已六年仍未得缺因海防捐河工捐層層壓班先君無賞可捐且不願以貸郎進故每以借貸度日焉

是年二月廣西提督馮子材大破法兵於諒山法人復請和詔各軍停戰當時邸鈔中有欽差大臣彭玉慶會辦雲南軍務前湖南提督鮑超兩疏一腔忠憤溢於毫端今摘要錄之是役也吾國對外用兵爲最後之大捷自今視之奚啻天寶之於開元自後甲午也庚子也割地喪師重慙賄謬不可爲已

彭疏

上年十二月法虜大股自船頭來犯十九日攻谷松二十九日陷諒山本年正月初九日入鎮南關桂軍將領楊玉科戰沒董履高重傷諸軍多潰惟蘇元春所部及陳嘉六營尙完於是法踞諒山於關外十里之文淵州築臺安砲爲堅守計龍州爲全軍後路商民驚徙游勇肆掠逃軍難民蔽江而下廣西全省大震自太平南甯以達潯梧皆電報所通水路所達紛紛告急請兵桂林空虛倥傯籌備先是幫辦軍務前廣西提督臣馮子材暨廣西右江鎮總兵王孝祺於臘月先後抵龍而募軍未足裝械未齊王孝祺率數營馳援出關而諒已潰馮子材原有之八營尙在東路僅帶中軍兩營駐龍州元旦聞警乃留一營彈壓根本親率一營赴南關與王孝祺軍攔截潰勇一面調八營來關晤商撫臣潘鼎新告以守關無須該軍令仍顧東路遂以所部全紮關外派站親往督剿初九日南關告警復檄西援十二日聞信折回時法已於十一日晨焚關自退馮子材素有威惠

爲桂越人心所嚮還入關衆心稍定乃建議於關內十里之關前隘跨東西兩嶺間督所部築長牆三里餘外掘深塹爲扼守計謂桂軍宜稍養銳自任以所部羣軍守之營於嶺半令王孝祺勤軍屯於其後半里許爲犄角當是時幫辦軍務署廣西提督臣蘇元春毅新軍陳嘉鎮南軍俱屯幕府在關前隘之後五里蔣宗漢廣武軍方友升親軍俱屯憑祥在幕府後三十里潘鼎新率鼎軍屯海村在幕府後六十里魏綱鄂軍屯艾瓦防芄葑在關西百里王德榜定邊軍屯油隘專備鈔截兼防入關旁路在關外東三十里獨廣軍兩枝當中路前敵時值北海封口西電皆謂法將由欽廉攻南甯斷桂軍後路而廉州並無統將臣等因桂軍漸集擬調馮部回顧欽廉又恐難於移動當經電奏調廉仍令馮子材酌度進退緩急一面詢商該幫辦或全移或只調兩營或全不移動聲言即日東援以定衆心聽其斟酌因潘鼎新屢電不以馮軍爲得力必不肯言留故令該幫辦自酌知其力任大局必有權度旋接潘鼎新覆電謂蘇元春自芄葑調回卽

令馮軍回廉馮子材覆書則言該軍喫重兩營亦難移調當卽電復令其專顧桂防不必援廉此正月中旬以後廣軍佈置扼守前敵之實在情形也於時馮部全軍已成桂軍休息漸定越人密報法將出扣波襲芄葑攻牧馬繞出南關以北且斷唐景崧馬盛治兩軍歸路蘇元春率軍暨魏綱軍趨芄葑以待馮子材遣五營扼扣波以邀之二十七日法數十騎率教匪至芄葑官軍先在驚走扼扣波之馮軍突出奮擊敗遁獲其馱軍火大象一擒匪黨二二月初二日法又爭扣波遇馮軍脫洋衣洋帽挂林木而竄芄葑卽長定府法以越官長定府知府給已殺其子遂無西犯意馮子材請於潘鼎新調蘇軍還中路法揚言將以初八九日犯關馮子材料法必於初七日禮拜一出兵決計先發制敵羣議多不欲戰潘鼎新以士氣未復止之馮子材力爭率王孝祺軍於初五夜出關襲敵山有賊壘三安巨砲我軍已入街心自五鼓戰至初六日午刻賊益盛王孝祺馬中砲斃易騎戰率死士由山後攀崖而上破其二壘斃賊甚多賊敗走我軍傷亡

亦多未刻我軍饑疲乃還此二月初五初六兩日廣軍倡議出關力戰破壘之實在情形也初七法果悉起諒山之衆併力入關直撲關前隘長牆攻廣軍營壘馮子材告諸軍曰法再入關有何面目見粵民何以生爲王孝祺以淮軍爲龍州人所詬病諸軍多輕之憤甚皆誓與長牆俱死法以開花砲隊循東西兩嶺互進向下轟擊以鎗隊撲中路法謂越人皆馮內應自以眞法兵居前黑兵次之西貢洋匪又次之教匪客匪在後砲聲震天遠聞七八十里外山谷皆鳴槍彈積陣前厚者至寸許我軍死戰傷亡殊多東嶺新築五壘未成爲敵攻踞其三王孝祺自率小隊鈔敵後仰攻敵稍卻戰至申刻蘇元春援兵至合力拒戰諸軍竟日不食至夜仍未收隊是日王德榜自油隘出軍夾擊據文淵之對山與敵鏖鬪數時互有傷亡遇賊連軍火乾糧之馱馬無數逐之皆返走法糧械遂不得入關初八日清晨復大戰賊來益衆砲益緊馮子材居中蘇元春助之王孝祺當右陳嘉蔣宗漢當左左路卽東嶺敵砲最猛馮子材與諸統領約有退者無

論何將遇何軍皆誅之復於各路設卡以截殺逃者馮子材王孝祺各刃退卒數十人賊勢狂悍致死已薄長牆或已越入馮子材年將七旬短衣草履持矛大呼躍出長牆率其兩子馮相榮馮相華搏戰將士齊開柵門湧出諸軍覩馮子材如此無不感奮關外游勇客民千餘聞馮子材親自出陣亦來助戰伺便隨處狙擊馮軍扣波五營自關外西路來夾擊其背於是諸軍合力死鬪短兵火器雜進王孝祺部將潘瀛率隊撻鋒袒臂裸體衝入敵陣故所部勤勇傷亡最多陳嘉爭東嶺三壘蔣宗漢繼之七上七下陳嘉四傷不退至酉末王孝祺已將西路賊擊敗親率軍由西嶺鈔敵後與陳嘉等合擊而王德榜之軍亦自關外夾擊東嶺之背遂將三壘全數奪回是日王德榜自清晨出軍甫谷待敵援賊至率隊衝之賊截爲二援賊因回槍擊德榜軍我軍奮擊大勝部將張春發蕭德龍戰最勇斃法酋法匪甚多餘衆敗走獲其騾馬五十餘匹所馱皆槍礮彈麵餅洋銀之屬德榜遂自外夾擊東嶺奪回三壘法鑿戰兩日彈礮已盡而後收隊

軍火被截惶懼無措頃刻間砲聲頓息遂大潰我軍任意斬殺賊翻巖越澗而竄教匪路熟先逸法兵多殲此戰所斃真法兵黑兵千餘法酋數十客匪教匪數百逐出關十里而還是日馮子材王孝祺身畔屢有開花砲子墜落未炸我軍屢與法戰被挫之時率皆陰雨霾霧是日大開晴霽風日光明此初七初八二日廣軍會合桂省主客各軍血戰大捷之實在情形也初十日馮子材親率十營出關攻文淵州法匪望風潰遁追擊斃紅衣法酋一遂復文淵法以越官文淵州知州通馮剖其腹殺之而去十二日諸軍三路攻諒法踞諒城固守並扼對河北岸之驅驢墟有王德榜舊壘甚固黎明王德榜進攻之士卒多傷斃其六晝兵總一午後諸軍至王德榜與王孝祺兩軍戰尤力傷亦多孝祺部將潘瀛執旗先登諸軍並進克之法涉水而逃併守諒城十三日五鼓馮子材軍楊瑞山劉汝奇等潛渡河攻諒辰刻克之獲其軍械糧米無算皆納之於官軍無私焉諸軍大至法悉衆遁分兵追剿桂軍楚軍追中路廣軍追西路十五日陳嘉攻谷

松賊勢仍悍王德榜力援克之斬三蠻法酋一馮子材軍追賊至觀音橋破其巢同日克復屯梅屯梅卽長慶府生擒五蠻法酋一斬三蠻法酋一遂進軍克拉木逼攻耶甲耶甲卽諒江府王孝祺進軍貴門關連日諸軍追殺搜獲法兵極多盡復去年官軍所駐邊界此初十日至十五日廣軍會合諸軍分兵追剿獲勝復界之實在情形也越人久苦法虐聞馮子材此次起家治兵欣若望歲越官越民多來入關通款當卽密布間諜宣慰招徠及克諒後遂慨然畫掃邊北圻之計越官北甯總督黃廷經糾集各路義民立忠義五大團二萬餘人皆建馮軍旗號供糧米作嚮導或分攻或助戰北甯城內逃潰大半李揚才之弟在北甯來報官軍破耶甲彼卽率衆內應馮子材各許官賞分給旗榜河內海陽太原等處皆密受約信紛紛叛法西貢亦以重金購線通款已令莫善喜一軍由欽州襲廣安時唐景崧一軍亦由牧馬進窺太原馮子材已定於二十五日親率全軍進窺北甯並率勤軍同進適逢停戰撤兵之旨乃止前軍馮紹珠麥鳳標等

於二十九日尙攻郎甲是夜前軍聞旨乃還自三月十四五日起廣桂楚鄂諸軍連環捲紮至二十日撤入邊馮子材之軍分屯樟山鎮南關彬橋等處王孝祺軍屯彬橋此二月十六日以後三月二十日以前廣軍進窺北甯遵旨凱撤還界屯防關內之實在情形也竊惟法虜自去秋敗盟以來擾閩圍臺增兵踞越攻犯桂軍諒陷關失以後大局岌岌此戰若再不
利則南太將危欽廉隔絕兩粵事體殆難措手幸賴國家威福宏遠詔令嚴明諸將同心士卒效命遂獲大捷克復越南一省一府一州擒斬法酋六晝數十法提督尼忌理亞重傷法之精銳盡殲客教離散全越驚擾法人自謂入中國以來未有如此次之受鉅創者時滇軍亦獲大捷於是法都震懾天威舉國嗟怨將其外部花利罷黜倉卒乞款聖上寬仁不欲黷武俯允其請休兵息民是此戰勝負之所關實非淺鮮在前敵親見戰事者僉言法二次犯關非有生力大軍難遽言戰非馮子材創築長城與王孝祺合軍死守則諸軍無所依倚更無戰守之法當初六七廣軍苦戰兩

日之後非蘇元春軍往援陳嘉蔣宗漢力拒東嶺則馮軍亦將不支非王孝祺疊次肉搏陷陣橫衝敵堅則馮蘇諸軍亦不能取勝非王德榜截其後路斷其軍火關內外夾攻則亦不能如此大潰然非馮子材之素得人
心忠勇奮發鎮邊安民戡掠收潰設險倡戰料敵情散賊黨廣援應則法亦不至如此摧破瓦解惶駭遠遁故諸將皆有功而尤以該幫辦爲功首
鮑疏

行抵白馬關准兩廣督臣張之洞咨奉電寄法人請和已允停戰撤兵著毋庸出關等因欽此仰見聖主柔遠息兵之至意惟將領忠勇性成聞之皆捶胸跌足怒目豎眉恨未能戰統領徐連陞李金聲向世珍周鵬舉並諸將俯伏帳前力請兼程一戰營務處何應鍾則求迅速拜摺請戰奴才以君命爲重再三慰退及聞我兵退而法兵不退諸將憤怒又環列帳外擦掌磨拳同聲請戰戰如不勝先立結狀甘從軍法奴才諭之不應揮之不退更叩頭不起言詞激烈至於涕泣奴才行止兩難心如錐刺不得已

乃獨責營務處以違命悖理更委婉慰退諸將然心中焦灼廢寢忘餐欲上言請戰不但干違旨之愆而且恐勞聖慮欲極言停戰不但阻將士之氣而且恐懈軍心以奴才蒙三朝之恩當五旬之後久積憤懣之懷幸奉主戰之旨於此而不圖報國後恐欲圖無由於此而不期誅法後恐欲誅不得故選將練兵益加嚴慎深期一戰而捷以彰國威雖邊釁久開恐兵連禍結然痛加懲創而許和則法人膽懾羣醜心驚寇患可除今聖主懷柔俯允其請虛糜帑金億萬數千里徒勞士卒此奴才心中之恨事亦卽爲奴才畢生之恨事也且和議雖經初定後慮尙多隱憂奴才身列行間言之則迹近戀棧不言又心實難安積日思維人臣當不避斧鉞何況嫌疑管見所及不得不爲我皇上縷陳之法人狡詐甫敗請和安知非避我銳氣懈我軍心耶安知非老我將帥糜我帑金耶我初勝而彼請和安知我稍懈而彼不乘隙狡發耶海國迢遙謀爲莫測輪船飄疾來去難知敵情詐而防不勝防海岸闊而守不勝守和議成後該敵不必防我而該敵

易於乘我我不能往攻該敵我不能不防該敵籌防日久糜費日多將領日衰軍士日懈不數年間元勳宿將壯者老而老者歿一旦有變欲求如今日之能戰能攻誠不易也卽不然選將練兵另起爐竈勢必緩不濟急較奴才去年之成軍爲尤難且訓練隊伍需用槍砲均非急切所能辦再兵端一開各守公法尤爲臨時所不能辦况審時度勢眈眈而視者又不僅一法人也然旣經許之大信難失但條約不可不慎後慮不可不周勿使其獨據利源勿使其得有地勢往歲議和敵屢索賠兵費今無故擾我藩疆侵我內地壞我兵輪毀我船廠彼豈不應賠償耶再按萬國公法據理力爭彼將何辭以對設從寬免賠則越藩之疆土尺寸不可讓臺灣之法人一卒不可留越連滇界滇產五金垂涎內犯後患何窮臺雖海島物產富饒乘間相侵全閩何恃得隴望蜀人情類然而况詭譎之法人乎現在我正撤兵彼反添兵我已退滇粵彼尙紮臺澎不開臺廉海口反禁我接濟船隻何耶耶甲退師又開四礮以擊馮軍新議便違詐情已露如此

奸欺殊堪痛恨倘租約稍涉要求仍請一意主戰奴才合滇粵諸軍及所部將領誓拚犬馬餘生力滅豕狼小醜必動出萬全功成一戰庶我朝柔遠之恩威並周而報國之愚忱略盡使天下臣民廿餘年之積憤亦得稍抒且法人所恃者槍礮奴才所恃者隊伍槍礮爲呆物隊伍乃活人若專賴槍礮與決勝負雖勝而所傷亦多奴才雖不能不用槍礮決不專賴槍礮必率隊直入敵陣短兵相交四面兜剿盡戮之而絕其根株正月二十八日片請添募二十營者原期厚集兵力擬獨任滅敵復越之責添營雖必添餉滅敵後各省之防餉可輕一勞永逸是添餉尤爲省餉計也若洪逆竊據江南使諸逆各陷各省賊數無算帶隊攻剿無一不戰而破其全軍數年肅清數省滅全逆至致中興如朝廷信奴才於昔委以重兵授以重權勢必復全越而滅法人奴才成軍時已誓諸將不誅法復越必不生入關門況法兵無多卽傾國來犯亦斷不及洪逆十中之一分法據越地萬不及東南數省之一隅今昔相較多寡相衡則破之滅之更如拉枯折

朽成案可鑒非敢侈張欺罔於君父之前也海內臣民無日不以誅法爲心而奴才舊部將士亦無日不以減法爲念又不得不望我皇上赫然一怒伸天討而快人心耳

應試之文至光緒乙酉一變同治以來墨卷之習而歸諸根柢之學是科北闈主考潘文勤翁文恭兩公皆以樸學提倡風雅與嘉道間阮雲臺畢秋帆後先輝映爲當代士類所宗會稽李慈銘爲潘公墓志謂公之尤有功於天下者咸豐之末湘陰左文襄公以舉人參湘撫駱文忠公墓府有憾文襄者力齟齬於重臣文忠幾爲動公力辯其誣三疏薦之謂左宗棠在湖南關係事勢甚大國家不可一日無湖南卽湖南不可一日無此人疏既傳文忠得持之文襄以安卒能光佐中興功在社稷而公未嘗一日識文襄也宋元以來吳賦最重蘇松太倉尤甚同治二年四月公疏請減江蘇賦額得旨允行

中略此皆公謀國之忠拳拳大者公性通敏遇事理解批牘答簡運筆如風無不洞中時弊長刑工兩部積年百廢具舉官吏秉成嚴而不苟旣去之後

思公不替久直內庭待宦寺甚嚴指使呵叱如奴隸及至公薨而中涓至今言及公者無不流涕謂如公者不可復見也中略公愛才出天性其主文也務得魁奇沈博之士而深疾骯髒徇時之技士有一技之長終身言之不去口故公既逝而世失所歸風流遂衰余丙戌謁公於米市胡同邸第豐頤渥丹神采奕奕教以篆書須學石鼓行書須臨書譜又有絕世聰明之褒語思之愧汗門生來者先叩以來過幾次若已來二度而門簿祇書一度立召闈人責之其微密方嚴小節且然立朝有泰山巖巖之象公年十九以祖太傅文恭公八十賜壽恩賞舉人二十三歲中咸豐壬子科會試第九名殿試一甲第三名及第授編修二十五歲太傅薨以遺表上晉公侍讀在南書房行走二十八歲晉侍講學士二十九歲署國子監祭酒三十歲轉大理寺少卿三十二歲署宗人府宗丞三十三歲擢光祿寺卿署都察院左副都御史充山東鄉試正考官三十五歲擢左副都御史署工部右侍郎三十六歲署禮部右侍郎三十七歲擢工部右侍郎三十九歲兼署吏部右侍郎調戶部右

侍郎四十歲轉左侍郎四十四歲兼署吏部左侍郎充癸酉科順天鄉試副考官以磨勅被議降二級調用四十五歲特旨賞編修仍在南書房行走未幾開復侍郎任內處分以三品京堂候補四十六歲授大理寺卿署禮部右侍郎四十七歲署刑部右侍郎補禮部右侍郎兼署工部左侍郎四十九歲調戶部右侍郎仍兼署工部左侍郎五十歲轉左侍郎升左都御史擢工部尚書加太子少保銜調刑部尚書五十一歲兼署工部尚書五十三歲兼署禮部尚書十一月授軍機大臣五十四歲丁光祿公憂還葬五十六歲服闋至都署兵部尚書仍在南書房行走充乙酉科順天鄉試正考官補工部尚書五十八歲兼署戶部尚書六十歲加太子太保銜充己丑科會試副總裁綜公生平年未及壯卽值南齋洎爲講官所劾督撫提鎮不可勝計盈廷側目沮之尼之會清文宗北狩同官忌其伉直特令留守京師是時端華肅順當國公密疏參之至二千餘字端肅以公有重名留中不究轉授意特致敬禮公素性不附權貴然以肅順頗引用漢人如王闓運湘綺高心夔碧湄均

羅致幕下胡文忠曾文正起自田間尙引官文以自固公之奏保左文襄得請者未始不由於此會那拉后垂簾肅順處死有人謂公肅黨思排之那拉后卽出公二千餘字密疏爲證謂當肅順熱可炙手之時誰如潘某之黷者以故戊午以後疊遭排擠至革職留任仍復南齋洊長數部并入樞廷皆此一疏之力及乾蔭旣摧服闋入都未能重膺內相者左右羣臣畏其剛烈那拉后亦面諭中涓勿犯潘大傻子隱然若敵國矣使公能執朝權天假之年逢甲午戊戌庚子諸役其所設施當較虞山有殊矣顧虞山文采風流與公名埒以身爲帝師欲尊國威以固主位又遇文士之好言戰略如趙括者流遂至割地喪師身遭放逐以視公之識左公于未遇其幸不幸爲何如哉當左公之由陝入覲也以數十親兵舁大鼎贈公人謂公受賄不知文襄與公尙書中有自稱受業字樣賄云乎哉

文恭相業以甲午戰事爲人詬病亦以身居保傅欲佐少主以張國威而于兩國軍事準備未嘗深悉其後康有爲入都文恭微服過訪力保其才尤爲

那拉后所深忌至于文藝一道金石考訂埒於文勤書名傾動中外自劉石庵何子貞外未見其匹與合肥和戰事意見相左獨中俄密約事則水乳交融友人宗耿吾先生得手稿亦一代得失之林也今形勢大變俄國改爲蘇維埃政府無祕密之可言記者得其全稿公諸國人除圖外皆文恭親筆裝潢成卷後方有吾友鄧孝先先生題跋詳盡無遺故附載之以備國聞之助虞山白鶴峯有墓廬文恭退隱時所居也門聯曰原思環堵泄柳閉門後樓爲起居禮佛之所迄今過之不禁有西州之感云

翁文恭公盟俄圖稿

圖在吻

密件

四月初二日
初三日 來電

四月初九日發電

奉

旨環球之大惟俄與中爲三百年舊好今俄君復與我連盟中國亦推誠相與所擬約稿均已閱悉惟末兩條一則不待贅言一則無庸立限皆可

省去著李鴻章轉達俄廷將四條定立密約倘中國西南水陸有事俄國如何援助之處亦於約內敘明以期周密欽此

第一屬地屬字改土字

第二末添如非敵國不在此例八字

第三所有二字節去入字改泊字

第四今字下添俄國二字議於下添中國二字

電悉約文本無異同邊地二字係東電原文經理二字慮與龍州約有礙故刪合同向不請批故改條約展限二字來電從未提及至俄國亦可四字尊處文電如此非本署所添因語氣不完故填不用二字固非多疑多變若不准改一字則遇電第四海參崴下直接此路中國國家云云竟將不佔土地不礙權利等緊要語全行截去約文全篇所以遵旨添人此約是否兼用法文所譯漢字務希詳明況俄亦將初稿刪改何必故爲譏切電碼頗有訛字卽如文電明指歐國歐字必係倭字并聞

四 英法援請究竟有無後患

五 改東方屬地尙未分明 滿洲改中國

准交俄華銀行承辦句由中國國家與俄華銀行句 瑣疏

六 每羅布合洋一元恐未的 四厘息既係先提何云口是

不能保利作何解 查核應征應免句未晰

在京商定亦未妥

四月十三日恭邸見起

慈聖諭此事固須顧念邦交亦須謹防後患

八號

俄國亦可句未完 歐國當是倭國此李應河

奉

旨李鴻章兩電均悉畫押約文應先譯全篇電署呈覽約本或親齎或派員要須慎密防傳播生衅（總署廿四廿五兩電并着妥辦電奏）欽此

沁午

四月廿七日午

奉

旨李鴻章二十三日電悉前因約本寄到需時是以令將全篇先行電奏
一俟奏到卽行照准欽此豔午

來件催

批准

又一件銀行

許大臣

在前

弁字第三百二十八號信

詳鐵路運料設電二事

陸由吉林東界 水由松花江運入

與齊勒格面商由總辦發照

一拖帶輪船編號

二挂公司旗

三每船執照以三年爲限

四照由總辦發總局轉給

五船入中國在第一關卡呈驗執照迅即放行

六總辦有權派員在卸載處所查驗物料

七公司與船主立合同料件之外不帶他貨

(原係紅圈)

弁字五百四十八號

四月廿三到

許大臣信

俄要商路線

要開煤礦 此口

彼屢次欲歸不在另議許已駁之今彼派人在松花江十五俄里內覓得
礦地另予厚酬

又請代鑄制錢 此不可允

或借款添鑄 或可允

又請行用口錢 口大項次請東省收賦稅用口錢亦亦九

總監工茹格惟志下禮拜卽往工次

五月五日來信

自烏蘇哩鐵路雙城子車站起向寧古塔伯都訥嫩江右岸海蘭爾 卽呼

魯貝爾各處接通西畢爾鐵路薩拜喀爾一段赤塔斯特列田斯克兩車

站之間爲止 遇中國各城應量爲緩避

齊齊哈爾呼蘭均在鐵路之外吉林之拉林亦在外

俄鐵路方向前已由總署寄知原擬由粗魯海圖入界歷呼倫貝爾齊齊哈爾呼蘭寧古塔通過綏芬河出界今俄使在京請將路綫改由呼倫貝爾順綽爾河歷札賚特郭爾斯兩旗邊界至伯都訥經洩水甸子趨寧古塔至三岔口出界計移南二百餘里

此路較平渡兩江處較窄也究竟地勢民情若何且經由蒙古地方有無窒礙著恩澤延茂通盤籌劃當仰體朝廷聯絡邦交之意又須預防後患

若不允其請將如何措詞切勿襲拒俄成說徒生枝節再松花江可置小輪黑龍江可造通海大輪否著一併籌度速卽電覆

寄

黑龍江將軍電旨 五月朔八日

光緒甲午之役日本既燬我海軍奪我旅順馬關議款又狙擊我上相僅乃得敵是時朝廷震於喪地辱師念大陸與國惟俄最親又強鸞可倚再命李文忠歷聘歐洲實陰與俄訂攻守同盟之約也文忠衰年航海持節慷慨中外人士仰其風采至柏林時德相畢士馬克尙存親御宮車執手慰勞兩賢相遇一時遂有東方畢士馬克之稱歐人崇拜英雄誠不聞以成敗論人矣迨抵森彼得堡俄之君臣禮待優渥下榻皇宮以國君之禮處之而密約以成此卷所載圖稿則吾師翁文恭公在樞府譯署時所手自商定者當甲午事起文忠初不欲戰文恭惑於左右輕敵之謀一意主戰持論頗相齟齬獨論俄約則翕然無間蓋真視此爲救國之良策也文忠歸後俄於樸資茅斯會議席上仗義索還旅

順於是有東清鐵道之設而歐亞陸運遂通雖遼東半島乃握於外人手中然用趙救魏之策既行亦未嘗不沾沾自喜未幾日俄戰事復開旅順再陷東清之路自長春截而爲南滿吾國以退守中立之故坐視外人交鬩於境中事定之後轉乞憐於虎吻之下前功盡棄後患方滋茹痛含嗟於斯爲甚嗚呼當文恭贊襄密勿奮筆屬草之日豈不躊躇滿志取快一時詎知事變之來曾不旋踵夫祖龍肆虐曾何懼乎六國之連衡句踐雪讎端有資乎十年之教訓甯有謀己之不威而欲借人以圖敵者耶文恭既謝賓客小史出其叢殘得此數紙耿耿吾吾兄輯而存之以留先朝掌故持示不佞屬爲跋語余待罪東陲粗知崖略又先遊瓊海於文忠奉使軼事得諸耳聞其下榻之地又俄官親舉眎余者故備述之如此亦如天寶宮人談明皇時事也庚午歲盡雪窗呵凍正閩鄧邦述記

乙酉解元爲鹽山劉仲魯若曾南元爲通州張季直壽其他知名之士如臨

桂梁巨川濟綿竹楊叔嶠銳侯官沈濤園瑜慶番禺梁杭叔渭嘉興沈子封
曾桐陽湖屠敬三寄望江余壽平誠格元和王勝之同愈定遠方長孺孝傑
其尤著者也余試後回保定清苑侍先君寓所次年丙戌入京會試仍住虎
坊橋吳宅袁渭漁同年寶璜同舍渠自廣州來攜所得粵中舊書至琉璃廠
換得新書插架甚富一日以龔定庵集示余曰君讀此當有奇悟勿徒尙考
據爲也渭漁爲明賢六俊苗裔頗有民族思想余當時以爲異聞今則芻狗
矣三場與季直同一號舍時方從朝鮮吳筱軒軍門幕府假旋季直謂余江
南人文字柔靡汝文頗有剛氣余曰通海向無文學今出吾子及朱曼君周
彥昇諸文豪實因洪楊時代蘇州人避亂江北故變學風耳相與大笑視其
舍則纍纍者文獻通考遼金元明史滿坑滿谷夾帶特多對策題下余所不
知者問之則亦無有但曰吾惟以比例之法遁空耳榜出俱落孫山余乃返
保定侍吾父訪大院君消息是秋吾父令余回南完姻親至天津送歸住宮
北街裕通恆報關行行主洞庭山葉姓蘇人多寄宿于此吾父云李傅相命

汝謁見明日當去緣上年秋文忠以陵差在京北闕榜出卽問許星叔師索
闈墨見第十名卷詢知爲余故吾父入謁時及之明日余乘車至督署同見
者有道府等五人余以年幼最後五人者皆行半跪禮余以父命叩首見文
忠昂然直立頗以爲奇繼知督撫本不還禮大清會典有之起立後文忠招
五人者坐東首推余西首與彼並坐一奴子持水煙筒長可二尺餘文忠顧
長坐時出人頭地先與五人者言公事其一人聞公斥之齒相擊末及余問
在蘇考書院山長何人余對以潘順之先生則曰正誼尙是蔣心齋乎彼於
各地山長留心如此繼謂余須多讀書送客出吾父明日往辭文忠戲謂曰
汝子跨竈汝須好培養之父曰某庚辰至省已七年舉債度日無力使入校
讀書文忠問故父曰海防捐河工捐兩次壓班卽用實成不用文忠憮然曰
吾爲汝酌之余南歸贅於顧氏家次年春北上吾父以酌補正定縣己之任
正定在保定西三站明設巡撫卽常山趙子龍故里又爲漢南越王趙佗所
產地大佛寺隋之龍藏寺離縣署不遠時時往遊焉太守爲富順蕭濂甫世

本與吾父親若家人余幼時喜夜讀晨起則吾父早堂將退父未明卽起黎明卽傳案研訊吏役皆連夜不寐以待竟父任二十閱月論死者惟一人耳余婦留蘇妊子秋末奉命南歸接孥次年戊子二月北上吾父以哭蕭太守之喪病矣秋間調補平鄉縣謝正定事回省先兄以父病未愈不如回南乃以修墓假航海而南余入京候明春會試寓夏閩枝姊丈家余壽平同年亦同往其地在丞相胡同伏魔寺側對門卽繆筱山所居伏魔寺則有毛碩君喬茂萱兩年丈宿此候試榜出除壽平外余與閩枝皆報罷偕袁渭漁結伴而行舟中又遇季直漕漁謂季直曰當今天子重文章足下何須說漢唐蓋儒林外史中語余適從季直借此書閱之故以爲戲也至蘇未幾吾父患痰喘殊劇六月見背喪禮從儉吾父雖居官二年宿逋尙數千金百日後余以沈旭初丈之汲引館于盤門汪氏挈余弟一鵬伴讀生徒四人一汪瑞閩韻荀一韻荀兒子駿孫祜孫後祜孫更名士元一已忘其名居停爲汪瑞曾南陔其弟瑞高君謨南陔爲撫署文案君謨則直隸道員辦理天津支應局者

也每月考紫陽正誼平江三書院又收校外生六七人賣文爲生神觀日損
遂患失眠越二年辛卯房師孔少霑先生祥霖視學湖北招余往乃辭汪氏
赴鄂往三日卽病遂歸翌年春方愈壬辰未應春試館于鳳凰街陸氏生徒
三人來問字者如汪生心源屈生伯剛貝生季美盧生彬士魏生克威吳生
劍瀏今皆已五六十矣次年癸巳山長陸雲生先生開館題爲子曰巍巍乎
兩章余作兩卷皆超等而矮（超等六十名在下半段者名曰矮超等）生
徒之叔陸晉笙錦燧鄉試時以余課藝爲夾帶頭場首題卽子曰巍巍乎兩
章晉笙與余弟一鵬號舍相近乃以余文又一篇易弟爲之作二篇榜發則
兩人者皆中式生平未爲搶手而場外之文乃在場中入彀里中目爲三個
半舉人亦科舉時代腐敗之掌故也

翌年甲午余兄弟同上春官仍主夏姊丈家均不第回南後館于懸橋巷洪
氏是歲爲中日之戰卽割地賠款之第一次最大恥辱卽戊戌政變庚子聯
軍之張本亦卽辛亥革命之動機波瀾壯闊風雲瀾漫吾輩入場之先卽朝

鮮東學黨亂事之始時袁世凱爲駐朝商務委員屢電北洋請派兵助剿復
德惠朝王乞師文忠遂于五月初一日派海軍濟遠揚威二艦赴仁川漢城
護商並調直隸提督葉志超帶淮勇千五百人向牙山一面遵依天津條約
先照會日本日本隨即派兵出征五月十五日兵到仁川者已五千韓廷
大震請中國先行撤兵以謝日本中國不允乃與日本磋商一齊撤兵世凱
告大鳥圭介韓事漸平我兵擬即撤歸以避暑雨聞貴國遣大兵至華亦將
增兵兩軍雜處必生嫌隙倘宵小伺隙播弄或西人亦增兵抗衡以收漁利
不但韓危華日亦損宜彼此互撤以歸平和大鳥允諾而水陸兵來日益多
濟遠船管帶方伯謙方駐仁川見日兵多移船先去于是漢城內外滿屯日
兵仁漢華商紛紛逃散大鳥圭介干涉韓政韓已宣言不認屬邦文忠猶望
和解而政府主張大舉六月十二日文忠奉廷寄籌戰備乃派總兵衛汝貴
統盛軍馬步兵六營進平壤提督馬玉昆統毅軍二千進義州分起由海道
至大東溝登岸而飭葉志超軍移紮平壤皆淮軍也所派各兵雇英商三輪

分運而以濟遠廣丙二兵輪衛之廿三晨爲日兵輪襲擊濟遠管帶方伯謙見敵近惶恐匿鐵甲最厚處遭日砲毀其舵卽高懸白旗下懸日旗逃回旅順高陞沈我軍死七百餘二十七日布告各國飭駐日公使汪鳳藻下旗回國二十九日牙山失守葉志超退回平壤捏報勝仗稱于二十五六七等日迭次斃倭兵五千餘人得旨賞給軍士銀二萬兩將弁保獎者數十人焉方五六月間日本兵船齎集朝鮮殆如梭織而各華艦避匿於威海衛逍遙海上啓椗出口約歷五六點鐘便遽回輪八月初旬北洋疊接軍電請濟師以壯聲威遂以招商局船五艘載運兵丁銀米以海軍兵艦護送凡鐵甲船巡洋船各六艘水雷船四艘合隊同行中秋日安抵鴨綠江口五運船鼓輪直入淺水兵船及水雷船與之偕餘船小住於離江十里或十六里之地爐中之煤未息也十六晨瞭見南方黑烟縷縷知日艦將至海軍提督丁汝昌傳令列陣作人字形鎮遠定遠兩鐵艦爲人字之首靖遠來遠懷遠經遠致遠濟遠超勇揚威廣甲廣丙及水雷張人字之兩翼兼以號旗招鴨綠江中諸

戰船悉出助戰俄而敵艦漸近列陣作一字形向華軍猛撲共十一艘其巡洋船之速率過於華軍轉瞬間又易而爲太極陣襲人字於其中華艦先開巨砲示威然距日船九里不能及也砲聲未絕敵船奮至與定遠鎮遠相去恆六里許蓋畏重甲而避重砲且華砲之力不能及日兵之彈已可至也與人字陣末二艦相逼較近欺砲略小而甲略薄也有頃日艦圈入人字陣脚致遠經遠濟遠三艘皆被挖出圈外致遠失羣後船身疊受重創勢將及溺其管帶鄧世昌開足汽機向日艦飛馳欲撞與同沉未至而已覆溺舟中二百五十人同時殉難蓋中日全役死事者以鄧君爲最烈矣其同時被圈出之經遠船甫離羣火勢陡發管帶林永升發砲以攻敵激水以救火依然井井有條遙見一日艦似已受傷卽鼓輪追之乃被放水雷相距閃避不及遽被轟裂死難者亦二百七十人慘矣至管帶濟遠之方伯謙卽七月間護送高陞至牙山途遇日艦逃回旅順者也是日兩陣甫交伯謙先挂本船已受重傷之旗以告主將旋因圖遁之故亦被日船劃出圈外致經兩船與日苦

戰方伯謙置而不顧如喪家狗遂誤至水淺處時揚威鐵甲先已擱淺不能轉動濟遠撞之裂一大穴遂以沈沒揚威遭此橫逆死者百五十餘人方伯謙驚駭欲絕飛遁入旅順口越日鴻章電令縛伯謙軍前正法云廣甲一艦逃出陣外誤撞島石日水雷擊碎之陣中自經遠致遠揚威超勇沈濟遠廣甲逃與日艦支持者僅七艘耳海軍既在大東溝被夷陸軍亦在平壤同時失事平壤爲朝鮮要鎮西南東三面均有大江圍繞北面則枕崇山城倚山厓城東江水繞山南迤西而去西北隅則無山無水爲直達義州之孔道我軍葉志超聶桂林豐陞阿左寶貴衛汝貴馬玉昆六將共統馬丁三十四營自七月中會于此地當中國之初發兵於牙山也副將聶士成曾建議以爲當趁日兵未入韓地之先以大兵渡鴨綠江速據平壤而以海軍艦隊扼仁川港口使日本軍艦不得逞牙山成歡之兵與北洋海軍既牽掣日軍然後以平壤大軍南襲韓城云云鴻章不能用其精神全在守而不在戰此其病根也時依李之部署馬玉昆率所部毅軍四營繞出江東爲犄角勢衛豐

二軍十八營駐城江南岸左軍六營守此山城上葉聶兩師城中十二三四等日日兵已陸續齊集平壤附近互相挑戰彼此損傷不多至十五日晚敵部署已定以右翼隊陷大同江左岸橋里之砲台更渡江以衝平壤之正面而師團長本隊爲其後援以左翼隊自羊角島下渡大同江衝我之右十六日在大同江岸與馬軍相遇劇戰敵軍死傷頗多砲台卒被陷時左寶貴退守牡丹台有七響之毛瑟槍及快砲等鏖戰頗力敵軍連發開砲寶貴負傷卒遂大亂午後四時半葉志超急懸白旗乞止戰是夜全師紛紛宵遁從義州甑山兩路爲敵兵截殺死者二千餘人平壤遂陷厥後九連城失鳳凰城失金州失大連灣失岫巖失海城失旅順口失蓋平失營口失登州失榮成失威海衛失劉公島失海軍提督丁汝昌以北洋敗殘兵艦降於日本而戕於是中國海陸軍遂盡

中東戰事畢馬關條約成遼臺既割二萬萬償款既納歐人知東方病夫之已入膏肓各經略東方事歐洲之戰場忽移於亞境俄法德三國有迫還遼

南以市恩于我之舉動遂有光緒二十二年中俄密約之事其略已見上文於是德人據膠州及山東鐵路礦務權俄人據大連旅順及擴充東北鐵路法人據廣州灣及南部鐵路英人據威海衛九龍及種種利益於是路權稅權練兵權漸漸外移又與英訂長江一帶不許讓與他國之約與日本訂福建全省不許讓與他國之約讀乾隆英使覲見記吾人視各國如蠻夷戎狄幾不知天下尚有所謂列邦者至五口通商而自大之心降至零度至馬關條約而媚外之心漲爲高潮中國之弱久矣而剝腸剔腹盡出底蘊與路人共見之則自甲午之役始其所以致敗之由不一端卽以海軍論之興未兩年而頤和園之工程大起所籌之款盡充土木之用名則海軍實則園工直至平壤鳳凰報頻達乃下詔停海軍衙門吾聞醇賢親王奕譞之逝也文忠哭之慟蓋漢大臣必以滿人爲護符雖曾胡不能不利用官文奕譞旣薨文忠獨力難支致戶部有停止軍火十年之奏故以甲午之敗蔽罪於文忠文忠不任也前乎此者則曾文正奏請翰林入同文館而倭仁沮之劉銘傳

奏請全國造鐵路而劉錫鴻沮之亦吾國得失之林也重以帝后之爭激成戊戌庚子之兩次慘辱謂清之亡亡於那拉氏可也謂中國之弱弱于愛新覺羅之家事可也今者日本視我如無人之境遼瀋吉長任便攻殺試取馬關條約一研究之誰生厲階至今爲梗後之視今亦猶今之視昔耗矣悲哉自甲午報罷南歸仍館於陸氏吾國經日本一擊迷夢始醒昔之醉心科舉者漸知海外新潮之不可抗讀譯書治算學者日多至乙未而中日和議成賠款割地元氣大創南海康有爲聯公車三千人上書言變法其年七月京師強學會開余在里中約同志設蘇學會始設於舊學前文丞相祠元和令李紫墩年丈實左右之是時風氣初開長老驚詫至有厲氣所鍾之考語先是上海有南洋師範學堂之設盛京卿宣懷延張經甫煥綸爲總教習何梅生嗣焜爲提調卽今之交通大學也考各地高才生習師範余弟與陳頌平懋治同入選至滬肄業未數月余弟因事罷學回里自設小學於唐家巷其地原爲無忌堂亦李紫墩大令撥充學舍蘇學會卽遷入其中生徒數十人

課本皆自行編訂有英法文教習各一學會中在滬購買新出圖籍會員殆近百人閱書者以費仲深爲最勤奮三五日卽易他書費君是時尙未冠也強學會不數月爲言官所劾封閉上海會所亦廢而黃公度倡議開一報館卽時務報梁啓超專任撰述著變法通議西學書目表等書十月湖南巡撫陳寶箴督學江標聘梁主時務學堂講席公度爲按察使湘學一時鼎盛未幾德國據膠州灣瓜分之憂震動全國湖南始創南學會演說大行又有湘報鼓吹新學余兄弟在唐家巷小學七日一集會同人中如邱公恪震汪袞父榮寶皆少年奮發感慨激昂學堂校舍不敷余弟借貲建造余是時已移硯於懸橋巷洪氏課文卿侍郎之孫爲校刻元史譯文證補

翌年戊戌會試弟以校務未行余獨往初坐京津火車仍住夏閨枝姊丈家時已由丞相胡同移居官菜園上街及同考官揭曉閨枝分房余以內弟例行回避閨枝入闈時託友人秦由衡同年樹聲招待以散悶時康有爲在南海館開保國會由衡拉往聽講入館門已聞講座大聲擊節見南海弟子梁

任公麥孺博及康之弟孺博初納交余亦署名于會簿言官又有彈章二次開會於貴州館又往聽焉京朝向習媵媵會中人多狂士言官又有禁阻之請壽平來言之同鄉報罷南歸余附之而返繼聞德宗銳意變法譚嗣同林旭劉光第楊銳入爲京卿令各省俱設學堂虎虎有生氣乃八月政變六君子流血康梁竄於英日於是吾蘇學會無形解散而學校諸生父兄多請爲入股李紫墩年丈已移令江陰至移書家弟謂傳聞令兄神經失常有之否此雖謠言亦可見人心之惶惑矣

戊戌政變言人人殊余據北洋幕府所聞譚嗣同因西后干政謀圍頤和園說德宗賞袁世凱侍郎銜欲令人衛袁本強學會中人可爲已助奉旨後入京謝恩寓海淀旅店嗣同夜訪之出一德宗墨諭曰今日之事如不諾則以手槍擊公後我亦自盡袁云皇上所命無不遵者但向例皇帝必用硃諭墨筆盡人可爲不能奉詔譚曰然則明晚卽以硃諭來不可爽約次日召見德宗示以所命袁極言母慈子孝爲立國之本退朝有某侍衛大臣拍其背曰

好小子蓋西后遣
轅則見榮祿已命
乃跪求榮爲作主
日之事皇上處于
臣子則不能保
遺年譜則云八月
居頤和園而用榮
在握也而景帝珍
大考翰詹預知賦
妃兄某捉刀列高
禦江海關道于魯
奏詰問爲那拉后
於是帝黨謀矯旨

回內廷嚴訊景帝懼而吐實於是楊銳譚嗣同劉光第林旭楊深秀康廣仁六人就逮數日未具獄詞遽斬西市廣仁以康有爲弟而誅深秀以常言得三千桿毛瑟槍圍頤和園有餘也康有爲梁啓超跳於英使館而免各省惟湖南行新政最認真得罪最甚巡撫陳寶箴學政江標巡警道黃遵憲皆革職寶箴子三立與焉自是啓超避地日本既作清議報醜詆那拉后復作維新報痛詆專制倡言革命章炳麟尙書革命軍各印本出人人皆有革命思想矣云云石遺所言皆當時傳聞之語但亦有未確者那拉后之垂簾實由斥去禮部懷塔布等六堂官懷之妻入內哭訴后于是借回宮名實行訓政向例太后回宮須先期傳諭此次突如其來德宗跪起問老佛爺何以不先傳諭那拉后云我偶想起去年所種葫蘆耳汝可隨我觀之觀畢過殿門入叫起德宗跪受責軍機大臣王文韶等跪碰頭宣諭步軍統領入袖出一封信出外開封即逮捕某某等之密諭也康有爲已出京過烟台由美人李提摩太救往外國梁啓超爲日領事救至大沽兵艦尙召鐵路總辦王苑生登

舟縱談一日夜方放棹至日本也至楊深秀則以垂簾命下抗疏請撤簾而死抑尤烈已梁啓超飲冰室文集有六君子傳可參觀之

吾友江標字建霞己丑翰林游歷日本知吾國之未可言戰甲午朝鮮之役會上書掌院請代奏未果暨督學湖南極力提倡新政新學如唐才常譚延闓譚人鳳畢永年之流皆所取高才生試取沅湘校士錄觀之則列名者非維新之魁傑卽革命之偉人自湘錦旋正拜京卿與總理衙門章京之命未幾政變以言官參劾有與熊希齡庇護奸黨潛通消息語革職交地方官嚴加管束君所居與唐家巷相近常至小學堂談時事又以廣東浙江兩書局全份書籍寄附學中是時學會禁矣科舉復矣保國會有名者幾被錮王君九有勸余避至上海之語余以會員中自尙侍及翰詹科道不知若干人未必及余坦然處之惟守舊之徒揚揚得意昔之自附維新者惴惴懼禍獨君意氣自若過從益密不數月忽患肺疾以逝南菁書院山長丁叔衡先生輓聯云公死在庚年前可矣黨獄俟再世後論之極爲精警一似預知庚子之

拳禍與革命之將興者使建震至今猶存不啻房杜之河汾商山之黃綺而當其生時毀者多而譽者少是知先知先覺之難爲而依草附木者之易於容悅也

戊戌八月以後黨錮既興八股又復恹恹失志繼以悼亡館主以洪生入學不復延師已丑乃入唐家巷小學授特班生但校中生徒漸減經費不敷僅羈糜勿使中絕不得已余弟乃就廣德州陳牧聘往課其子全校事余與同人任之時西后及頑固大臣議廢立各國公使不謂然榮祿奏請遣李鴻章調公使意旨將以大阿哥溥儀代帝位鴻章一日至總理衙門各國使臣來會各使問貴國廢立之謠有之乎李笑曰決無此事又轉詰之曰如誠有之貴使意如何各使均對曰不贊成李乃因榮祿以達於后故溥儀僅爲大阿哥而后讎外之心實自此始上海電報局總辦經元善聯名爭廢立事西后震怒逮捕經元善避地海外御史余誠格奏經元善爲盛宣懷之屬員請飭盛宣懷交出盛大恐謀諸幕中何梅孫何爲草奏云當今之世父不能保其

子師不能保其弟卽如余誠格爲康有爲之房師若責成余誠格交出康有爲恐亦未能遵辦西后覽奏釋然而余誠格以廣西思恩府知府謫外矣何君妙才一時傳爲趣語剛毅者庸妄人也南下籌款在江南搜括二百餘萬往廣東又四百萬繼見西后謀廢立阨於外人以爲西人所長在乎槍砲于是有不畏槍砲之義和拳以中西后之欲是年二月十一日以剛毅爲軍機大臣召見時力贊李秉衡之才因李爲山東巡撫時曾以大刀會燒教堂殺教士爲義民故也卽命李至盛京查案事畢授爲長江水師提督李過武昌訪制軍張孝達謂張曰太后命我南來除外人耳庚子夏毓賢抵山西巡撫任告司道曰義和拳確是義民其魁首有二一爲李鑑帥一則我毓賢也是年五月北方拳匪方熾朝命李秉衡帶兵來京七月初二日命幫辦武衛軍務未幾洋兵自天津入京李駐楊村所統三十營不戰而潰仰藥自盡云毓賢始爲山東巡撫賞匪首朱紅燈銀兩匪旗大書保清滅洋山東撫提部院毓字樣毓出示改大刀會匪名曰爲義和團連燒教民家不可勝計教士稟

報諸使奉旨毓賢來京陛見山東巡撫着袁世凱署理毓入京極言義和團忠勇剛毅端王莊王皆信之遂有撫晉之命八旗子弟望風希旨舉國若狂自邸第至寺人靡不習拳山西全境遍懸紅燈任團民搶掠焚殺毓賢于六月自請帶兵勤王直至聯軍入京始行遇兩宮于途次李鴻章與各國議和德王令先議罪魁然後議約駐德俄英美法日各使臣電參釀禍諸大臣以李秉衡毓賢剛毅趙舒翹董福祥端王瀾公爲禍首李鴻章劉坤一張之洞盛宣懷等先後彈劾于是毓賢伏法剛毅道死趙舒翹賜自盡董端瀾等流竄方事之殷也總理衙門行走許景澄袁昶抗疏言請將信崇邪術誤國殃民之徐桐剛毅啓秀趙舒翹裕祿毓賢董福祥治以重典于七月初二日步軍統領下之獄初四日於菜市口殉節臨刑神色不變天下冤之時東南數省劉坤一張之洞袁世凱盛宣懷與外人定保護南數省商教章程保護上海章程得以無事奔走其間者爲湯壽潛文稿多出其手南北樞紐實惟山東袁世凱撫東境內拳匪剿逐無遺疊電奏請保護使館皆留中自洋兵入

京兩宮西狩京官南下者至德州則拳匪絕迹賓至如歸東南各省文報皆由山東轉遞督撫請辦禍首皆惟馬首是瞻自是風采聞於中外全權大臣李鴻章于光緒二十六年十一月初一日與各使議定約章爲被戕之德使克大臣立碑懲辦傷害諸國國家及人民之首禍諸臣端王載漪輔國公載瀾斬監候加恩發往新疆永遠監禁永不減免莊王載勛都察院左都御使英年刑部尙書剛毅大學士徐桐前四川總督李秉衡均已身死追奪原官卽行革職又兵部尙書徐用儀戶部尙書立山吏部左侍郎許景澄內閣學士兼禮部侍郎銜聯元太常寺卿袁昶開復原官昭雪甘肅提督董福祥革職懲辦諸國人民遇害被虐城鎮停止考試五年被害之日本書記官杉山彬派專使赴日本代表惋惜在諸國被汚瀆及挖掘各墳塋建立滌垢雪侮之碑禁止軍火及各種製造軍火材料入口二年付償款四百五十兆兩各使館境內專與任用由使館管理中國人民不准居住大沽礮台及有礙京師至海通道之各台一律削平酌定留兵駐守以保京師至海通道係黃村

鄆坊楊村天津軍糧城塘沽蘆台唐山灤州昌黎秦皇島山海關餘如商改通商行船條約及有關通商各事宜改善北河河道設黃浦河道局改總理衙門爲外務部均在約中附入庚子之變由戊戌反動而來從此中國萬劫不復矣

拳匪起於山東袁撫繼毓賢之後時袁之翼長爲姜桂題本准軍宿將目不識丁言於袁曰有神拳師不畏槍砲盍試之袁乃聽其所爲拳師云須搭高台三日行法三日後袁令陸軍環而發槍拳師盡殪乃悟其詐時直隸拳匪蜂起惟山東境內捕有拳匪卽正法謂果是義民不應逗遛山東故直東交界之德州成一有匪無匪之界線拳匪不能越山東而南長江乃以定互保之局姜桂題之事余聞之山東幕府中人亦一趣語也

庚子聯軍入京那拉后挾清德宗西狩保皇會歷在外洋運動華僑積有巨款以戊戌維新中止密謀舉事武漢時瀏陽唐絨丞才常實主其事在長江上下游有所布置因哥老會爲秘密會黨之一有勢力於長江才常以勤王

說之其頭目謂吾黨若以勤王號召其勢不可理喻必動之以利乃可致之才常不得已故有大戮三日封刀安民之說爲當局詬病自滬至漢均有所謂富有票者爲入黨祕證事成則泝漢入襄河劫德宗於西安以圖復辟機事不密才常被捕授命亦維新痛史也梁啓超在橫濱候船失期事敗不果行否則及於難矣保皇黨所蓄罄盡不能復振是年十月余道出宜昌途次見東湖縣張榜揭示第五次富有票繳票免究者約二百人然則東湖一縣必有千人矣以湖北全省計之數更可驚才常爲兩湖書院高才生與譚嗣同齊名兩湖總督張文襄欲勿殺爲湖北巡撫于蔭霖所持遂戮之維新之人太息不止

余之過宜昌也有蜀游之役同縣吳鈍齋年丈新授四州學政約閱卷並課其兩公子以十月二十六日抵上海章君伯初方往美國舊金山留學詢其行程彼抵美祇月餘余抵成都尙在其後吾國交通不便當時有公司船失事於崆峒峽全舟覆沒非民船不可也上海至漢口水程二千二百七十六

里漢口至宜昌一千四百零八里宜昌至萬縣九百六十里萬縣至成都一千三百四十三里都共五千九百八十七里

離宜昌城十五里有三游洞循江而上一路山勢奇峭亂石縱橫棋布爲水齧者片片成雪羅狀舟行疑無路螺旋蟻盤繚曲深宵洞深十餘丈中成佛殿再入則石乳下垂瀼瀼然名曰甘露泉僧寮三楹跨洞左右爲游憩之所
有明人重刻白樂天與其弟知退及元微之到此故名又東坡父子與黃魯直爲後三游居易文謂初見石如疊如削怪者如引臂如垂幢泉如瀉如灑奇者如懸練洵不誣也次日出東湖門游東山寺有吾鄉覺阿上人所書山居詩云僻處山村靜養真繩牀經案靜無塵東邊茅屋先迎日南向梅花早得春長日喜添清淨課荒年幸作太平民袈裟幾輩嫌多事豈獨儒冠誤我身他日檢梵隱堂集中未知載否

自宜昌而上舟行萬山中千態萬狀不可究名如肺葉下垂如鐘乳百結如冰合來其纍纍不絕如老僧破衲片片欲墮如刀斫無痕如斧鑿無跡如虎

豹狻猊猿狖百獸攫拏遊戲如羣神袍笏寶相莊嚴二十二日過崆峒峽水聲渾渾泡泡大石橫亘處水俱作漩渦狀過此而上則牛肝馬肺厥狀俶詭再上至新灘爲最險惡同人俱上岸崎嶇亂石間扶掖而過視岸石遠望如煤菑者卽之作深碧色次日過洩灘水涸不甚凶惡是爲歸州境過此爲巴東縣無城郭山多赭石自入峽江石五色俱備造物之巧不可階也再上過鐵棺峽入布袋口爲蜀楚交界翌日至巫山所謂十二峯者隱約可辨自此入四川奉節縣境過灑瀨堆望見白帝城奉節爲夔州首縣街道以巨石砌成再上過雲陽縣南岸有張桓侯廟舟駛不及登過新龍灘舟中物須起撥輕載方得過由雲陽以上山勢平衍不似前之突兀至萬縣舍舟而陸自宜昌至此舟行已十三日矣

由萬縣乘肩輿行輿以竹篾爲之大竹爲杠輿夫三人加繹夫四人遇高坡則繹夫引而上江南無此也一路山色清絕田如梯形天然圖畫山泉作溝洫每區圍以泥土溢則於缺口處流入下區臘月豆麥俱似吾鄉清和天氣

過響鼓嶺爲萬縣樂山交界中過生死巖石梁橫亘間以欄楯山中水田四繞往往見紙窗竹屋有亭翼然舍輿步行有水碓自春次日過佛耳巖山勢斗絕下界白雲在足底矣一路鶯粟遍地此爲可歎入大竹界竹陰濃綠鬢眉均作碧色煤峒林立每斤一文色白燒之如炭灰若以鐵路運至江南不知利若干倍過九盤山至捲洞門所過見煤峒六七與緯夫談余蠻子事聞大足銅梁一帶百五十八團俱聽其號召與洋人爲難余係挖煤出身而有馭衆之術近爲巴令王柳堂所獲至萬縣則二千餘人乞免蜀中風氣閉塞得以惑衆現已錮省中無能爲矣行在頑錮之徒尙有奏保余蠻子與湖南周漢者義和團不足責而士大夫復揚其波豈不慎哉

由大竹過九盤山渡渠縣之李渡河自此路漸平衍山勢亦和易近人至蓬州南界之照燈壩住復興店見壁上有五可詞人八歸一闕頗可誦詞云積陰成瘴積晦成雨空山寂寂行客已自不了辛酸更那堪杜鵑聲住鷓鴣聲切苦道不如歸去怎又道哥哥行不得堪歎此情此景寸心千折早知險巖

如此相思如此爲甚當時輕別倚竹調笙抽琴席月遙憶那人今夜雨餘沙路滑回頭分袂處但只賸亂山層疊極天涯一碧無情若有情時不會者般顏色

由蓬州而順慶府城爲綢緞薈萃處過順慶百三十里爲蓬溪縣途中見竹皮所包之滑車兩人踏之間諸輿夫云下有鹽井爲汲水煮鹽之用又有斜葉風車借水力爲旋轉其製甚巧逾蓬溪過射洪而中江而三台而金堂見橘樹甚多綠葉不凋秀色可愛金堂煙葉爲雪茄原料味濃厚過金堂入新都界爲楊文襄故里過新都入成都城城外有向忠武公墓阿文成公祠住青石橋明陽店因前學使吳子修先生尙未移署也自萬縣陸行至省已半月矣

余至成都爲庚子臘月十九日十日後卽辛丑元旦原約課學使兩公子故不出柵校卷惟成都所屬十六屬與調省之外屬十六屬卷及尊經書院課卷則在襄校之列除歸途取道重慶外其餘未能暢遊殊爲憾事每星期日

必徜徉於諸葛武侯祠杜少陵浣花草堂二處武侯祠前爲昭烈廟祠左精舍毗連饒竹木之勝最後爲惠陵卽劉先主陵也雙江劉咸榮聯云長留此漢家半壁天三國至今疑家漳河無尺地取不得中原一寸土千秋遺恨惠陵風雨尙生愁元和顧復初聯云臣本布衣一生謹慎君眞名士萬古雲霄用成句天衣無縫出祠稍西北卽草堂寺左爲浣花祠祀唐崔旰妾浣花夫人事見舊唐書再進爲杜公祠少陵垂老窮愁而所居長留天地間爲錦城名勝此老許身稷契身後足以自豪成都道觀有名者爲青羊宮因老子得名規模宏敞後祀唐高宗李淵有花市特盛僧寺有名者爲昭覺寺寺屋四百餘間近寺里許檜柏參天大殿柱皆栴木約兩抱聞寺基佔地九百餘畝亦精藍所罕有也

在成都之江未海瀚周孝懷善培王吟伯棧時相過從沈衡山鈞儒時從其叔父淇泉學使於陝西三原時通訊記趙展如舒翹撫蘇頗有美政以附和拳案賜死臨終自書云主辱臣死夫復何言所難堪者母老子幼悠悠蒼天

悔恨何及二十四字亦可傷也宗室壽富字伯福殉庚子之難有絕命詩云
袞袞諸王膽氣粗竟輕一擲喪鴻圖請看國破家亡日到底書生是丈夫曾
蒙殊寵對承明報國無能愧此生惟有孤魂凝不散九原夜夜祝中興薰齋
相雜恨東林黨禍牽連竟陸沈今日海枯白日見兩年重謗不傷心伯福以
新黨被錮者大節凜然讀之起敬

自上年拳禍創鉅痛深是年朝命裁撤六部書吏責成司員親理照鴻博舊
例設特科自明年爲始鄉會試頭場政治史學論五篇次場外國政治藝學
策五道三場四書義二篇五經義一篇武科永遠停止又令各省鑄銀元俱
附廣鄂兩局部藩出入統搭三成江督劉坤一鄂督張之洞會奏變法自強
摺風行一時然西安來均謂宮廷近事仍以賄成有誦（昌黎）中朝大官
老於事詎肯感激徒媵媵（放翁）不望夷吾出江左新亭對泣亦無人二
詩以刺時事者八月二十四日兩宮自西安啓蹕回京沿途供張甚侈較之
庚子出奔行在時大不同矣十一月二十八日到京李合肥先於九月在京

出缺以王文韶署全權大臣袁世凱署直隸總督合肥予諡文忠

余雖未徧陟蜀境聞諸襄校同人言川南甯遠一帶多猓獯族由小相嶺而過大相嶺嶺上或雨雪嶺下可麾扇其高可知逾嶺皆夷人行走如飛語言衣服皆與漢異大渡河卽五月渡瀘之瀘水川多金礦有水黎土司者商人以貨貿易與土人習許入遊一巡入則以草履出則履中皆金沙其金之富如此

壬寅之秋安岳金堂資陽資州簡州忽有義和拳起拆教堂焚教民與庚子京師事相類八月十四日匪竟入城走馬街已殺數人臬司陳璠成都府沈炳堃捕匪正法沿街出巡人心始定川督奎俊電軍機處拳匪入城戒嚴云云朝命晉撫岑春煊帶兵署督川局遂安余於九月中旬附四川副主考官俞階青同年之舟次東下以次年爲癸卯會場將赴汴應試因同考官夏閏枝姊丈入關二次迴避乃於閏五月入都應經濟特科廷試正場一等四名覆試一等二名以知縣發往直隸補用自此入北洋幕府矣經濟特科之試發

端於光緒二十四年貴州學政嚴修一摺由總理各國事務衙門會同禮部
議訂章程上諭著三品以上京官及各省督撫學政各舉所知限於三個月
咨送總理各國事務衙門會同禮部奏請考試一俟咨送人數足數考選即
可隨時奏請定期舉行後至二十七年行在內閣奉旨照博學鴻詞例於本
屆會試前舉行二十八年又諭改於明年會試後舉行二十九年五月二十
四日上諭經濟特科保薦人員著於閏五月十六日在保和殿考試蓋距戊
戌嚴範孫學政奏請之期已閱六稔始以政變擱置中以聯軍入京兩宮西
狩痛定思痛舊事重提是時刑部方有杖斃富有票黨人沈蓋一案其與權
要素通聲氣或夙列清班者往往已經保薦不願應試諫垣交章論列皆爲
黨人混入京僚主張嚴格余以甲午而後三次迴避無路進身揭債入都姑
妄一試時天津火車三等者無棚一肩行李火繳張天甫近永定門大雨淋
漓至都寓夏閏枝姊丈所次日患痢夜起數十次夏姊丈延王聘三侍御診
治旋愈離十六日考試之期未一旬尙疲憊不堪也

特科首場題大戴禮保其身體傳傳之德義師導之教訓與近世各國學校德育體育智育同義論漢武帝造白金爲幣分爲三品當鑄多少各有定直其後白金漸賤鑄制亦屢更竟未通行宜用何術整齊之策二十七日覆試題周禮農工商諸政各有專官論桓寬言外國之物內流而利不外泄則國用饒民用給今欲異物內流而利不外泄其道何由策余初至北洋時官報局總辦張遜之孝謙屬編經濟特科同徵錄將前後公牘名單檔案彙成一冊付印視鴻博時代之鶴徵錄如大巫之與小巫矣

特科兩場俱張文襄總校首場取一等梁士詒等四十八名二等桂培等七十九名共百有廿七人覆試祇取袁嘉穀等九名二等馮善徵等十八名共廿七人傳聞文襄初定仍取百餘人慶親王奕劻傳旨不得過三十人蓋內廷畏革命黨混入京僚預備散諸各省余卷本列第一拆封見一江蘇舉人以煌煌大典之特科而首列本無官階過於減色乃以原定第十名之袁君易之袁爲雲貴總督王文韶所保又新科庶吉士授職編修免其散館余以

第二名發往直隸以知縣補用引見後謁見各閱卷大臣文襄時以湖廣總督留京定學制接見各門生開口卽云你們濶極了康熙乾隆鴻博數百人現祇二十七人名貴之至謂余曰你願從余往湖北乎余曰書生不諳吏事湖北人才所萃從師學習公牘固所願也退後見鄧孝先君談及此事孝先云香帥門生四川夏某入幕十餘年以咯血終子精神不能隨老師余爲君不取然已諾之不能背也乃文襄奏定學堂章程久未脫稿延至月餘余贊斧將罄幸文襄幕前汪荃台世丈言諸文襄許先往直隸直隸總督袁世凱先已允文襄電調長蘆運司汪瑞高爲余先容袁督一見卽令入幕不三日而委札下矣

北洋幕府二十餘候補道有陳昭常蔡匯滄阮忠樞翰林則子式枚傅增湘留學生金邦平等天津洋兵初退舉行新政經緯百端海門周嘉祿本管學務將南歸乃以余繼之學務處總辦嚴範孫修本壬午同年卽貴州人相傳二百年無此文宗者人品學術中外推崇余新進惴惴除公牘外買書自

修以補學力之不足如此一年間除出見外未私謁府主未嘗求一階月薪六十金未嘗求加一文有所委託未嘗辭謝人或以爲駭或以爲清不問也天津學界漸以虛譽相加一年後項城命兼辦奏牘未幾而警察也地方自治也交涉或法律也凡舊幕友所不能辦之新政幾無役不從實則每一問題必研究三五日博咨而後下筆其有心所不安者必面諍不敢阿也

五大臣出洋在火車站爲黨人吳樾所炸項城命爲文勸告革命黨人不爲則有人疑余爲有連爲之措詞實難下筆余乃爲四六一篇高懸於各火車站粗通文義者不能讀也吳樾爲保定師範生項城欲派某道員查辦某有屠夫之目余力爭不可請以毛道慶蕃往札文中有該道往查時如有爲人覺察所查何案者卽惟該道是問語結果祇革一保人之功名而已此時海外革命風潮正盛雅不欲激成士氣也

北洋大臣行轅卽清德宗預備爲閱兵駐蹕行宮而建造之地戊戌政變後慈禧幽帝於瀛臺閱兵之禮不舉項城奏請改行轅而原有之北洋行轅則

爲津海關道署津埠縣城經聯軍都統衙門時拆去城基均成馬路公私各機關俱爲聯軍佔領時唐君紹儀任津海關道與項城本至交樽俎折衝使洋兵分期退出照約津不得駐陸軍祇有衛隊及警察維持地面卽以陸軍挑選改爲之自庚子亂後拳匪餘孽伏處天津苟有舉發俱付營務處審決大都處死幕府婁椒生先生謂項城按法律宜從寬典項城答之曰此輩如臭蟲孳生不絕惟有芟夷淨盡以遏亂萌蓋取周禮刑亂用重之義所謂水懦火猛也不二年津埠治安爲各省冠有六個月不見竊盜者西人亦爲歎服

督練公所爲練兵總匯王士珍任總參議分設教練兵備參謀三處每處一總辦一會辦公所之門卽在行轅東偏挂刀制服之軍官出入其間若田君文烈張君紹曾靳君雲鵬唐君在禮高君爾登時與往來余未習軍事一日奉批以步兵操典囑爲潤色僅就其文義不適者分條簽出又數日有事候見遇教練處何君宗蓮亦至及入謁何君卽以步兵操典稿上呈已將余所

簽出者亦分條駁回項城曰汝輩武夫不知文墨此原簽之人即在座之張某也何君大窘連稱余爲老夫子余先退出頃何君亦來余齋就商余曰我本不願強不知以爲知府主強余爲之雖有改正於文義本無出入請公酌之可也何君後爲第一鎮統制與余相得甚厚其姪卽茂如曾爲淞滬護軍使亦與余訂交此一段趣史至今猶爲捧腹

余初至天津時至小學參觀見每校學生數俱在三百人以外詢諸校長何以致此發達校長曰此義和團之賜也八國聯軍在京津一帶氣燄熏天爲家長者飽受刺激知非興學不足圖存又科舉在拳匪區域俱已停止舊日舉貢生監均無出路嚴範孫先生乃設師範講習所利用各校傍晚時間一面多派出洋學生或短期師範因之師生均努力於學所謂貧賤憂戚庸玉汝於成也某校長洵知言哉

光緒三十年間朝有大政每由軍機處問諸北洋事權日重往往有言官彈劾賴中朝信任未爲動搖毛碩君年丈上書勸其學湘鄉之謙退項城雅重

之然軍人性質頗與胡文忠所言包攬把持爲近但其虛懷下士亦有不可及者與幕府言或謂吾文字不通汝爲我改之屬員多就原文稍加是正彼卽不懌謂如是不足蓋吾愆也盡易之則大喜然長篇文字經其竄易者如神龍點睛起稿者自愧弗如固由更事之多抑其天稟有大過人者一日晨起召余商公事問已食否答以已食乃令侍者進早餐先食雞子二十枚繼又進蛋糕一蒸籠旋講旋剖食皆盡余私意此二十雞卵一盤蛋糕余食之可供十日無怪其精力過人也兩日奔奔有神凡未見者俱以爲異與人言煦煦和易人人皆如其意而去故各方人才奔走於其門者如過江之鯽然所用無私人族戚來求食者悉以已俸食給月廩不假事權屬吏苟有贓私必嚴劾治罪總督本兼鹽政時長蘆及永平七屬鹽務餘利巨萬又灤州煤鑛啓新洋灰公司皆蒸蒸日上每日彼等拉余入股余拒之無諸己而后非諸人余爲一省長官而近利何以責人故袁氏所有股票皆段芝貴以黑龍江巡撫罷斥後虧帑過多項城爲出貲彌補而以股票作抵非袁氏所固有

也其不用私人不有私財非當世貴人所能望其項背使遇承平之世豈非卓卓賢長官哉此非一家之私言也凡當日過北洋聞政者之公言也

修訂法律館大臣爲伍廷芳沈家本伍擬刑事訴訟草案用陪審制沈不謂然乃問諸北洋先由刑幕婁椒生具覆奏稿項城嫌其過舊以屬余余乃請偕金君邦平同具稿金爲述意余屬文主用檢察制案乃定董君康自京之日本過余力言陪審制不宜於吾國董君法律綜合中西余亦信爲導師是爲余與董訂交之始

南皮張文襄督兩湖時值七十生辰項城送壽屏十六幅命余爲文而使官報局總辦張遜之孝謙書之遜之書名本重若幕府能文之士多如過江之鯽何以徵及下走偶與同事謝仲琴先生談及謝君謂余曰府主以南皮爲文章山斗善罵人汝與遜之皆出南皮門下若以爲寫作不佳則是自罵其門生也余恍然項城雖此等交際小事尙鈎心鬪角亦見其精力之過人也考察政治大臣回國時一時輿論靡不希望立憲南通張季直致書項城以

大久保相期而自居於小室信夫一日余入見力言各國潮流均趨重憲政吾國若不改革恐無以自列於國際地位且滿漢之見深入人心若實行內閣制度皇室退處於無權可消隱患但非有大力者主持未易達到目的項城謂中國人民教育未能普及程度幼稚若以專制治之易於就範立憲之後權在人民恐畫虎不成發生種種流弊余力言專制之不可久恃民氣之不可遏抑反復辨論竟不爲動且問余至此尙有何說余曰公既有成見尙復何詞退而悒悒乃越宿又召余入見囑將預備立憲各款作說帖以進與昨日所言似出兩人頗爲驚異對曰昨陳者祇爲救時之策至其條目則須與學習政治法律之專家研究之退而糾合金邦平黎淵李士偉諸君分條討論繕成說帖後見北洋與考察諸大臣會銜奏請預備立憲稿卽余等所擬未易一字且知項城先與余辨論之詞實已胸有成竹而故爲相反之論以作行文之波瀾耳

自預備立憲之疏上奏先從編纂官制入手而軒然大波起矣先是京朝士

大夫皆以北洋權重時有彈章迨編纂官制局設於海澱之朗潤園孫寶琦楊士琦爲提調周樹模副之編纂員十餘人皆各部院調入者余與金君邦平從項城入都故亦與焉各員多東西洋畢業生抱定孟德斯鳩三權分立宗旨立法機關卽議院資政院及各省諮議局章程皆當時所草（辛亥革命皆以諮議局爲發端）對於司法獨立說帖尤多行政官以分其政權舌劍唇槍互不相下官制中議裁吏禮二部尤中當道之忌自都察院以至各部或上奏或駁議指斥倡議立憲之人甚至謂編纂各員謀爲不軌同事某君自京來澁告余曰外間洶洶恐釀大政變至有身齋川資預備屆時出險者其嚴重可知北洋舊人如唐君紹儀梁君敦彥力勸項城出京乃乘彰德大操以欽派閱軍爲名自京往彰德南北兩軍以北洋與兩湖新軍爲攻守假想敵余因發胃病僅於第三日走排一往觀光事畢仍隨節回津編纂官制發起於項城與端午橋自項城回任北洋午橋出任兩江督軍結果設一憲政編查館於京師派出英德日本考察憲政大臣于式枚汪大燮

諸老成立軍機處變相之內閣而北洋所練之新軍六鎮奏請以四鎮還諸練兵處僅留二四兩鎮於北洋減去兵權以塞讒慝之口在天津設審判廳以爲司法獨立維形設議事董事兩會以爲地方自治基礎其結果如是先是日俄之戰吾國嚴守中立戰地既在遼東西而地主僅守中立不免爲有識者詬病然吾國自庚子後瘡痍未復其情勢與洪楊平後湘鄉遇天津教案時同一棘手復有何力以禦兩強但當時日人於糧餉子彈等軍需處由我國人予以便利風聞項城密遣大員與日本軍事長官訂有密約以事平後中日善後事宜互讓爲條件厥後俄人大敗所有旅順大連等權利皆爲日人移轉以去更訂中日條約清廷以袁世凱爲全權大臣與日本全權大臣小村壽太郎訂約雖日人要求過甚而吾國尙無損失實由前此密約之效力觀夫小村回國時日本人民屢有騷動而吾國外交史上於是役尙爲平安過渡則言者所傳不爲無因也

編纂官制原兼京外而言外官制主張督撫司道同署辦公徵求各督撫意

見參差不齊時當日俄戰後以東三省善後事繁議改將軍都統而爲總督制一日余奉命入都與編纂官制局有所接洽回津時楊君士琦密告余頃確聞東三省總督內定徐世昌君到津可卽以余言告宮保余唯唯暨下車卽謁項城以此言報告項城頓足曰誤矣誤矣余驚問何故乃曰東三省當兩大之衝外交最爲難辦原議吾自當之余對曰請速派委員設法挽回或可及也不數日東海總督三省之諭已下余探其故則孝欽后謂東三省譬如後門北洋如大門袁某如離北洋則大門無人看守徐與袁本至好徐去則與北洋仍一氣耳此一段祕聞外人俱不知之然東海未幾仍入軍機繼之者錫清弼錫去而趙次珊繼之至辛亥革命時趙卽爲治安維持之首領也

光緒季年朝政杌隳滿漢之見亘於中革命之聲騰於外預備立憲之招牌旣挂實行無期請願者踵至樞府舊人不足以應付危局乃有命北洋大臣袁世凱兩湖總督張之洞同入軍機之舉袁張初入京深相結納南皮與同

.....

後見南通翰墨林已排印出版今不贅

當項城初入軍機兼外務部尙書時蘇浙自辦鐵路之風潮正盛項城以軍機處字寄江浙有外交首重大信議約權在朝廷之語江浙人大訶於是江浙同鄉京官紛紛入諫未得要領同事費君急馳書囑余入都余立至京邸力爭謂外交固重大信而江浙人心亦不可不顧項城謂此事由盛宣懷等經手余初至外部何以集矢於余因議電江浙督撫告公司派代表入都公開檔案洎各代表至閱檔畢嗒然無詞歸報公司自辦之說乃寢

心太平室集卷八

心太平室集卷九

吳縣 張一麀 仲仁

樂府

題赤城孫節婦掬井圖

節婦為天台齊尚書孫之室

有清大儒息園之門世載其德施及後昆後昆不祿遺節婦曰孫一解孫也

為淩越二十年既喪舅姑且殞所天門衰祚薄無以為葬於祖氏之阡二解

朝掬土首不櫛夕掬土室如漆越時七千二百日積土成山吾事畢三解昔

聞負土成墳今聞掬土成井井中水不波婦也淚如縷精衛木石愚公山此

井同垂千古永四解天台賢令來胡公表彰苦節揚清風視此井兮養不窮

五解

秦興殷孝子建祠樂府

殷孝子幼孤露有母六旬雙目瞽呼天泣禱神呵護一解天鑒其誠母目復

明無書可讀無田可耕乃與漁樵伍奉母以俱生二解晨而出計魚租午而

歸引母娛貧不娶婦親滌廁論有時琅琅演平話母忘其苦相軒渠天寒燂
湯煖母足市人莫不知爲孝子之湯壺三解大孝終身共子職二十餘年如
一日天乎何酷焚其廬反哺不及同罹劫四解哀感行路均悲酸豐碑屹屹
至行刊我聞此事摧心肝

題張節母尤氏事狀

黃鵠黃鵠夫命不續結禱四句天乎何酷一解水漿不入口三日死則同穴
穀同室爲杵臼易程嬰難三十六年縻緯卹二解上有祖姑以孝以享下有
嗣子迺教迺養姑也篤老子也在襁終姑之年及子之壯三解母子相依宛
宛春暉棄官不仕早寄當歸四解母也好施不私其貲予寒者衣食餓者糜
奉已以約而人之遺吁嗟我佛大慈大悲五解孝門苦節宜褒揚懷清巴婦
柏舟妻巍巍綽楔迎春坊

節孝陳宜人暨孝女燕姑死事題詞

節婦沈賢絕倫年二十孀於陳二郎遠科學琴瑟娛雙親三索皆得女丈夫

子一人郎年方壯忽病呻一瞑不視愴心神願隨地下同沉淪一解姑曰婦
勿爾死易立孤難收淚撫弱息爲姑勉加餐避兵輾轉吳與越事姑禮畢佳
城安何物狗盜敢眩篋大叫飲刃投凶殘二解孝女聞聲啓戶出視賊又戕
之呼聲未已昔慕曹娥與趙娥謂逢母難當如此竟成語讖照丹青雪碎霜
凋長已矣三解悲莫悲於失所天慘莫慘於死非命天道悠悠寧足論節孝
雙雙受其正名標綽楔光門閭秋墳草長風中勁四解

仿古樂府詠鍾馗出游徙宅嫁妹擊鬼

各一首

終南進士善啖鬼寂處山中無聊賴藍裳破帽思出游大鬼醜醜小鬼嘆一
朝南游至申浦衆鬼挪揄不汝怖人而爲鬼汝則呵鬼而人者汝奈何噫吁
嘻我勸鍾馗勿出游出游恐爲衆鬼謀

鍾馗山居不得志棄去故廬徙城市誰與公結鄰神荼與鬱壘誰爲公辦裝
靈魑孺狂輩噫吁嘻世人懼鬼始徙宅鍾馗喜鬼將宅徙惟恐世有無鬼鄉
坐令鍾馗飢欲死

鍾馗有宅新門楣鍾馗有妹初及笄寶馬香車自闌溢鬼卒屏息供驅馳
聲橐橐鍾馗出送妹登車帛百疋噫吁嘻鍾馗嫁妹世所傳未知夫婿誰家
賢我爲鍾馗擇良偶泰山府君有子某

鍾馗擊鬼剗其目袒臂一呼鬼夜哭新鬼故鬼恆河沙但遇而翁盡瑟縮有
唐迄今幾遷貿卽論鬼道亦非舊尋常耗鬼不足饑蠻夷之鬼乃其尤噫吁
嘻鍾馗擊鬼好身手鬼方強鬼君知否

詩 五古

夜泊武昌

波路殊壯闊山容與縈紆武昌古雄鎮綰轂東南輸我思典午朝宏侃騰英
譽江左遂中興羣彥紛馳驅我朝咸同間紅巾擾皇圖此邦屢失陷搗柱文
忠胡老罷兀當道辛苦籌軍儲上扼荆襄勝下控吳楚樞東南遂底定肅清
斯權輿忽忽四十年變幻直須臾羣羊爲虎偃豺狼復生羶太阿已倒授陸
沈滋堪虞我公不可作蒼生涕淚濡

思親

作入蜀

小草心不死春暉盈我眸粲粲羔雁貲聊以警吾羞謂兒苦文字不如事遠游遠游非所樂庶以忘親憂忘憂憂不輟陟岵增綢繆羝羊尙躑躅烏鳥猶啁啾有子不歸養天地長悠悠

凌毅然母陳太夫人八十壽詩

湖湘多奇士我識凌君賢君愛吳清嘉寶萌來受塵卜築富巖巷高吟束皙篇板輿奉老母孝養何拳拳名園日以涉花鳥紛蟬嫣疊石成小山鑿池通甘泉我時入其室俗塵三斗捐坐銘子玉泐僮約王褒懸履屐有法度鷄犬皆神仙方知運甓勤胥由封鮒傳君當弱冠時投筆揚戎旃下馬作露布仗策墮飛鳶絳灌多後輩臙涓列講筵廿載騰風雲一朝歸林泉咳唾亦儒雅情話尤纏綿但知事親樂有如匪石堅高堂躋八秩健步如中年登樓杖不撰製履鉞猶穿惡博投檮蒲戒奢懲華鈿敬姜誦先德歐母崇吉蠲君奉老人訓一如孺子然侍膳問寒暖萬事如雲煙世俗喜文飾廣樂齊鈞天豈況

遇大壘桃實盈三千顧念時艱亟鴻雁徧垓埏朱門酒肉臭何如廣惠鮮不
許盛供帳祇結文字緣作詩頌聖善愧無筆如椽願歌南山句所貢惟萋萋
壽費仲深四十

君年未弱冠名已驚老叟復社觀羣書羅胸燦星斗三日一更番如風掃塵
垢暨余賦北征入幕相先後緣避僚壻嫌薦才徵下走余性已迂拙君遇我
獨厚津門集襟裾京華競詩酒形影鎮相依有似穎同畝洎上賦歸耕勞燕
遂分手里門再相見投桃報瓊玖滄海陡生塵白雲變蒼狗苦爲桑梓謀奮
身固戶牖僕病罷軍書君實代其耦冒險入北都瑣札不去口世路尙艱危
嚶鳴渴求友烏臺未三宿忠言呼負負浩然襤被歸君行我則否十疊還山
吟雲天義不朽倦鳥同圖南蛩距誓相守君猶不惑年積軸富二酉我抱五
石瓠鬻文供覆瓿匹士難回天運會阨陽九廿年昆季交松柏期永久君子
自長生賦詩爲君壽

贈師龍內弟

佛言前世因今生受者是處逆不必憂處順亦勿喜君昔席門蔭融融鄰里慈母竭劬勞阿兄盛華綺秋社吟粉榆春城植桃李君時談教育體羸氣不弛入宮困蒺藜泰往運途否客歲啓君械一病幾不起匪伊磨蝎臨實乃晨鷄侈方知關雎詩乃是王化始參商出房闔胡越生牀第辟地效三遷心曠疾良已勸君慎眠食暇或參禪理冤親悉平等庶悟菩提旨大地漸回和懸揚待君止爲君解煩憂毋徒自苦耳

賀孫籌成與吳松如女士銀婚詩

孫君性倜儻弱冠卽從戎青廬藉軍幕顧盼何豪雄民國旣成立得失如雞蟲學校擁皋比文史足三冬商場繼籌筆奄有陶朱風梁孟賢伉儷流寓棲吳中南陔飫甘旨笑語常春融西俗號銀婚佳氣門閭充重修合巹禮相敬仍協恭持此鎮薄俗倫軌將毋同

詩 七古

韋齋以永安六年磚硯及古銅鏡見貽並賡以詩卽步我癸丑夏日壽詩元

韵仍和之

殘棋一局斧無柯爾我相看均老叟少時每刺蘇秦錐偶然撞破范增斗厭
聞鼙鼓賦歸來俛視羣兒盡塵垢雲龍上下我與君兒廖誰先王良後妖星
乃似追亡逋迫使餓生汗僵走事急方知性命輕時危更見交情厚去年今
日是何年妖星嘆汝一杯酒豈有桃源可辟兵可憐滯穗遺棲畝吳人脆弱
亦能軍肝膽輪囷好身手籠東敗將來金閭何以贈之瓜與玖片語能當十
萬師白雲變幻成蒼狗哀樂催年正一周追思會有神明牖皇覽揆予以降
辰一家吳越無猜耦贈我貞珉記石交永安六年炙人口尙是東吳全盛時
盛冲韋曜臣兼友明鏡明朝定少年光輪萬歷無相負古賀生年不慶年西
河文集君知否伯玉知非非更多敢將朱紫文枯朽我所思兮在瑯環當門
倘有二龍守鄧尉梅花雪正香洞庭龍威山勝西秫田可給淵明耕元文待
覆子雲頡振衣濯足隨君宜渾忘百六占陽九歲寒松柏更蔥蔥致柔專氣
天同久會傾菊水倒新醅高堂九秩齊稱壽

謝李穀宜年丈贈書

穀叟貽我雙畫眉示以兩首西湖詩書詩畫已兼三絕又有一絕臣叔癡人
謂翁癡翁實慧不狂爲狂自古稀世間萬事那足道白雲蒼狗紛昌披不如
放筆摹混沌意在山巔與水湄赤松黃石苦不遇從翁同采商顏芝

南通曹公亭題詞

事見南通縣志

嘉靖紀元三十三是時倭寇窺江南曹公健兒應徵募持矛騰蹕凌江潭螯
弧一麾寇旗靡餘皇旣沉可掬指未幾敵艦如屯雲大呼突陣無餘子挺槍
擁盾髮衝冠嗟峨京觀今猶峙鷙地三年拜賜師追奔逐北風輪馳單騎衝
鋒陷泥淖殲我良士心傷悲南通城北單家店埋骨英雄此死綏夏歷四百
有九祀有亭翼然豐其碑父老咨嗟相太息輪囷肝膽誰能植髣髴橫刀立
馬時悲風慘慘白日匿青詞宰相勢熏天冤獄張楊繼登泣杜鵑江陵南
塘尙未作坐令壯俠溝中填噫吁嘻封狼翦食尋常事衆志成城鬼魅避不
然徒喪好男兒千秋一掬同情淚大陸風雲捲地來排山倒海心腸摧登亭

且看新潮起茫茫百感何爲哉

闕園

李甲集爲世間
太夫人作此圖

吳中流寓多名賢曲石先生此息肩衛公功業軒天地鄴侯棲遯擬神仙風
塵瀕洞何時已泉石徜徉別有天先生產自滇南徼期門子弟誇影狡投筆
非榮萬里侯請纒尙是三河少碧雞金馬仗暗鳴風虎雲龍起壯圖西陲經
略蘇鄉節南粵勛名馬援珠駁歷承明依大樹又薰丹穴筦天樞相貴羣兒
鎮相斫砉然長嘯歸林壑試問橫金蓋世功何如舞綵依親樂城南綠水敞
名園瑤草琪花綠短垣白下爭墩陋安石衡山學道祖長源圖書插架呼龍
犬金石羅庭付鶴猿太君日涉娛清景呼僮埽花婢淪茗甲第相望界綠楊
金鑲不閉紆丹軫坐中賓客酒盈樽蘇梅皮陸茅茹引東西廡下兩家春我
亦華笙韻裏人同奉板輿祝眉壽良辰美景屬天倫

武進徐堯卿藏先德鄺生先生遺硯屬題

我聞范喬尙幼稚手握祖研涕漣漣又聞吾郡陸公紀鬱林巨石歸裝遺方

知世德昌厥後誰云廉吏不可爲徐君曩作三湘宰處膏不潤曾無悔淡泊
武侯志早明澄清孟博時有待一研摩挲什襲藏徧徵題詠經桑海爲言先
德少孤貧博得修羊藉事親研田生活差不惡亂離身世馳風塵負土他鄉
未成禮爲文誓墓號蒼旻子雲筆札閩江道浮沈簿領求溫飽藉甚聲華牧
大州振興文教民無擾權稅每聞公帑贏俸錢依舊清風保惟餘片瓦紫雲
英留與兒曹證石盟家世常傳清白吏墨痕猶作蛟龍鳴

迦陵以先恭肅公遺笏徵詩

君家故物河圖珍三百餘年手澤新豐城劍氣終歸寶合浦珠光不染塵公
孫門閥仍華胄家有賜書仗龍守笏兮笏兮不可求紅羊劫換空懷袖圍爐
煑雪敞賓筵擊筑歌風話耆舊座中躍起李長源不爲宰相歸田園道是君
家祖庭物藏諸什襲騰朝暄曲江風度持蠹日血漬淋漓段秀實猶是武宗
全盛時都堂屹立冠簪筆給事彈章直有聲內台察吏嚴無匹崔琳置笏紛
盈牀東林領袖文孫行忠毅抗言尤矯矯批鱗折檻摧權璫鄒馮已罷文鄭

黜郎當鐵鎖名馨香清門世澤羅羣雅裙屐翩翩結詩社秦碑沒字不堪搜
和璧連城更無價入手光芒射斗高書思對命晨臨朝再拜稽首魯休命世
世子孫藏球刀帝制既終大同始羣雄虎踞烽煙起君家此笏將奚爲搏擊
豪強偷賴此

顧竹庵藏宋井闌屬題

闌有宋編定題郭並明崇
祿七年刻顧街復泉四字

吳中華胄惟陸顧三國人才如蟻附陸家舊宅千餘年

吳家巷陸氏宅晉墓
相余尙三國時故址

顧家誰識將軍墓

上將軍顧榮墓在魯山李君
印泉防而封之衆其後不得

望信橋邊有復泉楚弓楚

得求其故竹庵考古喜摩挲令子氈椎剔塵土稚蘅著錄語不詳緣裝披榛
未呈露顧衙劍氣合延津珠還合浦豈無主醋坊巷前郭鎬闌東小橋頭施
判注黃牛坊西景定鑄獅林寺中開慶著王老媽歟邵必達蘇城古井以十
數何如此井屬君家珍比夔球堪搏拊來復佳名剝轉亨殷殷雷聲地中鼓
蔡洽民所得王椒畦繪文選樓圖題詞

童時耳熟肇經室學海經神兩無匹壯宿吳山祠屋中每瞻遺像懷神筆漢

學清時禁網疏金吾搜不到蟲魚長洲三惠休寧戴各樹師承奪五車儀徵
 晚起揜羣雅風流文采傾朝野試誦羽琫紀績文知公豈是書淫者文選樓
 傾蹟已荒昭明故里閱滄桑祇有丹青垂宇宙焦桐終屬蔡中郎蔡君人傑
 吳江秀巧與畫師同井耦百十餘年手澤新樓中人物今何有讀書種子大
 江南碩學方聞客二三願寶斯圖招隱士抱冰漢上尙留龕

胡子靖

元

以所藏郭筠仙荔灣送別圖及自序殘稿屬題

湖湘閒氣鍾咸同崛起更有筠仙翁罪言一卷著涯路揮斥八極明雙瞳鸞
 張虛矯豈能久多半清流誤乃公况有奸回隱沮尼徙薪曲突終無功坐看
 神州胎巨禍歸從海外安癡聾獨惜交情間新亮兩賢相厄心忡忡自古廉
 藺與韓范意偶鑿枘皆英雄胡君手持雙璋寶顧及下走徵詩筒還君此卷
 三太息至今七見途將窮衡嶽英靈渺何在令人搔首祈蒼穹

題吳江王伽島母節操圖

寒雲慘慘日西匿烏尾畢通意悽惻展讀王家節操圖皋魚血淚猶盈臆太

君姆教夙莊姝梁孟相隨德不孤中道琴亡傷別鶴七齡劍侍剩遺雛燈影
機聲絲歲月范滂攬轡意躊躇不寄當歸寄熊膽鬚眉巾幘原同途四十年
中愁如擣劬勞罔極將何報祭豐養薄心悲酸留得此圖質蒼昊

題杭筱軒鴻雪仙蹤圖

我生足跡半天下長風萬里排雲烟錢塘江湖靈隱壑西湖兩載塵心鐫岱
宗曾觀白馬練居庸亦瞰盧龍邊有時滄海見日出綉縵五色紛連縣北遊
燕薊選幽勝御園安坐昆明船天壇松柏鬱青翠黃河橋柱相鉤連南遊更
訪焦先屋遙望北固煙蘿牽普陀觀音不肯去包山丈人事邈然山色湖光
入懷袖別有大地擬飛仙大江東西我上下獨恨未陟匡廬巔所幸宣尼庚
子日摩挲禮器陳鏘鏗披君此圖如舊識平生所好惟天然惜我歸來君宿
草不及攜手尋喬佺卽今闌闌那得此凌躡霞客追馬遷

題蘊之弟家藏先世斬劍圖

吾宗示我劍及圖題詞已似牛腰束豐城之劍合浦珠兩家風義如天篤中

丞化鶴廿年餘功罪千秋與時觸倘值康雍全盛時清名于郭湯張陸廉吏
難爲究可爲兩家子弟宗風貽莫邪合締干將配姻亞常聯子與姬圖中咳
唾紛珠玉續貂烏用駢枝詞此物固是商周器摩挲製作容然疑茶堂不作
簠齋逝三代吉金知者誰吾友馬君工劍術脊臘莖鐔細梳櫛西清古鑑或
有之君所寶藏數得七持此相參伯仲間三尺祥金此焉匹諒伴容刀作佩
裝不然匕首荆卿叱倘隨魚腹出鱗諸想見韓刀藏富弼中間刊作雲雷文
或釋蛟螭蟠鬱律諦視鱗作雞魚形二千年後無斯筆或說矛頭非劍頭友子
說或云蝌蚪文雕鏤鮫生讀書眼如月獨視古物慚溝猶雞鳴戈入研經

室窻齋虎鉞名空留還君此圖三太息子子孫孫永寶無量休
題單母楊太夫人桂陰課子圖長卷

停舟齊女門前路嘉木陰森籠曉霧半檣重築豈偶然天矜苦節禎祥著節
母庭前正課兒早歲終童誇捷悟縑車聲與讀書聲惟有花神伴朝暮佳兒
天上石麒麟一出名場頭角露榜花折得桂枝香青雲矯首天衢步南陔潔

養譜笙詩補到白華兼絳跼賤子聯交十五年每瞻韋幔生忻慕世間萬事
總成空惟有劬勞恩莫副慈暉分作兩家春萊衣共作傴傴舞此是蘇台掌
故花抵得燕山五株樹

善子先生以哲嗣比德世兄所畫君子佳人圖屬題戲作數語以博一笑

丑丁

齊元

吾宗畫虎如畫龍點睛飛去乘長風君家虎兒不畫虎清驢玉女質營中世
間色相原來空美人猛虎將毋同阿翁對此甘癡聾

消寒第九集韋齋招飲賦此

諸公高會閱九九畫本詩筒積如阜飛觴折柬承嘉招不爲雞口甘牛後江
南二月春城暄桃花塢比桃花源主人好客坐常滿門外雜沓停高軒歲籥
欣逢新甲子風塵頌洞何時已蘇臺麋鹿差無驚欲把羲皇祝桑梓一時儔
侶人中豪慚余瓦釜當瓊璈何當嘆酒息烽火太平旣醉歌陶陶

沈衡山自高等法院看守所賦詩索和

天門詆蕩不可上開函索我贈以詩空腸芒角久磨盡老來二豎頻相欺身
熱頭痛逾旬日至今強起猶支離人生局促苦塵網圓扉歲月如駒維戲謂
君等弛負擔不能奮飛寧守雌予季齋書詣京邸羣龍無首終趨起長安棋
局須臾定中樞決策扶傾危君年雖老氣彌壯覆盆昭雪當無疑君家步兵
苦相憶及門况有髯于思想見朋簪恣諧諠揮毫伸紙時淋漓鴉鳴鵲噪聊
倡和夷吾堂阜何人斯

張繼高母潘太夫人七十壽詩

吾宗伯子人中豪天鷄一叫空其曹中流擊楫與潮搏談笑力抵狂風號靈
山會上聞獅吼說士江淮推健者去年京洛初班荆今歲秣陵重聚首茅容
菽粟款佳賓永叔文章賴賢母母也春秋屆古希歲饑未許舞萊衣祗將文
字揚家範藉答三春寸草暉滎陽望族清河匹孝事翁姑鼓琴瑟撒環雅慕
北宮風傳經能繼西河筆夫子居鄉有盛名郎君早歲客公卿蓮花幕府傾
三輔桃李門牆雋一鬢滄海桑田時轉徙麻姑撒米原彈指要將正誼掃羣

魔博得高堂颯然喜僕亦江湖一散人鬚毛如雪歲時新何當海宇澄清後
各捧家醕進老親

周特人母節孝張太夫人七十八壽詩

吾友周君人中龍籍成交誼資磨礪大阮先頽小阮繼靈山高會他山攻爲
言壽母苦節事一字一淚含青瞳四十八年折蓼教宜有賢子昌其宗君棄
儒冠習商業甘回蔗境天酬庸君違心疾一朝愈方知福善非夢夢臺臺神
明還矍鑠芝楣表德新居崇回思鐙影機聲日老人笑指歲寒松

莊思緘室董夫人六十壽詩

莊叟平生最奇特性秉伉直憎媿嬰居官治盜如草薶一朝頓悟歸彌陀百
鍊鋼爲柔撓指賢哉內助匪伊他夫人家世名門紹食貧操作如桓鮑孝養
慈姑自乳兒不辭勞瘁逾傭保叟也間關煙瘴鄉治兵折獄無昏曉閭內夫
人獨主持心驚膽慄身爲犧居憂歸里甫偃息風雲大地山崩摧丹穴熏君
護桑梓蝴蝶羹沸成瘡痍叟也癯冠成首疾夫人苦勸毋傷悲幸解天弢入

京邑烏臺首領糾彈職雲翻雨覆吞狂泉獨清獨醒甘三黜長齋奉佛相喁
于同修淨土消塵劫五月欣逢設脫辰追思舊事眉當伸不用蟠桃開大會
伊蒲設饌羅天親爲祝衆生離苦海熙熙同作太平民

方玉山同年母程太夫人六十壽詩

桐城文章名天下桐城姆教尤風雅伏生書向繡緯傳韋逞經從紗幔寫伊
川世澤舊門閭名媛窈窕光巾幗蘋蘩湘釜事重闈融融桃李宜家室夫子
常爲汗漫游牽蘿牖戶資綢繆青裙出汲鹿車挽紛羅棗栗儲珍羞宛若傾
心侮甬化鴈鳩如一誇姻亞功德池澆續命田耳鳴陰德紛華謝次公甲第
出詞曹制科特起人中豪蜀中兩度軺車駐歸來長揖朱公陶走也同舟叨
接軫石交差比鍼磁引喜逢王母宴蟠桃祇媿詞仙聯玉笋稱觴鞠臆介眉
壽藥湯况有初來婦華堂燦爛粃盆香定見慈顏開笑口南陔今日綺筵新
璇閨稱媿開嘉辰百歲徽音壯彤管嶺頭齊放梅花春
讀章式之孫氏妹六十貞壽序書後

天綱將傾地維折啼烏瞻屋聲嗚咽天桃穠李逐芬華獨有寒松傲霜雪哲
舅本是文中雄白華孝養傾儒宗阿妹賢聲尤卓絕滌淪調藥忘其射樂安
公子尙書裔二姓絲蘿初結締納吉猶遲奠雁期鬢髮已感離鸞逝滄海可
填山可移耿耿貞心維我儀素衣往弔奉木主此身有屢兄勿悲舅姑篤老
叔稚齒食指繁多待經記闔門內外欽賢明泣血椎心婦代子中遭世變嗟
流離浮家泛宅無定期憂國心長同漆室撒環力作逾嬰兒哲弟流寓津門
久形影相依時聚首牽蘿補屋歷艱辛叔也生兒爲夫後茹藥含冰卅五年
書香繼起有薪傳我讀此文淚如梗柏舟要續風人篇

鄧璞君之弟蕙珮輓詩

鄧翁一別三周稔充沛道中森輪馳比聞解組悟禪悅歸來高臥滄江湄京
華元夕雁足空得翁啓事勝以詩驚聞君有惠連痛六章哀輓其聲嘶上言
弟病未一視天倫此恨無窮期夢中友愛猶如昨回首風雨聯牀時下言一
弟先折翼曷不淨土同修持大願未償報疾革附身火速蒼頭遺相距三日

不及待許負田宅空爾爲佛法了了澈生死露電泡影原無奇恆幹雖傾神
不滅無明業盡慈航慈翁昔萬家謚生佛欲拯苦海蘇瘡痍大千世界陷五
濁幡然形影空王隨有兄如此弟目瞑極樂國土偏怡怡如是思惟大歡喜
解脫塵滓翁毋悲

詩 五律

新灘

水石怒相激雷霆終古鳴千夫同邪許萬壑總砰訇資育俱無術尊陽同此
驚狂瀾資砥柱何日慶清平

姜孝祠

廟貌千秋在劬勞百感滋哀哀王子句粲粲東生詩負米懸親望調羹仗婦
持謁公還自愧不忍面崇祠

庚戌四月寄天津嚴範生同年

吾愛嚴夫子絲絲善者機潛龍方起螯神鳥已高飛學海無舟楫朝陽有德

輝清時翻大隱終古子陵磯

王聘卿先生輓詩和韋齋作

薊北思名將常山望獨隆風雲經譎詭裘帶自雍容清峻無徒黨艱危有苦衷弔公還自愧揮淚向西風

老去仍憂國危城一木支武鄉終盡瘁伯道竟無兒洹上雄圖盡河間宿草滋茫茫生百感終古峴山碑

題李薇莊太守謫羈蘇州府署有圃詩扇後爲太守子祖變作

瓦釜雷鳴日坡仙小謫時魚游漁父睨鳥盡弋人知清淨大無畏蒼茫自詠詩更欽焚券義雙筵子孫貽

幼梅仁兄出其尊人梅岩先生遺墨屬題

片楮珍珠壁風霜剝蝕餘惟留質田券抵作鑿楹書世變經桑海家傳仗硯鋤清芬遺手澤悲慟慰皋魚

自杭州歸和康南海贈詩元韻寄同席諸君

靈山思大會南海原句還上葛仙亭華髮皤然白閒雲晚更青談天究幽渺說地

賦真靈自有長生術相看夢眼醒

題葉雲程先德庭楨先生望雲思親圖

獨立蒼茫處思親泪暗流欲賡華黍句無奈稻粱謀大孝終身慕高堂齧指

憂春暉不可駐萬事盡浮漚

淒絕皋魚痛慈雲孰與親遠游曾負米垂老更沾巾報德天無極披圖迹已

陳追思萊子戲同此感鮮民雲程先生以先德望圖題距先慈撤座之期僅一月展覽茲圖不知逝之何從也

吳子楚縣長屬題其先祖雲海先生詩文遺墨

慣作諸侯客生逢板蕩時飛仙長吉語史筆杜陵詩手澤傳家遠襟懷與古

期黃堂吟嘯處珍重祖庭貽

李穀宜年丈七十二壽詩

比屋推潛德生崧紀大年三高入外隱一老地行仙早歲香名飲洪都賦句

傳來游齊魯地初上孝廉船列宿郎官貴分符太守賢暫迴長孺駕為補廣

微篇浙水仍投轄吳山復著鞭賑貧蘇轍鮒別弊集堂鱸近監牢盆裕掄才
瑣院虔問閣競稱頌關節絕蚤緣單騎亭平奏巖關推政宣鑠金雖被謗躍
冶總高遷清異傳胡質推肥讓惠連龔官甘脫履直道失如絃令子蜚循譽
而翁授太玄東坡方判事北苑已歸田橐載餘廉石家風有舊氍毹婆娑惟翰
墨痼癖在林泉詩卷留巢父襟懷接輞川委懷同栗里彈指已桑田眷屬同
嘉淑精神比偃佺八龍齊舞蹈五鳳更聯翩玉樹俱懷抱瓊枝盡比肩新春
剛旖旎吉語正蟬嫣綽楔高陽榜遐齡綺夏延紫裘羣鞠脆朱履喜盤旋積
善終餘慶煬和自得天梅花香不斷松柏節彌堅海屋添籌永華堂介祉綿
請歌眉壽什媿乏筆如椽

天津林墨青

北翰

六十壽詩

北地林和靖班荆二十年津門常聚首京國又摩肩鶴立倚修竹雞鳴著快
鞭時分陳寶絹偶挂邠原錢此地通閩閩何人譜管弦腹箴獨孤侶適鐸每
勤宣設學培髦秀園橋絮豆籟歌場賡白雪鄉約締藍田嶽嶽嚴夫子恂恂

古大賢得吾作驂靳愧我感華顛同閱滄桑變更師松柏堅杖鄉仍健步吹
笛祝行仙願化婆婆界都成浩蕩天小詩介康爵綺語讓人先

丁芝蓀

明隆輓詩

矯矯雲中鶴虞山一俊髦梓桑稱保障

辛亥獨立君被推第一熱民政長治行第一桃李沐薰陶

戊戌

推新君舉設中西學堂出私財繼之

物望推廚顧書倉嗣季毛鄉邦數文獻淹雅式吾曹

吳會移家日欣聯舊雨緣品茶排雅集閱市戡陳編接席方驚羸揮弦已徹
縣令威真恒化定作海龕仙

詩 七律

松花園

鄧尉山頭百尺枝生成異菌味偏奇盤飧細嚼霜肥後石髓閒敲雨過時仙
品只宜毛女啖芳名未許漆園知誰於春韭秋菘外更餌華芝一療飢

經神

千秋俎豆鄭公鄉十萬黃巾拜講堂北海清樽資供養東萊帶草薦芬芳文

孫合耐楹間祀詩婢應添案上香莫怪宣尼呼起起至今廟貌近宮牆

米囊花

勞勞負米總囊虛坐對奇花愧不如海外至今稱沃地中朝從此歎倉儲脂膏任使侏儒飽顏色偏於我輩疏二百年來成利市可憐非種有誰鋤

檳榔芋

世人但識嚼檳榔不道蹲鴟異種藏夜雨圍爐呼老衲秋風登俎倩廚娘取糧應課園丁稅消食兼傳樂譜方絢爛總歸平淡好紫文裂盡白於霜

桂花粟

桂花香裏果嘗新紫栗堆盤更可人露滴無聲房乍脫月明有影罅初勻芳含金粟苞添綻粲列瓊筵氣帶辛忙煞兒童爭拾取橙黃橘綠一般珍

與蜀中同幕諸君

水陸閒關使節催諸君豪興重徘徊有靈山水驚知己無價文章入酒杯別我情如雲影盪照人膽似月華開相期握手論遊迹臘鼓聲中倒舊醅

庚子蜀遊舟中

水激颯輪滾雪寒長風萬里破狂瀾壯遊不賦新婚別危世何論蜀道難
夢裏家山遊子意尊前談笑故人歡大江東去我西上舉目神州一倚闌

秋興八首和工部

涼颯颯撼叢林丞相祠前古木森三峽橫流江水駛千峯直接雪山陰
西窗剪燭論時事南國拳蘭動客心聞說防秋煩遠戍清商併入擣衣砧

濯錦江頭日景斜五陵年少自芬華絃歌曾被文翁化汗漫誰乘博望槎
大夏古原通葑醬朔方今已息胡笳蜀中久號膏腴地搖動風前鷲粟花

長安日近有光暉井絡終南接太微蹕路已儲千騎扈普天同盼六龍飛
卻緣馳道工猶緩頓使宸遊願暫違北極朝廷終不改用成秋高薊塞馬初肥

往事茫茫似覆棋銅駝荆棘劇堪悲吞刃吐火曾何用麥飯壺殮又一時
作鎮江淮天塹保弭兵晉楚使車馳司農仰屋紆籌策宵旰還勞聖主思

西來一脈太行山灑道清塵指顧間恩詔便蕃捐正賦屬車迤邐出重關臨

軒太息矜民力夾道驩呼仰聖顏稍喜周原甘雨足翠華基
期門齊唱大刀頭秦樹燕雲一色秋靈武詔書都欲涕何泊
人正擬求神駿野老何心狎晚鷗誰爲官家憂社稷要擎天
中興方召憶元功蒼狗離奇一瞬中欲爲蚩尤開大霧請墜
州學校如林列萬國艤幢蔽日紅兩部怒蛙憑軾過渭濱可
雪泥鴻爪向西迤流轉光陰反覆陂卻憶鱸魚初上市翻喘
芭問字功無補王粲登樓意欲移夢到江南明月夜滿庭瓜

秋興

秋風已到錦江頭客子光陰逐水流北望秦關紅日近南瞻
聞鴻雁猶鳴澤卻憶鱸魚正上鉤獨立蒼茫生百感文人例
失題

垂髻劍侍仰豐裁一室絃歌絳帳開身後浮名艱苜蓿筆端
章爾雅研京賦筆墨叢殘歷劫灰付與兒孫珍什襲孝思不

和桐城張南岑傳題壁詩元韻

一卷離騷激楚音，人間何處覓青琴。卻將宋玉悲秋意，迸入王郎斫地心。對
酒當歌豪氣在，倚樓看鏡旅懷深。古來大器成原晚，滄海珠光未竟沈。
詩人例作蜀中行，怨老嗟卑太瘦生。閒散宮曹羈駕監，窮愁著述困虞卿。坐
看倦鳥歸林去，苦作寒蛩向壁鳴。尙有碧紗籠句日，休言一棹五湖輕。
薄日難回黍谷春，何堪簿領著吟身。牛衣曾下王章泣，鶴俸難蘇趙壹貧。何
日囊錐欣脫穎，伊誰宦海悟迷津。袖中一掬蒼生淚，同是天涯多恨人。
虛名羅隱滿江東，蜀道雲山入眼中。我亦稻粱供雁鷺，君原得失等雞蟲。登
樓王粲真無賴，覆瓿楊雄愧未工。惟有照人肝膽在，中宵劍氣作長虹。
蒼狗浮雲一刹那，每論時事動悲歌。賈生銳氣銷磨盡，杜牧狂言感慨多。填
海難爲精衛石，回天或有魯陽戈。問誰抱膝吟梁父，兵甲胸中十萬羅。
鄒松如丈和我談字韻，仍依韻答之。

卅年文酒接清談，飲我醅醪味更甘。方致千金垣洞一百期逢七日徑開

三每一星期京華小隱如湖上吳會耆英在斗南

俱令兄弟

世事正同棋劫

盛可無志略續松龕

致徐芷升步談韻

十二年前促膝談醕醪飲我有餘甘交情白傅懷元九時劇黃幡唱李三魁
魁雖聞投有北鯤鵬未必奮圖南穀城片石今安在欲向包山乞一龕

和易實甫見贈原韻

曾聞鬼笑與靈談說士尤逾食肉甘君是歲星輪轉七我思香雪徑開三海
波飛濺軍聲北歐洲北車軌交通地氣南莫問人間何許事萬梅花裏擁

詩龕

側席康駢恣劇談被天強派未心甘詩用韻詩篇跳出手又八世味深嘗肱

折三差喜人心知拱北每參佛法作和南鯁生本是煙波侶相約湖山共一

龕

再次韻和實甫

家學龍門接史談聖童馳譽項兼甘詩人不數輕元九走卒能知熟魏三文
史汪洋媿吳下賢才窈窕富周南紉盆大好圍爐話解脫應燒木佛龕
閒來捉麈作清談呼馬呼牛一例甘感事躬逢陽轉九及時眉仿月初三侏
儒未敢譏臣朔信美何須妬子南大隱金門多著作豈惟寶鑑續龍龕
和寶甫用樊山元韻元日書懷

自分山林老務光無端禁籟許回翔曉風柳岸行如畫春日椒盤祓不祥鶴
訝今年多大雪龜言初筮履新霜似聞舌極將逢泰

辛亥之冬毛石君年
丈同天下海海何時定

丈言自奉以後至今為否閉戶濃熏卅字香
今後交聯遇其語甚怪

和夏映庵贈詩元韻

每循旭日入槐廳譏鼎時思味且銘祇有文章能報國固應姓字早書屏風
流故土懷嘉樹飄忽華年感瑞奠鄉夢已隨春水漲杖藜同上可中亭

奉和自嚴先生原唱并呈錫百志吾兩先生同晒

士衡文采耀雲間擬鬪尖叉願力慳酒債祇緣寒雪重鄉心先趁倦雲還休

疑龐統惟耽飲，僞學袁安不閉關。差喜銀潢今洗甲，居然粉本現名山。

諸公才望式南邦，各有長城築受降。歇後俳詞嗤鄭五，爭先大敵陷王雙。頻
霏瓊屑搖銀海，便臥糟邱倒玉缸。今日車書欣一統，何因楚澤怨蘭茝。

餓生垂老隱鷓巢，巢運轉三陽。筮拔茅敢向大晟鳴，瓦釜猶陳古樂撫。陶匏苦
無良醞能消渴，偶詠新詩或解嘲。遙望匡廬多感慨，彊華空自獻符苞。

采藥親攜白木鐮，不嫌塵土浣衣衫。欲招隱士瑯嬛遠，苦憶良朋玉札緘。詩
派翁行尊吉贛，政聲朱博噪嶠函。青峯一曲歸何日，潮汐年年潤下鹹。

和仲深見懷詩元韻

不學雄飛願守雌，狂瀾激蕩鬢成絲。強爲蒙叟逍遙樂，欲廢香山諷諭詩。寥
落江湖無我相，輪囷肝膽信吾師。菘鱸早辦歸田事，夢繞山塘短簿祠。

和鹽城吳彝白感懷原韻

白門秋柳幾時春，大會靈山別有因。墨翟非攻誰鉅子，老萊作戲爲衰親。

家母

今年八十五
動似中人

豈真淨土須離垢，尙有謬臺未是貧。猛憶五年前故事，行吟

頗似楚江濱

丙辰帝創以力抗
洪憲幾瀕於危

十年兩度鼓鼙驚流轉如看月昃盈程伯元戎成舊夢馮侯大樹愴平生談
兵秋隼摩空氣草檄春蠶食葉聲已是倦游還作客煙雲過眼薄浮名

華胥一夢是耶非攬轡澄清志尙違法正難回先主惑華元曾解楚人圍江

南花鳥天然美秋末尊鱸客欲歸憂國厭聞凶歲耗蒼生滿目待寒衣

秣林小駐謝鳴鸞不學隨園著食單古寺鐘鏡入清夢故宮瓴甍拾叢殘

立省

第一醫官吳谷宜院長借我一榻地
在毗盧寺之東明故宮之西故云

椎牛享士軍容壯

謂齊督軍
閱兵之日 嗷雁鳴天

野哭哀更是不堪回首事碎身尸諫有遺棺

葉君立民飲賦尸諫遺書
棺省議會空地過之駭異

荆棘銅駝話昔年六朝煙水尙依然心靈槎觸難羈馬身世郎當已蛻蟬今

雨偶來成雅集驚風已定且安眠娑婆世界無明境閒讀楞嚴證上禪

偕伯雨信卿觀瀾唯一任之自下關沂江至大勝關觀東南大學農場任之

有詩和其元韻

尺書曾解魯連園來訪農場逸興飛如此江山忍撞碎相看禾麥有餘暉牧

民管子貧兒富士化周官瘠壤肥多少黃金擲虛牝劇談暴諱總嘘唏

張彥雲宴特科同年珏生柚衡亮叔師愚仲綱惟樹五回滇綏之不至余作

小游仙一首索和

同詠霓裳十二年麻姑彈指說桑田長庚小謫寧非福曼倩爲郎不羨仙雞
犬聯翩昇福地魚龍曼衍奏鈞天投壺電笑從今始霧鬢風鬟尙宛然
和黃君浩投詩原韻

苦厭青蠅競止樊二三知己晚來樽瀾翻人海新棋局雲涌春明舊夢痕未
了因緣心漸定歷經憂患道彌尊竭來面壁山中坐靜對浮屠悄不言
題馬筱巖靜觀萬變圖

白雲蒼狗渾間事猿鶴蟲沙不足奇大易知來終未濟道家尙德說無爲芸
芸萬彙動植礦擾擾一生貪嗔癡悟徹真如歸極樂水邊林下好修持
題崑山王巖士先生百年偕老圖

百歲齊眉信罕儔柴桑甲子幾何周尋梅翻笑林和靖賣藥都知韓伯休四

壁書經秦劫火萬言文寓晉陽秋神仙眷屬無量壽菊水流觴共唱酬

題劉正康僧裝圖

正康先生今之振奇人也僑寓吾吳迭經兵劫有事則運籌決策無事則排難解紛生平功德詳故友費君章齋所撰六秩壽言不復翻縷茲以僧裝圖像屬題敬賦一律以誌佩仰

萬人空巷看劉翁氣蓋三吳一諾中示疾維摩能度厄

君病足癱而頭腦特強

發心苦

薩早觀空龍蛇起陸終銷劫獅象隨身孰競雄愧我根塵猶未淨點頭倘許遇生公

張矯塵以令先慈高太夫人之命在蕭縣三座樓設念幼小學落成徵詩

桓桓武德炳旂常生我劬勞永不忘爲道慈闈縣教澤早從故里剏膠庠文

翁石室傳佳話開母穹碑設講堂絃誦于今盈葦邑他年合配大功坊

潘濟之年丈重游泮宮步原韻奉賀

鼎族高門總得天南飛一鶴白翩翩華山驢墮銷塵劫泮水鸞鳴說舊緣禁

欄旌閣相題額園橋空巷士摩肩柴桑甲子分明記別有桃源不羨仙
通家兩世許升堂猶憶髫年玉尺量聯席記行荀氏酒傳衣媿燕魯公香白
髭朱履爭扶杖瑜珥瑤環喜負牀爲問觀棋柯爛否星雲復日盼重光
秀水沈淇泉姻丈重謁泮宮題詞

玉堂歸老地行仙回首襦衫六十年吳下僑居多著作秦中視學擢英賢
噉鸞飽閱滄桑幻薦鸚鵡虛聯香火緣待到瓊林重宴歲駕湖煙雨擁成連
和張選甫先生重遊泮水原韻

入泮童年僅十三重攜玉杖把春探白駒空谷文才擅雛鳳清聲妙諦含

君一歲入泮時年十三亦出長樂林師門君試古學
題爲白駒空谷賦余覆試詩題爲鷗風清於若風聲橋壁舊遊成夢影開天

遺事入叢談也如薊子摩銅狄老去禪心許共參

少壯雄心澈紫霄齊年鄉舉歲華遙

君乙酉中副車
是歲擢北

多君高詠黃花晚願

我深慚朽木雕猶憶秋風峨席帽欣看臘雪長靈苗幡幡兩鬢頻鏡鏡欲臥

滄江避客囂

侍母往遊香山雙清別墅贈主人熊秉三

壽母同年八十三香山佳處共停驂眼前兒輩皆蒼老雨後山光作蔚藍稚
子癡情掬泉水野人清福住茅庵謂英君雞蟲擾擾何爲者柳栗芒鞋看翠

嵐

贈馮河間詩時河間寓天津

白宮受代卽歸耕閒話桑麻望太平豈有酖人羊叔子謂馮言馮不教稱帝

魯連生隱居尙係寰中望先著終銷海內兵馮與西南主和而段賤子曾爲

蓮幕客願公上壽比彭鏗

宿國清寺贈胡味蘭知事步思緘韻

山中四日共晨昏風俗天台子細論坡老泉亭兼判事河陽縣境遍靈根迎

曦華頂妖氛息觀瀑飛梁佛性存能轉娑婆成淨土人間何處不桃源

岳州說吳子玉將軍罷兵寫示軍幕同人

將軍氣已吞雲夢我輩還來作宋輕無地可揮憂國淚願天平息閱牆兵慮

山風雨新和會

張敬典刊
山會錄之說

戎馬關山古洞庭如此江湖如此夕諸君何以

慰生靈

壽陳蓉曙年丈二首

家法遙承漢穎川
蕺山學派紹前賢
文章買董千秋業
治績龔黃萬口傳
隱約金絲聞孔壁
摩挲銅狄問堯年
貞元朝士知多少
獨抱遺經意渺然
曾騎竹馬望黃堂
今喜同舟識李方
金友玉昆皆國寶
雲耕繡憶在天閭
八千歲祝靈椿壽
三五月逢丹桂芳
有鶴南飛歸舞綵
尊鱸大好侑霞觴
尤鼎孚丈八十壽和原均

靜觀桑海歷昭昏
心似菩提問世尊
戲綵有如楚萊子
乘輿每斥鄭公孫
防川曾督投菱役
掩骼難忘結草恩
尺宅寸田工導引
長生何必酈泉源
從知積善有餘慶
愛日堂前敢舉觴
多難萬方須救濟
屠刀立地斂鋒鋦
清詞娓娓顧南雅
書法錚錚潘瘦羊
自是君身有仙骨
雞窠歲月正綵長
贈費芝雲八十雙壽

文戰春明獨擅場老來梁孟慶相莊紛傳治譜栽花令早飲香名執戟郎八
秩年猶能夢筆兩家春不隔垂楊眼看同執同文世多謝君家縮地方
萱堂九十備賓筵君亦春秋閱八千華黍筵中佳話並紅梅閣裏雅歌傳鴻
聲鮐背鈞天曲金齒鐵牙行地仙更有朱桓同甲子相逢各倒杖頭錢

吳姻伯母周太淑人八十壽詩

吳星衢
之母

濂溪禮法毓名門王謝家風姆教尊鴻案相莊甘苦共雞鳴敬事笑言溫不
聞聲色加僮婢常矢勤勞式子孫美意延年多福祉笑斟菊水倒芳樽
郎君治譜早蜚聲刻意娛親謝遠征廉石歸田護蔭茂香溪近市板輿迎伯
霜仲雪天倫厚瑜珥瑤環喜氣盈大耋遐齡人共羨幾經桑海祝昇平
壽余壽平同年七十

憶從結客少年場湖海元龍不可當鎖院文光射牛斗臺史筆肅風霜朝
辜碑碣尋蕭寺夜聽笙歌到教坊七十童顏還跌宕可無烏爪說滄桑
開府鞞刀扞赤眉歸來野史一亭遺皖江南北稱山斗瀼水東西富蒼施司

馬清娛能煖酒謝家幼度又圍碁鐵牙金齒神仙骨直待雞窠作小兒
李橘農同年七十壽詩

宣南記共踏槐黃早躡蓬萊日月長鼎鼎高門承豸繡觥觥講席啓鱣堂衡
文桂海材無滯奏事楓宸筆有芒一棹江湖先勇退尊鱸歸後見滄桑
幼學猶傳炳燭編白髭朱履地行仙彭鏗文獻希前哲孔鮒詩書付後賢吳
郡清嘉開盛會詞曹歌詠祝高年更從唯識空諸相觀壽無量證佛緣
陶君小泚暨陳夫人七十雙慶壽詩

運甓家風衍慶長香名早飲噪詞場中州飛鳥傳仙令大府檄書拜議郎風
骨峻嶒鄉里式精神矍鑠室家祥劉綱夫婦皆耆耋細嚼梅花進一觴
曹潤田母周太夫人七十壽詩

京華雞黍卅年前拜母登堂愧昔賢慧苴明珠忠被謗梅花鐵石老彌堅掃
除障礙方成佛閱盡滄桑不羨仙畢竟白華終潔白慈雲長護在山泉
陳君齡詩暨戴夫人六十雙慶壽詩

文壇飛將老能詩梁案相莊各壽眉小築園林栽燕麥相看蘭玉擁臯比心
平如水方無競意美於花更足奇夜望太邱德星聚合歡樹又茁孫枝
壽崑山王沂仲六十

崑山學派首亭林有恥名庵幾素心四海黨爭方擾擾一鄉德望獨愔愔主
持文化施桑梓砥礪廉隅式玉金六十高年如壯少醅醪公瑾飲人深
壽李鳳山丈暨德配六旬雙慶

廚顧聲名噪鄂中鹿門恨未拜龐公神仙眷屬都眉壽伯仲壻筮盡俊雄張
楚軍煩天下計鈞天樂奏大王風羹湯又見兒枝茁劇羨門庭喜氣融
和徐錫丞五十一生日游焦山原韻

頻歌復旦尙漫漫徙倚松寥酒半闌鳩杖遙知添鬢鑠鶴銘未獲訪叢殘

約同游以
病未果銅琶鐵板聞聲遠沙鳥風帆入望寬鞮鼓喧喧官事急嚴陵暫撤

釣魚竿

一時勝侶集中裾入畫江天俗慮祛從古勁兵推北府中流形勝說南徐浙

西已立高峯馬江左誰憐涸轍魚槃錯方能知利器福星良夜照庭除
梅君景福暨鄧夫人五十雙慶壽詩

仙尉家門應壽昌黃花晚節有奇香帆檣載陶朱業金劍安排陸賈裝
昧旦雞鳴仍舊戒中年鴻案尙相莊伯霜仲雪皆馳譽積善從來餘慶長
鄧縣魏伯楨五十徵詩

奔走兵間憶漢皋魏徵嫵媚寇吾曹多君明法安桑梓愧我歸鄉廢蓼蒿
繞室芝蘭皆國器盈門桃李亦人豪欣逢伯玉知非歲一曲南飛奏八瓊

心太平室集卷九

心太平室集卷十

吳縣 張一塵 仲仁

詩 七絕

蓬溪縣道中

斜風細雨蓬溪路
翠柏蒼松逆旅塵
欲問世間窮達事
上山人看下山人
大雪漫天失翠微
朝來寒氣襲人衣
山中可有高人臥
滿架圖書靜掩扉
受盡揶揄志不摧
餘甘要自苦中回
餽生若使先通籍
此味何從識得來

巫山舟次

巫山神女本荒唐
雲雨膏流楚蜀疆
底事騷人無賴甚
陽臺終古玷詞場
始至成都

兩月崎嶇六千里
而今始見錦官城
遠遊轉似歸家客
驚見寥天一雁橫

青洋地竹枝詞十二首

時光緒二十二年夏

無窮心緒觸滄桑
一霎千秋石火光
猶憶放翁詩自好
滿川鼓吹入盤闔

放用

張王崛起亦英雄猿鶴蟲沙一劫中
遂使前朝歌舞地秋來燐火閃青紅
荒塚纍纍不計年紅顏白骨等黃泉
山邱零落墟煙絕可有人來捨紙錢
千年遺蛻埋幽壑一紙官書闕廣場
故鬼無靈新鬼大紅毛碧眼盡披猖
佳城負郭本非宜淒絕陽明瘞旅詞
終是太平官吏事他年免遇摸金時
老人結草恩曾報杜伯彎弓怨亦伸
厲鬼有時能殺賊願君毋崇此邦人
陵谷遷移事偶然從今車馬更喧闐
吳儂喜作詼諧語冷水盤門熱水船
羣工邪許運風斤畫棟高飛陡入雲
不見春申江浦上電燈如月白無垠
寸絲尺縷煩紅女何似機輪百倍加
南國蠶桑中土寶要將價奪米囊花
范蠡湖邊景色幽吳江東去浙西頭
緣知今歲中秋夜串月還應看賽舟
遙空蜃氣結樓臺酒地花天孰主裁
寄語吳中諸子弟銷金一窟又安排
白雲蒼狗太荒唐曠野偏成一闕場
十萬彌羅彈指合生天何必鐵輪王
民國五年七月赴日本過朝鮮海峽

辟盡炎歊適莽蒼方知世界本清涼海天三五閒鷗過師爾忘機祇不祥
華髮飄蕭涕淚多年來樂事久蹉跎而今學得長生訣且向華胥夢裏過
水行渤海兩晨夕大霧漫天舟不前忠信涉波無挂礙島經七發意愴然

發七

島在朝鮮海峽號稱危道

過朝鮮十里島大霧停舟

山頭滴翠山腰霧誤我行期兩日程世事由來難預計占天不獨在陰晴

過門司對面卽馬關

字文忠于此議約地也

溼霧初開翠欲浮春帆樓外一停舟莫言當日傷心地一代興亡問白瀧
神戶偕林宰平父子登布引山

噴雪飛花布引山電光如月照煙鬟傾城士女摩肩至涼夜憑軒不忍還

嵒滌生領事宴於六甲山香櫺園園主屬題一首

亦名著樂園

松風萬壑一行窩福地瑯環未足多欲爲衆生除苦惱先憂後樂竟如何
東京喜晤禹石從弟

童叟相將竹馬嬉中年勞燕各分離轉從海外連牀話各撫頭顱異昔時
劉子楷孫子涵同招飲精養軒晚蔣念騫仍約是軒

憑軒一日兩傳餐不忍池邊怯薄寒恰似富春江暮雨羊裘老子自盤桓
江之島

寓廬三日對愁霖簷溜初停尙綠陰喜到金龜樓上住海濱終夜聽潮音
箱根萬福樓

清晨尙在江之島晚聽箱根萬斛泉樓下怒濤飛滾滾樓中旅客各酣眠
自箱根往蘆之湖

前山雲起後山晴夾道青松萬籟鳴汽笛嗚嗚雲裏過仙家何必御風行
山高二千六百尺山巔忽現蘆之湖陡憶杭州舊游地蘇隄如畫綠陰鋪
箱根玉瀧

玉瀧噴雪流涎長砵石濯足心脾涼池中游魚尾方羊吾知子樂觀濼梁
日光至中禪寺道中

巖厓聳翠入雲中絕壑銀濤震耳聾
溼霧濛濛衣袖冷不知身在最高峯
華巖瀧

日光瀑布不知數此是山中第一瀧
解識華巖眞解脫舍身崖外玉瑋
鹽源木之葉石有花葉形云是十萬年前之物

十萬年前補天石分明木葉間
蟲魚我來偶試樵人斧慚媿張華博物書
松島紀遊

眼前八百有餘島錯落珠槃置一堂
海上神山今歷歷吾儕福分過秦皇
楊子桡同往嵐山卽爲子桡書扇

浮海來尋東道主君家兄弟盡英才
蘆湖煙霧松洲月他日重逢笑口開
神戶車中報廉惠卿二絕

湖海胥疏廉孟子錦囊一一寫簪花亦狂亦俠兼禪隱
但有名山便是家
一月遨遊饌飲河鰈生眼福本無多山川信美非吾土
鳥倦知還奈若何
自神戶歸舟泊大沽口

一月有餘汗漫游頻年勞苦差相酬歸來海上觀朝旭斑白征人儻黑頭
海州雲台山紀游詩

禹貢徐揚跨二州雲台矗立海東頭從今歐亞交通點不數申江數郁洲
雲台本峙海中間滄海桑田事等閑未與珠厓同割棄天留南部一名山
朝發彭城夕海東桓桓虎將主人翁白寶山鎮守髯忝短簿俱風雅八顧三君盡
俊雄

舊雨相將話夙緣隨輪送我小遊仙山農俱識將軍面謂有甘霖沛大田
問官郊子此停車孔望山頭聖迹賒想見兩君高會日犁彌辟易衆無譁
淮海叢林稱第一寺旁靖節有祠堂雲汀已邈陶山逝終古桃源此道場
墟溝形勢更離奇別墅東山一局棋咫尺便爲龍世界濃雲突起作之而
一夕雲騰雨似傾蒼苔路滑少人行閉門且讀蒼梧志得句論癡紀日程
將軍喜作魯公書我仿坡仙得似無留得些些行看子驪龍起瞰獻明珠
雨餘潮退起漁罾南有嘉魚汕汕蒸或號紅娘或命字晚來下酒可三升

左拍劉伶右杜康海濱訪友到山莊鱗鱗壘石爲屋舍
遊客兒童喜欲狂徐福求仙去不還人間何處有神山
齋然西笑馱經去震旦文明一水間馳道金椎此盡頭
驅車直達到歐洲天山南北成都日淮海商場奪馬留
早起飛車抵大村輿夫武士集山門層層石級過西園
革履戎裝汗虎賁石穴森羅盡向南容人兩兩與三三
想當洪水橫流日營窟先成海上龕

校師

生麻營峯壘
台古測考

邪許聲傳十八盤南天門內萬峯環三元宮外千年樹
定有仙靈時往還三百年來五丙寅滄桑變幻又逢春
登樓膜拜陶公象此時湖湘第一人

雲陶

訂制軍
版集

玉琬蒼壁貯琅函墨勅題名亦大觀筆墨煙雲渾不辨
老僧捧硯乞留翰歸路崎嶇入灌雲當筵談笑口芳芬
談經虎觀圓橋滿漸愧元亭少異聞

師在

校演
講

雁蕩紀遊

眼前巒嶂重重過足底煙雲冉冉生便欲乘風上天闕半空鸞鶴倘來迎

梁至北
斗洞

石自

跌蕩天門攀巨靈玉昆金友費經營層樓合是神仙窟未許人間展齒停

爲蔣叔南季哲
昆仲所營別業

峯蓮

噴玉飛煙百丈長濛濛煙霧失鼉梁午曦映徹琉璃彩散作人間無量光

漱瀑高七
十餘丈

龍大

兩峯低處作鞍形天隔東西列畫屏盡日看山迷五色荀輿扶夢上青冥

嶽

鞍馬

王喬鳧鳥不成飛偶到龍潭足一揮彷彿謝公傳落屐銀河倒瀉雨霏霏

天台紀遊

大師創設天台宗莊嚴骨塔存其中衆生苦已三塗窮誰歟悲智雙圓融

寺爲智者
大師所創

明高

大師寫經閱千載墨光筆澤英靈在袈裟爛爛銅鉢摧付與後人藏宛委

師大

寫經一册又
衣斜各一

自房山歸途口占

三日行程抵十年如離火室見青天上方山志分明在有約重來結善緣

拒馬河中有異聞桃源真箇避羸秦明時風俗猶堪識待到秋深訪老人

宋湖

避兵之處與外隔絕中仍行者
人制常君瑋有記書之甚詳

北戴河雜詩

夢中徹夜有潮聲破曉霞光萬道明海上陽烏噴涌出方知日觀在窗楹

倒臥沙灘檢蚌螺恆河沙數那由他仰頭一碧天如笠側看沙帆點點過

漢海

檢貝殼臥
而作此

田蘊山都統招往張家口挈貽兒同往道中口占

青龍橋畔一停車憶六年前感歲華獨上長城登絕頂北門鎖鑰字摩厓

橋斷車傾頃刻亡八人伊命不如羊有羊七方知此事須科學枉說天災最

可傷各股劫路以土工為之安知氣乘學與地質學訪者謂為天數
可也也余車後此車抵二時在廣盛候修車路誤點半日餘矣

與蘊之弟同游房山雲居寺

蘆溝橋上看西山卅八年前曉月寒後視今猶今視昔剎那飛艇繞空間
琉璃河畔上肩輿兩岸青紗幃不除自過長溝山勢峻青松翠柏到雲居
唐僧靜琬刻石經俗名小西天經洞

石洞藏經筆有神卽論刀法亦超羣琬師骨塔今何在震旦雷音如是聞
與觀瀾同遊汴過正定及邯鄲

三十三年如一瞥趨庭曾記放衙時

知大夫年正定二十月

宵來夢到龍藏寺零落常

山未泐碑

盧生一夢事堪羞偏有陳生借枕頭我羨黃梁如白石平生早已薄王侯
赴太原閻督軍約住洗心社到站見大書木牌

大書千五百名字才下車時卽見之三古言文原一致家絃戶誦意誰知
孔子生日代東海主祭於曲阜

太原曾傍聖人居曲阜親臨闕里閭如抱彥和丹漆器來觀宣聖壁中書

二千四百年前物端木親瑠二聖容此是中邦真寶像百神呵護到南宗

孔君以端木子楷木孔子與元官夫人像照片見圖原物現在徽州

儀鄭堂書戶久肩微波榭圯孰傳經玉虹樓帖猶珍重多謝居停兩眼青

公尙幼族長孔與環設宴

登泰山絕頂

昨遊孔子廟堂中今日登高謁岱宗俯視衆山真培塿閭門白馬氣如虹

漢柏秦松不勝紀金堂石室孰能圖祖龍舉動真癡絕強派高人作大夫

宿泰山斗姆宮

起看參星尙在中倒懸眉樣日升東雲霞四擁金輪現大地河山一霎紅

頂脊日出距中秋祇半月冰已成凌

到此方知萬念清六塵五濁蔽無明赤松黃石今何在我欲從之餐玉英

場

九百餘文經石峪齊梁石刻不知年周鬚甲姚胖光有古癖引繩捫字來流

連

經石
峪

濟南屈文六約游龍洞
龍洞來爲秉燭遊岩前
馬子貞約觀武術并往
蒼頭技擊周時遺角牴
新息能爲楔子書蒙莊
梁無

青島住大和旅館

昔聞論語付王仁心學
燕趙周秦齊楚代青徐
千佛山舜祠

重華祠畔一停驂預作
常州天寧寺聽冶開大

治師爲我說大法贈以百八牟尼珠屏除六塵續淨念了徹生死超三塗
中秋後四日由漢回潯仍由潯回漢德和舟中作

呼馬呼牛亦自呼來牛去馬任馳驅江神笑吾忙何事千萬軍中一事無

中秋過大江在黃浦舟中作

時爲江浙協會推爲
代表往漢說南軍

大江東去吾西上欲挽銀河洗甲兵如此江山忍撞碎中宵愁聽鼓鼙聲

一樣中秋月色明可憐月照武昌城武昌被圍已兩旬
人民食盡飢死伊誰造箇中流筏渡

彼無辜至玉京

慣向兵間作宋徑武昌夏口動吟情然其煮豆終何益舉目蒼生涕泪橫

祕魔崖住劉厚生寓

冉冉白雲歸壑去蕭蕭黃葉逐人行行窩一覺華胥夢起聽晨鐘百八聲

慈幼院贈熊秉三

哀鴻雖鳳原平等八百彌羅一刹那小試經綸醫國手徑將淨土化娑婆

和金研君七絕四首

廿年前共蹋紅塵歷劫滄桑不忍論苦憶松陵老居士吟肩高聳辨齋辛
楓葉天平已褪紅漫空風雪一舟中此行應惹山靈笑未到支硎最上峯
頗聞寒汎澤冰堅大壑膠舟凍雀拳料得詩人清徹骨出山何似在山泉
熱火糝盆歲籥更征車將指石頭城餘生博得狂名在要與哀鴻訴不平
浴佛

香花瓔珞鬪禪關競說龍華會上還不道西方清淨體楊枝一滴借人間
餅餌爭迎九子神拈花一笑或前因未應墮落閣黎手始是金剛不壞身
采桑

南枝窈窕北枝長女伴娉婷執懿筐歲年年桑下路幾多辛苦始爲裳
春至陰晴氣未和似聞桑葉去年多無端拋却筠籃坐笑指城西盡綺羅
徒倚牆邊日晚時催歸生怕致蠶飢勸君須趁桑黃盛莫待桑稀更折枝
番舶連檣上市來蠶桑事了貿絲回似聞人說歐洲地也有柔桑一樣栽
題易實甫詩稿

不如意事什八九，大有心無二三好。麗殷勤韓子語，許身稷契杜公談。
哭盒詩名滿天下，哭盒吏事無人知。懺盡東南金粉氣，益陽功業不爲奇。
題張南岑詩文稿

桐城文章冠當世，存之不作濂亭亡。靈光獨有吳擘甫，君應摩壘相頡頏。
論古縱橫蘇玉局，論今剴切賈長沙。萬人叢中一握手，使我兩眼無昏花。
太行蜿蜒走秦隴，大江渾泡通岷峨。山川自是助靈氣，腕底絡繹煙雲羅。
馬如游龍車如水，高門鼓吹開華堂。風流獨有神仙尉，細嚼梅花字亦香。
合肥李萼樓國棟南園得墅記題詞

吳門亦有故侯瓜，天與行窩玩歲華。尙是萬方多難日，長源可許臥烟霞。
平疇似罽郭如環，半畝方塘月一彎。尺木禪栖應伯仲，先生長日閉柴關。
贈嘉應熊衡三理並題其所箸文

海外文翁君獨步，滿栽桃李送春回。羲軒遺種思歸漢，不數虬髯古霸才。
卽論文字亦清道，華路君家啓馬留。
屈來由古云馬留相傳焉按南遷而留者我願堅車加速率

慈航普渡到新洲

湘鄉曾氏謂文以較道比桐城為繁車近日東西文化絕

字以實行致有難及即如飛機飛艇之應潮流也

題黃克強挽劉道一詩軸為劉霖生撰一作

多少英雄盡黃土惟餘碧血化明星
弟昆師友拳拳意付與禪龕照汗青
願起潛以先德竹庵遺墨手卷屬題為二絕句

卅歲鄰居共釣遊滄桑劫後喜歸休
人琴闕絕無消息名跡猶留顧虎頭
令子英英命世姿一編遺墨付裝池
復泉卷册同珍重寸草春暉永孝思
寶甫以張夢晉船山春水畫件屬題寶甫自謂張靈後身

十二萬年如一瞥區區七世更何奇
料當黃土搏人日便有無窮聖小兒
吳中掌故吾家事都仗先生作化身
欲效爭墩王介甫媿無彩筆說前因
曾踏芒鞋看蜀山吳江虎阜夢鄉關
何當一棹煙波去心與白雲同往還
題明嘉靖間吳江曹良全太史錄乞食兒圖

滿幅流離乞食兒監門圖畫少陵詩
先民筆有蒼生淚世世子孫永寶之

帝王事跡已成塵滅賦騰章記校邠
題沈藻卿姻丈牡丹畫本爲衡山妹
淡妝濃抹總相宜家法南田筆露滋
乙亥冬臙病起展誦經耜所藏篁村
同舟人望若神仙擊楫還留翰墨緣
殘山賸水感滄桑終古金焦媚夕陽

汪生向叔士元屬題傳硯圖卷

傳硯曾聞漢范喬君家四世更遙遙

晴村公所傳以授子孫先得科第者至向叔四世

竹林懸榻幾春秋執挺門生已白頭

於龍門汪宅向叔年十四耳泊需次津長蘆運使任向叔中進士第翁命代訪

探籥妙論發梨洲新舊乘除運不侔

文山元晦登科錄千載依然什襲珍

吳江周迦陵麟書出其祖先石落先生友人手札

松陵世德在清門緘札裝池手澤存風動乾嘉諸老輩獻韓留得雪泥痕

吳江

人物續志石落先生官楚中方伯行部請韓先生律不喻竟以韓獻方伯恣甚因斷能之遂解組

個儻公孫信白眉鱸鄉繼起擅文詞他年更續耆英傳世世子孫永寶之
朱毓生以其母郭穉芬太君遺畫扇屬題

丹青一幅抵熊丸珍重臨歧掩淚看莫使元規塵撲面蘆衣不信有單寒

題吳中七老怡園雅集圖

並序

圖爲顧艮庵方伯潘西圃侍讀吳引之觀察蔣心香水部潘玉淦方伯彭
訥生都轉吳語樵觀察光緒己卯在怡園雅集年皆六十以上余十三四
歲時先兄寅皋館於吳語樵太世丈家課其諸孫今忽忽四十餘年不勝
滄桑之感爲題一絕以歸之

城東游釣記前塵老輩風流迹已陳想見園林裙屐盛貞元朝士更何人
題顧若波畫西湖風景圖

吳下靈光老畫師煙雲筆墨兩迷離燕南跌宕諸侯客猶記相逢未寇時

乙余

西應鄉舉先生時寄
沈仲復府尹署中

四時佳景說西湖淡抹濃妝入畫圖一自滄桑經變幻樓臺金碧失平蕪
題王凌霄燕貽圖

兩世淒悲黃鵠吟扶牀傳硯有遺箴想當燈影機聲裏辟呌垂髻會苦心
母澤都由苦節貽宰官身尙憶含飴披圖省識拳拳意燕翼毋忘茹藥時
題張冠春家藏璇璣圖

錦字迴文絕妙詞補天五色女媧遺君家伉儷應增重不信人間有寵姬
題李筠盒所藏陳榕門相國事迹圖及命名猶子手迹

雍乾儒術中天日更讓榕門治理純滄海橫流民已瘁百川重障更何人
畫圖如見端凝象手澤尤徵樸厚風珍重君家藏什襲心香一瓣祝生崧
題松海

風塵瀕洞人間世爲聽龍吟植萬松添得吾吳新掌故小王山頂小隆中

無錫榮氏蓮花作並頭者五索詩贈之

昔聞荆樹蔭重稠今見蓮花五並頭自是君家名德重玉昆金友冠南州
太湖一角闢園林華萼樓前瑞氣深不羨姜家誇大被荷衣薰帶賦同心
葉小鸞疏香閣主遺像題詞

不爲弄玉隨蕭史早共姮娥入廣寒十七年中文字障獨留眉硯與人看
玉清小謫墮塵埃笑指昆明幾劫灰悟澈曇花如泡影菩提無樹鏡非臺
題憊僧居士趺坐圖

菩提無樹鏡非臺色相俱空障翳開要化娑婆成淨土人間到處見如來
我亦金剛百鍊身諸天下謫墮紅塵衆生何日都成佛重到靈山證夙因
題沈田莘僧服像

自是金剛不壞身偶然遊戲到紅塵披圖忽現瞿曇相悟徹如如證夙因
欲將隻手挽狂瀾同禱和平夢已殘誰把娑婆移淨土側身天地一蒲團
陳思九廣文八十二像贊

疇人絕業及門多如坐春風飲太和苜蓿盤空松菊好磻溪老去有漁簑

四十五年前事在先生寫箠我成童

先府君庚辰進籍自京歸賜扇卽先生所書

靈光殿圯傷者

舊克守楹書賴許冲

籌成孫君以卅週從戎紀念屬題爲兩絕句以報之

投筆從戎盡出羣卅年回首氣凌雲而今虎阜鷹揚宴應被人呼老子軍

會余

言青年有童子軍則老人應組織老子軍

莫謂吳人多脆弱君家篋有十三篇干將門巷要離家烈士何須慨暮年

會余

著蘇州武士道載於斗報中

壽張季直七十

矮屋年華卅六餘歸舟嘔噓集襟裾儒林外史勞君授喜讀生平未見書

戊丙

報羅同舟南歸君以儒林外史勸余閱之

教稼明農百卉蘇君歸長樂我飢驅華嚴彈指成樓閣領袖東南冠顧廚

幕府參軍又一時子雲筆札繭生辭龍蛇大陸風雲起猶抱郵筒作導師

北

都中項城與人交書皆余捉刀民國元年余應召入
都公在縣墮門墮函稿以介於項城自後文電絡繹

一樣心期不帝秦鳩媒鳩逝詈申申放歸田里渾閒事偏仗元方作轉輪

安

會起公以退庵函電繼余代諫數日乃放歸
後來魯云公亦在風中又云島不觀梅耶之

三日濠南媿授餐南天應作德星看平生風義兼師友松柏相期葆歲寒
刊落尋常側艷文悲歡離合述前聞願公壽與彭篋比長蔭江南作大雲

壽崞縣梁伯強六十

一樣心期不帝秦君行我止各沾巾

乙卯秋余出機要局入
教育部翌日君赴天津

行年六十猶年

少欲往西方訪美人

前年君欲遊美約余
同行旋以疾中止

天台雁蕩普陀山月舟車共往還

前年孟夏共遊浙東
諸山及東西湖

一自大龍湫畔坐

頓教白髮變紅顏

有約匡廬謁遠公無端勞燕又西東風雲變幻郵程阻

是時津浦
路不通

一瓊遙酬

巽鑠翁

劉綱夫婦本神仙三鳳河東更比肩不作尋常稱慶語連籃豆腐滿筵前

事本

壽王仁山六十雙慶

閒居無俚敲詩鉢髯也超羣手八叉龍馬精神聊小試已教吾輩斂蓂芽
絕糧猶記武昌烽火連天靜不驚能使赭衣同一飽豸冠功德徧羣生
梁孟年來賃廡居陶然天地一蘧廬壺中日月羲皇世座有車公詠樂胥
白頭眷屬擬神仙意氣軒昂尙少年有鶴南飛歌一曲爲君起舞醉瓊筵
袁觀瀾輓詩

平生風義兼師友溫飽無求獨數君破帽敝裘勤一世惟知損己利人羣
津門攜手方傾蓋燕市推襟各履冰一綫生機興教育清流黨禍弭甘陵

甲清

辰乙巳間君至天津考察新政始相識民四與君同奉教育部籌安議起
教育界無請願者余以職後范靜生君翔長教政皆舉君爲輔與論議然

環球閱遍盡師資一病彌留不及私今日蓋棺方論定九京可作我誰歸
卅年奔走空皮骨桑梓安危未息肩禹墨胼胝儒澹泊祇羸兩字謚鄉賢
江霄緯輓詞

詞林一現宰官身解組歸田不療貧老臥梁溪仍講學澹齋絕業屬疇人

文壇角藝少年場耆舊凋零閱海桑賴有文孫傳世德黃壚軼事說滄浪

曾君

爲蘇州中學監督
在滄浪亭左近

陶小泚輓詩

曾共春明詠白袍飲人和氣如醅醪

余與君甲午春
同舍

葛巾漉酒君家事一葉扁

舟挂大瓢

自鄉學舟
時相送從

精覃洩長九千字高詠離騷廿五篇老去粉榆推祭酒百城書卷飲中仙

年來卜宅近滄浪都爲王生結鞶忙排難解紛天下士少微何遽掩光芒

病榻喁喁話杞憂

余問君疾尙以
四鄉匪禍爲念

正聞強飯忽彌留家徒壁立惟傳硯歸旄

淒涼蘆荻秋

殷母閔太君輓詩

白塔港閔傷科之
女斥資建義莊

汶上曾傳洗髓方神奇偏衍女兒箱從今中壘編遺傳更與倉公繫短長

婦德鄉閭徧口碑義田千畝布仁施笑扶鳩杖升天去七七開花付兩兒

八一三倭寇淞滬後雜詩

無翼乘雲且御風旂飄十字貫中紅弦高縱乏韋牛犒一片丹心表阿蒙

幸與

印翁等同往前線
為十字會勞軍

昨夜風狂雨洗兵天空軋軋有機聲笑言爾輩毋驚恐老子軍如小范營

所會

在范莊宋夏人稱范公為小范老子余欽
糾六十以上者為老子軍亦先賢志也

太炎不作石遺亡猶有城南李小王

小王印新問居
山故

要為乾坤留正氣誓織醜

虜掃機槍

鄧尉相傳即仲華司徒廟柏尙槎枒

指邑侯
鄭公

慈航請為蒼生渡滿目哀鴻似

水鴉自唯亭以上見
難者連船不絕

大樹將軍忽地逢桓侯態度轉從容坐中更有楊難敵出匣龍泉各及鋒

章煥

文伯發壺嘯天
將均同時晉接

暮色歸途飲市樓到家兒女話從頭忽聞電激雷轟勢臥榻難逢鼻息齟

晚是

敵機炸西善長巷與
聯運甚損傷甚重

破曉街頭千行倉皇婦孺可憐生城闔接軌皆囊橐北戶俱封靜市聲

晨明

遷徙一
空矣

送帑到處望黃駢樂土紛紛近墓田獨有老夫撐健骨呼兒快著祖生鞭
為郡將入
救護隊
兒次

中元時節正秋初鬼餒神嗥祀典虛多少親朋迷不復彈丸往往震堦除
排日淞濱報捷音倭奴授首協天心又聞北道行收復痛飲黃龍酒待斟
得似橫濱地震無汝曹猖獗追天誅朱莊左近朱園側殃及池魚骨齒枯
莊朱

目的在老五團營房朱家園即善長巷
側目的在縣政府掩埋隊斃敵數十具

嚴生肝膽亦輪囷瞬息飛車發滬濱鉅萬災民移善地貲糧屏履感懸鶉
嚴

慶祥乘汽車來蘇云上
洵難民二十萬待運

穹窿高處舊居停留得茅庵盼客星孤負禪師親勸駕塵緣未了謝山靈
堅道

師留屋待吾
善言謝之

莫釐峯下指迷津一彈飛來墮水濱辟地諸公多似鯽幸哉呵護有河神
機日

投彈于東山
落水中無害

多魚師漏最猖狂父子駢誅亦可傷窟穴中樞甘賣國醜聲終古玷詞場

時人

黃秋岳及其子最爲日
諜談大事父子處極利

田單自始無生氣吳起原來善吮糞身負創夷猶壯語大呼殺賊碎臨衝

病院

已千餘人傷
兵多可敬者

醫家利濟徒空語一一高飛不賦歸累爾青囊阿堵物須知削籍有官威

醫院

延醫往往逃四鄰不復新縣長
戲斥約其不至者奪其醫照

人去樓空鐵鎖嚴繞梁君子似郎潛滿堂金玉誰爲守肱篋專車太不廉

偷兒

有公然車運者警察
以爲家主也不問

鹿兒島現我空軍稍示膺懲滅敵氛報李投桃循古禮紛紛倭婦索失君

我空

軍于九月三日轟炸鹿兒島日軍
人殉者其婦有米夫團之組織

傾國來侵海濫師兩旬血戰卻蝦夷三年拜賜拼焦土收復燕雲總有期

常聞間諜冒災黎亦有生俘兩淚垂噴爾心驕天奪魄五洲同憤看醒獅

熱血一腔無地灑嘔心長吉祇耽吟曲園三字催眠訣呼吸調和病不侵

睡血

盈升三
日即止

寧使寶山作焦土田橫五百盡橫尸同胞同日同時死取義成仁百世師

寶守

山之姚于育全部俱
殉外人稱其壯烈

泚泚飛將陷重圍擊賊猶能奮國威南八男兒惟死耳倭人傾倒視神祇

空航

員閣海文往炸敵
手槍擊敵斃數人後自擊殉國日本各報深致欽敬

星使鱗傷幾隕生英倫羣作不平鳴仗飛驂乘分明見魑魅橫行世盡驚

大英

使許需森自京返中途中途被日機掃射其
武官伏地見之日乃嫁禍華人無賴之至

流亡就食過雲間八百餘人陷火山公法約章都不管可憐溝瘠幾生還

民難

過松江為日人炸死者三
百餘運杭病斃者五百餘

高會葵邱筮盍簪一篇牒訴筆誅心

聯國

欲全國命輕生命壯烈犧牲海外

欽

月到中秋色已寒庭陳餅餌與誰看嫦娥夜夜傷離別縫號千人淚不乾

機敵

其尸時之衣有所謂子人縫者與
護身佛同為我戰利品矣

七誠不罵罵元璋三百年來九四香

明太祖以殺氏祖籍為額曰使吳人

宋吳人燒九四香于地以紀念之

香火應隨兵劫斷路人私祭尙難忘

因避飛機而下敵尙不

也悟

鄉賢小范本能軍老子成羣創異聞贏得元戎高論在先驅何以謝諸君子老

軍紳案委員長馳電勸止自當遵命然同志來訊已寸餘矣

縱然祈死亦能軍千叟同袍古未聞欲使懦夫生壯志轉煩當局賚鴻文

員長來電許為懦夫立志

亂向臺台送彈丸無辜赤子受摧殘詰朝盡室流亡去老子婆婆獨倚欄

二十日敵人投彈于聞外車站苦力死者殆百餘城隍廟畢士街萬年橋均炸翌日人跡又稀

嚇雞腐鼠肆狂談萬國金軻辱不堪東殺何如西禱祭勸君大口暫緘三

會各國二十日午後大炸京都各國可早出避請使皆拒之各國均祈禱和平

井蛙甕鼈夢難醒我武維揚帝有靈十萬健兒齊拍手龍城飛將在郊垆

一日敵機七十二架炸京為我空軍碎其四京亦無重損

飛將名門出戰憑樵風徑內有書燈爲猿爲鶴無遺恨尸祝千秋萬口騰

道以空軍殉國四年前長成
中亦畢業生未婚化樵風徑

大樹童童陟冀方齋書使者亦輝光悲歌慷慨稱燕趙還我河山禱彼蒼

指揮已往滄州遺
使述北方戰事

好生四海皆兄弟攜手同謀拯子遺推食解衣營舍館首防疫癘訪盧醫

國際救濟會英士梅乃魁
先調查收容所難民免傳染

金吾衛士本零星保衛鄉閭賴壯丁記否五年前日事曲端縱鶴乃鴻冥

八之歲余與李印翁主練保衛團印翁在善人橋召集乃逃匿山陬或亡命
別區時踰五年昔以壯丁爲多事者今則噴噴稱之亦見時會之不同也

四海同心一子由軍糧民食費綢繆迷陽傷足身猶熱摩頂將毋墨者儔

患熱百餘度右足不長須人扶
掖乃強起赴會議席戒之輒忘

叱咤風雲李武甯忽膺末疾軫幽并參謀帷幄才無兩望子康強返玉京

和患中風歸武甯休
後期一月後即愈

百戰威名顧泗陽平倭步武威南塘魏貅卅萬聽申令一晤深談近艸堂

三總
指揮

上官功與稭侯齊草聖吾宗亦鼓擊猛將如雲多舊雨凌煙一一姓名題

青伯英
剛集圖

徧地徵調捉役夫農民裹足市人驅江淮戍卒能瓜代畢竟施讎是宿儒

員曾諸省府運導淮卒
萬人以弛拉夫之事

玉鏡臺前溫太真顰飛雙鳥詠來旬老巖當道原無畏吳會干城福我民

侯溫公下車復居
縣府民心大安

鼙鼓聲中賦瑟琴請纓救國斥兼金有情眷屬都如此雙祝平倭夜夜心

會使凡新婦者效之數不足平矣
樹金

各方長老尺書貽責問成軍未有期鍊氣自稱能辟穀狼煙噴霧更為奇

子軍來養盈尺有二重云能辟穀兩旬日行百里又有
引武備志須烟方藥謂可作燈霧彌即黃帝五里霧也

寒衣大被費諮謀待作春申江上游染得西儒豪俠氣毀家須訪富民侯

尤懷幸借集款助離民困與雄博士等同往
運募中西賑款而約月進幾千欣其客

舍身濟物屬程嬰敵彈穿舟色不驚勸衆同聲宣佛號慈航安渡到蘇城

程叔

覆護難民數百敵人送槍彈洞十八處有跳水或果泣者程君令齊聲念佛竟無恙

貨殖懷清百尺臺諾言早許濟沈災幕廬竟屈賢侯駕十叩朱門九不開

某

婦許以十萬助政府與邑侯同遊西跨塘訪之不遇後約期又履爽

分肉陳平尙少年白登歸後又吳船三軍挾纜爭先往不埽凶鋒不凱旋

自陳

長

不似徐家書畫驢僅供高士飫庖廚百方便面慚三絕救國誰能措大如

樊典

少雙畫師合作扇面百頁全充救國捐

女師裝束過徐妃風借孫郎亦閻威可似平倭戚元敬凱旋拜倒絳紗幃

族

女校教師徐蕙芳于籍孫氏賀之

公綏先澤在班書師座蒿庵善者居墨突不黔圖救濟蒼生滿地肆枯魚

亞成

員

不是相如諭蜀篇神山徐福女童傳弔民伐罪煩重譯排難吾師魯仲連

敬作

告日本國民
一文付歸

血肉淋漓手足殘車中蒿目淚痕斑昔言親善今如此天道難言只好還

一翔至北新涇
一路傷兵

潘郎老去鬢初華說士談兵富五車要使流民出溝壑使君妙舌粲蓮花

潘子潘
欣先

尤袤名家學劬農轉移風氣醒吳蒙監廚請客忙書簡精悍終爲不倒翁

尤
壻妹

知名湖海杜君卿一諾千金四國驚十萬朱提自隗始吳兒那得不心傾

杜
生

晝夜碎旬震耳聾樓高千尺聽豐隆分明苦樂鴻溝界半壁笙歌曲未終

十四日雙方劇
租界如隔岸觀火

不道逋仙善理財吾爲爾宰古顏回萬金足使民勞息元舅聞之亦快哉

侯會長兼憶
其勇沈若嬰

廣林

月九

月杜

韻尤

子潘

南自

富士今偏成樂土鈍髻昔殆慕蚪髻一篇老子軍歌出况有龍門接史談

金硯君先生末句謂其子立初

滬瀆歸來月上初轉輸餉械盡兵車呼兒返旆金陵去憂樂希文計未疏

日同里杭兒譯本舉返京

子弟黃花比瘦人八旬邱嫂話前因寡妻弱女依梁廡多謝良朋任大椿

均一家團聚妻女均生彼珊宅

拳稱太極象天圓摩盪縱橫手口傳吐故納新調氣海人間到處有神仙

習太極拳深呼吸

熱淚雙行鄭俠圖忽聞克敵又歡呼旁人錯訝成狂疾歌哭無端是老夫

百花西巷伯休家花木扶疏靜不譁要與流亡營廣廈沿門托鉢找生涯

百花巷程宅為吳縣救濟會所在地

風雨重陽潘大臨隱居常喜遁深林商山若用留侯計未許遐心闕玉音

笙光生

天龍八部雁門關軍實生俘滿載還更喜捷音馳涿鹿幽并豪士復常山

路八

軍大捷津浦平漢兩路亦捷

老子何如娘子軍鬚眉畢竟讓釵裙木蘭未嫁嬰兒老各撒環瑱願獻芹

以擬

宋慶齡爲軍統李鎮全何香凝副之劉立明湯國黎爲左右翼

曾向湘鄉受挺經焚香一炷告神靈任人呼我爲牛馬龍燭何嫌燭火焚

所有

理不

勤攻吾闕師諸葛狂狷偏才每自箴炳燭餘年思寡過獨行盟影寢盟衾

八百餘人守死城遺書訣別過田橫睢陽食盡將餐血漢幟高張壓楚聲

晉謝

元劉八百壯士死守四行倉庫

退守休將勝敗觀蘇州河北立營難深溝高壘軍心固孫武兵書子細看

軍大

撤退漢茹以就工事

黃金台上郭先生已著戎衣尙請纓芳草王孫新著作重來吳下作賓萌

見齊

郭竹書參議

新著頭銜號挺翁滌翁經說衍南豐圖形老子須臾筆卻笑須眉似社公

張佛

千請吳畫師
圖我親惟肖

肉身菩薩住蘇州語錄流傳祖慎修入識須將三毒酒南能北秀盡低頭

江蘇

易園講演錄
稱印光法師

殉國同心八百人居然復活古張巡重標漢幟歸吾土喜極翻教涕滿巾

國謝

奉令出四
行書庫

一門將種願元歎休沐黃忠徧體癢更有鄼侯功第一聊酬佳釀佐杯盤

酒以

奉希平敬
久繪甫欽

兵間亦有子陵臺回首河汾育將才千載相思重聚首言師方自采芝回

贈贈

立三先
生二首

何必匡廬有洞天穹窿可訪赤松仙神州舉目河山異橘叟彈棊笑拍肩

特爲蒼生訴大師黎明入寺願慈悲只求一滴楊枝水徧灑枯魚勿餒而

印謁

師商
教齊

目空三島氣先吞慚愧虛名達至尊千萬軍中心不動陽明學說我能言

首二

謝曾擴
情贈詩

蒞官必敬曾夫子道出吳門過敝廬更有佳章詞溢美王良無奈馭虛車

名城橋李苦相侵蒹菜鱸魚草木深悵望雲間聞鶴唳元龍故里咽潮音

與嘉

松江俱被炸松經冷
陶遺故里昭後克復

失計防秋瓦不全東南大港久垂涎吾宗老鐵紆籌策黃浦江東一蟻穿

浦乍

金山衛失機浦
東已受威脅

漫向汾河檠戟馳危城獨坐傳修期雲山三晉多天險臥榻豈容木屐兒

川百

已往臨汾傳
宜生留守

烏糞何因著佛頭帶花士卒復相讐女師鬻舍都焚毀蔡琰班昭羅百憂

華振

與蘇女師為傷兵婦
均被炸後兵俗說帶花

上書幕府髮衝冠退舍須通生死觀欲效江陵身作薦勛哉夫子尙桓桓

松蘭

江青浦本
上書幕府

要謀甌脫置灾黎如築菟裘障潰堤國士幸交天下士輕車四出夜聞雞

友四

梅項閱諸君謀安
置灾民于鄉間

飛仙畫餅不充飢川潰如唐節度師晝夜紛紛逃窟室流星迸火戶然眉

日粉

空軍不逐崑山
素亂潰卒如頽

欲脫修羅訪道場五千瘠者出盤閭相憐同命如蛩駘火急追亡孰辦裝

送贊

羅民至善人橋與由
筮同至小王山安設

夫椒笠澤蹙夫差兩拒乘虛似曳柴六十八旬成燕雀船山土室費安排

九十

日蘇城
不守

舊約招提小止觀威儀三代愧儒冠芒鞋柳栗將終老黃蘗詩篇子細看

辨已

裝備

本作灾民卒歲謀稻梁鴻雁枉綢繆鉅橋擬貸監河翠終勝量沙故唱籌

木運

漕倉無以
繼民食

追蹤樂圃信鄉師佛是仔肩一木支後起英才堪倚仗歡顏大廈我心儀

立朱

長助校

快哉亭後壯哉樓環抱名山氣不侔燕子飛來和尚誤
亦庵入定且歸休
廣姚

此寺故廢

道第難行積水深摸金校尉戡戎心定中枯坐明如鏡
罔罔生魚入釜鬻
近村

身積卒需
崇或搶掠

讀書石刻買臣臺度嶺亦庵石罅開大士尋聲方救苦
清齋留共嬾殘煨
草宿

庵

擔柴挑水自句當六祖纏腰不二方夜靜惟聞風撼樹
中宵為燕佛前香
清隱

師

修羅降世率羣魔努目金剛沒奈何事到急時依佛翻
了無恐怖證維摩
卷

昔聞論語出王仁學說陽明更絕倫乃木東鄉何處去
只餘其豆泣先民

因果循環有佛訶衆生業力召修羅何如放下屠刀去
造個慈航海不波
以上

二首元墓
山補壁

行行望到虎山橋百濟新羅氣甚囂廚願正謀羊酒犒歸途合掌視天驕

福飯銜如家歸見步
麟千餘因僧服未問

名山從此見萑蒲汪直餘波似識途不道岩阿成藪澤參寥夜半摸金徒

木檀善人橋均被擾所居
寺遇盜幸佛祐未見我室

寒衣未運擔簦回聞道金閨畫不開比戶搜牢成竊疾燼餘重撥建炎灰

城者不得入又來聞城
中門戶大開物無存者

蘇俄早換新經濟反共偏嫌共產低共產但知增已產公妻專欲奪人妻

為公之
別解

女作男裝太可憐雖非孟母亦三遷避秦那有桃源路且向空王證夙緣

寧學蒙莊曳尾龜豈甘太廟寵為犧度人自度終何補細讀華嚴泣路歧

真人不出孰降魔野狐梁到處譁鄧尉山頭重負手鍼膏起廢有醫家

遇雄乃魁榮梅生集
有病人入光福醫院

天漢銀槎路未通相煩梅福作郵筒潭山深處幽人宅濟眾還謀兀者翁

光自

福往潭東宿正康富商冬振
棹乃魁赴瀝以書托交三弟

巨創直接建炎年道殫相望戶不鍵漫道棲霞紅葉好自西長戴杞人天

殆遺失

疾病死應爲有福祖庭舊句最含悲寥天一雁成孤影腸斷申江永訣期

弟凶耗自十月十四五
日一曙後遂成永訣

合傍彌陀設一龕脫離五濁或回甘高僧誦佛安靈座他日重移止足庵

屋東有止足泉余將以是名吾庵弟之
位現擬草庵清禪師爲念佛廿一日

石城消息隔天涯國破山河屬幾家成住壞空原一瞬何如學種故侯瓜

危已

猗雛轉詠樂無家大好湖山玩歲華欲向洞庭尋石室曉猿夜鶴水之涯

月二十日有
洞窟之游

汎舟孺袴與溫衾差免窮氓二豎侵范叔倘逢須買楮但求清夜自捫心

勸代舊衣袴棉胎九百
事分與光福香山羅民

立朱

京南

堰上

三關

城蘇

瓜皮小艇泛胥江五十年來舊酒缸猶憶予昆就甥館激莊西去午鐘撞

歲廿

到激莊至今五十一年矣
由此往渡村將至東山

荆棘叢中掉臂行學仙學佛任吾情何當爛醉中山酒一夢醒時竟太平

徐飲

祖舞家與
少逸狂飲

一生一死翟公門海外坡仙又告存咫尺家書無術遞喜逢信使笑言溫

三喜

弟未死
之訊

氣包天地地包山福地嫫媼犬亦間想見留侯逢四皓咸陽大索度函關

侯留

下邳人而西山有四皓故
里殆博溟惟後選于此耶

朝出橫金夕莫釐石林攜手薛家祠山中名士多於鯽宿衛依然見漢儀

東宿

洞庭四日葉樂天
君介紹於薛嗣

五十一年尋舊游姑胥山外水東頭浦莊午膳橫金宿懸榻難忘席氏樓

胥白

口至橫金
宿于席氏

筍輿度嶺野花香白髮門生菜味長謁墓先塋王閣老茶鑪燕火謝諸郎

後白

宿業功甫
惠和堂

買舟西去訪龍威古寺重游勝翠微此是鄭莊通驛處蒲團坐破雪花飛

郭聚

約至包山
寺下橋

曾讀清涼讚佛詩梅村隱語少人知帝心早悟修羅劫一領袈裟證大師

東華創始睿親王二百餘年攝政亡菩薩畏因懲葉赫潛龍何似隱禪房

包右

山寺風清世祖所寫佛字
張山僧曉晉和尚者二首

雪滿山中鳥不鳴天空玉戲失人聲忽思李愬禽元濟正好重鑿北府兵

立馬吳山願不違童童錦樹幾成園精忠柏萎祠堂在可有胥潮作怒飛

覺右

范包山
寺二首

小劫紅羊八十年梅花萬本已成烟尋聲欲把慈航渡乞取楊枝一滴泉

余題

秋編集所繪梅花觀音小圖
係成豐庚申袁鍾琳送山者

五旬三度虎山溪山外時聞惡鳥啼喜與汝南分一榻淮王雞犬亦遺黎

爲尋漢柏禮司徒竟乞山僧香積廚歸路忽聞好消息浴沂更醕兩三壺

徒司

聯午食歸過浴池
報漢口南京新消息

學佛將無類濟顛未能斷酒惜高年賓朋雜沓筵前話一夢蘧蘧對客眠

光福

宿劉正表
寓得三首

申江兩度萬金書一子尋親返故廬水陸間關天或佑縱談時局轉欷歔

弟得

函二次杭兒來述
三月來經過情形

張吳後裔喜相逢雁足傳書制毒龍府姓自言為張安得錢鏐留鐵券姑蘇

城外怕聞鐘

戲改唐張繼
寒山寺詩

飢卒居然作贖刑湖中每峙宋江營可憐巾幗無安宅麋鹿蘇臺冷故城

寇湖

四劫婦女
進退皆難

弱女偏能搏盜酋楞嚴台上佛燈幽脫離虎口誰援手一卷彌陀蕩百憂

子女

賊案
賊事

不拯遺黎誓不行仁漿義粟運輸成欣逢黃憲申江至喜極如狂躍五更

勝黃

願自申來三弟
有口說運賑款

工事先從水利商欲完三堰繕荷塘

將荷花池

要求慎伯齊民術白想亭林塞

上羊

工賑以水利為主而輔以種植畜牧

還元閣上雪晴天信宿忽忽入虎年老樹着花春已逗色空空色悟初禪

元墓

山靈

元旦虔熏佛殿香山僧同拜喜神方莊嚴龍象降魔杵欲爲蒼生叩九閻

元日

佛禮

一紙家書值萬金汎舟饑粟洽天心泉源五百夫人乳徧灑羣兒和鶴陰

劉商

正廣劉振款安插難民五百

方推福地莫釐峯忽報河防地水凶回首路公祠下過後凋終望歲寒松

山東

三耗德如汝殺

闔閭霸業劫池灰臥虎瞿騰眼不開何似生公宣佛法點頭頑石亦慈悲

烏啼月落曉鐘春生小吳儂解避秦同是東方君子國休教萁豆泣先民

黃巾不入鄆公鄉媿煞流風漢彥方賸水殘山留墨妙袖中東海自芬芳

本日

軍官鄭夢起題
虎邱圖三首如右

亂離身世尚尋梅，疏影橫斜取次開。木閣虎山橋畔路，倭刀武士伏牆隈。

潘仲

杪至虎山尋梅橋地以木
爲之有武士二人伏焉

還元閣上又登臨，合掌山僧有佛心。欲覓異材修大廈，相期把臂入深林。

邱至

尉與心朗上人
海木料爲屋材

夜半鎗聲夢裏聞，蔥靈羣盜釀愁雲。叩門壯士充游徼，多謝殷殷蔣子文。

士蔣

才傑長
來宿衛

梅雪爭春未肯降，紛紛村女駛徒杠。虎狼四伏門前後，恨不生成鳥翼雙。

石白

馬頭至山麓
婦女逃遁

漢上伶歸報捷音，瘠牛能債亦甘心。任環石壘猶堪指，木石同銜海角禽。

伶某

自漢勝言空戰時
勝敵擊落十五

申江半載又來游，邱嫂荆妻淚欲流。憂患方生安樂死，菜根滋味說從頭。

汪倫昆季最相親，輸粟方舟屢指囷。更有潘郎同飲讌，鋒車明日度春申。

秋桐

蘇昆季與頌
約留宿光福

狼子尋仇作虎傷，皇軍夜襲索戎裝。草廬餉士供糜粥，借箸伊誰策子房。

馬白

寺記

落魄鄉居已半年，在山恐作出山泉。謬臺大半因人築，又向天孫乞聘錢。

蘆中窮士出昭關，喜見妻孥爲破顏。大廈偏容吾輩住，人生苦樂本循環。

申到

住樂雅公
寓三樓

又見梅郎絕世妝，容華半老尙清吭。萬方多難容歌舞，卻爲哀鴻助稻梁。

關梅

芳演
劇

詞

賀新郎 賀汪伯唐子娶婦

老子擎天手，到年來、婆婆風月無心。圭卣繡佛長齋隱，人海萬事糝糠塵垢。但甘爲哀鴻奔走，酒肉朱門道旁骨。爲郎君積德，求佳偶，賓欲醉筵無有。桃花流水春深後，見新人心腸菩薩同符。君舅玉鏡臺前，青綾幃味，且雙雙。

上壽更準備催妝幾首織就天孫宮樣錦問而翁得被蒼生否君子曰衆人母

浣溪沙 賀狄巽公長郎九乾新婚

用九乾元見在田海虞瑤島詠胡天武襄門第月長圓 西洛才名稱國寶
東萊博議本家傳戴銅面具拜張仙

心太平室集卷十

心太平室集補遺

吳縣 張一塵 仲仁

徐佛蘇西南自治與和平評議

徐君佛蘇以西南自治與和平一書見示且曰子必爲文以評之余諾以十日會余將至萬全避暑窮一日之力走筆爲之文不加點亦未錄副卽遺徐君爲我刪潤之乃徐君卽以原稿登報漫漶脫誤不可卒讀上月初余自塞上歸而徐君已翩然南下矣頃余由洛陽遊伊闕旋京而小極不能出門戶乃乘此養疴餘閒輒加修正以貽當世明達君子評其所評焉天下大矣事變無窮余作此文不及兩月耳而和平之聲大作總代表又已有人向之所言似爲陳迹雖然以科學原理言之兩平行線雖引之至於無窮終無相遇之日高高在上是名大圓地球之遠日也以離心力與向心力二者之和而乃保其永動性今之離心力亦多矣其向心力則僅有存者欲問人之向不向先問我之心爲何如心致中和天地位焉萬物

育焉人爲三才之一順天者存逆天者亡慎之哉中華民國八年九月東

吳張一慶自記

吾友徐君佛蘇今年二三月間卽有西南自治之議僕適南歸過滬聞其言卽痛駁之謂今日四分五裂之不足而又助之張目乎僕所非難之點大致謂南北分治不易得外交之同情而轉授野心家以離間之柄也政客之朝秦暮楚合縱連衡更無已時也雙方仍持軍閥主義無自治之實而適得雙料之迪克推多也人民困苦已達極點處乎南北地域之間者一彼一此將爲春秋之宋鄭三國之荆襄無術以避丘八之禍如今日之醴陵寶慶者恐延及於全國也凡此皆余所持爲理由者其時和平會議雖中斷而未絕統一迷夢方沈酣而未醒不獨僕於徐君非難之卽友人中與僕同一懷疑者不少也乃者代表撤回和平中梗吾輩向者無窮之希望已付東流計自上年兩方代表開議以後所可稱爲讓步者不過主戰之段合肥變爲局部議和之馮河間而止（此有陸鴻逵一案可證）然不生不滅不戰不和之局

則雖有善者無以解決之甲仆則乙興丙唯而丁否以外力之撻逼與夫國力之困窮其能長此終古耶日復一日元氣凋喪火盡油乾非與國同休不止徐君乃盡出其所蘊蓄作爲此文公諸當世展讀一過然後知吾輩向者所持統一之說未離乎徐君所謂苟且調和者不足以超度懺洗種種之孽寃何如徐君主張自治爲因勢利導直截了當也徐君屬余爲文平議之余於政治之學懵無所知惟目擊民國以來之經過情形人非木石心實痛之又最近東西各國潮流所傾向鼎鑪有耳余亦聞之對於徐君之文有引伸其說者有補助其說者而終之以結論其然與否俟達者糾正焉徐君此文之要旨具開端六項楔子中此外研究戰亂所由起皆由混括統一說之足召內亂尤與共和國原理相背馳乃推論其結果則彼此以武力相矜而武力卒不能統一故以西南自治分列九條件爲之綱又畫分中央政府與西南之各種行政權限以明其分對症發藥如醫者之切脈處方雖以僕之懷疑亦不能不幡然折服古人有言不知來視諸往十年間之歷史不可誣也

顧徐君之說有未盡者余爲引伸之如左原文謂吾國十年來之歷史實一中央與地方專制與革命相斫之血史是已余謂此等相斫之歷史豈惟十年以來爲然自漢以後或數年或數十年或二三百有年有不革命者乎此其故安在哉三代以前尙已自游牧變而爲城郭圖騰社會變而爲宗法社會無不先有分子而後有分母（嚴譯分子爲么匿分母爲拓都今以數學之分子分母代之使易明瞭）柳子厚曰有里胥而後有鄉大夫有鄉大夫而後有縣大夫大率以最小之分子爲基址其自治能力富者則基址愈堅其分子愈析者則分母愈大故成周時千八百國周之中原不過今直隸山東河南山西陝西等數省耳此千八百國者名爲國而或小于今三等縣缺（劉孚京曰古之封建大國不過百里次七十里次五十里及秦兼諸侯分天下以爲三十六郡郡各統縣中略一縣之地容公侯之封累十或八九五六者所在猶多有之中略姦宄之所伏匿怨仇之所交構紛然錯出吏以一人之耳目手足而欲兼營而並務嗚呼苟不得罪於民爲幸耳而謂其民猶可

得而治者吾不敢言之也。雖各國中爭奪相殺變亂無常而周之守府則歷年八百無他百足之蟲死而不僵也。秦併天下易封建爲郡縣實爲混括統一之初幕二世卽亡漢興小變其制然文帝時賈誼卽言藩封之弊謂一脛之大幾如股一股之大幾如腰魏晉以後刺史州牧都督節度使其名雖殊大指不出于藩鎮者近是浸淫至於元之行省而廣漠已極明以十三布政司分治天下其實省也天崇以後督撫星羅棋布一省解紐一省隨之清仍明制而用元之行省始以滿人監視漢人同治以後滿臣功高則滿漢迭爲消長迨辛亥革命不及百日而帝制終焉皆省制粗疏中央集權爲之也（顧炎武郡縣論曰古之聖人以公心待天下之人胙之土而分之國今之君人者盡四海之內爲我郡縣猶不足也人人而疑之事事而制之中略有司之官凜凜焉救過之不暇以代爲幸而無肯爲其民興一日之利者民烏得而不窮國烏得而不弱）亡友湯君勸講東西文明各國無不經封建或類似封建制度遞嬗而來者若美法德俄意日本皆然惟朝鮮始終統一則

亡若中國二千年前固爲封建時代惜離今太遠而與東西強國相遇以脆禦堅耳余思其言良有味也徐君此文謂英之于愛爾蘭坎拿大澳洲南非洲德之於聯邦各國法義之于各洲普魯士之于各省皆分治之模範卽吾所謂自治能力富者則基址愈堅其分子愈析者則分母愈大也譬如造塔然他國由塔底之基礎起而層累以至於塔頂若吾混合統一制則開宗明義第一章卽爲塔頂（例如各省無小學而先有大學堂各市鄉無自治制而先有資政院）至求其所謂塔底之基礎者則大索十日而不得此種建築制度安有不傾圮者哉薛福成言吾國治化劃秦以前至黃帝二千年爲一時代秦以後至今二千年爲一時代吾觀秦以前之二千年皆封建時代秦以後之二千年爲郡縣時代而其亡也則爲藩鎮時代長夜漫漫千古一轍夫封建時代雖未離宗法社會之舊習視近世各國地方自治之美備固嫌其擬不於倫矣然各分子中人材皆有以自効其上焉者爲殷湯周發之誅獨夫齊桓晉文之扶王室下焉者或爲鄭子產爲宋向戌假盟府之書以

自全其弱小蓋封建時代爲之主者尙能分其權於同姓或異姓之功臣秦以後卽人人有萬世帝王之思想不肯分其權於他人卒之寡人政治不能久存勢不能不假手於權貴盜憎主人太阿倒持或數年或數十年或二三百年而卽亡於一二奸雄之手民生其際乃輾轉呼號于刀俎之中徒爲奸雄芻狗而已昔王安石青苗之法行之鄞縣而治行之天下而擾今者七人政府之制施之瑞士而地小易行之廣東七總裁而尾大不掉民國二年熊內閣時國務會議袁前總統每會列席吾見其議案一大冊均主整理道制以爲廢省制之預備其後閣制推翻省權轉重卽項城混括統一之見誤之也帝制萌芽在民國四年之初各將軍紛紛添募軍隊一日余謂朱君啓鈞周君自齊曰藩鎮之勢已成此後中央命令恐不能行於地方兩君然之而無如何果也項城沒而督軍團興南京會議徐州會議天津會議風起雲涌不可爬梳昔也川滇之役今也奉吉之爭苦我人民危及邦國皆省制之賜也徐君謂混括統一說足召內亂證之二千年之歷史而益信奚翅十年

由今之道雖與之天下不能一朝居也此余引伸徐君之說之一也或謂誠如子言則自治須由下級起不已將徐君認西南數省設自治總體之說根本打消乎曰西南自治總體云者不過就已成之局因勢利導爲之兆耳若最初級之自治則當于地方制度中規定之如繪地形然先畫方千里之總圖必將有方百里方十里乃至一里之分圖原文謂混括統一尤與共和原理相背馳可見共和原理必由民治吾友劉君仁航言自治模範利益曰法律章程是假的今所講模範自治之學是要各人從自己治理起方是自治故今所注重是民格能力的自治非章程的自治真正模範自治能令全無希望者有希望無辦法者有辦法好爭亂者息紛爭轉家國地方貧弱者爲富強使無教育者受教育無職業者得職業然後名爲自治故真自治便是國民有自覺之知識自動之能力美國杜威博士教育大家也其論美國民治的發展有曰美國的聯邦除了重要政務交給中央政府去辦別的事務都交給地方自辦又曰美國當初移民的時候每到一處便造成一個小村

由許多小村合成一邑由許多邑合成一州更由許多州合成一國小小的
一個鄉村一切事都是自治又云歸總一句話美國的趨向要把民治主義
和教育合在一塊民治就是教育教育也就是民治凡是教育都是爲民治
設的必須有這種政治才可讓教育格外發展也必須有這種教育才可讓
政治格外改良我盼望中國將來也做到這個地步的（杜威所講詳見專
書及各報茲僅舉大略耳原文用白話今仍之）故言自治之極點必標其
名爲民治其在中國周時五家爲鄰二十五家爲里二千五百家爲鄉五百
家爲黨齊之內政五家爲軌五軌爲里四里爲連十連爲鄉二千年以前民
治之迹粲然可觀矣顧炎武曰有聖人起寓封建之意於郡縣之中而天下
治矣吾求其說而不得乃今知地方自治者真寓封建之意於郡縣之中也
（此說甚長當專論之）謂中國人民無自治能力者是秦以後之言也謂
人民政治程度不足而復歸於專制猶之見纏足婦人初解放者不良於行
乃並三五歲之女子而仍束縛之也謂中國人民不足言共和而倡爲開明

專制者猶之治河專恃堤防絕無疏濬一旦川壅而潰犧牲無數之生命財產而冥然不悟也徐君原文但謂混括統一與共和原理相背馳而於民治之義尙未發揮盡致僕故借杜威氏之說以足之此余引伸徐君之說之二也原文謂彼此以武力相矜而武力卒不能統一於辛亥以後覆轍相尋之故詳哉言之又謂苟且調停即伏將來南北戰爭之導火綫尤如燭照數計雖有儀秦之舌不能起廢疾而箴膏肓矣夫武力之不能統一由當事者不知民治之義遂無自覺之心至於今則向所恃爲雷霆萬鈞之武力無不力盡筋疲途窮日暮宜若可以幡然變計咸與維新而雙方皆以習與性成莫肯推誠相見至外債積至十八萬萬損失權利鬻及子孫此五洲萬國稍有知識之人百思而不得其解者自共和成立以來凡走極端罔不傾覆民國初元同盟會自矜革命有功挾於菟吞虎之力爲七省同盟之祕計一往直前不顧其後而天怒人怨遂召癸丑之兵則革命黨人無自覺心爲之也項城統一全國有華盛頓之資格而不善用之狃於癸丑之役以爲北洋兵力

可以唯所欲爲遂至設會籌安逞其亂命鄙人痛哭流涕誠不足以格其心迨詔下輪臺大勢已去中央威信掃地無餘則項誠無自覺心爲之也項城既蕩黃陂就職合肥以再造共和之聲望出任總揆天下歸心喁喁望治若能效藺相如之下於廉頗與胡林翼之恭於官文府院協和不以力而以德則督軍團可以不作復辟之事可以不生舊國會議員無由持其短長以激成解散之局乃政府國會如逢寇讎對德宣戰牽及內政南北對峙遂生厲階幸也馬廠義師共和再造使與西南諸將棄好尋盟專力對外祇須十萬人出現巴黎境上則此次歐洲和會豈不振振有詞乃不以外競而以內爭已落下乘然卽讓一步言之旣以戰爲名則當自將以身臨前敵或者一鼓作氣數月之力迅奏膚功使西南諸帥翩然來歸尙不失爲舊式的軍閥乃者徵調四出所包圍者不過京漢津浦京奉京綏之交通機關而未嘗有一卒能入桂粵滇黔之境人爲其勞我爲其逸形格勢禁友邦責言蓋以武力而謀統一無有是處不由氏治入手無有是處則合肥無自覺心爲之也西

南諸省揭護法之旗行割據之實無論其事之是非曲直使其勤修內政戮力同心遠如五代錢鏐楊行密之大治農田近如山西省長閻錫山之厲行教育雖在偏遠民必歸之乃狃於洪憲之役以爲武力可以北向爭雄而搜括民財召募烏合所爭者飯盃所較者地盤幸中央政府人各有心政同魯衛否則衆寡異勢強弱異形雖欲自全談何容易則西南軍政首領無自覺心爲之也嗚呼約法精神中華民國主權在人民全體公等苟以人民大多數心理爲己之心理僕將五體投地以從之否則時無英雄有效阮藉廣武山頭之狂歎耳原文謂孽冤相嬲苦獄重重將欲超度懺洗之厥惟民治此余引伸徐君之說之三也雖然原文謂地方分治者卽防制武力之聖藥似矣然各省軍民分治不自今始其省長而不受左右於督軍者幾何人耶彼督軍又豈好爲是不憚煩哉蓋其歷史上之觀念視民政長官如前清督撫之於布政司一也擁二師以上之重兵人人震懼於丘八之威故司民政者不能不爲所挾之而走二也督軍卽自命不侵權限而民政各機關思借軍

人之威以自重求差求缺彙集其門親戚故舊偶爲關說喧賓奪主久而安之三也與其謂地方分治爲防制武力之聖藥不如謂減縮武力爲地方分治之前提故必軍人先有自覺心而後分治乃有效力徐君之說微嫌倒果爲因否則吾前所舉之三者有一於此將奈何昔五代之季襲唐末藩鎮之禍亂極思治宋太祖乃得以杯酒釋兵今之擁高牙建大纛者其身家隆富足以高枕無憂矣雖然人之欲望不獨在本身而在環境使中國而竟爲朝鮮耶將作猶太之富人乎各國均以奴蓄之矣况二十世紀之亡國與前世紀不同使猶太而亡於今日安有富人卽朝鮮之一進黨首領李容九不過受日本警察之保護未爲安重根輩所殺耳彼之自由則已剝奪矣其鼎鼎大名之李完用當時爲親日派首領值韓國黨派分歧內政紊亂姑爲一己功名富貴計冒此不韙之名及日韓合併完用舊日勢力亦歸無何有之鄉不禁門前冷落之感日人待遇亦前後迥殊其題伊藤博文詩卷一絕有句云蓋世功名人已古酒痕和淚滿衣斑哀怨之思殆難回首訕笑吐罵徧於

全球今已以抑鬱死矣今夫一家之中宮室車馬備極豪華然使環境之內糞溺騰臭於牆垣乞盜充斥於鄰里則富家翁雖日扃其戶亦未能強作懽容况曾爲最高級之軍民長官一旦托命於外人之宇鳩形親友槁餓而來歸虎冠偵探盤旋而注視一巷之菜刀且受限制何論手槍（菜刀事見臺灣游記）累萬之存金不能擅提誰爲外庫（今朝鮮富人存金銀行者祇可用百元上下因恐其爲獨立運動也）亡國奴之聲浪日聞于黃口小兒巴圖魯之威風已化爲紅頭巡捕凡立憲國之十大自由不適用於歸化之貴人公等此時作何感想雖有百萬一紫標千萬一黃標將安得而用之夫兄弟爭訟往往一朝感悟泣下沾襟放下屠刀立地成佛吾敢爲無罪之良民九頓首於軍人之前而呼之起起也此余補助徐君之說之一也原文又謂分治以後南不挑撥北方武人以攻北北不挑撥南方武人以攻南果若是豈非如天之福顧徐君不見民國初元統一之局乎西南既有自治總團體矣則士大夫主義之毗於南者必歸南毗於北者必歸北其賢者則有調

和之意其不肯者未免有主客之觀人苟未絕貪嗔鮮不爲所播弄前清光緒之末非統一乎然排滿排漢之暗潮無日不在醞釀之中而以革命爲終止民國初元非統一乎然兩派相傾一則以反動促項城之稱帝一則以矯枉斥孫黃爲罪人如游釜中俄而汽化爲水俄而水又化爲汽一升一降同歸於盡又不觀於辛亥革命時乎都督獨立矣縣亦獨立鄉亦獨立吾蘇之吳江一日而來三知事廣東尤甚此皆鑿鑿可據者故分治而不以民治爲本不獨武力餘燄可以復張卽和約條文亦不能拘束不見美國大總統威爾遜之十四條主義乎協商國以空前之大戰爭撲滅暴德乃巴黎會議按諸威爾遜之民族自主自決主義今竟何如（吾友蔣君方震謂巴黎會議集全球無算之聰明人爲極笨之事而已）彼全球大會尙然何況吾國幼稚之軍人而謂不受挑撥其誰信之今夫物有相合不解之力謂之愛力如煤炭炭氣一遇空中養氣幾於無法可以化分是以世間一切情感有相愛無獨愛有以情相合而爲愛決無以權相臨而成愛顧炎武曰天下之人各

懷其家各私其子其常情也爲天子爲百姓之心必不如其自爲聖人者因而用之用天下之私以成一人之公而天下治亭林所謂用天下之私以成一人之公彼欲使縣令私其百里之地耳若夫今日自治之說則用人民之私以成天下之公然非有權力者深知其環境之能禍福於其身犧牲小我以全大我其道末由徐君固言確定地方自治一事爲和議成立之根本條件余謂全國文武上下之自覺心尤爲地方制度之根本條件此余補助徐君之說之二也抑余更有進者吾國內政往往牽涉外交民國以來吾最親愛之鄰國助南助北惟利是圖吾嘗讀小寺川吉氏之大亞細亞主義（大要謂吾東亞二獨立國各互爲反目則各不能獨立故以日本之武補中國政治之弱以中國之大補日本經濟之小兩國提攜合同然後可以抵抗世界之大勢而順應民族統一之大風潮）夫以吾所親善之近鄰濡染唐風同文同種攔然處於世界五強之列吾國民應視爲師保之不遑何以吾對於白色碧眼之人愛之敬之而對於同一黃色黑眼之人則相驚以伯有乎

無他以彼所助者非國民而爲軍閥彼之新聞往往誚中國人遠交近攻政策爲錯誤（我國安得有遠交又安敢有近攻夫子自道耳）而不知彼之不得罪於我國巨室而得罪於我國人民尤爲莫大之錯誤也蓋所謂親善者有善意的親善有惡意的親善資之餉械以助我國之自殺曠其軍閥而以國民爲犧牲是謂惡意的親善視我國人民之痛苦如其彼國人民之痛苦有利則爲之興有害則爲之去兩相提攜如車有輪如鳥有翼吾國人民方憔悴於水深火熱之下見其鄰之人如此義俠如此慈悲則大亞細亞可以成遠東和平可以久是謂善意的親善且二十世紀之外交國民的外交也吾聞內田康哉氏之由俄歸國也宣言此後世界日趨於民治的方面可見明達之士先見相同也近日吉野博士提倡兩國國民之真正親善可謂得其道矣夫以吾之地大物博用彼之物質文明以開發我利源用彼之實業人才以引導我常識何爲損人而不利己以排斥國民之同情乎自歐戰以後英美實執牛耳勢若連雞日本欲以孟羅主義逐出英美於世界市場

亦多見其不知量而已矣得諸吾國而失諸英美吾見黃色人種自相踐踏以自殘亞細亞洲而已吾望吾國之民治吾尤望吾親善之國爲善意的親善而勿爲惡意的親善使我亞細亞洲爲他洲之人造機會也此余補助徐君之說之三也今夫世界政治皆以科學的眼光化無形爲有形謂之公例雖聖智莫能逃焉格物家驗彼我力有二法一爲一動一靜之抵力一爲兩動之抵力人之生也官體心知皆有自生力以自養以自衛以抵距害我者積人成衆積衆成國皆是物耳霸者以絕大力加之而其自生力與抵距我之力皆消融於我力之中而增成我力體積益助我力之速率然而此力也或乍合卽分甫聚卽散將擗復解驟引旋離其所以若此者必有阻力存乎其間古人曰觀我生觀其生求兩力相抵之比例也又曰知彼知己百戰百勝得兩力之比例而於我力加其速率也自民國元年以至二年間是兩力相抵之時代自民國三年以至四年是得兩力之比例而於我力加其速率之時代至帝制興而兩力互相易位一則北洋派數十年之憑藉一則西南

新勢力之未可厚非又足相抵而歸於不動重學家云物力相關有倚點有重點有力點如權衡如轆轤其顯而易見者也力重兩點加減之力遞傳於倚點而軒輕升降之形出焉人之建議舉事也往往昧於倚點相涉相妨之理鹵莽滅裂一意孤行比彼力之驟加而我仆矣之人者大抵憑藉一時之重勢忘乎兩力之相持銳任之氣多而審幾之智短憂時之意迫而防患之術疎（以上以物理講政治大率采取張氏鶴齡變法經緯公例論）凡民國以來赫赫炎炎而一蹶不振者皆違犯此公例者也其將飛更作回風舞已落猶成半面妝者皆將出乎公例之外而覺悟較早收拾較敏者也今者不生不滅不戰不和之局即兩力相抵而無絕大力以加速率者也雖然物不可以終靜但視所加之力在何等方面耳以他力加之則相抵之兩力俱等於無只有他力無有自力苟以自力加之則如機器然其蒸汽之機關一動無論輪也桿也滑車也劈面也螺旋也一動而無不俱動三千年之故態百年之間而可使盡變也此以泰西百年以前與今日相較而得其速率之

例非空談也然則此自動之速率安在哉曰民治而已曰全國人民之自覺心而已僕性疎狂不樂羈繫人事牽率每難自由清光緒癸卯以後在北洋幕府者七八年藉讀未見之書略明當世之故辛亥變革偃處里中以地方秩序之不可坐觀府主情誼之不能過卻參與文牘無役不從蒿目時艱彌增隱痛歎吾謀之不用遂浩然而思歸項城卽殂亟思退隱乃塵心未淨祠祿虛餐國危而無以扶持民困而末由拯救自上年十月十日以後閉門思過久已與政治絕緣今因徐君之文而又嘵嘵不已甚至指斥元老批評偉人且對於最親善之強鄰直言開罪是亦不可以已乎願嘗思之人之所以異於禽獸者惟人偶之仁（中庸仁者人也註讀如相人偶之人卽人與人親善之義）與互相之義耳孔子云邦有道危言危行佛云衆生無盡我願亦無盡世有能保我民國善我亞洲以撲滅全世界之東方導火線者乎雖礫余其無悔

湘鄂戰事及議和情形演說詞

鄙人年來南北奔走鮮有功效此次來甯並無耽擱幸蒙鮑朱二君介紹得與各界諸君見面歡聚一堂實爲榮幸鄙人自信並無學問惟自幼卽受師訓抱定宗旨欲在政治方面做事現在大局糾紛補救無術連年奔走總想將兵革解了無如人微言輕鮮能得各方面之諒解回憶馮河間北上時鄙人曾告以勿動湘譚延閣詎料未久馮段意見不合而以傅良佐督湘南北之爭遂由此起自是以後時起時伏歲無寧息此次鄂人倒王實因恨王之大山東主義且恨王要錢要得太多請願無效乃以武力解決直軍出動援鄂時鄙人曾函吳使勸勿用兵並詢是否援王抑係援鄂吳答決不用兵當謀和平解決月前黎黃陂公子在津結婚鄙人到津湘鄂要人借此機會會開一會議大家知我與吳使交情尙好都要我赴鄂一行鄙人義無可辭惟求湘鄂人同行乃由衆舉定湘范源廉鄂張國淦同行二十四日廣水兵變車停至二十六日始成行二十八日抵漢卽晤蕭耀南請其電吳說我要見當時因電報不通乃改拍無線電旋接吳覆電囑蕭派輪送予赴岳翌日抵

岳晤吳於楚貞兵艦中予卽問其戰事如何吳答要攻長沙並謂湘得王款數十萬子彈無算今卽以王款王彈打王可不痛恨我軍初到要其退兵湘軍不允故祇好打予謂國家元氣要寶貴不可自殘同胞我公能得一般國人之信仰心者因倒安福主開國民大會此次援王已失人心倘要打湘恐我公令名將一落千丈矣吳答已約趙恆惕英國兵艦見面如趙不來定打長沙翌晨起無事予邀吳之旅長參謀長數人同上岸進岳陽門大街見各店鋪均貼有本店洗空四字長條天主堂成爲婦女救濟會紅十字會傷兵病人不知凡幾行人絕跡店鋪閉門抵火車站時見所裝均係軍隊聞岳州上有一橋適湘軍乘車逃行至該處被開花砲擊中死千餘人故橋上血跡有數寸厚吾等卽回艦旋聞趙恆惕已到英艦吳使偕參謀長同去因英艦限制不許帶人不許攜帶武器故列席者除吳趙外祇張紹曾及吳趙之參謀長等三人吳係三點去七點回我先問吳之參謀長會議如何彼云吳趙見面半日未發一語嗣我與張紹曾藉故走開故吳趙說話均不得詳後議

定休戰條約九條攜回飯後我即走吳處道湘鄂和平成了之喜吳即將條約給我看見吳尙未蓋章旋見吳趙發出互請贛川退兵電兩通吳謂謠言武昌將設第三政府其實我覺得南北兩政府已嫌其多是以蔣百里所主張之廬山會議我決不肯署名到第二天又答允發又說要攻下長沙發此電係蔣擬稿經予修改故是日至晚四點始睡翌日（二日）吳仍不肯署名謂此電早發晚即與趙聯銜通電贊成現吳趙電仍未見不知又有變化否

贊成廬山會議通電

中華民國主權屬於國民全體豈非約法全部之精神哉然共和十年現象如此染專制獨裁之流毒以生命財產爲犧牲如水益深如火益熱外人以爲擾亂全世界和平之種子即在亞東夫吾國自始未嘗不統一也前年太原開全國教育會川湘滇粵會員皆列席此即明證所以不統一者在特殊勢力之一部份強以己所不欲者施諸人耳剝奪人權寧有全理鄙人奔命岳陽適有廬山會議之風說吳將軍以避嫌故囑動議之張君紹曾發起自

身通電贊成民國前途在此一舉望公等以互助精神作同聲應和但求會議如期成立對於草案暫勿批評俟大會既開本有修正餘地從前南北畛域黨派異同有如昨日死此後制定國憲解決大局有如今日生湘鄂間戰死國殤之魂魄環遶於公等之前面爲孤子寡妻請命矣誰非人子誰無人心何忍以意氣之爭坐待鬻割仁人君子庶幾哀之張一麐江

致蘇州總商會及各團體函

日前由龐君復庭李君澄遠杭君伯華賚奉惠書並沈監督通知書入京業將應選公函面交寄蘇轉呈諒蒙鑒察一鑾無似重以故鄉父老兄弟之責望其何以仰答拳拳適津浦車水阻不通龐君等留滯京師一鑾於二十六日由京漢特別車南下二十八日抵漢口竊今日大勢欲保一省治安必先謀全局之妥協長江流域武漢實爲中樞抵漢之日聞直軍已抵岳州吳子玉將軍本有宣言入岳後解決大局之說日來廬山會議草案已發現於報章一鑾不敏擬本夙昔和平宗旨在此間與同人商榷冀效國民一份子之

力在漢口或有半月勾留中秋前後乘輪東下想公等熱心國是湘鄂之事影響及於長江下游奔走呼號亦公等之志也先此奉報以紓懸系並謝盛意不具張一慶拜啓

復蘇州總商會及各團體電

久居北方無志議席閱尊致各電躊躇再四愧駭實深愧者以慶何德何能屢承父老兄弟之推挽駭者當金錢勢力之下乃尚有良心自由之主張雖受非其人而施者甚正重以大教敢不應命爲國爲鄉惟力是視中秋左右本擬南行晤教非遙專謝盛意一慶歌

建築圖書館說略

近世教育家言於學校之外尤注意於社會蓋雖有最善之學校而有惡社會與之相參則不特一暴十寒之可患也卽十暴而或一寒焉其勢恆相抗相勝則甚矣社會教育之重且要而息游之地必有沂水舞雩之佳勝射御勺象之精神以使人日遷善而不自覺也一慶往在天津其地學校如林而

與商場接武自公家立一小小公園則學堂師生遇星期有所休憩青年墮落者日以少蓋稍稍得社會教育之意焉比至杭州則有西湖一帶爲天造地設之公園休息之日莘莘學子倚裳接襪而拱宸橋之市埠江干之畫舫皆相距甚遠非夫執袴之尤罕有往者以故杭之士風較蘇爲樸其得於山水園林之助爲多竊自私忖若蘇州都邑置諸天平鄧尉之間何至以甚囂塵上之闖胥趨之若鶩使少年浮薄喪身亡家於狹邪飲博之中如此其甚乎雖然西湖天然者也公園人爲者也天然者不能自有而之無人爲者可自無而之有長夜不寐心靈沈沈惟桑與梓庠序盈門誰無父老誰無子弟葦路藍縷請自隗始具說略十八條如左

一 請於城之中心撥官荒以二十畝內外爲率其地須南近各學堂北聯觀前市場使學界師生爲朝夕必由之路又爲四方聚會之中心不至久而廢棄

二 擬呈請農工商局查明該地底册除有人承領外尙存若干丈有無

二十畝左右如其地有關涉營壘能否另遷他處當呈請局憲轉求撫院裁奪

三 在需要地界以內如已有人領過並未築籬圍牆尙係白地應請局憲將原領地價發回領主撥歸圖書館其發還之價由發起人照繳歸墊

四 呈請時聲明承領後在六個月以內不動工應由公家將地收回以免無主官荒化爲有主官荒仍與農工商部期無曠土宗旨相背且杜借題佔地之浮言而間執護愚之口

五 丈書勘地向有延宕之弊應請局憲派科員會同速行文見以便插標開工

六 地經核准後應呈縣出示曉諭以防地方人等需索作難並請巡警總局飭警兵彈壓（以上請地之屬）

七 圖書館爲此事起點以後逐漸開拓附屬甚多就最要者言之曰公共體操場曰閱報室曰教育品陳列室曰彈子房曰公共教員休息室曰

公共學生休息室其四週曰植物園其沿街曰茶樓曰酒樓其預備添設者曰蠶學館曰博物館故至少有二十畝方免另星湊合致有不能聯絡之弊

八 現在經費無着公家款項支絀又不敢輒請官撥致近倚賴性質擬捐集銀圓六七千元作爲圍築籬笆及先立圖書館基礎之用其逐漸擴充俟諸來者惟各項區域圖樣應預爲劃定以免凌雜無序

九 先造圖書館兩進其後一進爲樓房三幢樓三楹不用格扇四周環以書箱爲藏皮圖書之地樓下三間夾以格扇中爲食堂左爲管書人宿舍右爲小客座前一進平房三間門以玻璃窗爲之取其透光左爲入口右爲出口中間排列長桌椅任人取書或閱或鈔其募書及閱書章程另定之

十 兩進之中間以長廊相屬樓梯卽設于廊下梯後可作小室二一以置燈盞什物一以爲僕人臥房

十一 以上九大間又廊兩道約計每間三四百元當三千有餘之譜若改爲五間一排數當倍之其墊路栽樹之費不在內

十二 另設公共體操場擇地十丈用石礮平植以淺草其各種器具如網球木馬天橋啞鈴等類以次添置或有人捐助尤妙

十三 閱報室陳列室彈子房教員學生休息室募人陸續捐造無則闕之惟圖樣中先應繪入以待能者

十四 四周植物園劃定若干區區種若干株木以榆柳桃杏等草以木香雞冠鳳仙海棠雁來紅等爲宜應仿日本章程各學堂有畢業生一人令種一株名之曰學林呈請提學立案通飭不十年而成陰矣

十五 茶樓酒店等招人租地造屋其地租則作爲常年經費及添置書籍儀器之用

十六 前條招造各房須就預定圖樣如式造之不得私自爲無規則之形式大要以有益衛生注意美術爲主不就範者不准其租

十七 計畫既定圖樣既成於應造之處一一樹以標識定期投標招工其監工人員應公舉幹事若干人及名譽董事若干人幹事酌酬薪水願盡義務者聽

十八 學部奏定教育會章程勸學所章程俱有籌設圖書館等語民政部奏定地方自治章程亦有圖書館事項至學部奏報分年籌備事宜摺內宣統二年行各省一律辦圖書館尤爲憲政刻不容緩之圖再農工商部奏准推廣農林章程第十一條凡紳商農民認領荒地荒山稟辦農林地方官查係公正殷實並無流弊卽予准辦所有胥役勒索延擱情弊一概嚴禁掃除地方官接閱此項稟牘應隨到隨辦所有丈勘繪圖劃界給照暨申報立案務於十日內辦竣不得逾限稽遲等語是圖書館及農林均繫考成之事現在議董兩會尙未成立此項圖書館及植物園將來辦有頭緒或歸教育會勸學所管理或歸地方自治會管理應由發起人酌量贈與並稟官立案（以上建築次序及辦法理由）

上江蘇護撫公呈

爲共立圖書館請撥地立案事案查學部奏報分年籌備憲政事宜摺開宣統二年行各省一律開辦圖書館等因又奏定教育會章程勸學所章程俱有籌設圖書館等語民政部奏定地方自治章程亦有圖書館一項是本年開辦圖書館爲刻不容緩之圖近如江甯浙江皆已奏辦蘇爲省會之區人文所萃鈞座提倡風雅啓牖士民此早在籌籌默運之中似無容妄參末議惟是細繹章程有廳州縣之圖書館有城鎮鄉之圖書館有教育會勸學所之圖書館雖多多益善而庶政同時並舉亦有日不暇給之情一應等語屬梓桑匹夫有責敢援撮壤導涓之義竊比先河後海之觀擬於城心籌設圖書館一所分投捐募冀有規模惟是城中隙地無多礙難應手查察院場有課桑園十畝昔歸賓興局管理科舉既停移交學款總匯處收租考蘇州府志園爲舊撫標守備署咸豐十年燬於寇同治七年郡人潘儀鳳請於當事充賓興局經費厥後因撫標中軍稟請歸還署基於光緒十九年由蘇州府

詳准從光緒二十年正月分起除開支外營局各半均分立摺按季支取但局中先後添造租房左營應出一半造價卽於五成息內扣還截至三十四年十二月底止除舊墊歸清外實尙墊錢六百十千文曾於上年繕冊呈報藩署有案現擬將該地建造圖書館所有左營五成之息前墊尙未歸清應請將園地統歸圖書館之用其左營應分之地五畝可否飭下農工商局另覓相當之官荒撥還以備營用抑一應等更有請者圖書館皮藏圖書任人閱看不過濟學校之所不足至於社會教育宜有文明之公園一應等力薄智短固萬不能及此而將來必須開拓者如公共體操場如閱報室如教育品陳列室如植物園如博物館如球房一一應爲預備現查課桑園牆後東西荒地皆有高墩若雇工挑去以備日後擴充尤屬呵成一氣並乞飭下農工商局准將左近無主荒地一律撥用並查照農工商部奏准推廣農林章程第十一條於奉批後十日內勘丈繪圖畫界給照立案不勝銘感之至其捐募章程暨搜羅圖書分區建築各辦法容再商定續陳伏祈批示遵行實

爲公便謹呈

附節錄府志學校一第五十六頁賓興局一門郡人潘儀鳳復捐置課桑園地十畝充局中經費園在察院場舊撫標守備署咸豐十年燬於寇同治七年儀鳳請于當事種桑千株爲里中教率復以隙地蓋屋三椽設義塾又蓋屋七椽僦民生息今義塾停止產並歸局

覆農工商局公呈

爲呈覆事竊一慶等前奉四月廿五日貴局照會內開宣統二年四月十五日奉護撫憲陸批張紳一慶等呈擬辦共立圖書館請撥地立案由奉批據呈擬辦公立圖書館爲地方推廣文化起見實可濟學校之不足而爲近今急要之圖將來更擬組織公園於關係德育智育體育各端逐一設備具見熱心公益深堪嘉仰所請撥給課桑園十畝究竟能否另撥官荒與營互換此外有無左近荒地可撥希農工商局一併查明詳復核辦並先照會張紳等知照此致原呈鈔發等因並鈔粘到局奉此查籌建圖書館組織公園非

得寬廣之地不足以資展布本局前於宣統元年三月卽有留撥官荒地備公園之請此次貴紳等所議將課桑園地十畝撥爲籌建圖書館嘉惠士民甚非淺鮮所有中間五成營基應卽由局另撥荒地抵還該營以資調用惟查課桑園左近荒地或據各業戶呈驗契據領回或已繳價具領實無餘地可撥擬請卽在本局前次詳准留備建築公園地內選擇數處聽候撥用除繪圖詳院外合將備建公園地畝繪具圖形備文照送煩爲查照見復施行等因仰見大憲維持學務鼓舞士民之至意業經將課桑園地畝覆丈繪圖豫備建築惟造端伊始必須全局瞭然雖鰲戴蟻馱慮寸莛之折幹而曾冰大輅須成竹之在胸約計伐去桑株經營土木非鉅款不能集事自應分投籌集俾底於成所有填路伐木一切事宜擬於六月前先行籌辦中間五成營基蒙大公祖允撥荒地還營以資調用既無膠轕卽可放手爲之至留備公園地址數處承將圖形鈔送詳細閱勘與課桑園相離約有數里之遙勢難聯絡一俟將來力能開拓再行呈請撥領以仰副貴局格外提倡之盛心

公園亦不至曠而弗治致爲藉端壟斷者所藉口所有現擬經營圖書館大概辦法暨從緩承領公園地址緣由理合具文呈覆仰乞轉詳立案實爲公便謹呈

呈江蘇都督莊移交圖書館文

呈爲圖書館移交馮守之接收立案事竊一慶於上年四月間呈明前護撫院陸請將察院場課桑園地十畝統歸圖書館之用並將該地向歸左營應分之五畝飭下農工商局另覓相當之官荒撥還等因蒙批飭農工商局查明詳復核辦嗣經該局詳院勘定吳縣北亨三上圖第六號駱駝橋浜荒地一區計四畝四分七厘八毫撥還左營應用並移營將課桑園五成營基讓出交由紳等接管在案其時一慶因旅行在浙未能躬親畚築之事因有馮守之自願相助爲理所有基本財產僅有一慶籌得千元蔣紳林熙集捐千元交由馮君先行籌辦而馮君勇於爲善將該園建築後門挖掘桑根修葺園牆造成房屋兩幢俱係獨立捐墊未動捐款分毫所有前項二千元仍交

這一慶等暫存豫康莊號近由教育會會員祝秉綱提議將該地向由學款處付出之建築費四百二十千文及津貼左營二百元歸圖書館付還學款處將大來堂零剪店及碗店後披屋三所歸圖書館收管以備改造大門之用已經教育會議決通過業經將應交款項交割清楚立有合同各無異詞一慶身弱多病又俗冗鮮暇因念此事發起已久同志中實心任事出資建築惟有馮君公議嗣後該館一切事宜悉交馮守志接管以一事權而利進行除將課桑園附屬租摺租契逕交馮守志收接外其前存捐款二千元除付出學款處之建築費四百二十千文及津貼左營二百元係由豫康攔淺僅取回抵押房屋應俟回贖後清算本利續交應用所有圖書館移交馮守之接管緣由仰懇都督恩准立案以垂久遠實爲公便謹呈

心太平室集補遺

心太平室集附錄

祭張仲仁先生文

蔣中正

烏虜三古以還士風凌替賴有英賢匡扶正誼惟君嶽嶽崛起吳中研經味
道振起儒風品重圭璋材儲杞梓偶涉世途中立不倚經猷未展肝膽輪囷
振衣千仞敝屣虛榮宏景知機挂冠神武幼安避地仍歸鄉土中戶多故國
論紛紜時艱蒿目憂憤填膺北伐成功朔南統一主義昭宣合爐而治邦基
初奠所寶惟賢東南人望魯殿歸然倭寇驕橫蘆溝變作抗戰軍興張我民
族中樞國策抗建同時禮羅賢俊共濟艱危應我弓車間關萬里粵海巴山
惠然莅止參政集會羣彥一堂皤皤黃髮謀國孔臧所重伊何精誠團結所
貴伊何憲政籌設嘉謨偉議豁闢屯蒙橫流迴挽耿耿清忠新約完成曙光
漸啓方冀遐齡允膺福履哲人遽萎胡不憇遺蒼穹難問有識同悲昔晤光
儀音聆金玉今隔人天典型如昨據詞志悼永憶周行英靈來格式荐馨香
尚饗

張仲仁先生

王寵惠

吳中風土清嘉人文蔚起歷代名賢輩出或宏濟艱難或砥礪氣節雖遭際不同成敗異數而貞固幹事爲國之光則後先一揆也於唐則陸宣公於宋則范文正公明建南都吳爲近畿功名之士往往乘時崛起迄於末造吳中士大夫揚清激濁主盟東南其忠義之氣尤足以震鑠今古有清一代雖文苑儒林代有傳人然以視前賢智略輻輳夷險一節人才亦稍稍衰矣仲仁先生生丁清季世變日亟外患日深故自其少時卽慨然有澄清之志早歲英發以名孝廉應經濟特科宦遊南北所與遊者悉當代賢豪晚清同光以來督撫權重開府自辟僚屬隱然如藩鎮先生文名籍甚自舉孝廉卽從提學使者衡文蜀中故宦轍所至諸帥多禮致之幕下爲司章奏以是受知於項城袁氏民國初元袁氏掌握政權陰蓄異志先生珥筆府中獨持大體及籌安議起袁氏憚先生方嚴從容語之曰從來無不亡之朝帝王末路有求爲平民而不可得者余老矣將營菟裘於海外外間紛紜滋非余意苟相迫

者余當乘桴浮於海先生初不知袁氏之欺以其方也願信爲由衷之言每與人語願以首領保袁氏無帝制自爲意其後帝制之謀日亟勸進之表紛至先生侃侃執前言相質袁氏遂出先生長教育實遠之也先生雖夙受袁氏禮遇然終不屈拂袖以去其大節屹然如此自袁氏之歿十餘年間相繼當國者多袁氏舊部先生苟稍委蛇其間則勢位富貴即可立致而先生不屑焉獨以國家爲重凡可以弭紛爭致統一者惟力是視先生長教育時力主統一國語畢生致力於此老而彌篤可謂識治本矣至其愛護士類獎掖後進特餘事耳民國二十年日寇侵東北翌年犯淞滬先生時正里居以忠義號召鄉里越五年寇大舉來犯中央鄭重決策全面抗戰之局以定先生尤激昂慷慨誓不與敵人共戴一天是年十一月寇陷蘇城先生入城西山中間關至漢口膺選爲國民參政會參政員耆年碩德負議壇重望於茲有年余夙仰先生仗義之勇謀國之忠而處世接物則和平坦易竊念抗戰勝利在望憲政開始有期老成典型如先生者對社會國家將有更大之貢獻

不料先生遽以民國三十二年十月二十四日病逝陪都其平生行誼世系爵里有國史志乘在茲所述者特其犖犖大端蓋先生憂樂關天下如范希文論議動鬼神如陸敬輿而智略自喜慷慨多奇節又遠承有明吳中士大夫之流風惜乎值抗戰建國之會躬與國政而未及見狂寇之就殲建國之完成遽贖志以歿悲夫

我所嚮往之仲仁先生

張君勳

國所賴以立者曰忠誠貞固守正不阿之正氣或見之於直言侃侃面責廷諍或見之於臨難不屈不事異族或見之於力持邪正之辨不畏斧鉞之誅亦有知事之不可爲而不惜出生入死以挽救之雖不見其成功而足以振奮千百載後之人心者此皆所謂正氣也其對象之不同則其表現而出者因時因地因事而異矣吾蘇輓近之士氣在外人視之每謂爲巽懦疲軟工文字巧趨避婉轉柔順樂爲人用至於崢嶸屹立獨往獨來之氣概則少見矣然此豈蘇人之本性哉近三百年之環境使之然也攷之宋明以來之史實可爲明證當宋靖康建炎之際持和議之非計者獨爲李綱而朝廷信之不專忽任忽罷獨太學生伏闕上書斥李邦彥張邦昌爲賊稱李綱爲社稷之臣者非丹陽之陳東乎南宋厓山旣失負王赴海且驅妻子與之同盡者非鎮江之陸秀夫乎明之末葉朝政不綱獨有東林學派冷風熱血洗滌乾坤（黃梨洲語）不獨對於風靡一時之天泉證道語樹反對之幟且對於朝政時加臧否終至成爲東漢黨錮傳中之人物者非無錫之顧憲成高攀

龍乎及明既亡有瞿式耜從桂王以死有顧炎武奔走南北志存匡復又非吾蘇常州崑山之人乎彼宋明時蘇人之見義勇爲如彼而今之蘇人懦弱如此蓋清代三百年間講學之風所以振作士氣者久已廢棄而士子羣趨於科舉一途以中狀元點翰林爲榮乃以成今日吾蘇衰弱不振之風氣也雖然何幸於清代民國之交有吳縣張仲仁先生秉性剛正有古所謂一士諤諤之風當其身處朝局中朋友至好有乞之以私者公正色或以詼諧語揭發之無所忌令干者惟有慚赧以退公投身於政界十餘年常以良心之所安爲行事之標準未以委身事人之故而輕易所信公受知於項城辛壬之交公所以勸項城者曰服從共和以全萬世名項城始雖面從終於帝制自爲事先有詢公以事之確否者公則答曰苟有其事可殺吾頭項城知公之不附己乃出之爲教育總長終於避居津沽不與頌莽功德者同流可知公之雖犯顏逆鱗而不以爲意矣元二之交項城置俄蒙初期交涉於不理恐天下責之以喪權辱國於時勸與友好三數人訴袁二十罪賴公之保

全乃得遠適異國及二次革命起陳君輝德在寧嘗舉造幣廠銀十餘萬以助舉義者及事敗張勳將置陳君於罪其爲之辨白陳君非預開始事之人而使陳君得以專心致力於創造金融大業者公之力也馮公國璋兼代總統之日邀公出任總統府祕書長時則國會既廢代以參議院公則心知毀法之非而以無可挽救爲恨事及馮公任滿公亦返鄉里不問世事惟遇有地方兵災所以救恤之者不遺餘力然此猶爲尋常義舉而已及八一三變起公以七十老人倡議組織老子軍國中初聞而駭然繼知其所以愧天下無抗戰決心之人而發蘇州陷敵國人懸懸於公之生死旋知其易僧服隱居山寺繼且間道走香港此又見公以垂老之年不屈於敵之威武繫心於民國之安危者爲何如也凡此所舉公之大節贊助民國也反對帝制也以老子軍號召抗日也擬之吾鄉先賢陳東陸秀夫顧憲成顧亭林輩以軒昂矗立之氣視危難如無物者可以先後輝映而無愧色然則謂蘇人忠誠貞固守正不阿之氣賴公以存於今日可焉民國三十三年三月重慶

紀念張仲仁先生

梁漱溟

渝中友人爲紀念張仲仁先生徵文於愚並言以有關仲老生前行事者爲好仲老與先父爲清光緒乙酉鄉試同年素相友好於愚爲父執先父故後愚數得晉接深荷垂愛器重每語及大局必諮詢愚之意見愚既陳其所見輒示首肯時或加以鼓勵凡近年愚之主張行動先生實嘉許之而深致其勸勉者也卅年十一月在香港作別不獲再度承教去年先生在陪都作古愚又不獲躬詣叩奠感念在衷至今耿耿於茲徵文不能復辭然先生生平行事並世中知之確言之詳者正多其人愚生也晚所知甚爲有限實不敢輕於着筆慮有錯誤轉而不美茲謹述兩事一爲距今三十年前所耳聞者一爲抗戰後所親接者距今三十年前卽民國三年正袁世凱帝制運動急進之時也自清季以來先生在袁氏幕府多年以性情和易作事謹慎不苟積年愈久愈爲袁氏所倚任其間關係蓋甚深矣帝制之前袁氏旣毀臨時約法而別造一約法改國務院爲政事堂攬大權於總統先生被任爲政事

堂機要局巨
成帝制既白
之所嫉忌日
冲等諸悍賊
公然向先生
之何乃出生
要矣先生在
自一二人之
獨自騎小騾
生晚年每應
得不失正礎
觸機會較全
抵渝稍後晉

得朝夕侍側者旬餘日時值廣州武漢先後不守人心震動汪逆主和已在陰謀中以故頗有紛紜之論先生秉持正義意態堅定其於靖人心固正氣蓋亦有力焉先生起居生活謹嚴有規律不以年衰自懈每日天不明即起床如無燈則秉燭書日記及雜記審其紙本似爲數十年前所收藏之物作書既畢則就室內作種種運動以鍛鍊身體粉江飯店建築殊不堅固樓板皆爲之動搖愚以長者既興不敢更臥而先生則囑以天尙未明無事不必起來蓋其自律之嚴而待人以恕又如此焉先生言行可以爲世人則法者甚多愚媿未能道其什之一二然即此所述不既可使今之人有以自鏡而知其所當勉邪

仲仁先生之回憶

張名振

烏庫先生逝矣其生平言行記載綦詳余亦不能無所紀述余於民國三年權長法制局事適先生任機要局長忘年訂交甚相得也袁氏野心日大先生遇事裁抑頗具苦衷迨邪說朋興國體動搖復根據約法力持正義忌者

側目恐嚇多端弗顧也時徐菊人先生方謝病引退先生往訪之徐氏告以國事至此危險殊甚人皆以君爲傻子尙能最後再進一言乎先生曰諾翌日謁袁以徐語語袁並痛陳利害至切袁謂軍人將不利於君幸勿多言先生憤然曰如不能管束軍人假令受其擁戴專橫跋扈爲禍更烈稱帝者之結果可知矣烏乎可出語同僚人皆服其膽旋蜚語蠶起乃以先生出長教育實疎遠之及馮河間代總統聘爲祕書長不久謝去南歸偶或北來一聚嗣余南下訪先生於吳門抗日戰起先生移家香港余亦在港得以晤對數載以來余遄返故里時相過從縱談文藝涉及禪語曾偕往參學大乘密宗先生蓋夙具慧根人也

張仲仁先生軼事狀

錢基博

維三十二年十月吳縣張仲仁先生以參政薨於行都於是先生年七十七矣寧甯州部之良抑爲天下之老民失具瞻國恫殄瘁懿德之好秉彝攸同茲不有述後將安仰而以先生於博有一日之知屬抒覩記之所及以備史

氏之有采獨念予季孫卿以鄉邦父老之命服勞地方而與先生周旋過從之日久余性疏簡不喜接人事寧一室坐嘯以自爲泰先生獨以文墨議論有意於余人皆謂先生之輔袁世凱以義不以生平眷顧之私而爲詭隨有以仰先生立身之高和而不同私獨以先生之接余兄弟以謙不以後生年輩之末而引共濟有以闕先生執德之宏周而不比其心休休其如有容盛德形容誼無所逃羅舉細故以裨高深君子觀人必於其微不嫌瑣也抑不敢誣也先生名一塵仲仁其字也余之獲接於先生吳江費君樹蔚實介之而爲民國五年方是時袁氏僭帝費君以密戚而爲肅政使先生以幕僚而爲內史兼政事堂機要局局長咸以久故而與帷幄而費君諍之疾先生陰與持費君抗議不省則拂衣南下棄官告絕而先生中於和節不爲聲章袁氏則以先生素所賓敬而出爲教育總長陽爲顯擢意實疏外顧先生維匡調娛不改於故以迄袁氏殞命而爲經紀其喪曰吾以無負於府主也然後南歸而拜其母庶幾有始終者於是母夫人年八十矣費君則介其友入金

君祖澤而造於余曰聞吾子之名舊矣吳中士夫議製屏以介壽於張母而張先生之高風亮節母夫人之壺教內美微吾子之文不足以張之屬某也爲之請敢以不腆致潤筆余却之曰文不敢以辭然余固不鬻文以爲生而張先生之母亦豈可鬻文以爲壽張先生國之正人而諸公不棄以介壽之文屬於余是亦以余爲正人也焉有正人之文而可以貨取者乎焉有壽正人之母而可以貨爲文者乎因爲文引孝經顯親揚名孝之大者而謂以高官膺仕顯親揚名於一時不如以砥行立節顯親揚名於後世壽莫壽於使後世知母爲古人也千秋萬歲揚休無極費君讀之大喜而先生讀之亦大喜復書以謝曰曩者張南通嘗眎君論鹽政計畫書謂熟曉掌故而澤以爾雅有魏默深龔定盦之風今誦所爲壽母之文申古誼以相礪切敬聞命矣乃知端人而非文士顧以余之却潤也必欲得當以報乃表吾母孫夫人之墓而稱其文章中引南通張審之言謂江以北無抗顏行吳江費樹蔚則曰豈惟江北卽江以南亦寧有二蓋不恤以聲聞過情之談而獎藉之以勉於

踐也其然豈其然乎馮國璋之督軍江蘇也尤禮重先生而欲得一吳士爲祕書以備諮詢而悉當地情僞問先生誰可者先生則以金君祖澤與余對金君固高蹈自重而余則以祕書爲人喉舌職代言主者或有失政亦必以文章爲潤色職固爾也有筆有舌胡不自抒所欲言而代人之言吾不能自抒所欲言吾寧捫吾舌韜吾筆以不言也亦謝却之先生則貽金君書謂公老成養望猶有可說錢君年事方壯何可不出天下事在人爲馮公以客將懸寄亦欲爲惠於吾蘇而延主人以相僇力主人則深閉固拒若將浼焉然則政事措施之不當民間疾苦有不知亦必有尸其責者而豈馮公之咎哉其時里中父老亦以黨獄繁興而促余一出以善消弭者余則自以不能委蛇以授徒養父民間疾苦知之稔矣而苦於主者之不知則議論不能無激切交淺言深或以賈禍老父在堂亦非所許復書謝絕先生亦不之強也然先生之有意於余而驅策之以爲鄉邦服勞用心甚苦而余愧無以承安能不呼負負也及十年而先生當選江蘇第三屆省議會議員予季孫卿亦與

焉而議長之競選以起時有爲公子名流之說者公子者張君孝若也以南通名父之子故尊之曰公子名流則先生所謂民之望也然而黨同伐異囂然塵上矣於是予季孫卿通電聲明以議長由議員互選議員同出選舉名流公子初未嘗自有所異而非名流公子亦何必挾以爲重彼持名流公子之說者皆其人無以自重而欲挾他人以爲重者也議會爲集議體議長不過議員之一其對外名義亦以議會而非議長人亦何所利而必爲議長亦何所不利而不欲爲議員願其爲公子者則大張旗鼓成立所謂金陵俱樂部自號多數而心有不慊者相約不出席於是予季發表論選舉議長書發表爲議長問題告同人及再告同人兩書大旨謂政黨運用重在政策若爲議長而啓紛爭是不啻示人以組織政黨爲個人之意味多爲政策之意味少可以犧牲政策以殉個人而不能犧牲個人以全政策力主除去兩張另舉一人其後卒如予季言而由武進徐君果人當選議長張君孝若即電會辭省議員而先生則出席依然坦迤若無事於是予季歎曰名士自有真如

仲老者其名可及其德度不可及也昔郭林宗稱黃叔度汪汪若干頃之陂
挹之不濁澄之不濇吾於仲老亦云自是江南有大利害必奉手先生而先
生亦虛衷採納左提右挈相與持地方之傾而以待天下之定不競不絀則
先生之以也嗚呼費君獨憤直道之不容嗟人生之實難而以二十四年侘
僚死矣余輓以聯曰矯首於共和絕續之交君之宗之早識高名空冀北揮
涕在交情死生以外撫我虐我誰宏大論奠江南蓋實錄也先生既爲費仲
深先生傳張其風誼以不負死友而於文集之編獨若謙讓有所未遑以告
其孤曰吾不如錢君余既論次而序之因過先生先生爲言仲深最服吾子
文嘗手寫吾子文十數篇以相眎余於仲深十年以長仕宦相偕問學相商
固弟畜之仲深擅詩筆吾子能古文仲深英氣逼人吾子長者恂恂出處語
默絕不似然知吾子者莫如仲深仲深以獨立不懼世途多迂不如吾子之
遜世无悶蕭然物外余譬之曰人苦不自知未敢以欺長者獨立不懼意氣
可以自負遜世无悶隱微孰堪自信此養聖之功非末學所能也先生亦許

爲不欺先生危行言遜不如費君之彊直自遂然十餘年來江南亦多故矣大兵大災薦更喪亂政柄可以迭移而生民無所託命惟先生柱危定傾有以綏底之其中隱微委曲有不得語於人人而默運於先生之一心者惟予季知之爲深二十六年抗日興軍予季以無錫縣商會主席江蘇航業公會主席而被委主任軍站供應予季以匹夫有責不敢逃命則徵集汽輪以供運輸凡幾百艘徵集米麵以供糧食凡幾十萬而各輪船公司各廠家以予季服勞地方未嘗以自私利予取予求悉索惟命六師所過靡有缺供顧師徒不戒江南告陷至十一月二十一日縣官以下無不撤退予季慷慨語門生子弟謂守土者可以奉令撤退而吾儕生於斯長於斯丘墓所在寧棄如遺不能不走未可遽走部分指揮各竭所能壯丁登記焚其冊籍曰毋以藉寇兵餘帑簿錄致之上海曰毋以齎盜糧潰兵塗遇派人導引曰毋以遺敵俘以二十四日護妻子避鄉而日軍以二十五日入城劫盜橫行殺越人於市而欲得予季爲用懸名募告予季則買小舟泛五湖晝不敢傍岸夜則泊

蘆葦如是者一月伺購索之懈而後繞道南通以之上海先生亦以日軍購索而先期至相遇於旅執手涕零予季曰吾力竭矣先生謦曰力有竭而意無盡將以何爲予季則建議糾集江浙兩省士紳之亡命而至者成同鄉會月兩聚餐於八仙橋之青年會以資搏結而圖善後先生可之乃以三十七年之二月十五日爲第一會至者百餘人皆民之望也先生主席感慨陳詞申三軍可奪帥匹夫不可奪志之義聲容激越在座莫不氣振而志以莫搖江陰縣商會主席吳君聽臚亦感先生之言而日人三登其門請之歸以主縣政却弗見日人則見其子以脅其父而吳君嚴斥弗許也旣而先生欲告難行都子季往迨先生願語曰國家棄我我不棄國家別矣我年七十君亦餘五十於名於利更何希圖維桑與梓必恭敬止毋負地方亦毋負國家行者居者各盡乃心其濟與否則天也於時余任教國立浙江大學而隨轉徙以之泰和瞻來日之大難思致身以無地而撰吾人何以自處一文以爲寇深國危非死之難而生爲難以告於朋友以寄於予季旣倖予季之不降志

辱身而又欣其脫死亟欲一面以七月之上海而晤予季乃知一婢阿榛以夫病不得偕攜兒奉姑而守龔氏之室日軍入城而聞鄰居婦見迫呼救其姑覩事急則牢關大門而驅榛入於房曰汝侍夫也積薪於其戶外注油焉而坐守之伺有卒之奪關也則縱火焉姑婦母子三代并命也有同居者走而得出爲予季告如此顧龔氏則以爲大恨謂守室而燬室也余聞語予季曰吾儕醜顏儒衣冠讀書識道理而偷生視息以在此不如此嫗之有分決也真有何必讀書之歎予季則告以先生之言余譬之曰然三軍可奪帥匹夫不可奪志國格雖或以兵力屈而人格則可以心力持人格能自持則國格終不墮胡文忠公有言兵可挫而氣不可挫氣可挫而志不可挫蓋兵之挫無可如何而氣之挫志之挫所貴自力也予季則介余詣江浙同鄉會以有陳說余乃承先生之論而益闡之推本上古驗之當世參以兵法察盛衰之理審權勢之宜聽者亦爲動容謂自仲老之去鬱陶於心久矣未有深切著明議論如今日者也日人某氏嘗主上海同文書院之支那研究部而讀

余所著現代中國文學史貽書爲校譌字又以余爲文稱引慈谿裘君毓麟思辨廣錄來書乞爲介以取逖譯然而未之晤也至是投刺相謁以亞洲文化歐洲文化爲論談次因言賢弟昔嘗有惠於鄉邦而今避地如勿及於初心得毋刺謬卽如張仲老一去蘇州而人心失所維繫不得不日尋干戈豈仁人君子之用心縱一身之節義爲重而地方之休戚尤大此中亦有權衡孔子所爲譏欲潔其身而亂大倫者也余鑿之曰唯唯否否不然國之不存何有地方枉己直人孟子不許仲老國士愛惜羽毛重其身以重中國豈可枉其身以徇地方仲老縱不自愛國人亦所不容余弟摧頽不堪世用苟全性命爲幸其他匪所思存然不愛其身而愛他人者謂之悖德愚兄弟思之熟矣予季則綜核經管地方餘帑都若干萬而代表無錫商會以雙十節獻金交在滬中央銀行匯解有故人子先於城破之日攜款數千金走漢口予季則電責就近獻繳亦以電告陳將軍誠毋任隱匿曰國家喪敗而廉潔不可墮地方紊亂而風氣不可壞雖亡老成人尙有典刑吾斯以無負於地方

者無負於國家矣蓋先生之教也先生溫恭煦嫗與人爲亡町畦而大節不可奪神機有默運浩浩汪汪仰止景行稟命不融天不愍遺一老永懷哀悼靡所置念敢寫身歷以昭義問其所不知蓋闕如也三十二年十二月謹狀時避兵湘中之光明山

追念江左耆英張仲仁先生

汪懋祖

予小子與張仲仁先生居同州里少時曾讀其文而未獲親見其人迨民國

五年歲首始晉謁
大典籌備處僞造
局局長調任教習
流氓僞稱公民團
爲所殺時各部長
臣先生出而語人
在袁氏淫威之下
意態堅決勿用泄
濟力持大體教習
銷時先生已辭去
生之手人皆知牛
氏左右所造成之
去進退出處咸令

謀轉移之力有不可磨滅者先生亦因此爲時流所屬望此一時也民國七年張勳謀復辟先生在南京說馮國璋通電討逆段祺瑞再奠共和其部下勢驕甚先生曾一度入總統府任祕書長與安福系不協發生府院之爭由是灰心政治民國八年以後軍閥內鬩國帑枯竭北京國立八校痛政治腐敗陽以經費久欠集體與政府爭暗示不合作十年四月實行罷課呼籲政府充耳不聞六月三日乃向總統徐世昌請願遭衛兵閉拒各校師生代表多被擊傷是卽北京教育界六三請願案懋祖亦身歷其境是時先生在京代熊秉三先生主持香山慈幼院事固已不問政治而與蔡子民梁任公諸先生協力文化運動自擊教育瀕於破產實爲國家前途大憂於是約同前任教育總長范靜生傅沅叔張乾若三先生出而調護入校得以維持雖其後國庫收入皆被軍閥截留教育經費仍無保障然而先生維護教育之苦心亦爲當時北京各校所共感仰此一時也旣而先生南旋奉母家居於指導地方事業之餘仍惓懷國事軍閥交鬩連年不斷因此頗贊成聯省自治

期杜野心者擁兵自衛及割據之禍十三年秋齊燮元盧永祥構覺備戰蘇人推先生與江浙士紳領袖奔走和平訂立公約皆歸無效而吳佩孚倡武力統一之口號先生通電請息兵開和議勸其懸崖勒馬以國家前途及百姓生命爲重無如挽回乏術繼而奉軍楊宇霆南下繼以孫傳芳據江左稱聯帥又繼以張宗昌南來侵擾先生以江蘇父老之託奔走斡旋雖苦口婆心不足以消弭凶頑黷武之禍而在江南一帶羣凶似猶有所顧忌此又一時也當國民革命轉戰江西之際國人對於三民主義之認識無多且因容共關係宣傳不免過當先生又一度被推代表赴贛向蔣總司令請願接洽國運之轉變固已默識於心迨國民革命軍初定南京一時是非紛呶黑白混淆每有因睚眦之怨企圖報復而高呼打倒某某劣紳設計陷害者先生獨無所芥蒂夷然處之民國十六年至二十年間懋祖回蘇任蘇州中學校長爲蘇屬文化及教育之中心多賴先生之協助與指導并追隨杖履參與縣政及地方文化公益事業間或相從遊覽山水益佩先生清明在躬其剛

正之氣淵默之度爲不可及廿一年一二八之役先生扼腕痛心而身體益衰弱乃習太極拳常下鄉小住黎明卽起習拳有聞雞起舞之概其次子爲鼎在蘇州中學畢業後先生命報考航空學校因身體檢查不能及格而罷蓋早知中日交涉必無妥協之可能凡屬國民人人皆應奮發也廿六年八一三日本襲擊淞滬我軍抗戰開始十六日敵機轟炸蘇垣先生赴南翔勞軍而縣長鄧翔海於蘇州轟炸之夕出走人心慌亂懋祖謁先生商避地時已遣家屬赴滬只見先生一人獨守家門謂軍興之際地方秩序不可一日紊亂關於前後方之聯絡地方士紳不能不負相當責任此時尙非吾等避難之時遂以其所發起之老子軍一文見示蓋欲以激勵民衆抗戰之情緒良具苦心先生平素景仰范文正公其老子軍之名稱卽取自小范老子且謂既有童子軍何不可有老子軍以協助抗戰乎時流有譏爲書生之見甚且譏爲一種遊戲文章者殊不知其激勵民衆同仇敵愾之苦心尤其對於蘇州麻木之環境借此作興奮之劑其用心深矣迨蘇州淪陷先生矯裝老

僧出圍抵重慶謁蔣委員長二十七年春到昆明時懋祖在滇籌備中央政治分校獲與先生重聚各道蘇州別後經歷悲喜交集曾約同故友江小鶴爲洗塵先生精神如昔爲懋祖書五嶽尋山不辭遠萬方多難此登臨一聯同時索書者二十餘起先生一一書之可見其精力尙不弱不料自昆明一別竟成永訣瞻仰遺墨恍親音容不禁泫然先生五十歲以前行狀懋祖知之甚鮮但聞父老言先生十二歲入泮十六歲領鄉舉處館教讀讀書常以天下爲己任則猶范希文之志也及壯曾隨鄉先輩吳鈍齋閣學入蜀校士庚子後在蘇提倡新學在唐家巷開設小學頑舊之徒聞其議論未嘗不目之爲怪光緒二十九年應經濟特科取第二於是久居北方時一返蘇直至民國十年始退隱林泉但遇可以安國家利民生之事及被推充代表請願之舉仍不辭勞苦苟義之所在無不力任其難抗戰起後入陪都爲國民參政員公舉爲主席團之一三十二年逝世年七十六國府輓以江左耆英之額蔣委員長製祭文備致尊崇先生得見百年來不平等條約之取銷得見

積弱之中國與英美蘇三強同盟作戰而其希望最殷之憲政亦將於抗戰
 結束後實現至先生之子女各能樹立効力國家先生可以瞑目矣先生貌
 清癯自奉甚寒儉初見之類一村儒及把談稍久其清剛之氣每使人悅服
 蓋其素修極深內充而外弗露又遇事肯負責而不居其功對於已往政治
 變故不願多述其出處進退之際毫無遺憾愛國之忱老而彌篤平生守道
 自得孔子謂剛毅木訥近仁孟子謂雖大行不加焉雖窮居不損焉分定故
 也真儒行之典型宜長爲後輩所矜式懋祖不敏謹就所知微末草成此略
 以誌我鄉人


民國三十一年之夏在昆明接旅渝江蘇同鄉來函爲仲老徵文紀念即書
 此篇以應之去年冬在渝晤仲老次女爲凝女士云已讀過此文并得悉仲老
 身後情形已歎息久之擬回鄉後爲仲老發起紀念會乃吾久病蹉跎至今聞
 省奎謫會已動議公辦仲老足見遺愛在人乃默念錄前作賈諸謫會尙祈幸
 政諸公徵集事蹟纂輯傳記上供史館下備方志表彰
 德諒多同心實所禱祝又續三十餘年三月一日

心太平室集附錄

先德集

葉景葵敬題






先德集目錄

生餘留草一卷 清張世榮撰

略歷 公字詠召號味鱸又號味魯長庠優廩貢生清咸豐七年請旨議敘以復設訓導選用生於嘉慶十三年戊辰七月二十三日亥時卒於咸豐十年庚申十月初三日巳時年五十三歲

甲申小陽賚餉天雄途存一卷 清張世榮撰

略歷 公字秉之號潮生又號韶笙世業長子長庠廩膳生清同治癸酉科舉人光緒庚辰大挑二等本科進士欽點知縣掣籤直隸卽用光緒丙戌年直督李保奏以同知直隸州用題補正定府正定縣知縣調補平鄉縣知縣因病請假回籍修墓保舉同知直隸州加二級紀錄四次生於道光十四年甲午八月十八日辰時卒於光緒十五年己丑六月十六日子時年五十六歲



生餘留草題辭

長洲張味鱸先生吾少歲舊識也性孝友能文章爲人磊落有骨氣故文之清剛道上適與之肖世保自得親承風采辱先生折節下交每於風晨月夕輒攜詩酒過吾廬相與酬唱詠歌商榷文義尤愛吾廬有林下風月明皎潔中恆徘徊不欲去曾輓先大人聯句云獨占園林清福聰明冰雪況教才子擅文章深愧之猶憶之也出時義稿見示俱得詳讀庚申吳門遭兵燹先生里居保奉母北行燕吳迢隔廿載不通音問矣庚辰春先生哲嗣韶笙兄來試春明過訪時敬詢先生知先生已歸道山韶笙遂於是歲捷南宮以大令籤掣直隸文章經濟不振家聲爲先生幸有子焉今以先生吟草手錄付讀囑爲綴言保忝與先生爲文字道義相師事謹述前後踪跡若此嗚呼哲人往矣手澤猶存不禁淚泫泫下也時在壬午人日盱江後學魯世保百拜頓首謹序

長洲張味魯先生以制藝名於時昔在紫陽書院肄業涇縣朱蘭坡師激賞

其文輒爲列入院課，潛不得志，蹭蹬名場，以諸生老良可慨矣。嘗謂天之報施善人，不於其身，必於其子孫，匪特此也。績學之士，顛頓終身，其後嗣亦往往貴顯於此，見造物之不負苦心人也。先生哲嗣韶笙，能讀父書，以癸酉舉於鄉，庚辰成進士，官直隸知縣。先生雖未及見其亦可含笑於九京矣。今秋韶笙郵寄生餘留草一卷，屬爲題詠。且云：先生生平著作，失於兵燹，所存者祇有此卷而已。余因重有感焉。曩者吾蘇庚申之變，會垣淪陷，倉皇出走，先徵君歸研山房詩稿，盡付劫灰。亂後搜覓，僅得數十首，付梓。每一念及，飲恨無窮，嗟乎！手澤無多，百身莫贖。韶笙與余同抱此蓼莪之痛也。夫壬午秋日，吳縣劉廷枚題。

吾鄉葉調生先生集，嘉道以來之能詩而已。作古人未經刊播者百三十家，都爲一集。顏曰：感逝甚盛舉也。而有未得爲先生見者，已不及登。是選如味鱸張丈之詩，卽其一也。令子韶笙同年，以庚辰通籍，需次保定。今夏入都，出示是冊，深以哀集不多，是懼然苟得如別叔濤祭酒，刻其尊人礪香徵君詩。

以傳於世則零
跋數語卽以慰
再拜并書

人之所以自立於
時者之所爲也
時者誠尙矣不
於其言發之殆
之不立耳既有
下武之次章曰
國固有之家亦
以敦行篤學世
舉文每試輒冠
省試累薦弗第

平生箸述蕩焉無存至其避寇僑居撫時感事之作有所謂生餘留草者蓋已寥寥無幾也丁亥春詰嗣韶筮年丈以名進士出宰正定達文適以菲才謬主是邦講席仰荷謙光不以達文爲譎陋手先生是編以視且屬爲弁言達文受而讀之其近體清新拔俗雅與陸劍南爲近樂府六章音節不必規於古而閔時病俗之懷流溢楮墨視梁鴻五噫歌尤爲沈痛舜典不云乎詩言志歌永言詩序亦云詩者志之所之也在心爲志發言爲詩夫以先生之所志卓卓如此假令得所藉手俾獲宏此遠謨一雪斯言詎不足以自壯而乃邑鬱僚侷饑驅顛頽徒以有志未逮者槁項長吟於流離頓踣之餘嘻亦可悲已雖然歐陽永叔有言爲善無不報而遲速有時昔何大復述其太公之言曰子孫之於祖父猶水之有源不積不厚不導不流不廣不長吾祖宗之積厚矣吾導源者也子其廣之今吾韶筮年丈廉靜而篤厚下車伊始興廢舉墜凡於士習民風所關係悉務培養而整齊之蚤夜孳孳深以不克仰承先志是懼固已有足多者而其文孫仲仁復英氣秀發嗜學不厭乙酉

登賢書年未及冠距乃翁以庚辰通籍甫踰五稔雖天之所以報其世德者
理有固然而要不可謂非先生有以導之也願益軫念時艱洞極頽敝因先
生之所言者恢而廣之旁推交通力求實見諸行事它日出爲世用其繼志
之大尤有未可限量者先生有知又何憾乎徒垂空文以自見也光緒十三
年歲次丁亥閏四月十一日年家後學魏達文謹序於古常山郡恆陽書院
丙戌冬余捧檄篆正郡越明年春長洲張韶笙大令來宰郡縣縣故衝要韶
笙始蒞任咸措理裕如每與商榷政事叩其宅心一以學道愛人爲本余固
意韶笙之有所秉承也一日奉其尊人味魯先生生餘留草見示余受而讀
之乃歎韶笙之能學道愛人蓋服習於庭訓爲多而先生生平鬱鬱未得展
布者將於韶笙一竟其蘊蓄也昔嘗讀元道州春陵行杜子美石壕村諸詩
謂其撫時感事略不失詩人溫厚之旨今讀先生樂府諸篇切陳時弊慨然
有道州子美之遺意惜所存止於是編也方今時事多艱民生凋瘵韶笙幸
得所藉手庶幾仰承先志舉平生鬱鬱未得展布者一竟其所蘊蓄用以希

古循良者之所爲焉庶有冀歟丁亥仲秋富順蕭世本謹序

士人不得志於時而又身當亂離往往發爲歌詠藉舒其抑鬱無聊之氣齋志以沒論者方歎其遇之終齋矣乃數十年後問其子若孫類皆奮發科名克自樹立則又歎人之齋於其身者未必齋於其後若是者可於我張先生味魯信之先生性純孝躬行篤學弱冠補博士弟子員善屬文每試冠曹偶爲名公卿所激賞中年以後究心經世之學因九戰棘闈未售鬱鬱不得志遂借詩歌以自陶養庚申之亂先生在城或傳寇至常佩劍有殺賊志旣而避難鄉居所著詩文稿俱散佚今惟存生餘留草一帙其後人珍而藏之蓋皆鄉居時所作也先生晚年繪閉戶授經秋燈課子兩圖殆有撫衷自惜以所學留貽後人之意果也有丈夫子四長韶笙以名進士出爲縣令有循聲次南臺爲名諸生有聲庠序次誦穆今爲上元校官季子信魚則以明經宿學應甯垣學務之聘韶笙又有令子曰仲仁者以賢書應經濟特科召試列前茅曰雲搏者亦以賢書赴日本肄習法政學業有成誦穆有子焉曰于達

剛毅有魄力則以諸生肄習武事留學德意志入陸師學校於今數歷寒暑
矣是皆卓犖英才能以先生之學爲學異日者出其所學爲邦家光其興起
正未有艾以是知先生之澤其留貽於後人者固遠而且長也然驥竊有感
矣先君子敦品樸學長於文辭與先生正同庚申之變驥兄弟四人亂離之
中連喪其三所存者予季耳而驥辱與誦穆同官江甯迄今浮沈冷曹垂十
餘年自問絕無表異以視誦穆之兄弟競爽足以闡揚先德實切愧懼誦穆
兄弟其將何以教我乎時光緒丁未中春世愚姪同縣沈維驥謹序

閉戶授經日秋燈課子時一生惟立品無事且吟詩歲月悲遲暮家山感別
離尙留冰雪卷澹泊有誰知 光緒辛巳十二月潘曾綬題

原本忠孝學有根柢故遭困境如淵明之超曠言時事類子美之悃款卽此
已堪不朽 愚姪劉樹堂謹識

詞人少達多窮蹇創論廬陵獨得之豈意規餘遺墨在長留平子四愁詩而
今令子能傳業鄭重楹書教子心經術由來通吏事好持清白勵官箴 吳

江費延釐謹題

歛却才華臥澗阿，苦吟豈必學陰何。文能入妙無過熟，詩到言情不在多。劍氣珠光終發洩，片金碎玉儘搜羅。卽今治譜承遺教，再聽雲巖德政歌。九芝陸懋修拜題。

人言詩到窮而工，又道工詩能致窮。工詩還有致窮理，其遇則嗇其才豐。況更憂患鍊詩骨，詩成借以陶心胸。君不見杜陵詩老境亦同，彭衙道上羌村中。癸未仲夏懋修再題。

豈是耽高隱，時艱志未伸。才因憂患者，詩道性情真。文采傾流輩，功名付後人。人家修卽延，獻用以告燕民。壬午秋八月旣望年，愚姪陸潤庠謹題於小懷鷗舫。

感遇嗟無益，安貧樂可支。不期陶令宅，又值少陵時。雉竄頻逢繳，蠶僵尙吐絲。可憐傳世業，剩此一編詩。同里推時望，明經夙世聞。一生餘隱德，仍世發清茶。令子先通籍，名孫更出羣。去秋鄉試副榜慰君還自愧，頻歲感劉蕢。奉讀

味鱸先生遺集率成一律卽請韶笙大兄正之癸未夏五吳縣許玉璩書於
宣武門外

孤松驚風吟簌簌寒泉寂歷咽幽谷蟋蟀奏夜贊鳴秋一卷商聲迸絲竹先
生澹蕩蘊素心一生耽書事苦吟植品軒軒青田鶴遭時鬱鬱樊籠禽封狐
在城鴻在野嗷嗷哀鳴旅懷寫杜陵離亂富詩篇宋玉悲傷亦儒雅牢騷樂
府六章存知君大非忘世者豐城寶劍長沈淪深澗芳蘭空自春先生今日
眉當伸彼蒼福善不干身長公畿輔行長民弦歌和風待後人 癸未夏月
通運差次與韶笙大兄同寓因得拜讀尊人味魯先生生餘留草遺稿奉題
拙章卽請吟正弟李紹濂拜藥

吾吳山色鬱葱籠遭逢寇亂失舊容吾宗碩望仰溫恭脫離鋒鏑隱高蹤囊
中有筆無所施聊拈韻語據胸臆一片憂國憂民心毫端隱躍何愴惻世事
滄桑幾變更生餘留草猶精英文子文孫相繼起傳家豈必金盈箠敬讀公
詩重有感吾父辭世亦廿載天涯奔走愧依人安得揚名酬遺誨

先君遺稿
卷中題辭

或名述今未
酬言之愴然

光緒甲申六月族姪廷驥拜手謹題

韶笙明府捧其尊人味鱸先生詩集屬題弟久宦風塵於茲事少所窺測不能道其深處嘉韶笙之孝思兼喜詩人之有後用弁數語於卷端 甲申秋仲駿生何崧泰

識公我尙是童年手筆爭推許與燕潛伏空懷經世志清高不讓古人賢詩因歷劫精逾細境獨安貧老益堅驥子龍孫今繼起好將科第慰重泉 同里蔣嘉霏芝庭氏謹題

信美非吾土南遷瀕海州灌園以餬口却掃可忘憂欲去不得閒未歸且淹留舉觴還酩酊駕言出焉遊 尺蠖以時屈坐令華髮新得歸良不惡嗟我復何人遂遠華胥境眷然骨肉親呻吟殊未已況乃百憂身 偶校始祖淮海詩稿有互見蘇文忠集句敬集五律兩章奉題金饋世愚姪秦煥堯

一卷含冰雪錚錚繼谷音倉皇郝嶧隱慷慨杜陵吟手澤傳留永楹書佑啓深吾生嗟已晚披誦想遺襟 孫壻夏孫桐謹題

懷才抑鬱沒吳門幸覩先生遺草存壯歲早膺名士譽衰齡尤溯古詩源苦
吟字字含忠孝福善明明逮子孫蘭桂齊榮徵繼述九京冠帶笑無言 光
緒丁亥夏閏四月廿八日韶笙仁兄大人係運癸酉鄉榜同年也又爲正定
郡城同寅至好公餘之暇出示年伯味鱸先生遺草囑爲題詠自揣譎陋恐
率爾成章不足盡詩中之美且貽笑方家耳然義不容辭因勉賦一章卽祈
誨政 年愚姪謝開運拜題

先生詩思實超羣口吐珠璣氣吐雲縱使當年才莫試也應地下再修文
文字何遭浩劫因却將詩藁赴灰塵幸留一卷生餘草半屬傳家半教人
彼蒼施報本無言福澤明明遺子孫科第蟬聯相繼起九京應許慰幽魂
自愧菲才無片長敢將沙礫比琳琅但求不辱先生命俚句何增泉壤光
歲丁亥夏奎客遊古常山郡適長洲張君韶笙年伯大人以明進士宰是邦
長才短馭良可惜矣一日攜味魯太年伯大人生餘留草詩稿見示並囑弁
言奎本不工吟詠且愧不能文小子何知敢率爾操觚致獻當場之醜然長

雲 率 辛 莫 展 軍 盡 伯 我 詩 考
君 文 其 出 日 去

敬賦一律甲午歲不盡五日再姪長洲章鉉

愁雲慘淡日無色犬羊蠢動肘腋側莽莽中原誰樂土避地無計我心惻忽披先生生餘吟奇想勃發不自禁鶴田一區殆仙境高人遺跡宜可尋其中景物足陶寫三間茅屋非廣廈聚族真爲張公藝買鄰何讓宋季雅日暮曳杖過鄰翁豆棚閒話猶古風兵氛雖復一相逼從容遷避仍湖東昔遭離亂亦福地詩成笑傲耽文字頗疑杜陵太工愁羌村同谷非實事但恐我生已不辰今非昔比徧荆榛欲起先生九京問桃源何處可避秦 戊戌孟陬敬讀味魯太姻伯先生生餘遺稿撫時感事爲之慨然不自知其言之激烈也 吳縣孔昭晉題并記

不見溫柔敦厚者於今雅道已中衰卻從軾轍論交日獲讀開天感事詩憎命文章生不達傷人憂患病難醫生平常度何曾改驗取雞鳴風雨時高吟遺興白休緘半載吳中未解嚴蒙穀頁書存舊典杜陵采藥托長錢思家每玩中天月卜宅曾依佛水巖幸得吉光留羽在後人珍重獲瑤函 誦穆信

魚兩兄以先德遺稿見眎謹題二首卽請是正江甯陳作霖伯雨甫稿
遭時抑鬱志難伸感世愁吟見性真文字竟能逃劫火蘧廬端合駐詩人身
多疾病常悲亂腹有詩書不厭貧一卷遺編傳後嗣簪纓繼起豈無因 敬
讀味鱸先生遺集勉題拙句呈請誦穆信魚兩先生教正江甯周寶森閩仙
拜題

生餘留草

清長洲張世棠味魯箸

男是彝謹錄

余幼嗜吟詠未成格律自抒性情積成若干卷藏諸篋中明知將來覆瓿而已今年四月寇氛日熾至十二日倉皇出城身外別無長物十三日城已失陷生平所著詩文雖不足惜而俱成煨燼可勝浩歎避地後偶有所得輒復手錄名之曰生餘留草其爲生也幾何其爲詩也不知又幾何已略序數語弁諸簡端咸豐十年歲在庚申桂月生餘散人漫筆

避地鶴田濱

三間草草結蘆廬暫託幽棲學荷鋤未識能留窮性命可憐盡失舊詩書見天多處方知曠閱事深餘始悔疏差幸弟兄時聚首比鄰閒話樂何如
遷東五渡

忽又烽煙逼湖旁借一廛山痕低入戶浪影遠搖天孟母三遷計
生一夢緣雞棲與豚栅地主話纏綿

三月先
遷下鄉莊

晚眺

清和時節嫩晴天潭水三篙漲暮煙楊柳數行無限綠夕陽分影載秧船
過相城妙智禪院

槎枒雙樹插蒼穹歷鍊風霜黛色濃鐵券功勳昭奠定寺爲前明法興寺少師宗嗣金輪
法象證圓通兜鍪嚴密鄉團急翰墨淋漓御寶崇寺有明成祖賜匾土銜瓦礫隨地
是可憐滿目盡哀鴻

讀春甫叔父遺稿

唱酬風月一囊詩斷墨零紈采輯之一卷尙能貽手澤千秋孰與訂心期縹
緗舊業存無幾烽燧餘生勉自支季弟勗哉珍惜此有懷述德涕漣漣

追和春甫叔父飛絮影落花聲原韻

倦眼朦朧睡乍醒忽教撩亂入窗樵空中色相疑窺鏡幻後因緣欲化萍漠
漠簾櫳吹有迹溶溶樓閣捉無形旗亭多少飄蓬梗根觸離懷涕共零

東皇無計慰幽衷閱盡繁華命亦窮人去廢園愁夜雨夢回孤枕泣春風三

更院落聽逾悄一曲笙歌和未終且待明年芳信早還將羯鼓試唐宮
郊居有感

據牀歌嘯亦堪哀一事無成志盡灰亂後不聞名將至夢中時遇故人來學
荒尙想披殘帙興到偏思倒舊醅藜飯菜羹已逾分此身願住水雲隈
衡門傍水偶棲遲飽食偷閒祇詠詩可屈可伸惟養拙獨來獨往不諧時但
留性命貧猶樂未減風情老尙癡世事奚堪搔首問強排愁緒且彈碁
宿蕩口

不是專城擁津梁勢轉雄波搖湖岸白燈閃市樓紅樹密能遮雨檐低不礙
風蓬廬容一榻閒話集村翁

曉行

蕉衫斜曳步橋東曉氣侵人接遠空殘月半輪疏柳外稀星一點亂雲中平
曉苗茁無邊綠古陌花搖自在紅端是化工工點綴先將收拾到詩筒

六魔詩

白頭猶自費吟哦不道詩中亦惹魔賈島祭餘靈有託杜陵死後崇偏多殘
更還苦幽懷絆終古空教浩劫磨撚斷髭鬚搖折膝未應悔作老維摩

詩覽

胡牀高踞發悲歌結住愁腸總是魔萬事揶揄長已矣百般排遣末如何莊

生入夢歡悰少平子工吟宿障多緊鎖雙眉常不展安能降卻狎煙波

詩覽

坐消永晝綠陰多睡味濃時似有魔冉冉韶華閒裏度厭厭意象懶中過還

疑渴漢魂相引漫說游仙語半訛不藉龍團驅遣盡槐堂別自有南柯

睡覽

文園善病臥煙蘿纏擾頻年竟入魔未必林泉成痼疾難將藥石救沈疴三

尸伏處神先恠二豎侵餘劫屢磨此去明知終老死可憐事業半蹉跎

病覽

三杯小飲碧浮螺酒興濃酣似着魔搏戰雖嚴降不住枯腸欲裂障偏多醉

餘尙想飛觴盡舞處頻看側弁俄浪說是仙還是鬼力加掃蕩定非苛

酒覽

紅裙百幅豔齊拈爲色迷來卽是魔終使沈淪成慾海誰能醒悟入兜羅留

將綺夢因緣誤句盡香魂孽障多但得修持憑法力一朝透出達三摩

色覽

卽景

破瓦頽垣碧蘚延村墟傍晚起炊煙板橋流水垂楊外一槩人歸放鴨船

樂府六章

捐軍餉民脂膏脂膏既竭民勿告勞將軍支餉善防禦民且高枕恩威叨孰料軍餉飽私橐捆載萬貫先奔逃一夜賊來萬民哀號吁嗟乎池非不深城非不高如此荼毒誰使遭

募兵勇兵勇來賊門開兵皆異鄉不土著心懷異志同蛇虺多一兵增一賊曷吏視爲爪牙材私鬪則赴公戰則摧名官兵實盜魁君不見猛士守四方漢王擊筑歌風臺

勸鄉團爾宅爾田爾自爲倫責諸官當宥之試問頻年完國課原爲軍儲得所支一旦有事民自衛修我矛戟舍鎡基鄉豪出權下移建牙纛麾旂一方雄踞稱偏師殺人如草莫敢睚眦於乎鄉團之弊有如此

點旂燈十家一旂五家一燈密布層層望之如綵綰撫軍出令令下憑陵里保斂錢百錢貫繩窮檐食無粥旂燈之費素必應星橋火樹燭價昂騰於乎

此真兒戲耳古來兵法得未曾燈一點賊兵興引之而入勢可乘民已望風走蠟油滿地紅霞蒸

燒民房清野堅壁古豈無惟在時異與地殊三吳貨聚在兩濠商賈輻湊稱名區偷竟不得已給白鏹下朱符奈何蓄志要焚燬一旦不測陷阱驅焦頭爛額無地可逋池魚盡殃民命誰蘇賊乃中計掩口胡盧東燒西應一炬焦枯噫吁戲官焚乎賊焚乎官乃道賊民其叫天爲無辜

黃籙醮酬天恩紳耆持疏衆且勿喧謂可銷鋒鏑保城垣冥鏹壓擔來元都觀裏如雲屯方擬鏗鼙鼓樹螭旛披鶴氅迓鸞軒而乃黃籙未舉賊勢鯨吞亟示改期衆已狂奔吁嗟乎天何言天何言獲罪於天無所禱紛紛祈報文徒煩撫軍之計乃出此元之又元衆妙之門

渡昆城湖

琴川雙塔卓船頭叢樹深藏古戍樓兩岸菰蒲風四面釣舟一葉海天秋

過言子舊宅

吾道其南矣長留俎豆芬紘歌敦雅化絲竹續前聞緒脈琴川衍淵源闕里
分牛刀曾報最千古仰斯文

游虞山

旭日升初紅策杖山之麓茲山鎮海隅言游溯芳躅學道斯愛人詩書拾餘
馥古殿盤鬱深叢篁罨濃綠坡石坦且平巖岫竦而曲旁有昭明臺扶疏花
影宿大半住花農隨意植花木欲訪拂泉巖泠泠漱寒玉游文書院鍾其秀
人才久孕育宜乎科甲縣簪纓多巨族茶煙一縷生瓶笙沸茅屋茲游得未
曾清曠胸次足惜未躋其巔觀海豁雙目

登昭明讀書臺

虞峯聳峙鎮琴川小築平臺傍拂泉文選千秋留著作蕭梁寸土付雲煙旁
栽花圃神仙福近接薪傳翰墨緣帝子於今竟何在遺容彷彿認碑鐫

像

有石
刻遺

病中雜感

民貧國亂極，此離瘡鬼如何。又擾之身似眠蠶，僵欲死家同涸。鮒困難支，減餐力乏，偏添婢買藥資艱。屢卻醫親友牀前，相慰問一談時事，一吁戲乘虛百病，乃叢生食譜間。翻本草名最不易，能天與健實無可奈。世難平暫棲何異鷓鴣，借不寐惟聽蟋蟀鳴。歎息諸公談袞袞，何時堪與請長纓。病軀飄立骨清癯，長伴茶鐺與藥鑪。入世何堪皆寇盜，移家最累是妻孥。誰能乞米書空帖，且自吟詩當畫圖。梅鶴孤山容小隱，蕭然孰是訪林逋。萬般愁緒已填膺，欲訪知交病不能。烈士壯心猶未已，癡人說夢半無憑。送窮計拙時逢鬼，食肉緣慳強學僧。賸有布衾冬藉禦，入秋早覺冷如冰。時危誰克燭先幾，今是方知悟昨非。祇自素餐慚不稼，倘能卒歲嘆無衣。豺狼當道休相觸，蛩駘窮居欲互依。百事全休無可做，不如垂釣坐苔磯。故交淪落各天涯，晝掩郊扉少客攜。疾病死應還有福，流亡歸已盡無家人。非同志言皆贅事，到窮途計輒差除却一身無長物，悔難及早課桑麻。病起偶吟

數日不出場圃豁如花開籬豆風景秋初

敬讀高祖在川公遺稿

昔懸遺像仰高堂

有青山愛我愛青山
遺照曾懸堂中右轉紀事

今讀遺詩奉瓣香真性情皆真

學問大經濟有大文章千秋不朽傳斯久一卷無多矢勿忘愧我元孫難繼
武況教世亂避倉皇

生辰有感

忽焉五十有三歲先君子年終於斯我今值此增愴惻瘡疾新愈身支離際
茲時勢死亦好惡活徒苦將奚爲死生有命早自定修短有數誰能移得活
一日且一日茫茫後會難預知天將寒兮禦無衣餅將罄兮粟不支桑榆暮
景日以迫攬鏡白髮添數絲要算五十有四歲待飲屠蘇酒一卮

雨中悶坐

秋雨三四點秋風日以淒菜苗綠微茁稻芒黃半齊寒蛩夜如訴午雞時一
啼意欲出門去襪被呼僮攜

出門

飢軀走四方四方無所走鬱鬱不得志親朋別已久親朋各天涯鄉居等株
守試問居鄉來得尙無恙否如逢天外人相見先握手歷訴遇屯遭身外更
何有轉而慶更生且飲杯中酒

出門不果

或自崖而返或臨河不濟自古命途窮中道輒淹滯我欲往洞庭洞庭渺無
際我欲至會稽會稽杳難詣湖海皆烽煙風聲與鶴唳舟楫誰阻行閉門且
暫憩斯已而已矣深淺休厲揭

將至滬城又爲賊氛所阻中秋夜泊梗子河望月有感

客路看明月中秋分外圓天高無障翳地阻爲烽煙似此真良友其如欠夙
緣會當待清宴重理載裝船

舟泊劉河

子午潮通信勞勞客路經沙痕隨岸長海氣撲船腥烽火遭時變江山失舊

形歸程猶未遠風順快揚舩

病後有悟

五千道德悟希微滋灌丹田水起肥閉目無非皆幻境養心漸覺有生機搏
沙異士蒸成飯翦葉仙人補作衣逐逐紅塵果何事不因五十始知非
夢醒後得二十四字可以自箴

開口易招禍患合目便悟神仙但尋自家快樂莫說別處因緣

先君子性純孝處家庭無間言持躬端慤接人和厚年弱冠補博士弟
子員歲科試輒列優等遂食鯨肄業書院三十年爲朱蘭坡師所激賞
師弟論文如家人父子陳芝楣中丞莅蘇鎖院掄才以先君爲首選評
語云不爲循吏必爲純儒奈文章憎命九戰棘闈五薦未售惟門牆桃
李栽植頗多貢舉後得廣文迄未授職晚年繪閉戶授經秋燈課子兩
圖以自娛屏卻塵囂日肆力於古今諸大家文聞友人有奇書輒一鷗

借之酷嗜吟詠所著詩稿有寄籬吟若干卷隨筆草若干卷庚申避寇
一身之外無長物詩文稿俱付劫灰僅遺生餘留草一帙乃避難鄉居
信手拈來之作是年夏疊患瘧痢延至十月初見背彌留之際猶聞吟
唔聲嗚呼痛哉先君手澤僅留此卷而已若久任湮沒則益增不肖之
罪用敢和淚謹錄副本以俟大人先生或賜序文或惠詞章庶鴻筆品
題藉光泉壤云時庚辰仲夏男是彝謹誌

生餘留草

甲申小陽賚餉天雄途存

清長洲 張是彝 詔笙

初五日出省偶成

涇陽縣十五日
錄呈孟介明

防河賚餉赴天雄小隊居然簇擁中

帶丁護餉

兒輩團欒纔聚晤

全春新憲
自南來

恩高厚許兼公

得治河局等
差而復役此

自飛委檄三邀獎

歷辦津通運
糧東口防務

竊愧寒氈一措

窮我已匏官閱五載頭銜還戀舊青銅

閱族弟翰伯繼龕詩集

二十日
留開州

譜系湮零付劫中一官一幕地相同

均客

文人飽讀申韓律

以博士員
馴至司審

爭推管鮑風

憤賢釋
傾鑑

血淚一編孝兼弟古心三代直而公

承先嗜古語
婉而開參侃直

嗟予羣季資成立教養交施有巨功

君弟一官國次京員再
次繼殤集中有詩紀卓

贈同差吳業翁

初六作
錄古邢郡

一樣蒼髯半百翁酸鹽氣味喜相同有緣誼附粉陰裏乍見蹤隨萍水中談

到寅僚都述苦炊來午爨各愁窮平生怕遇烟霞客難得延陵有古風

贈新樂令張迪齋

時時任吳橋詩以預賀
初九留樂城初七作

正是精神豐饒年歷膺煩劇若烹鮮紛紜案牘資良佐

現晉

淡泊蕪羹企昔

賢循績上聞榮以調卓聲下溢頌之虔老當益壯真無愧再看新猷徧野傳

贈新樂刑席董督孚

初七
燈下

爲賑災黎到古萊相逢萍水正緣來申韓飽學椽揮巨晉魏清談語帶談侍

奉雙慈曾齒及

君兩庶
母在堂

支持一力肯心灰扶成弱季三偕四

君二弟字永嗣
列舉頗精三四

均在裕後承先功偉哉

宿常山古郡題壁

初八
日

伴我延陵子馳驅駕與齊拂牆無網罟攜硯且詩題字落冰漸活燈寒燭燄

低譙樓慣聽鼓雞又向人啼

尖伏城驛留題

吟詩一路到長亭午飯停鞭飭櫃丁纔屆陽春風已虎破寒且試小杯醺

由常山郡尖二十里鋪題店

初九日作錄
呈張與亭

雄城何巍峨層塔每卓立近衙如魚鱗市廛頗不寂旅店權小停惜無詩在
壁斟我一尊酒曹然入甜黑曉起理敝裝窗前尙有月呼僮促征夫征夫面
猶赤宿醒還未醒匆匆駕上勒一路高復低馬汗功亦極到此爲何事黃流
需餉急

滹沱河懷古

蕭蕭易水向東流一去秦廷不掉頭匕首縱難鋒見血雄心可與博浪儔

贈正定令徐子樹

初十

似此衙齋眼一恢窗明几淨少塵埃有緣暗作心香禮不久將爲首令才循
績果然邀眷渥僚評誰不頌聲推燕民父母斯之謂我願門牆執贄來
抵柏鄉已晚進北關口占留店

鎗響鞭聲一路行抵關月已對頭迎尖風剖面帘休下爲看廛居燈火明

尖尹村待飯偶吟

十一作
留內四

紙窗土屋試徘徊待飯遲遲月莫催渴喚店丁茶再備晴當院午地無埃讀

書通籍都寒士飛檄防邊孰將才途遇甘軍等酒後醉人題壁去不知何日許重來

宿內邱城外旅店留壁

石棧沙程行較遲斜陽鞭影兩隨之出門奉檄偏多暇飽飯車中酬以詩

尖梁燕店題壁十二午刻

自出居庸石上鐫不彈此調已三年于今寫徧亭長短一路奚囊往復旋已

冬捧檄出屏帶關萬全邑令招辦草地帶
茶磁酒盒兼帶石匠有詩鐫牧羊堤畔

宿古邢郡公廡懷同里徐少懷學博留壁

別頸當年聚社中一醫一宦不今同侪儒體格魁梧骨短小而踏蹬名場

醫訪藥衷匏繫一官寒本色自冰銜四品老封翁君嗣京曹訊君中表余

親串近況如何想更窮君表弟施某子姑母夫也亦屢顯名

尖沙河店口占贈中邱令陳仲惺同年十三已刻留題

琴堂相見擬苔岑忽憶萍逢不自今柏署隨參曾識面蘭言粗領未談心誰

知譜末重重合亦嗜公餘細細吟莪蓼終天同抱憾豸衣晴淚各沾襟

道中見小車掛篷詩以志異

日十五

巧藉天工捆載輕受風一樣利遄行布帆無數隄邊出疑是寒澆死復生

十六抵大名贈邑令陶式如

賓至如歸誼最親衙齋遠訪亦前因天雄舊治猷重煥地主兼姻語更真手

段烹鮮雖小挫頌聲載邑尙餘循告君幼婦韓門烈含笑從容殉以身

君親
事韓

某結補甫三月病歿其婦扶
輿旋卜葬臨別遂仰藥終

弔韓烈婦長歌一章十七燈下錄呈陶令并留廣平店烈婦夫字少蓮余居

鄉舊徒也少蓮游燕數載矣去年先納妾後娶婦甫三月病歿甥館烈婦

扶輿旋南卜葬議嗣卽仰藥終作此以志其顛末云

人謂節烈可以表門楣吾謂節烈正以見祚衰自來大富大貴家罕聞大節
大烈一旦赴冥司韓本潮州刺史後精誠驅鱷無其儔韓生先人宦豫中格
頑化梗有古風初生是子已晚年愛如掌珠兼承宗無何失怙歸故里嫡庶

雙蕢藉娛縻十三齡時負笈來從予文字粗條理無何家道嘆中落爲訪親
串到燕北燕北亦自蔚人才承籍博得芹香渥初試棘闈鸚荐膺費掾相攸
東牀登家貧竟乏結褵資辜負天桃吉未曾野草閒花早鍾癖索得婢女作
偏匹先小後大素彝倫丈人峯下有貳室伉儷相隨諧夙因中將不繼藥以
春精耗力竭形徒具始終以色殉其身烈婦扶櫬計已決千辛萬苦抵鄉邑
爲夫卜得地牛眠議嗣大宗託親戚嬰粟一盒畢命時臨歿暗拜雙姑別鳴
呼夫爲縱慾終婦爲赴烈死有其夫而得其婦九原思之母乃泚嗚呼烈婦
之死竟如此

十九尖南樂署中贈賀邑令展如

二十晚留
照州唐

琴堂相晤益相親借馬殷拳亦夙因百里枉才欽地主一樽話舊帶天真文
如燕國名原重治繼鴻城績更循著作成編曾炙口袖中詩又想添新
廿一到東明廿二住署中赴工回贈邑令張與亭同鄉

梓誼蘭宗晤倍親衙齋權住亦前因謝庭林立成陰象

君子六

陶徑歸來小病

身已告病假美酒嘉肴欽地主直言俳語寓天真攀轅父老留何益要把琴

作入山計

囊付後人

贈黃流河工文案勞厚庵司馬廿四

無端布鼓到雷門自愧空疎少慧根箸作機雲爭管巨君弟玉初明清談魏

晉滌襟煩時艱應獻防邊策功偉先資順軌源一瓣心香竊師事小巫願拜

大巫尊

補錄十三日宿臨洛關寅館留題

差途借檄小偷閒渡得河來住此關臥看太行雲起處幾時借鳥倦飛還

望豐樓懷古廿五早赴樓在東明署後

危閣憑虛入望遙歲豐佳氣鬱青霄檀山北拱天連闕濟水東流日射潮林

鳥間關春事動簷花錯落錦雲飄遲回欲獻登樓賦詞客當年滿漢朝

戶牖俟

少年佳識永千秋佐漢官助果不猶小社擬尋分肉處只存聳石舊封侯

漆園吏

退衙仙吏想當年，箸罷南華手一編。
蝴蝶不來神栩栩，夢中願與暗通緣。
麋兒倖捷壬午副榜，忽于甲申歲邯鄲道中夢得下二句成一絕以存之。

衿青九葉沐先傳

余家序香一脈九代

發矢無虛試躍然

補縣府試研年九齡入學科舉後倖得副車

年少

篙工初點眼，半帆應讓孝廉船。

仲冬初二燈下再宿臨洺關待飯偶成

出門將越月游倦，覺何曾索飲杯嫌窄。
加餐飯較增更殘，雞唱月人靜鼠窺燈。
此役名韁絆懸懸奏牘登。

補前月十六日渡黃河中流放歌

吾聞黃流來自天一瀉，不計里萬千。今身是境誠大觀，禹績果然空後前。
舍車得得河干走，且對斜陽招渡口。渡口來船笨如牛，車馳馬驟聚船首。
匆匆解纜各理橈，土薄沿堤帶鹹潮。篙工點篙點不住，似近彼岸忽又遙。
倏聞大聲起，中流洶湧湧與耳。謀勢如橫空之匹練，色如倒走之銀虬。
人謂蜃氣

幻樓臺我覺胸次一大恢即使馮夷河伯怒焉懼風波不測來舟人告予東
昏近燈火兩立似蓬萊轉舵收篷安抵岸村墟已聞柝聲催無端憶及居鄉
時偶逢巨港膽不支丈夫志在矢四方株守一隅原非宜

贈樂邑令桂月舫

猶憶鄰居附驥羣追隨宦蹟德常薰巍巍潢胄勛華永卓卓官聲建樹勤匏
繫同寅孰知己桂香令子況能文君百同弱冠登壬午賢書杏花消息君應卜定許丹梯

直步雲

差竣返省

輕車減從且言旋知己家人望眼穿團話爐邊永今夕成名榜下看來年兒次

明年擬下北關

催妝弱女忙添鬚椎髻衰妻尙助賢但願雛兒能努力棣華競爽着

鞭先

推敲一路坐車中于役駢駢俾竣公祝到闈潭天默佑算來家嗣命何窮讀
書耽誤虛髫歲多病淹纏仗藥功倘得孫枝慰飴樂將媳俸邀薄福謝蒼穹

先君子弱冠後遭咸豐庚申之亂倉猝赴鄉避難未攜一物未幾丁先祖考味魯公之憂輟轉兵間昇棺歸葬於西跨塘先壠亂定回城以授徒餬口同治癸酉捷賢書庚辰成進士需次保定其間一至旅順海塘一至山海關偶有吟詠俱未留稿拙於仕宦每以借貸典質度日不肖每讀家書未嘗不淚泫泫下也時則捐例迭興正途出身者每爲貲耶所壓故到省八年始由直隸總督李公題補正定縣知縣莅任後未明而起夜分始休日坐堂皇計二十閱月中祇辦死罪一起而修理河堤祠廟獎勵生童俱斥廉俸終以精力不繼謝病告歸歸未期年卽棄養囊無餘貲繫衣以斂不肖仰承餘蔭不敢隕越未爲當代賢達所棄朋好慇懃傳鈔拙作因將先祖生餘草印布問世而先君子遺篋中僅存甲申轉餉大名詩草三十餘首謹付書人以附於生餘草之後令後世子孫寶守之民國二十六年男一應敬跋

甲申小陽賚餉天雄途存

民國三十二年春予被命將自渝
夕風雨蕭然燈火青熒忽門外有
躡屐夜行文愀然曰將有以煩子
蒐其遺得如于卷其原稿與日記
墨昔爲某君攜滬當尙得全然某
之滬試爲索於某君所果得之善
行於世卽不然能傳寫數帙分存
文不足覆瓿而卷末附有先人之
傳將何以對先人耶今重以付吾
有以報也始靦然色喜談諧移時
愴然曰子其東矣顧我此生亦尙
而歸亦烏能必其重相見耶相與
陳丈陶遺跡某君之居而得其稿

謂敬禮定文非所敢承則又捧之至吳門叩金丈松岑之關金丈慨然諾期以三月歲事予喜而遄返將以報丈乃行至大梁而丈之赴晉聞矣既傷丈之不作益惕然於付託之重越年又奉命出渝更潛至滬則金丈編閱已竣汰其稿之大半郵予女弟赴蘇取歸仍存之陳丈處時勝利將臨敵已負嵎轉變之機安危未卜陳丈大以孤本流傳散亡是懼而急切又無金匱石室之藏適馬君蔭良來訪蔭良亦丈故交也力任傳鈔之役而分存諸銀行保管庫中予與陳丈始稍慰又越年頑敵受降凱歌聲中蔭良鄭重舉以見歸如完趙之璧重一展視恍如隔世惟金丈所編次存汰者已不可復分遂并存之且以丈入蜀以後之作多可歌可泣不應有遺珠之憾而喪亂屢更蒐求不易卽八一三紀事詩當時有油印本有商務書館香港印本尙且求之經年始得他更無論而中原倣擾物價日高大恐蹉跎時日後更難圖乃亟付之手民今幸觀成有日矣嗟乎以仲仁丈之亮節高風危言遜行天下之所仰望者豈僅在文字間耶千秋萬世丈之所託以不朽者亦豈僅在文字

間耶抑文字之存亦豈僅此區區者耶然卽此區區者之得全亦已不絕如縷非陳丈陶遺馬君蔭良周護於前而嚴君欣淇首助印資顧君起潛力任編校印資所不足者又承杜月笙錢新之浦心雅錢梓楚諸先生爲之籌維亦烏能竟其功耶回念疇昔之夜丈之所慇懃屬付雖得以稍慰亦重有感矣而此一年來陳丈陶遺金丈松岑相繼謝世金丈尤爲之序竟不及削稿是則於斯集告成之日益不勝其延陵掛劍之悲黃壚迴車之痛矣民國三十六年七月後學吳江徐子爲敬跋於滬壩

先三叔父仲仁公汪山捐館瞬閱四年生平著述於己未歸田後手自刪定錄副存之丁丑避亂輾轉窮鄉流徙港滄隨置行篋不無散佚今夏杜月笙嚴欣淇錢新之浦心雅徐子爲錢梓楚汪伯繩諸君發起校印遺書編爲心太平室集十卷曾大父及大父遺詩同時付梓庶誦芬詠駿知名德之有自而公之文學事功亦略見於是矣竊念公耿介不阿平生出處進退無一非關繫國脈世運者若辛亥襄贊革命乙卯諫阻袁氏稱帝辛酉提倡廬山國

是會議甲子謀弭齊盧兵爭迨丁丑倭寇內犯公已年逾古稀猶持天下興亡匹夫有責之義間關入蜀遂任參政每屆開會輒被推代表致詞言論風采朝野仰望之若祥麟威鳳焉惜乎論政商學之書札呼籲和平之通電參加集會之演詞與夫晚年革新文字之闡述今皆無存際此時事杌隉蒐集綦難則此僅存之遺稿彌足珍貴爲章不肖早年失怙仰賴二三兩叔父耳提面命教誨成立詎料未覩國軍凱旋已先後見背小子旁皇無依其感痛爲何如耶遺集排印工料爲數甚鉅幸承親友資助始克有成願君起潛獨任編校之勞尤爲難得此俱爲我張氏子孫所永矢不諼者也中華民國三十六年八月胞姪爲章謹跋

抗戰期間流離遷徙先君子平生著述散佚堪虞茲承杜月笙嚴欣淇錢新之浦心雅徐子爲錢梓楚諸先生發起刊印願起潛先生慨然以校輯自任黃任之先生並爲撰傳彌深感激爲珂等痛遭失怙庭訓永違遺集告成歿存並感附誌數語敬申謝忱卅六年九月張爲珂爲璇爲資爲鼎爲璧謹誌